


27,131/2

Gesamt von 2000
Hr. E. Debor und
Freiwilligen.

1864.

Dr. Schellenberg



ANTONII DE HAEN
S. C. R. A. MAJESTATIS CONSILIARII
ET ARCHIATRI,

NEC NON MEDICINÆ IN HAC ALMA ET ANTIQUISSIMA
UNIVERSITATE PROFESSORIS PRIMARIJ,
SOCIETATIS SCIENTIARUM HAARLEMENSIS,
ET PHYSICO - BOTANICÆ FLORENTINÆ
SOCII,

PARS OCTAVA
RATIONIS MEDENDI
IN NOSOCOMIO PRACTICO;
QUOD IN GRATIAM ET EMOLUMENTUM
MEDICINÆ STUDIOSORUM.

CONDIDIT

MARIA THERESIA,
AUGUSTISSIMA ROMANORUM
IMPERATRIX,
HUNG. BOHEM. &c. REGINA &c. &c.



VIENNÆ AUSTRIÆ,
SUMPTIBUS HERMANNI JOSEPHI KRÜCHTEN.

M. DCC. LXIII.

305346





ELENCHUS CAPITUM.



CAPUT I.

Varia de Sudoribus in morbis acutis.
Pag. 1.

CAPUT II.

Varia de Crisi morborum. Pag. 20.

CAPUT III.

De Morbis acutis cum Petechiis &
Miliaribus. Pag. 103.

CA-




CAPUT IV.

Problemata de Scorbuto. Pag. 196.

CAPUT V.

De Machina ad curandum Ileum desperatum. Pag. 240.





CAPUT I.

VARIA DE SUDORIBUS IN MORBIS ACUTIS.

§. I. Hippocratica tota nostra Methodus est.
 §. II. Longus Hippocratis textus ex Progn. limitatur, & suis exceptionibus traditur, ex ipso Hipp. §. III. Morbi nomina exemplo Hipp. quærenda. §. IV. Quæstio an sudor in ægra nostra 7. die contingens, Criticus esset, nec ne, utrinque agitatur. Quandonam ante sudorem criticum rigor præcedat oportet, quandonam non? Licet sudores optimi sint prægressi, nihilominus in alios morbos incidere ægri, imo & in mortem, possunt. Ea occasione exponuntur quidam textus Hipp. & Gal. §. V. Multi iterum textus Hipp. de sudoribus continuis aut frequentibus explicantur, tristisque confirmantur exemplo.

Pars VIII. A §. I.

§. I. **H**ippocratis Methodus ea nostri Nosocomii est; Hippocratis est, quam ad Lectos ægrorum sequimur, norma: non proprie quia Ejus, sed quia purum est Naturæ studium, nullis aut innixum, aut sociatum Hypothesibus. Uti ad hoc demonstrandum plura specimina toties dedi, sic etiamnum, quo Medicinæ Studiosis hæc norma maneat alta mente reposita, & quo promissis, Tomo septimo de totius doctrinæ Hippocraticæ adornando compendio datis, stare incipiam, notabiliora quædam referam.

§. II. De sudoribus ad Lectos ægrorum frequens sermo est; qui, ut Hippocraticæ doctrinæ accommodandus, textum Prognost. Libri ut basin agnoscit. „ Sudores optimi quidem „ per omnes morbos acutos, qui diebus judicatoriis contingunt, & pe- „ ni-

nitus febre liberant. Boni vero
quicumque toto corpore orti, ostendunt ægrum facilius ægritudinem ferre. Pessimi autem frigidi, quique circa caput tantummodo, faciemque, & cervicem, oriuntur. Ii namque cum acuta febre mortem, cum mitiore vero morbi longitudinem, præsignificant: qui & per totum corpus eodem modo, quam secundum caput, fluunt. Qui vero Milii formam referunt, & circa Cervicem tantum pravi, boni autem qui guttatim, & exhalantes, contingunt. Atque hoc in totum de sudoribus animadvertendum est, quod nonnulli ex dissolutione corporum, alii vero ex vehementia inflammationis oriuntur. „ Et Coac. n° 572. „ Sudor optimus sane, qui febrem die judicatorio tollit; utilis autem &

„ qui allevat ; malus vero, frigidus,
„ & ubi caput duntaxat, & cervix
„ infudat. Nam & temporis diutur-
„ nitatem & periculum denuntiat. „

Dum ad hunc textum doctrinam
Clinicam accommodamus, semper me-
mores sumus Legis ejusdem nostri in
Arte Dictatoris, qua Naturæ aberra-
tiones & exceptiones attendere caute
jubeat, doceatque etiam bonis cum
sudoribus morbos nonnunquam aut
letales, aut longos, fieri ; tum &
defectum sudorum bonorum ita ali-
unde suppleri, ut & citum sequatur,
& tutum judicium. His cautelis pro-
gressi, quousque Artis præcepta in-
du bitata, quousque dubia *Hippocrates*
eadem tradiderit, intelleximus. En
porro exemplum.

Femina 26. annorum, febre con-
tinua acuta, una cum repetentibus
sæpe doloribus capitis, atque pecto-
ris,

ris, decumbens, die morbi quinto ad Nosocomium nostrum adducta est. Maculas subpurpureas paucas in pectore mox in illa deteximus, ad dorsum, in ventre. Subdubitantibus Medicinæ Studiosis num forte Pulicum morsus non forent, paulatim constitit ejuscemodi non esse: 1^{mo} Quia sæpissime in morfu pulicum punctulum distinctum rubicundius reperitur, lætior in ambitu rubedo. 2^{do} Quia sensim loca pallefcunt, ut paucis postmodum horis, saltem die altera, aut vix, aut nulla, reperias vestigia. Nihil tale in hac ægra; nam & maculæ hæ integra, quam occupabant, plaga rubræ æquabiliter, & centro conspicuo carentes, nec ante diem morbi 12. evanidæ; an ad Petechias ergo referendæ?

§. III. Quærebatur morbi nomen? Acuta febris cum cephalalgia ad Phre-

nitidem sæpe referenda est, præfagitive saltem illam; eadem cum laterum dolore, ad Pleuritidem. At vero utriusque loci dolor, nec perseverans, neque explens Pleuritidis aut Phrenitidis definitionem, relinquebat nobis acuti solam febris ideam. Igitur morbum vocavimus Febrim continuam putridam, imitati Magistrum, qui Epid. 1. historiam *Cleonactidis* sic infit: „ *Cleonactidem*, qui supra *Heracleum* decumbebat, ignis, id est „ febris ardens, vehemens ordine „ vagoprehendit: dolebat autem ab „ initio capite & sinistro latere. „ Quemadmodum igitur ille morbo, quem vagi capitis laterisque dolores ab initio concomitabantur, nomen Febris ardentis servaverat, ita & nos nomen synochi putridæ.

Secundum indicationem, in simili morbo formandam, bis ipsi Vena se-

cta

Etā est, data alimenta, potulenta, medicamenta, qualia ejusmodi ægris *Tomo I. Rat. Med.* nos dare solere descripsi. Sudor eam die septimaprehendit, isque calidus, universus, copiosus, sex horarum spatio, tam insigni cum morbi levamine, ut post placidam noctem, sola superesset capitis gravitas die octavo; febre prorsum cum cæteris exulante symptomatibus.

§. IV. Quærebatur essetne judicata ægra διὰ τέλους?

Utique dies criticus erat, & qui pro crisi sudor optimus. Aphor. 4—36. Morbi autem conditio hæc erat: Cruditis signa urina habebat, alvusque, usque ad initium sudoris: interim ipsa Febris post ultimam missionem sanguinis cujusdam coctionis signa tulerat, perque illud ipsum remissionis tempus somnus inquietior,

subdelirium, levis nausea, criticam quandam perturbationem subinsinuare potuerant, maxime cum brevi post sudor tantus, tantoque cum levamine, sequeretur.

Verum defuerat rigor ante sudorem. Rigorem autem sudores criticos præcedere oportere, *Hippocrates* Lib. I. Epid. in *Cleonaëtidis* historia, in qua admirando Laconismo suo sylvam observationum integram comprehendit, nos docuit. Simulque retulit, eo quod rigor ante sudorem defuisset *Mulieri, quæ in Littore habitabat*, licet ipsa post sudorem febre omnino vacaret, tamen quinto febris ardentis die symptomata rediisse cruditatis, nec sanatam ægram, nisi ad undecimam obrigescens, nova febre corriperetur, ab eaque tandem die decimo quarto judicaretur vomendo, sudando. Quare eodem Libro I. Epid.

pag. 915. Edit. Foëf. „ Plerique
 „ ægrotantium circa Crisin rigeabant;
 „ ac præcipue ii, quibus non flue-
 „ bat de naribus sanguis : rigeabant
 „ autem hi, & sudabant.

Hinc in *Zoili* Historia pag. 1023.
 „ Nescio, inquit, quomodo ille si-
 „ ne Rigore judicaretur. „ Et dein
 sudores non decernentes enarrans,
 subjungit : „ Absque Rigore est die
 „ 14. judicatus. „ Ostendit tamen
 postea, quam imperfecta ejusdem ju-
 dicatio fuerit.

Itaque defectus rigoris de sudoris
 jubebat dubitare bonitate, ad crisin
 sufficiente; ab altera parte consulenda
 erat, quam de sua ipsa regula fe-
 cerat *Hippocrates*, exceptio. Quip-
 pe refert Epid. 4. pag. 1131. „ Me-
 „ nandri Vinitorem, non esse, ut qui-
 „ dem sororem *Timenæi*, rigores pas-
 „ sum, quamvis judicatione absol-

„ veretur, eo quod alvum perturba-
„ tam, ac liquidam, ab initio mor-
„ bi habuisset.

Ad hanc exceptionem explican-
dam juvat decimus, isque obscurior,
textus Libri VI. Epid. cum *Galen*i ex-
plicatione. Textus sic habet: „ An-
„ te rigorem Urinarum suppressio-
„ nes; si cum bonis signis processer-
„ rint, & alvus dejecerit, somnique
„ affuerint. „ In quem *Galenus* dum
Historiam *Menandri* elucidat: „ Igi-
„ tur si alvus plura dejecerit, Urinæ
„ suppressæ fidere non convenit ad
„ futurum rigorem præsentendum:
„ at si alvus fluxa non sit, proxi-
„ mamque esse morbi judicationem
„ prænoveris, ægrotum rigere, fu-
„ dareque, necesse est.

Cum igitur ægra nostra, quem-
admodum Vinitor *Menandri*, pertur-
batam aliquomodo ac liquidam ha-
buis-

buiſſet ab initio alvum, judicatio æque bona & perfecta, quam illa *Vinitoris*, cenſeri poterat. Verum ita cenſendo non fuiſſemus mentem *Hippocratis* rite aſſequuti. Crebritate enim obſervationum ille didicerat haud modo, qui horrore præcedente caruiſſent, verum etiam qui illum præcedentem habuiſſent, ſudores, incertæ prognofeos eſſe, donec ſtatus inſequens judicationis confirmaret certitudinem : quippe integre judicari quandoque ægros ſudorum horum alterutro, unicâ ; ſæpe alios repetitâ vice ; imo non ſemper inde ne a morte quidem ægrum præſervari : Ita *Charion*, ex potus abuſu in febrem ardentem lapſus, licet die 7. poſt rigorem acute febricitans, diſuſoque per totum corpus ſudore manans, certo quodam modo judicatus videretur, nihilominus die nono novum inſultum paſ-

passus est; & graviolem die 14. cum sudore; aliumque die 17. novo cum rigore, febre, sudore; ac tamen non nisi 20. die (quo demum modo non narrat,) absolute judicatus est. Et *Dromeadae* uxor, licet ter sudorem cum rigore experta, nihilominus 6. die periit.

Igitur toties horum omnium exempla Auditoribus in Nosocomio demonstrata, in pronuncianda sententia cunctari omnino jubebat. Docuitque eventus haud inanem fuisse cautelam. *Ægra* nostra die 8. 9. 10. calido balneo crurum insidens, vomuit. Urinam hypostaticam die nono miserat. Die undecimo alvum coctam, biliosam. Die 13. vix vestigia macularum. Die 14. optime ac blande purgabatur ab unciis quatuor Aq. Lax. Vienn. noctemque dato paregorico transegit tranquillissimam. At vero
die

die 15. febre invadebatur tanti caloris, ut 104. gradum Therm. Fahrenh. æquaret; qualem febris in illa necdum attigerat. Die 16. mane calor 106. vespere 109. gradus notabat. Vomitus interea, dura alvus, urina jumentosa. Die 17. febris cum cephalalgia, vomitu flavo, flava alvo, ac pultacea, quater missa. An tandem vomitu judicata alvoque? Fere quidem; integre autem nondum. Etenim diebus insequentibus cum urina hypostatica vires rediere, pulcreque restitutæ sunt functiones; caput autem vertiginosum mansit, & hebes, & grave. Unde purgans cum paregorico repetitum: nihilominus a die 23. vagi observabantur colici dolores, noctu quam diu graviores, vomitusque frequentes. Et hinc, & quod oculorum album id innueret, & quod brevi ante ægritudinem vermes

mes bis ore expulsiſſet , haud im-
rito vermium nata ſuſpicio eſt. Da-
tis ideo cum antihelmincticis , tum
purgantibus , demum ſanitatē inte-
gram 34. die adepta eſt.

§. V. Atque hæc de ſudore cri-
tico ; de eodem vero aut continuo,
aut frequenti, paucis videamus. Su-
doreſ frequentes aut continuos , vi
productos morbi, nunquam in Noſo-
comio ſalutaviſus ſalutares , ſed vel
in mortem , alioſve in morbos ten-
dentes , vel demum , hiſce ceſſanti-
bus ſudoribus , animadvertimus aut
per alias vias , aut per bonum ſudo-
rem , febres judicatas.

Confirmatam proinde ubique Hip-
pocraticam veritatem conſpeximus.
Epid. 1. *Eraſino*, qui 5. die morbi
ſui periit, febres aderant ad mortem
uſque cum ſudoribus. Et Epid. 3.
ægr. 4. *Phreniticus* homo primo die ha-
buit

buit sudorem copiosum, assiduum, toto corpore dimanantem; ita & die altero, & tertio, cum symptomatibus gravibus, quarto vero periit. Cur *Euxeni* uxor, Epid. 7. pag. 1224. septimo post remissionem die obiit? Sudores affuerant ab initio per totum corpus; iterumque morbo medium agente cursum. Cur *Nicolai* filius die 7. mortuus? Quia præter alia symptomata prava notat Hippocrates Epid. 7. pag. 1234. illum per morbi crudum statum bis sudasse. Cur *Philiscus* Epid. 1. pag. 966. die 6. cum sudoribus frigidis extinctus? primo ac tertio crudi morbi die sudaverat.

Sic viri immortalis doctrinam intelligimus, quam diversis operum suorum docuit locis. Prorrh. 1. text. 58.

„ Sudor in febribus acutis copiosus

„ malus est. „ Et mox initio 2. Epid.

„ In

„ In ficcis caloribus magnis, febres
 „ ut plurimum citra sudorem; sin
 „ vero ipsis durantibus leviter ac gut-
 „ tatim pluere ceperit, febres eæ-
 „ dem jam ab initio sudores copio-
 „ siores, difficiliorumque crisin, quam
 „ alias, habent: licet tamen haud
 „ ita difficilem, quam si a morbi
 „ ipsius ratione, aut natura, proflue-
 „ rent. „ In *Phrenitico*, in *Euxeni*
 conjuge, in filio *Nicolai*, in *Philisco*,
 veritas constitit effati Hippocratici
 Coacar. n° 574. „ Qui una cum fe-
 „ bre incidit sudor, malus est. „ Et
 quidni? Τὰ κρίσιμα ἐς βελτιον μὴ αὐτί-
 κα ἐπιφαίνεσθω, dixerat Epid. 2. sect. 2.
 „ Haud ilico cum morbo appareant
 „ ea, quæ in melius judicent. „ Et
 quare non debent hæc ab initio appa-
 rere? Respondet ibidem pag. 999.
 Τὰ προκρινόμενα ἢ ὡμῶς κριθῇ. „ Quæ
 „ in cruditate præmature judicant,
 „ mor-

„ morborum recidivas faciunt, & si
 „ non has, tunc Crises aut malas,
 „ aut nullas : quin & si copiosiora,
 „ perniciofa sunt.

Ex quibus liquet quantopere &
Hippocratis, & nostræ *Experientiæ*,
 illorum Medicorum adverfetur metho-
 dus, quæ ab initio ad excretiones
 quascumque, potiffimumque sudoris,
 vires intendat omneis; Methodus, in-
 quam, quam optimus *Boerhaave* adeo
 damnavit Aph. §. 715. 716. „ Su-
 „ dor, inquit, *in initio* acutæ febris
 „ cùjus causa paullo pertinacior,
 „ si perennat, orbat sanguinem li-
 „ quido diluente, reliquum inspiffat,
 „ obftructiones facit letales; sangui-
 „ ne pofttea vix diluentibus, vel re-
 „ folventibus aufcultante; unde om-
 „ ne fere acutorum genus produci
 „ potest. „ Longus forem omnia,
 quæ in hocce binos textus *Boerhaavii*,
Pars VIII. B ut

ut & in 610. ac 698. *Illustrissimus Commentator* habet, referendo : sufficiat monuisse cuncta eo collineare, ut penitus condemnet cum *Boerhaavio* Lecti, Conclavis, Aëris, Medicamenti, calorem, in communibus, quorum causa pertinacior est, Acutis; & ut multis, potissimumque tribus diversis in locis, resumat æternas *Sydenhami* laudes, quem, ait, generose, se, animose, ausu generoso, se solum fere, primumque, communi, torrenti opposuisse.

Triste hujus exemplum vidit Nosocomium quondam. Italus homo a primo, ad quintum diem febris putridæ acutæ, potu Theano copiosissimo, lectoque ac cubiculo calido, profusissimos sibi elicuerat sudores, a quibus vehementer debilitatus, meam demum implorabat opem. Pergente sudore die 6. & 7. nauseas passus est,

est, ventrisque dolores, die octavo copiosissimam alvum, ab 8. die ad 10. qua mortuus est, perpetuos sudores. Mala utique arte infelix homo per primos quinque morbi dies crudam moverat materiem, sanguinemque exsiccarat; unde die 6^{to}, criticorum infidissimo, ad Ventriculum & Intestina materiæ morbosæ perturbatio nata; octavo die, non critico, evacuatio quidem alvi flava ac copiosa, sed ceterum sanguis adeo spissus, ut transire per minima non potuerit, debilitasque observaretur tanta, ut nec movere artus, nec in lecto se erigere, citra animi deliquium, posset; ac præterea, ab octavo die ad mortem usque, sudor a sanguine sic condensato, ut aquosa epota haud ultra fecum commiscere posset, perpetuus manaret. An palpabiliore testimonio doctrinam datam possumus confirma-

tam videre ? Caput tertium funesta exempla plura suppeditabit.

CAPUT II.

VARIA DE CRISI MORBORUM.

§. I. *Observationes Hipp. de morbis sine Crisi terminantibus ; ad Resol. benignam minime referendis.* §. II. *Ejusdem Observationes de Crisi perfecta.* §. III. *De Crisi imperfecta cum Recidiva.* §. IV. *Ejusmos agnoscendi Crises, quæ alios in morbos tendant, imo quæ in mortem: Regulæ ejus de Criseos bonitate & perfectione judicandi.* §. V. *Perfectæ Crises, quæ imperfectæ videbantur, & versa vice. Crises cum perniciosis symptomatibus bonæ. Ea occasione differitur de Urinis nigris, quæ per se letales, nonnunquam tamen cum bona Crisi apparuere. Attamen, una ægra excepta, quotquot post urinas nigras convaluere, non nisi post plures ærumnas convaluere. Galeni, & multorum cum illo,*

illo, de urina nigra errores hypothetici. Et in Chronicis urinam nigram laudamus, factâ bonâ Crisi, formidamus faciendâ. Pisonis textus & casus non docent contrarium. §. VI. Crises bonæ & perfectæ cum pravis, alio modo, urinis, pravis sputis, &c. Crises malæ, imo mortes, bonis cum sudoribus, cum bona, imo hypostatica urina. §. VII. Ad firmam prognosin tamen urinæ bonæ passim requiruntur, ad easque Hipp. attendit cum maxime. §. VIII. Bonæ ac praviæ urinæ solæ prognosin non formant: jungenda illis semper signa reliqua. Bonæ, insolitæ licet, Crises. Ad generalium regularum exceptiones perpetuo attendendum; ea vero lege, ut haud ita exceptiones consideremus, ac si regulam generalem auferrent. Pulcerrimum Hipp. in hisce exemplum. §. IX. Solæne urinæ morbos judicent? Probatur. §. X. Difficile sæpe exordium determinare Acutorum: qui hic se gesserit Hippocrates? §. XI. Agitatur quæstio num, Crisi bona contingente, prædici possit fore eam perfectam, aut non perfectam? Regulæ Hipp. omnem hic nobis prudentiam suadent. Morbi sive letales, sive periculosi,

nonnunquam formantur insciis ægris, inscio medico. Historia ægrotantis adjungitur, quæ multa confirmat dictorum.

§. I. **E**X *Hipp. Gal. Aretæo Capp.* ceterisque subsequentium Medicinæ Corryphæis, summus in Arte *Boerhaavius* dedit nobis succinctam descriptionem Cruditatis, Coctionis, Criseos, Evacuationisque criticæ, in Morbis acutis, Inst. §. 922. 925. 926. 928. & a 931. ad 940. His, ut per se perspicuis, non immorabor, recensurus duntaxat quas ipse *Hippocrates*, quas nos post illum, exceptiones in norma generali observandas deteximus.

Atque ut ab *Hippocrate* ordiar, observavit ille 1^o Morborum finem citra Crisin. Libr. I. Epid. pag. 944. tradens illam, quam in *Thaso* observaverat, Constitutionem morborum, 20. 40. 80. die judicatorum, „ Erant „ etiam,

„ etiam, subjungit, quibus ne qui-
 „ dem sic, sed errabunde, & nulla
 „ observata judicatione, febres de-
 „ finerent. „ Eademque in urbe
 grassantibus postmodum febribus con-
 tinuis remittentibus, Tritaiochyis di-
 ctis, notat „ ægrotantium plerisque
 „ febres absque judicatione desisse. „
 Praxi Medica in 29. annum occupa-
 tus, necdum potui casum aut obser-
 vare talem, aut demonstrare.

Cum simile quid, raro tamen, post
Hippocratem unus notare alterve po-
 tuerit, *Boerhaave* prudenter Inst. §.
 913. „ In morbis acutis, ait, qui
 „ in humoribus consistunt, disponi-
 „ tur, *ut plurimum*, certo tempo-
 „ re, materies morbi ita, ut fiat su-
 „ bita mutatio morbi in sanitatem,
 „ vel &c. „ Quæri potest num mor-
 bi, qui citra Crisin finiebantur apud
Hipp., ad sanationem per *Benignam*

resolutionem referendi sint? Verum cum in Resolutione benigna inter cætera requiratur benigna morbi materies, & in Historia data ab *Hipp.* materiei perquam malignæ signa obtinuerint, ἀκρίσιμοι illi *Hippocratis* morbi per Benignam Resolutionem non explicantur. Essetne hæc variarum rationum una, cur *Hipp.* dixerit Aph. 2 — 19. „ Acutorum morborum „ ὁ παντα, non omnino, non absolute, non citra ullam exceptionem, „ tutæ sunt prædictiones siue mortis, „ siue sanitatis? „ Etenim si nihil critici in morbi sanatione observatur, etiam nihil certi Medicus ad præsentem futurumve morbi statum, pronuntiare potest.

§. II. Ut morbos descripserat ἀκρίσιμος, ita descripsit multos διὰ τέλους, διόλως, integre, judicatos. Sæpe adhuc addit: „ Neque morbi est facta Rever-
„ fio.

„ fio. „ Fatendum tamen est neque unum neque alterum sæpe adjunxisse morbis, quos simpliciter judicatos tradidit, licet & perfecte, integreque, & citra morbi reversionem, essent judicati. Crises tales perfectas Nosocomium exhibuit multas.

§. III. Descripsit judicationes cum Reversionibus, quæ frequentes admodum ipsi visæ; ita quidem ut Epid. I. pag. 956. 957. integram viderit constitutionem, in qua nullus servaretur, nisi post recidivam, reconvallescerentque quotquot relapsum passi essent. Ut *Hipp.*, ut omnes Medici, ita & in Nosocomio nos frequentes relapsus cernimus. Est alia ratio cur *Hippocrates* in laudato mox Aphorismo passus sit, Acutorum morborum haud esse tutas citra ullam exceptionem prædictiones. Sæpe sæpius cernimus Crisin omnibus numeris absolutam,

integramque post eandem brevi redeuntem sanitatem, dum interea primo, altero, tertio, quaternario dierum elapso, morbus idem, aut similis, aut prorsum alienus, redeat. Contingitque subinde, ut de qua Crisi, num perfectam dicas, valde dubitares, eandem perfectissimam salutes; quamque arbitratus perfectissimam esses, hanc doleas fallentem. Ad talia in Nosocomio data exempla ipsum hunc Aphorismum adplicare soleo, & una cum Medicinæ Auditoribus prudentiam disco in danda Prognosi.

§. IV. Judicatos *Hipp.* vocat, quibus varia tamen incommoda, eademque sæpe gravia, post Crisin acciderint, imo quorum nonnullos mors abstulerit. Libr. 1. Epid. pag. 956. judicatos appellat, quibus parotides postliminio suboriebantur; iisque nec dimittentibus, nec suppurantibus, vel

Diar-

Diarrhœa biliosa nascebatur, vel Dysenteria, vel crassarum Hypostasis urinarum. *Metonem* Epid. 1. pag. 983. judicatum die 5. pronuntiat, cui nihilominus post judicationem Per-
vigilium ac Delirium leve nonnunquam affuit, a quibus non nisi crebriore na-
rium hæmorrhagia est liberatus. Ibi-
dem pag. 986. *Clazomenium* nobis re-
fert die 20. judicio liberatum, qui ta-
men ad diem 40. multa passus, de-
mum mansit Amblyops. Pag. 958.
inter judicatione absolutos retulerat
Scymni Fullonis ancillam, & *Cratistona-*
ctam, quos, licet Parotidibus suis cri-
tice suppuratos, mors dira abstulit.
Sic etiam videmus apud ipsum morbi
crisin in mortem describi. Et Epid. 3.
pag. 1073. *Euryanactis* filiam narrat
6. die judicatam, quæ postea, & ut
videtur circa 19. diem, legitur obiis-
se. Sane si ad constantes Judication-
nes

nes perpetuo addidisset suum *per totum*, suum omnino, aut *perfecte*; si ad imperfectas vel nihil addidisset, vel, ut Epid. 1. pag. 973. Morbus iudicatus quidem, sed *intermisit* tantum; historias morborum suorum accuratius traditas *forte* gauderemus.

Haud vero id *Hippocrati* ita visum, idque merito, est. Exemplo hoc ipso suo prudentem cautelam docuit Posteritatem. Dixerat Aphor. 2—12. & *quinq̄ies* in Epidemicis repetiverat: „ Quæ in morbis post Crisin relin-
„ quuntur, recidivas facere solent., Porro recidivas aliquando letales esse demonstraverat. Hinc mos illi perpetuus invigilandi post Crisin ægrotis. Crisin esse perfectam ex aliis non noverat signis, nisi rerum post eandem eventum. Hinc toties addidit ἡ ὑπέσπεψε. Debuit ergo suos in ægros perpetuo attentus fuisse, ut vel inte-

gra vel imperfecta ægrorum in sanitate illibatam constantemque restitutio, vel mutatio in alium morbum, vel recidiva nonnunquam letalis, sibi primo innotescerent, antequam, quam jam Criseos nomine donaverat, vel veram, vel personatam duntaxat fuisse, asseveraret.

§. V. Dixeram superius crises, quæ numeris omnibus videantur absolutæ, sæpe minime absolutas esse, & quæ imperfectæ admodum adparerent, has integras fuisse rerum constare eventu. Cum id in Nosocomio toties visum, operæ pretium erit altius, ac præcipue ex *Hipp.* repetere.

Cum urinis plane nigris & subnigris, seu tenuibus, seu cum contentis quoque nigris, Crises acutorum morborum observamus bonas.

Attamen nihil in praxi Medica certius ac testatius est summa nigrarum urinarum pernicie.

Consulamus hunc in scopum universam Medicinam.

Hipp. in progn. „ Viris , mulieribusque , omnium pessimæ urinæ nigrae , sicut pueris aquosæ. Et Coac. n^o 580. „ Pestifera autem est inter urinas & quæ hypostasim habet nigram , & quæ ipsa quoque est nigra : sed pueris pestifera est magis aquosa.

Unde *Hipp.* describens febres ardentes Lib. I. Epid. 1. pag. 954. „ a quibus plerique omnes moriebantur , addit : „ Urinæ his erant „ nigrae , tenues , & paucæ. „ Exemplis præterea urinarum nigrarum pravitatem demonstrat. *Pythio in Thaso* , post urinas primo subnigras , deinde nigras , 10. die mortuus legitur, Epid.

Epid. 3. pag. 1098. *Mulier in Cyzico* cum urinis nigris tenuibus, deinde oleosis, 17. die periit, ibid. pag. 1114. *Mulier in Thaso ad frigidam decumbens*, 80. die interiit, notante sic *Hipp.* „ Urinæ huic perpetuo nigrae, tenues, & aquosæ fuerunt, „ ibid. pag. 1096. *Adolescens in Foro Mendacium* post urinas subnigras obiit 7. die, ibid. pag. 1076. *Femina in febre ardente post puerperium* 7. die expiravit, urinis 5. & 6. die paucis, tenuibus, subnigris, ibid. 1079. *Philiscus* habet die 3. 4. & 6. urinas nigras, 6. die moritur, Epid. 1. pag. 966. *Erasinum* mors die 5. abripit post urinas nigras. Epid. 1. pag. 984. *Abderæ, Apollonius* in mortem incidit 34. die cum urinis, quas *Hipp.* scribit, ex quo ipsum in morbo viderit, fuisse nigras. Epid. 3. pag. 1111. *Silenus* morbi sui die 11. extin-

tinguitur , cum toties nigras urinas aliquando cum Hypostasi nigra reddidisset.

Hinc *Galenus* Libr. I. de Cris. cap. 12. *Charter.* Tom. 8. pag. 395. „ Pessima igitur est omnis urina denigrata , adeo ut neminem unquam servatum viderim ex iis , qui talem urinam minxerunt : „ Exceptiones quasdam adjungit , sed quæ ad rem non faciant ; agit enim *Hippocrates* in his ægris , non de urinarum contentis , sed de ipsa urina subnigra nigræque. Hinc quod *Galenus* , hoc textu , quod *Liber Galeno adscriptus de urinis* , cap. 20. , quod *Liber de urinis ex Hipp. Gal. aliisque* subjungere : „ Minus vero perniciofa est si solum id , quod subsidet , nigrum fuit ; atque adhuc minus , si solum enæorema ; ac multo minus etiam , si nebula : „ hæ , inquam , exceptiones

nes

nes locum hic non habent, quandoquidem de ipsa urina nigra sermonem facit *Hippocrates*, non de contentis.

Equidem negavit omnino *Galenus* urinam nigram existere posse, quæ simul tenuis esset: negarunt idem cum *Galeno* Autor Libri de urinis *Galenus* adscripti, Liber de urina ex *Hipp. Gal.* aliisque, ut & *Theophilus Iatro-sophista* Libr. de urinis, qui omnes libri apud *Charterium* Tom. 8. inveniuntur. Et cur negarunt? Quia causam nigredinis urinarum Hypothesis illorum ab atra bile deducebat; quæ cum crassa esset, non posset urinam nigram simulque tenuem exhibere.

Miror *Galenus* aliorumque errorem, miror eorum erga *Hippocratem* irreverentiam. Error est crassum liquorem nigrum non posse aquæ limpidæ copiosæ conciliare nigredinem sic, ut

aqua hæc cum nigredine sit tenuis: atramenti enim crassamentum exiguum nigram reddit copiosam aquam, haud ablata ejus tenuitate. Hic tamen adeo palpabilis error seducere hos Autores eo potuit usque, ut, quod tot locis vidisse se testetur *Hippocrates*, non suspiciant, imo se simulent ignorare. Unde recte *Lud. Mercatus* Vol. i. Lib. 2. pag. 254. asserit illos omnes urinam nigram posse tenuem esse *oscitanter* negasse, toties nigram ac tenuem demonstrante *Hippocrate*.

Duretus pag. 504. in Verba Hippocratis: *Pestifera autem est inter urinas, quæ & Hypostasim habet nigram, & ipsa quoque est nigra: „ Pestifera est inter „ urinas, de qua sperabilis nulla „ curatio est febris acutæ, cujus ar- „ dore talis meiendo emittitur.*

Quam-

Quamvis igitur omnium testimo-
nio urina vere nigra letalis sit, idque
tot confirmarit *Hippocrates* exemplis,
videmus tamen & cum iisdem serva-
tos ægros, & una cum illis crisim
bonam factam.

I^{mo} *Metoni* ad 5. diem judicato
urinæ subnigræ erant, tam ante, quam
post Crisin. Haud omnino recte *Hip-
pocratem* intellexisse *Foësius* videtur,
dum de *Metone* scribit: „urinæ istæ ni-
„ gricantes, etsi taceat *Galenus*, non
„ sine magnæ naturæ efficacitate,
„ potuerunt esse salutare, ut in acu-
„ tis morbis contingit, qui per uri-
„ nas judicantur, ut multas pleuriti-
„ des judicatas scimus per urinas ni-
„ gras, crassas tamen: & quæ solent
„ urinæ nigræ salutare esse, fere cras-
„ sæ sunt; *tenuis* letales. „ Etenim
subnigras urinas, earumque subni-
grum enæorema *Hipp.* refert ante cri-

fin fuisse, ergo non crassas, utpote in quibus enæorema non apparet: post crisin vero urinarum cum tenuitate nigricantium diserte meminit.

Epid. 3. pag. 1108. *Mulier in Thaso austera & aspera* habuit ad diem 3. urinas nigras ac tenues, cum enæoremate valde rotundo; eademque nocte perfecte judicata sudoribus est, & catameniis.

Epid. 1. pag. 974. *Herophon*, post nigras tenuesque urinas, est judicatus imperfecte die 9. perfecte autem 17.

Epid. 3. pag. 1106. *Heropytus* urinas nigras habuit, & tandem convaleuit.

Epid. 1. pag. 979. *Epicratis uxor* judicata est post urinas tenues, ac subnigras.

Epid. 3. pag. 1108. *Nicodemus* 24. die integra judicatione absolutus est, post urinas tenues ac nigras.

Igi-

Igitur sex exempla apud *Hipp.* prostant servatorum ægrorum, quibus urinæ aut subnigræ aut nigræ fuere: & quod ipse, idem alii magni practici observarunt.

Si *Galenum* per seipsum explicare debemus, etiam sic censuisse reputandus est. Ipse enim, qui dixerat, ut vidimus, eorum, qui in acutis nigram urinam minxissent, se servatum vidisse neminem, ille ad casum *Mulieris austeræ & asperæ*, ait: „ Urina licet esset nigra nihil attulit „ periculosi: quod retenti menses „ essent magis melancholici. „ Imo in comm. ad *Mulierem quæ ad frig. aq. in Thaso decumbebat.* „ Quandam „ novi, inquit, quæ talibus (nigris) „ urinis magna copia evacuatis, ἀπε- „ ληθεῖσθαι, opem perceperit.

Prosper Alpinus Lib. 7. cap. 14. de Præfag. non malas urinas esse ni-

gras judicat, si cum copiosa hæmorrhagia narium, ut in *Metone*; aut cum largis catameniis, ut in *Muliere austerâ*, observantur.

Ludovicus Mercatus laudato mox loco: „Tamen ad salutem, inquit, „ aut ad mortem prædicendam, non „ est solum nigra urina considerata, „ sed alia signa salutaria, aut deleteria, „ adjungere oportet, & inspicere an bene exeant, vel male. „ Namque diffidendum non est interim dum virtus constat, ut statuit „ *Avincenna*; quantumvis ab omnibus urina nigra letalis habeatur.

Prosper Martianus in *Coac. n° 580.* commentatus, *Mercati* sequitur sententiam. vide pag. 606. edit. Rom. 1626.

Hinc *Cl. Rega*, *Diff. de urinis ut signo* „ in æstate anni 1727. ait, vi- „ di ego hic *Lovanii* duorum æg-
rum,

„ rum, qui adhuc superstites sunt,
„ urinam per plures dies atram val-
„ de, cum sedimento quoque nigro. „
Non addendo autem utrum acute an
chronice hi laborarint, minus forte
probant bina ejus exempla, ut pa-
tebit mox.

Sed *Plempius* fund. Lib. 5. sect.
cap. 5. in acutis malignis nigram uri-
nam quandoque criticam salutat.

Porro inquirendum est, cur uno
tempore omnis denigrata urina abso-
lute letalis habita fuerit, alio tempo-
re minus fuerit?

Hippocrates raro ratiocinando, sed
simpliciter passim phenomena enar-
rando, parum quoque hic explicat;
nisi quod in Febre ardente epidemi-
ca, de qua supra actum, narret &
plerosque in ea febre urinas nigras
habuisse, & plerosque periisse: tum
in Historiis variorum ægrorum suo-

rum, qui nigra minxerint, aut Labores nimios, aut Calores arduos, aut Viſtum pravum, aut Bacchum, Veneremve, Morbi inter cauſas recenſeri oportere: denique in nonnullis humores Melancholicos eſſe conſiderandos.

Numquid hinc celebris illa nata diſtinctio, quam poſt *Galenum* omnes magni ſcriptores practici foverunt, qua cauſas urinarum nigrarum partim deducerent a cruore per violentiam febrium exuſto, partim ab ipſo humore atrabiliario, qui quidem ante morbum exiſteret, vi autem morbi valida moveretur, miſcereturque humoribus? Saltem eo collineant omnes ut nigram urinam ſemper quidem periculofam valde exiſtiment, longe vero pernicioſiorem illam, quæ a corrupto, & exaſſato per ardores ſanguine, quam quæ ab humore melan-

lan-

lancholico orta fit, pronuntient: & cum menstruum sanguinem retentum solerent Melancholicum fieri credere, hinc *Galenus* in Comm. ad *Mulierem morosam* supponit ipsi urinas nigras minus noxias fuisse; quale quid cum ipso censet *Durctus* Edit. Leyd. pag. 498.

Attamen motu humoris atrabiliarii in acutis *Hippocrati* nihil perniciosius visum. Passim in Coacis, in Prorrh. in Aphor. id videre est. Vid. Aph. 4 — 22. 23. 24.

Sane si videamus eorum qui, narrante *Hipp.* servati sunt, historias, excepta *Muliere aspera* & *morosa*, habuere omnes post Crisin aut perfectam aut imperfectam, prava symptomata varia, Crises perfectiores, nigrarum urinarum in colorem meliorem mutationes, alias excretiones salutare. Unde etiam *Hipp. Coac.* 577.

& in *Progn.* vel solas nigras lividasque
urinarum nubeculas damnavit ; &
Prorrh. 1. n^o 4. inter alia Phrenitidem
ex urina decolori cum nigro enæore-
mate præfagiit ; dein *Coac.* n. 581.
letale pleuriticis dixit fedimen nigrum
in urina porracea, & demum *Coac.*
582. „ In errantibus febribus ni-
„ græ nubeculæ quartanam denun-
„ tiant ; decolores urinæ enæorema
„ nigrum habentes, cum privigi-
„ lio, & perturbatione, phreniti-
„ dem ; urinæ cineritiæ vero cum
„ Dyspnœa, hydropem prænuntiant.

Unde quod *P. Alpinus*, quod *F.*
Plempius, aliique, ejusmodi urinas
nonnunquam Criticas appellarint, id
secundum *Hipp.* & celeberrimos ejus-
dem Commentatores, haud aliter ca-
pimus, intelligimusque, quam quod
in his ægris, Criseos tempore, una
cum nigris urinis, apparuerint hæ-
mor-

morrhagiæ narium, uterive, sudores, &c. qui morbum aut integre, aut imperfectius judicantes, simul indomabile illud, & vix coctile, letiferumque per sese, de corpore expulerint: pari profecto ratione, qua Petechiæ & Miliaria, dum cum aliis evacuationibus prorumpunt, critica quibusdam vocantur.

Exceptionem quidem Autores petunt Chronicis in Morbis, dum Hepar, Lien, aliæve abdominis partes, sua atra bile, Criseos in morem, exonerent sese, vel dum Melancholicorum intermittentes febres nigris judicentur urinis. Fateor & tales formidandas me Crises vidisse, optasse vero ne viderem unquam. Qui historiam Bilis atræ ex *Hippocrate* bene possidet, propriaque praxi demonstratam tenet, ille demum novit quid non timendum sæpe ab Atra bile mota, & quod,

quod, etsi aliqui fortunatiores emergant, post ejusdem expulsionem validam, vomitu, alvo, urinis; ejusdem motus nihilominus sit perpetuo formidandus. Ideo *Hippocrates*, & cum flore practicorum *Boerhaavius*, adeo anxie ac sollicitè inculcarunt nobis, ut de movenda Bile atra ne cogitemus quidem, donec eandem sic primo immutassemus, ut talis haud amplius esset, neve unquam prodiret foras, nisi sic mutata, mitigata, soluta, attenuata, dilutaque foret, ut antiquæ naturæ plurimum deposuisset. Verbo repetam, si in Melancholica Quartana febre urina nigra Critica dicenda sit, Crisin hanc infidam sic gaudent Practici prægressam, ut formidant futuram; eamque ob causam Quartanam talem cortice, cæterum contrario, moderentur sic, ne Bilis atra in motum ducta occidat.

Dif-

Difficultatem contra hanc Sententiam movere quis posset ex Observ. C. Pisonis Lib. de Coll. fer. Sect. 3. cap. 9. Agens hic autor de Colica Pictorum, & de ea Colica Nephritica, quæ Pictonicæ perquam similis, bonas se narrat observasse urinas, quæ sic atræ essent, ut ni quis attente conspexisset, a nigro sanguine tinctas credidisset, tumque subjungit : „ Ejusmodi urinae atræ mihi sane olim fuere in „ autumno familiares, & per plures „ los dies, vel etiam quindecim, assiduæ : sed fere iis post aliquot „ dies dolor Nephriticus, a me descriptus, successit. Alias cum nullam aliam injuriam iis succedentem „ expertus essem, plurium ægrorum „ deinceps postea querelas super iis „ composui, & animi anxietatem, earum occasione obortam, longe facessere jussi. „ Hinc quisquam for-

forte concluderet urinas nigras tam pestiferæ naturæ minime esse, quam hucusque descriptæ sint.

Sed regero 1^{mo} summas easque multiplices Autoritates pro sententia de harum pravitate urinarum laudatas, unica hac Observatione Pisoniana, eaque omnino extraordinaria, non elidi. 2^{do} Ex ipso Pisonis textu ambiguum fieri an vere nigra ejus urina fuerit? Et an non potius sic nigredinem retulerit, qualem toties in chronice Nephriticis contuemur, quæ a sanguine commixto penitus videatur nigrescere, quamvis non ea, de qua hic agitur, urina nigra sit. Calefacta urina differentiam demonstrat. 3^{tio} In Renibus ac Vesica urinaria, ut & in omnibus five naturaliter cavis, five præternaturaliter excavatis, corporis partibus, ejusmodi humorum aut solidorum degeneres mutationes ut confici-

sistentia, & forma, ita & colore, nos experiri, cujusmodi Circulatio humorum non toleraret, sed a quibus extingueretur : nihilominus degeneres has conditiones longo sæpe tempore tolerari, quia extra circulationis veluti territorium sunt. Hoc modi vidi in Chronica Nephritide, vidi in Dysuria, sic alcalinam prodeuntem urinam, ut miſtionis momento vehementer effervereſceret cum aceto. Sic Piſonis Nephritici urina, non atra de ſanguine ſecreta, ſed corruptum atque atrum tranſeuns antrum, atra reddi potuit.

Ergo, quo ad Theſin propoſitam redeamus, Criſin quandoque fieri bonam cum urinis, & *Hippocratis* & Auctorum Practicorum pene univerſorum, teſtimonio, vel abſolute per ſe letalibus, vel ſaltem ſummopere periculofis, diſcimus.

§. VI. Quod de urinis nigris vidimus, idem innumeris in ægris Nosocomii nostri observamus de urinis tenuibus, de urinis fœtidis, de urinis bonam nunquam gerentibus hypostasin. Cernere e contrario datur in summa Acutorum cruditate vel alvum quæ naturalis sit, aut etiam quæ flava ac pultacea conditione critica dici queat; vel urinas perpetuo hypostaticas, interea dum capit morbus augmentum, immo dum tendit in mortem; vel in inflammatoriis morbis pectoris sputa cruda, cum alvo urinaque adeo coctis, ut morbus inde judicatione integra absolvatur; vel Respirationem bonam, cum perpetua morbi cruditate, viceque versa signa quævis coctionis cum Respiratione ferre desperata.

In hisce difficultatibus pro more ad *Hippocratem*, ceu ad sacram anchoram,

ram, confugere, antequam diagnofin ac prognofin formemus, ſolemus, examinaturi quid circa hæc obſervaverit ille, quî in hiſce ſe geſſerit?

Epid. 7. pag. 1208. 1209. in Hiſtoria *pueri Eratolai* dyſenterici miramur terribilia tot ſymptomata, graphice ibidem deſcripta, unico in homine poſſe contingere, ab homine poſſe tolerari, poſſe poſt tot tantaque eundem fanefcere hominem. Aſt in media enarratione *Hippocrates*, interrumpens filum orationis, jubet attendamus ad id, quod πνεῦμα ὁποῖον ὑγιαίνοντι, reſpiratio haud aliter ipſi, quam ſano homini ſolet, contigiffet.

Ibid. pag. 1212. 1213. *Cydis* ſive *Cydios filium* legimus morbo terrifico, diuturno, affectum, & (quia neque de morte, neque de alio morbo ulla mentio,) ſanitati reſtitutum. In tanta calamitatum pravitate unicum no-

tat memorabile : „ πνεῦμα δὲ ἐπιείκως
„ διὰ παντὸς μέτριον : Respiratio per
„ omnia , fere semper , erat mode-
„ rata.

Dixerat in Prognosticis , sæpiusque
repetiverat : „ Oportet considerare
„ respirationem vim habere magnam
„ in cunctis morbis acutis. „ Un-
de adeo sollicitus fuit Respirationis
modum plerorumque ægrorum suo-
rum , ac *pravæ* maxime in letalibus ,
enarrare. Hinc quandiu bonam Re-
spirationem cernimus ægrotantium ,
concludimus spem vitæ magnam su-
peresse , quod aut illibata , aut perpau-
cum læsa tantum , innumera organa
esse oporteat , a quibus vitæ depen-
deat perrennitas , quodque cruditis
etiam summæ coquendæ spes bona
affulgeat. Hinc nunquam despera-
bundi ? Nunquamne tristis est facien-
da prognosis ? Non tristis , sed ut-
cum-

cumque dubia tamen. Vel enim nobilis hæc functio perennando universam morbi cruditatem emendatura, coctura, expulsura est, sanitatemque redditura; vel, copia ac malignitate crudorum humorum aucta, functio bonæ Respirationis lædetur, ac delebitur, unde mors: quandiu vero bona manet, bonam spem format.

Hipp. Prorrh. n° 102. „ Qui sopore oppressi, circa initia tenuiter exsudantes cum urinis coctis *ὀυροῖσι πέποι* ardentibus, citra iudicium perfrigescentes, rursus ex brevibus intervallis peruruntur, torpidi, soporosi, convulsi, perniciem habent.

Galenus qui bonis urinis nimium ubique fidit, voluit pro τὸ ἔργον πέπον, legere ἐπίπνον: sed 1^{ma} omnes fere autores hic se *Galeno* opponunt, dicentes lectionem esse genuinam τὸ πέπον; addunt quidam, ut *Jacotius*,

se in moribundis coctam, imo hypostaticam, vidisse. 2^{do} Quod *Hipp.* hic, idem significat *Coac.* 180. verbis iisdem, & convenit cum sensu *Coac.* 579.

Quod *Hipp.* in hoc loco notat de bonitate urinarum in summa morbi pravitate; quod *Jacotius* in pessimo morbo de urina hypostatica observat; idem in Juvencula brevi ante mortem cum pessimis morbi symptomatibus per plures dies observavi.

Epid. 2. pag. 1015. *Bion* eodem tempore & crudas habuit urinas multas, & criticam naris sinistrae in splenitide hæmorrhagiam; relapsum licet deinceps passus, servatus est.

Vidit *Hipp.* *Coac.* 582. diuturno tempore crudas urinas, cum cæteris omnibus signis salutaribus, tam frequenter, ut ausus fuerit regulam inde condere crisin per abscessum prædicendi.

§. VII. Attamen ab alia parte ad firmam prognosin, certamque salutem urinas cum cæteris bonis signis bonas passim requiri ab *Hippocrate* est certo certius.

Pro parte id jam vidimus in tot hominibus, qui post urinas nigras, subnigrasve, perierint; pro parte id docebunt sequentia: *Coac.* n° 575.
„ Urina in febribus albam, levem
„ sedimen habens, celerem libera-
„ tionem denuntiat: „ profequitur
deinde reliquas bonas urinæ conditio-
nes in acutis requisitas; maxime ve-
ro fortunatam Acutorum curam præ-
sagit ex varia urinarum bonitate in
magno textu *Libr. progn.* pag. 40.
Unde ad mortem *Hermocratis* *Epid.* 3.
pag. 1062. addidit. „ Huic ad usque
„ finem & surditas permanebat, &
„ urinæ prodibant vel turbidæ, ru-
„ bræ, non subsidentes, vel albæ,

„ non coloratæ, nec enæorema habentes.„ Quæ ibidem pag. 1076. mortua legitur *Iliaca mulier*, hanc notat paucas habuisse tenuesque urinas. Idemque pag. 1077. in *Mulieris post abortum febricitantis*, deindeque mortuæ, historia advertit. Epid. 3. pag. 1080. *Mulier in foro Mendacium*, quæ die 14. mortua est, minxit die 8. multum crassumque infcia, die 10. mane multum ac nihil subsidens. Et pag. 1083. in grassante morbo, quæ multos sternebat, lotium perturbatum fuit, multum atque pravum. Pag. 1085. in pessimo genere Febris ardentis, ac Phrenitidis: „ Urinæ co-
„ piofæ, tenues, nec critici quid,
„ aut levantis, habentes.„ Et paulo post: „ Vel enim densæ erant, vel
„ nullo modo habentes aut coctiones,
„ aut utiles purgationes. Pag. 1001.
„ *Homini Calvo*, ad 4. diem mortuo,
„ Co-

„ Copia urinarum prodiit, nunquam
 „ bonarum. „ Pag. 1100. Illius qui
 4. die *Phrenitide* perierat, „ urinæ tenues
 „ fuerant, parva enæoremata habentes,
 „ *διεσπαμένα*, divulsæ, non subsiden-
 „ tes. „ Pag. 1093. *Pario* ad 120. diem
 mortuo urinæ fuerant perpetuo malæ.

Memorabile quoque magnum Vi-
 rum Lib. I. Epid. pag. 953. suspica-
 ri ne *Bioni*, *Cratiæ*, *Aretonis* puero, &
Mnesistrati uxori, ideo post prægres-
 sam judicationem Dysenteria fuerit
 suborta, quod post judicationem uri-
 nas reddidissent dilutas multas, li-
 quidas, ac tenues.

§. VIII. Porro hæc ita, quemad-
 modum jam monui supra, non sunt
 intelligenda, ac si ob solius urinæ pra-
 vitatem, sedimentique defectum, *Hip-
 pocrates* desperatas credidisset ægro-
 rum res; verum proprie tunc, quan-
 do, una cum urinæ vitiis, cruditatis

notabilioris indicia in excretionibus reliquis, & præprimis in Vitalibus aderant functionibus : erat enim perpetua sibi & inviolabilis Lex haud judicandi unquam ex unico signo, sed ex multorum collectione, ut patet ubique. Hanc Coi immortalis legem & nos observantes, nunquam boni quid ad Lectos ægrorum præfagimus, si multa alia prava signa pravas commitentur urinas : nunquam spem sinu fovimus, si una cum optima urina, & quidem constanter hypostatica, alia signa perniciofa, functionum potissimum vitalium læsarum, animadvertantur. Quod autem de urinis, hoc quoque de aliis quibuscumque signis sive cruditatis, sive coctionis, dictum velim. Et e contrario quotiescumque in Laterum Pulmonumve inflammatione cum sputis aut nullis, aut pravis, aut paucis, bona alvus seu fo-

la,

la, feu bonis fociata urinis, levaret pulmonem, viresque repararet collapsas, nunquam prognosin infaustam formavi, lætique mecum Medicinæ Studiosi plurimos pectore inflammatos vel sine ullis bonis sputis, vel cum bonis duntaxat post crisin prodeuntibus, egregie curatos salutarunt. Sed bona alvus, & probe hypostatica urina nunquam inani spe animos lactaverunt nostros, quando partes alias, easdemque nobiliores, cruditate notabiliore laborare cernebamus. Pariter egimus ad insolita: haud parcius enim laudavimus illa, modo prodescent, quam si consuetas suas observaret Natura leges. Præiverat exemplo *Hippocrates* suo. Epid. i. pag. 951. Noverat consueta lege Febres arden-tes solvi sudore, alvo, urinis, hæmorrhagiis; ast didicit tamen postea eos qui urinas aut nihil aut parum

modo hypostaticas, & plerumque dilutas admodum reddidissent, modo insolito Dyfenteria curari. Rarior sane Pleuritidis per sudores judicatio; *Anaxionem* tamen Libr. I. Epid. licet 27. die cocta sputa ejiceret, legimus nihilominus perfecta judicatione non fuisse absolutum, nisi largis, qui de toto corpore, ad 34. morbi diem profluerent, sudoribus.

Equidem *Carolus Piso* de Coll. sect. 3. cap. 9. putavit haud insuetum esse ut sudores pleuritidem judicent, idque se in pleuritico cive *Pontano* observasse, quinimo *Hippocratis* id se auctoritate confirmare posse. Verum legitimam hanc *Pontani* civis pleuritidem fuisse & ipse postea pag. 254. dubitavit, & nos dubitamus cum illo; deinde quem laudat *Coacarum* 393. textum, is haud videtur nobis id, quod ipsi, significare, nisi alio
fen-

sensu & modo. „ In his igitur, ait
 „ *Hippocrates* ibidem, & omnibus
 „ qui Pulmonum affliguntur morbis,
 „ bonum quidem est facile morbum
 „ sustinere, dolore defungi, sputum
 „ prompte expuere, facile spirare,
 „ siti esse vacuum, reliquum corpus
 „ æqualiter incalescere, ac molle es-
 „ se. Ad hæc somnos, sudores, uri-
 „ næ educationem, laudabiliter fieri;
 „ quibus contraria mala sunt. Quan-
 „ documque ergo bona hæc omnia
 „ huic sputo (quod mox ante descri-
 „ pserat optimum) adfuerint, homo
 „ fervabitur. „ Clarum est Sudo-
 „ res hic ab *Hippocrate* laudari, & al-
 „ vum bonam, bonasque urinas, sed
 „ tamen sic, ut sputa morbum præci-
 „ pue judicent, id quod non ita in *Ana-*
 „ xione; licet laudabilia sputa ad 27.
 „ diem ejecisset, eguit tamen ad judi-
 „ cationem absolutam sudore 34. diei.

Hæc

Hæc nobis animo præsentia, multa utique dubia levant, multa etiam quæ certa credideramus, dubia reddunt, Artisque genuinos observare terminos docent; quæ tantummodo vere certa pro certis, pro incertis ac dubiis dubia tradit. Sic scilicet hæc nos docent plures exceptiones, seu naturæ a consueto tramite aberrationes, ut muniti quidem simus, dum occurrunt nobis, ast nihilominus ad consuetas ejusdem leges nos indefinenter conferamus, nisi nos illa, vi phenomenon aliorum, cogat exceptionem a regula sua generali agnoscere.

Suo iterum exemplo id docuerat admirabilis per omnia *Hippocrates*. Ecquis Viri in Arte certitudinem & fiduciam non itupeat, dum animo meditantem super consuetas naturæ vias Epid. 7. pag. 1229. illum cernit! *Fullo in Syro*, præter alia prava
sym-

symptomata, urinas posuit citra sedimen-
 limpidas, & citra evacuationes
 criticas ullas; & ad diem 18. certe
 non criticum, judicatur. Stupefactus
 primo titubatur *Hippoc.* & quî demum
 hoc portentum explicet, anxio ani-
 mo volvit. Ea occasione *Nicoxeni* re-
 cordatus, qui quoque citra sudores
 aliasve evacuationes, die 7. sic judi-
 catus esset, ut belle fumeret suas for-
 bitiones, suum vinum, suas uvas in-
 solatas, sed quem 17. die deprehen-
 derit in pessima post crisin tam infi-
 dam recidiva, ut ab ea illum non
 nisi magnos post labores die 20. ser-
 vasset, & sanasset; intelligit ejusmo-
 di criseos perfidiam, eaque probe
 confirmatam videt perpetuam suam
 experientiam: sed eo minus, cur
Fullo in sanitate perseveret, capit.
 Tandem incidit ipsi in mentem, quod
Fulloni enema ex *Thapsia* paratum in-
 je-

jectum sit, rogatque num forsitan paradoxī causa lateat in eo, quod alvus enemate sæpius mota, morbi eduxerit materiem? sicque febris citra ullas evacuationes alias, rariore cæterum diēi minime critici exemplo, judicata sit? Alvum non videtur conspexisse, firmiorem sententiam alioqui prolaturus.

Quod porro *Colis*, non nisi ejusmodi conjectura arrepta, hoc problema solvere se credit posse, nos convincit de ejus observationum certitudine inconcussa, doctrinæque æternitate. Simulque fateor, inter tot Naturalium Legum exceptiones, me nunquam in *Acutis*, in quibus Resolutionis benignæ spes nulla esset, neque in privata praxi, neque in publica, quemquam sine quapiam evacuatione judicatum vidisse; eamque ob causam semper & prædixisse, & even-

eventu confirmasse , aut recidivas , aut alios morbos , aut mortem , si casus talis observaretur.

§. IX. An idem judicandum , ac metuendum , si morbus acutus citra ulla evacuationes , præter eam hypostaticarum urinarum , judicatus esset? An vero , etiam cæteris evacuationum criticarum feriantibus organis , solæ urinæ sic omnem morbi materiem critice eliminare queant , ut tuta sequatur integraque judicatio?

Profecto Rariores sunt casus , in quibus morbi acuti per unicam modo excretionis viam plane judicentur ; adeoque , quemadmodum frequenter non contingit , ut cæterarum evacuationum unica duntaxat totam morbi materiem eliminet , ægrumque perfecta judicatione absolvat ; ita quoque frequens ea urinarum non erit. Veram tamen crisin Acuti morbi ut
olim

olim in praxi, ita in Nosocomio vidi; sic quidem ut cæteræ excretiones aut naturales omnino essent, aut plus minus cruditatem redolerent; urinis vero hypostaticis constanter emissis morbus levaretur, reliquæ excretiones emendarentur, & perfecta sequeretur judicatio.

Hoc idem *Hippocrati* sic visum esse ejus opera arguunt. Epid. i. pag. 955. „Atque in hoc statu (febris
„ ardentis) ex quatuor maxime signis fervabantur hi, quibus aut
„ ex naribus sanguis profluxisset, aut
„ copiosæ urinæ, quæ multam eandemque pulcram hypostasim haberent, per vesicam exivissent, aut
„ qui per alvum turbulenta biliosa tempestive dmitterent, aut qui fierent Dysenterici. Multisque contigit ut non ab uno horum descriptorum signorum judicarentur, sed

„ ut

„ ut plurimi per omnia decurrerent,
 „ graviusque habere viderentur. Sed
 „ hi omnes, quibus ista continge-
 „ rent, incolumes evaserunt. Mu-
 „ lieribus etiam & Virginibus con-
 „ tingebant quidem hæc præscripta
 „ signa omnia; *quibus autem horum*
 „ *quidquam* bene fieret, vel Mulie-
 „ bria liberaliter apparerent, per
 „ hæc fervabantur & hæc iudicabant.
 „ Nec periisse ullam novi, quibus
 „ horum quid bene successisset. Nam
 „ Philonis filia, cum liberaliter sanguis
 „ de naribus fluxisset, ideo mortua
 „ est, quod 7. die, (quo iudicaba-
 „ tur,) intempestive utique, cæ-
 „ nasset.

Epid. 2. pag. 1027. Metastases
 ex imperfecta crisi futuras expectat,
 nisi urinæ eruperint. Ergo credidit
 morbi materiem, quæ in corpore re-
 sitaverat, critice excerni urinis posse.

Ibidem in *Scopi* acuto morbo, ut etiam pag. 1085. & 1056. vocatur urinæ hypostases *Corporis in morbis purgationes*. „ ἔργα καὶ θάλασσις πολλή, inquit „ και πληθεῖ, καὶ ὑπόστασει. Urinarum „ purgatio multa erat, tum copia, „ tum subsidencia. „ damnatque urinas „ nec coctiones, nec probas purgationes habentes „ laudat illas, „ quæ probæ essent per Vesicam expurgationes.

Epid. I. pag. 956. „ Quibus febre judicatorie desinente parotides, in febribus cum dolore subortæ, neque conquiescunt, neque suppurantur, eos Diarrhœa biliosa, vel Dysenteria, vel Crassarum urinarum hypostasis liberat : quale quid *Hermippo Clazomenio* evenit. Videmus iterum urinas hypostaticas dignitate & præstantia critica certare cum alvi criticis evacuationibus.

Epid.

Epid. 4. pag. 1121. „ Hæmor-
 „ rhagiæ erant, & per urinas purga-
 „ tio & crisis. Αἱμόρροοι, καὶ ἔροισιν
 „ ἡ κάθαρσις, καὶ ἡ κρίσις.

Ibid. pag. 1131. „ diserte affirmat
 „ *Menandri Vinitori*, cui alvus circa
 „ initia liquida fluxerat, nunc vero
 „ substiterat, per solam urinam judi-
 „ cationem contigisse. Καὶ τὸ ἔρον
 „ ἐκρίθη.

Epid. 3. pag. 1083. describens
 malignum in febribus Erysipelas, in
 pessimos artuum, pudendorumque ab-
 scessus abeuns, „ illud vero ipsis in-
 „ erat, inquit, ut quæcumque ab-
 „ scessum facerent ad suppurandum,
 „ si *vel* tempestiva, opportuna, alvi
 „ perturbatio, *vel* probarum urina-
 „ rum transmissio fieret, per ea ipsa
 „ solutio procederet.

Unde & Aphor. 4—74. statuit a
 futuris alioquin in morbo abscessibus

ægros Urinam, quæ crassa reddatur albaque, liberare; liberationem vero hanc citius contingere, quando abscessuum futurorum materies duplici via eliminetur, narium hæmorrhagia & urina. Igitur pari passu urina procedit hic cum hæmorrhagia, ut paulo ante cum critica alvo.

Coacarum 575. „ Urina subrubra,
 „ habensque subrubram hypostasim,
 „ atque lævem, si quidem ante fe-
 „ ptimum diem fuit hujusmodi, fe-
 „ ptimo die (aut septimam febrem)
 „ solvit. *ἐβδομαίον ἀπολύει.*

Aphor. 7—54. crisin iterum certam declarat urinis dicendo : „ his
 „ per venas in Vesicam pituita ver-
 „ sa, morbi fit solutio : „ Hunc Aphorismum Duretus vocat gravissimum super urinæ materie, & super Crisi per eam suscepta & edita.

Coac. n° 207. „ Ex acutis morbis,
 „ in febribus ardentibus maxime tu-
 „ bercula ad aures exoriuntur, ac,
 „ nisi critice solvantur, & mature-
 „ scant, *aut* sanguis ex naribus pro-
 „ fluxerit, *aut* urinæ crassam hypo-
 „ stasin acceperint, ægros inter-
 „ imunt. „ In quem textum *Prosper*
Martianus advertit *Hippocratem* in Pro-
 gnosticis laudare in Acutis mitioribus
 urinam hypostaticam per omne mor-
 bi tempus, non qua signum coctionis,
 sed qua signum mitissimi morbi, &
 materie benignioris, unde morbi solu-
 tio evenit per solam ejusdem urinæ ex-
 cretionem: Criticas deinde urinas non
 differre ab ea Libri prognosticorum,
 nam eos referens *Hipp.* modos, per
 quos febres solvuntur, urinam conco-
 ctam apposuit, inferens solam urinæ
 coctionem absque alia evacuatione, ad
 morbi solutionem facere. Et quid

clarius in hanc rem dici potest, quam dixit *Hollerius* Lib. 3. sect. 3. Coac. pag. 1047. „ Atque aliquando ju-
„ dicari pleuritides multa urina &
„ biliosa mieta scripsit *Hippocrates*.
„ Et nos vidimus pleuritides graves
„ dissolutas urinis multis, crassis, &
„ nigris; conversa, ut *senex* scripsit,
„ deorsum materie: quod certe mi-
„ nus mirum videri debet, quam
„ Peripneumonias urinis solvi. „ Et
pag. 824. „ Pus in pulmone effusum,
„ a natura attenuatum, transmitti-
„ tur in Venas, & Arterias; atque
„ hinc modo ad renes, modo ad in-
„ testina, dimittitur: mirabili natu-
„ ræ providentia, omnia moliente,
„ ut salutem ægro quærat.

Eundemque in locum *Jacotius*: „ Ex
„ quo fit, ut per urinas pulmonis
„ vomicæ critice expurgari possint.

Et *Pr. Alpinus* Lib. 6. Cap. 16.
 „ Per urinas plures Acutorum mor-
 „ borum fuisse judicatos & nos vidi-
 „ mus, & *Hippocrates* in *Epid.* se vi-
 „ disse scripsit. „ Addit deinde ex
Galeno signa, quibus crisis per uri-
 nam futura prænoscat; si nempe
 defunt signa omnis cujusque aliûs eva-
 cuationis futuræ; postea signa a se
 observata adjungit, ubi præter signa
Galeni ponit morbum non admodum
 esse vehementem, hypogastrium gra-
 ve ac dolens, & in vesica veluti in-
 flationis perceptionem.

Unde recte *Jacotius* in *Libr. IV.*
Comm. Coac. pag. 240. urinam sic
Criticam considerat in sua natura, ut
 ipsa sputa pulmone ejecta.

Et *Boerhaave* §. 1016. *Instit.* ubi
 n^o 1. quandam hypostaticam urinam
 toto morbi tempore emissam conside-
 raverat, veluti indicium optimumque

morbi præfagium, deinde n^o 2. „, uri-
„ na multa, ait, alba, stranguriosa,
„ cum sedimento copioso alboque,
„ critico tempore emissa, sanat, &
„ abscessus tollit. „ Etiam §. 938.
omnes criticas evacuationes recen-
sens, sputa, alvi fluorem, urinam,
hæmorrhagias, &c. urinam iterum
ut paris ad crisin efficacix & dignita-
tis, quam sputa, quam alvi fluorem,
quam hæmorrhagias, considerat.

Jure igitur concludere videmur,
existente inter ægros nostros eo quan-
doque casu, ut præter urinam criti-
cam nulla prorsum alia evacuatio con-
tingat, non minus faustam progno-
sin dandam esse, cæteris paribus,
quam si in aliis, aut per solum sudo-
rem, per solam hæmorrhagiam, aut
sola sputa, aut alvum, morbi expel-
latur materies.

§. X. Cum ex omnibus hucusque dictis pateat, quod ad crisin bonam determinandam oporteat dies morbi accurate notare, adeoque morbi principium exacte definire; haud citra difficultatem id efficere sæpe non possumus. Non raro namque apud multos, potissimum plebejos, contingit, ut, seu ingenio, seu morbo, stupidi, ignorent qua die, qua diei hora, primum morbi experirentur insultum, & ut quotiescumque de integro examinentur, vacillent. Ubi nunc ab eorum Consanguineis, Necessariisve, id rescire non datur, res dubia manet. Hi tamen numero sunt pauciores. Dantur autem numero plures, qui initia morbi exacte teneant, sed ubi dubites utrum cum incommodis principio perceptis acuta, qua laborent, febris una occeperit, an vero accesserit postmodum.

Lassitudines spontaneæ passim adfuere; sed hæ Aphor. 2—5. æque morbos futuros denuntiant, quam præsentēs. Dolores Capitis, artuumque, inappetentiam, nauseam, haud minus Acutos morbos præcedere, quam comitari, docent nos ægri, qui ab ipso nos convocantes principio, hæc symptomata sæpe ante primum febris insultum patiuntur. Ambigui itaque sæpe hærentes in Nosocomio, Oraculum pro more consulimus.

Epid. 3. pag. 1106. *Herophytus* rectus incedens, ὀρθὸς αἰδῶν, & obambulans, capite autem dolens, videtur jam a principio febricitans ab *Hipp.* credi, ex symptomatum, quæ a principio cephalalgiam concomitabantur, syndrome.

Sed ibidem pag. 1111. *Apollonius* videtur diutius ante febrim male habuisse, erectus licet & obambulans; acu-

tæ autem febris initium non habuisse, arbitro *Hippocrate*, nisi quando per intempestivum potum, intempestivumque carnis bubulæ esum, inciperet incalescere.

Mulier in Thaso morosa & aspera
 Epid. 3. pag. 1108. die prima incommodi percepti, licet erecta & obambulans, ejusmodi symptomata habuit, ex quibus *Hippocrates* febris inchoamentum cum prima symptomatum origine notaverit.

Qui post cænam in somno horrore correptus, Epid. 7. pag. 1230. surrexit mane capite gravis, horruit, vomuit, gravitas capitis perseveravit, sub noctem remisit, ad usque secundi diei meridiem. Rursus inhorruit tum, noctemque tulit molestam. Haud tamen ante tertium diem symptomatum horum, cepit *Hipp.* febris acutæ notare initium, quæ demum, ut

videtur, ad 14. diem morte terminata est. Facile nos in Historia ægri febrim initio jam adfuisse suspicaremur, sed *Hippocrates* ex signis quæ hic non memorat, v. g. ex defectu caloris, ex pulsu, certus fuit, quod hominem non sit, nisi tertio die, aggressus.

Epid. 7. pag. 1231. Anamnesin refert *Anaxenoris*, quod Lienosus scilicet & pravi esset coloris, quodque obortus sinistro in femore tumor de repente evanuisset. Data hac Anamnesi, morbum præsentem sic infit:

„ Neque multis post diebus ad Lienis regionem exorta est illi per initia veluti Epinyctis, insuperque tumor, ac dura rubedo. Post quartum autem diem Febris ardens suborta est, & in ambitu omnia livida apparuere, ac veluti putrida. Mortuus est leviter antea pur-

„ ga-

„ gatus, mentisque compos. „ Vel ægrotum ante quartum diem vidisse *Hippocratem* oportuit, vel ex *Theſſalo*, *Polybio*, *Draconte*, aliisve, historiam morbi adeo accurate tenuisse, ut *Epinyctidi*, rubroque tumori febrim defuisse, eamque haud nisi post 4. diem accessisse, statuerit.

Epid. VII. pag. 1238. *Epicharmi* puer primo die necdum febricitasse videtur, sed a *pepsiam* contraxisse, id est cruditatem ex deambulatione, qua excalesfactus supponitur fuisse, & ex potu, quo frigido æstuantem ex motu sanguinem condensaverit, omnemque perspirationem suppresserit. Ab introversa transpiratione ad Ventrículum Nausea orta Vomitusque. Altero die anxietatem passus emeticum sumsit ex aqua cum aceto & sale. Post pituitæ vomitum, rigor primum ac febris accessit. Tertio die febris

ma.

major. Quarto die morbi totius, scilicet tertio die febris, mors.

Epid. 3. pag. 1070. *Philistes in Thaso* diu capite doluerat, & soporosus ante morbum acutum decubuerat: Morbi vero acuti, cujus die 5. obiit, initium *Hippocrates* notavit duntaxat ex quo in morbo abusus potibus esset.

Hisce, similibusque muniti observatis, dum minime stupidi ægri sunt, probeque existunt memores antecessorum, exacte, opinor, determinare novimus, utrum cum ipsis primis perceptis incommodis, an vero postliminio ortus sit, quo laborant, morbus acutus. Febris enim indicia, majore calore, cæterisque symptomatibus fociata, hic juvant; licet plures pauperum suos, quibus victum quæritent, labores, per unum, pluresve dies, adhuc continuarint. Dif-
fitendum tamen non est dubium su-
per-

peresse nonnunquam tale, ut incertitudo per totum morbi decursum perseveret, nec morbus ad demonstrationem regularum Hippocraticarum ullo modo sit accommodandus.

Quæ si ita se habent, an non capimus, quam inique nonnulli Hippocraticarum legum de diebus criticis inconcussam negent veritatem & constantiam? Si primo non utantur prudentia *Hippocratis* in determinandis Acutorum initiis; si secundo non absterinent ab applicandis hisce regulis ad casus incertos; si tertio, ut bene notat optimus *Baglivus*, contra Leges Hippocraticas naturam præpostera medicatione interturbent; habebunt unde perpetuo in *Hippocratem* invehantur, dum in se solos invehi illos oportèret, dumque suis invectionibus falsis *Hippocratem* magis confirmant, quam oppugnant.

§. XI. An, Crisi bona contingente, certo determinare possimus, utrum ægri perfecta judicatione absoluti sint, an vero recidivam timendam habeant, aliosve morbos?

Ne absolute unquam hic determinant, Auditoribus meis Autor perpetuo sum. Exceptis enim casibus, ubi Epidemiæ natura talis est, ut omnes fere recidivent, qualem *Hippocrates* sic describit Epid. 1. pag. 956. 957. „ Haud scio an eorum cui-
„ quam, qui superfuerunt, rite factæ recidivæ non recurrerint, omnesque, quod sciam, servabantur, quibus hoc recidivæ genus contin-
„ gerit : „ exceptis observatis Epidemiæ, in qua vix recidivæ apparent, qualem *Hipp.* describit Epid. 2. pag. 1020. ajendo. „ Nec nisi admo-
„ dum paucis recidivæ contingebant : „ hisce, inquam, exceptis,
in-

innumeræ causæ existunt, quæ recidivam morbi ejusdem, quæ morbos ex acuto alios, quæ demum cum optima crisi mortem inferre queant; adeoque summam in præfagiendo nobis inculcent prudentiam. Causæ hæ ab ipso morbo petendæ sunt, ab ægro, ab assistentibus ipsi, a Medico, ab errore Pharmacopæi &c.

1^{mo} Ab ipso morbo vel corpore morbofo pendere ejusmodi casus, docent nos quotidiana observata. Novi ex regulis criticis requiri criticæ evacuationis eam constantiam, ut omnis morbi materies de corpore expellatur: Quis porro Medicum certiorem reddet fore ut, quam laudet, quam gaudeat, critica evacuatio, ejus sit constantiæ? Ex causis nobis ignotis; ex non sufficiente virium expultricum robore; ex facili recessu materiæ per circulationem motæ in nobiliora lo-

ca ; ex angustia finium minimorum canalium, quos permeare critice motus, expellendusque humor, debeat ; optima crisis quæ gaudia excitaverat, in luctum vertit. Ne longus sim, qui Historias ægrorum apud *Hippocratem* attente revolvit, pluries has similesque bonæ, sed non perennantis, crises, reperiet causas.

2^{do} Ipsi ægri vix judicati, animi passionibus, errore regiminis, diætæ, imaginatione venerea &c., bonæ suæ perdunt judicationis effectum. Cur *Philonis filia*, quo ipso die optime judicata erat, periit ? Intempestive cœnando debilem obruerat naturam, vasaque debilitata sua copiosiore chylo infereiverat, quam illa essent transmittendo. Quare *Moscho* die 14. ut debebat, bene judicato, tam pessima recidiva ? ἀμαρτὰδες βρωμάτων ἐγένοντο : Die 17. errata in cibo.

borum ratione contigerant. Cur *Scopus* Epid. 2. pag. 1028. post crisin *Synanches* inciderit in alvi segnitiam, febrimque continuam? *Φλαύρως διατηθέντι* respondet *Hippocrates*: improba utebatur diæta. Si aëre nimis libero utantur, dum v. g. crisis per sudores fit, continuat, imo aliquando, ut *Sydenham* in quodam morbo advertit, 24. horis perseverare debet, aër frigidior imprudenter admissus omnem nostram spem ilico fallit. Præterquam quod aëris mutatio spontanea morbos mutet, eorumque symptomata. Fuerat *Perinthi*, Epid. 2. pag. 1020. aër in Epidemicis morbis siccus diu calidusque; ast cito mutatur in humidum a copiosa minutissimaque pluvia: tanta hinc in acutis mutatio, ut qui iis non nisi ad finem contigerant, sudores, jam ægros ab initio invaderent. Ponamus tale

quidquam contingere dum v. g. nunc fit critica per alvum aut urinam evacuatio : mollitudo cutis aëre calido humente nata , allicit motam per circulationem morbosam materiem , quæ forte , apta quidem ut systemate mēfenterico , aut renali , excerneretur , minus apta erit , quæ per cutaneos evacuetur poros , crisimque sic turbatam monstret.

3^{tio} Ab iis , qui ægro adsint , inserviant , adeant , turbari critica evacuatio potest. In irato ob uxoris morositatem viro , in alio quem uxoris cum alio viro adstantis zelotypia torquebat , visitantium hominum importuna multitudine , vidi anxietates ortas , crisesque turbatas. Nec desunt , qui res eo tempore haud concedendas ad manducandum aut bibendum suadeant , obtrudant ; id quod ne Medico subolsiat sæpe religiose cavent ;

vent; sique ille quid suspicatus, interrogaverit, præfracte negant, culpamque turbatae naturæ in Medicum impudenter refundunt. Cum a tot tantisque rebus fortunata judicatio morbi turbari queat, quis non videat, quam plena dubiæ aleæ sit, quamque circumspectum esse oporteat in prognosi?

4^{to} Ad evacuationes criticas a Medico medicamenta, quæ eo usque data fuerant, incaute continuata, imprudenter ablata aut mutata; evacuatio critica quod nimia crederetur, suppressa, imminutave, vel quod minor falso supponeretur, imperite aucta; nimia Medici in usu alimenti aut potus, indulgentia, virium intentione restaurandarum, ut ad laborem sustinendum æger sufficiat; aut diæta continuata, quæ in vigore morbi bona, jam insufficiens est; famu-

lorum Pharmacopolaë forte errores in paranda, apportandave, medicina, & millena id genus alia, criticam evacuationem turbare, minuere, augere, sufflaminare possunt.

5^{to} Quid quod Crises sint, quæ videantur perfectæ, nec tamen sint? Quæ sanitatem reparasse appareant, nec reparaverint tamen? Intereaue temporis homines quid vitii in corpore alere minime credantur, & nihilominus alant? Hoc genus vitia nonnunquam a bona natura sic coqui, alvoque, aut urina, aut perspirationis organis, tam blande eliminari, ut æger prorsum ignoret, credibile omnino est; sed sæpius post simulatam aliquantisper sanitatem, varios in morbos erumpere, testatissimum est. Desumatur a Variolis exemplum. Hisce sic defuncti, ut perfecta valetudine frui videantur, si ve-

na tundatur, fundunt æmulum pleuriticorum sanguinem. Cum omnibus propemodum Variolosis meis, Sydenhamo docente, semel, bis, ter, accuratis variolis sanguinem detraxerim, potero centenis confirmare, quod hic assero, exemplis. Porro ejusmodi cruor in corpore circumductus, videtur in multis sic sensim subigi, ut attenuatus insensibiliter eliminetur, aut etiam sic, ut diathesin phlogisticam amittat; attamen, quod dolemus toties, potest subitaneis in cute tumoribus furunculos generare, abscessus ad articulos, ad oculos inflammationes, suffusiones, cataractam, amaurosin; ad aures baruëkoiam, surditatem; ad pulmones aut vomicas, aut puris continua sputa, variaque ad viscera & partes, alia atque alia, formidandos morbos creare. Haud eget confirmatione Thesis, quam, heu nimium!

mium! demonstratam mecum dolent omnes practici, si post variolas venæ sectiones negligantur. Multi quidem inter variolarum curationem & erupturos postea morbos, languent; verum non defunt plures, qui, ut monebam mox, ferant hanc diathesin insensiles, inscii, usque ad tempus, quo alius inde erumpat morbus.

Sane miri casus, quos suppeditat praxis, millies mihi in memoriam revocant sententiam *Hippocratis*, quam inexperti rident, experti mecum verissimam agnoscunt. Libr. I. de Morbis pag. 456. de Abscessibus agens, qui multis in pulmone, sæpe letales, nascuntur, addidit „esse, qui ob bonum corporis habitum eodem in se fieri, ne sentiant quidem.,. Binos memorabo quos hac æstate habui casus. Vir nobilissimus in Moravia, totus torosus, ac sanus, vomicarum
in-

ingentium in thorace latitantium prorsum ignarus vixit, donec in prandio ab officulo aviculæ imprudenter quidem, sed feliciter, deglutito, maximas pateretur angustias, & sub conaminibus extrahendi officulum excitata tussicula, subito pus expueret, horrende foetidum, ad plures libras; post aliquot dierum quietem denuo plures libras, atque sic per 7. 8. vices, ut vix ausim describere dolium, quod pure plenum eo tempore evacuassee se æger affirmet. Norunt mecum casum bini celebrandi in arte Viri, qui ægrum tractantes, mecum super eo sæpius consulere, Doctissimus Sagar Physicus, meritissimus Circuli Iglavienfis, Botanices simul ac Historiæ naturalis eximius Cultor; & Doctissimus Dominus Magh, Archiater Nobilissimæ & Excellentissimæ Comitissæ viduæ de Liechtenstein, in praxi medica co-

lenda & promovenda eminens : & quod magis mirabar, bimestri spatio vix inde exacto, vidi Nobilissimum Comitem in prædio meo suburbano me visitantem, adeo sanum, & terosum, ut quid in ejus valetudine culparem, invenirem prorsus nihil. In Curatione ejus Lac, Aqua Selterana, Mel, Opium, Cortex peruvianus, primas tenuerunt.

Dixeram diathesin phlogisticam longo tempore in corpore circumlatam, haud raro, absque formato primum sacco, ex sanguine videri immediate transsudare, dilatata vasa pulmonalia, aut bronchialia, atque purulentorum sputorum forma expui, ut incautis vomicae pulmonalis videatur evacuatio esse, idque ideo præcipue quod longiore sæpe tempore hæc continuet sputorum ejectio. Casus plures variis in *Rat. Med. tomis*, Ana-

tome demonstratos, communicavi; dabo alium confirmatum sanitate. Nobilissimus Vir ex Rheumatismo dimidii anni, ex Morbillis deinde, & Angina, incidit, anni abhinc spatio, in magnam debilitatem, & in induratum valde hepar, deinde in febrim tertianam. Solvente ac deobstruente remedio, succis herbarum potissimum, curata febris fuit; iisdemque remediis, aqua selterana, atque continuato cataplasmate ad durum epigastrium, hepar denuo molle factum est, vires rediere, somnus, appetitus; ut demum declinante æstate munere suo publico fungi æger, itinera quotidiana curru, aut equo, sanitatis ergo, peragere potuerit, & exceptis flatibus sæpe torquentibus, integram videretur sanitatem adeptus. Ast subito, ineunte Septembri, raucus fit, moxque tussiendo pus coctum album

copiosum commode, unica tussicula expuere cepit, & toto mense Septembri & Octobri continuavit, sanitate interim, liberrimoque semper pulmone, perseverante. In Excellentissimo Comite priore latuit omnes enormis copia puris, vomitis contenta pulmonis; in Posteriore, diathesis purulenta sanguinis magna & copiosa, non nisi numerosissimis innotuit sputis.

Ergo dubia prognosis danda semper est, bona quamvis fiat evacuatio critica, & nunquam post eandem, dum videtur absoluta esse, nimia indulgentia erga ægrum utendum: ne nostra culpa quod forte insensibiliter exivisset, vel recidivam, vel novum morbum faciat; neve in ipsam Medicinam, aut Medicos, refundatur recidivæ, aut deterioris, causa.

Addere juvat historiam ægrotantis letalem, quæ tum per se singularis est,

est, tum egregiam facit plerorumque hucusque dictorum ἀνακεφαλαιωσιν.

Femina 27. annorum, quæ veris variolis bis se laborasse asseverabat, leviolemque dabat virulentæ gonorrhœæ suspicionem, morbos acutos pluries perpeffa, menses suos aliquando interruptos, semper irregulares tempore, copia autem paucos, habens, tandem 15. Augusti proxime elapsi horrore ac frigore, spatio 5. horarum corripitur, magno succedente calore. Tristi necessitate coacta, lassum suum ac dedolatum corpus ad hortenses labores iterum admovit, superstite ad prandium & cœnam aliquo appetitu. Die altera laborem hortensem eadem difficultate profecuta, tandem die tertio ingravescente morbo lecto surgere non potuit, æstû laborans ingenti, siti intensa, cephalalgia, apositia, artuum omnium dolore, vigiliis, &c.

Pul-

Pulverem quo sudaret fumsit, modice sudavit. Die quarto maculis rubris sibi cutem tingi advertit, vespere evanescentibus. Die quinto maculæ renatæ; pedes, manus, venter, pauculum intumuerunt. Die sexto eadem. Huc usque & alvum quotidie habuerat, & nunquam dormiverat fere. Die septimo inchoante, mox ubi ad Nosocomium SS. Trinitatis adducta esset, ad nos adferebatur.

Femina hæc quamvis primis morbi diebus labores suos profecuta esset, erecta & obambulans, ὀρθοσταθῆν, ex regulis tamen a pag. 73. ad 80. datis judicabatur a nobis acute ab ipso initio laborasse, adeoque acuti ac maligni morbi diem nunc septimum agere. Cum in summo æstu, notante thermometro Fahren. in umbra gradum 81. caloris, febriente corpore laborans valide sub dio, tenuiora humo-
rum

rum suorum dissipasset, incretasset reliqua, dein sine auxilio bono, cum intempestivo sudorifero, jacuisset, mirum minime est petechias accessisse, morbumque evasisse malignum.

Symptomata porro, die 7. inchoante, hæc invenimus; cephalalgiam, artuum gravitatem, vehementem sitim, cutem aridam & urentem, aridam linguam, respirationem difficilem, fortem ac celerem pulsum, ventrem tumidulum, dolorem, attactu auctum, in latere dextro, eoque inferiore, thoracis, petechias tandem, & ad femora vibices, quæ tamen ex aliquot horis coloris intensitatem multum dimiserant.

In toto morbo, undique examinato, nihil non crudum. Petechiæ, & errore natæ, &, quod morbus indies ingravesceret, vere symptomati-
cæ; ergo tuto, *Sorbaitii* consilio, negli-

gligendæ, ac si non adessent; & febris acuta, tanquam plane cruda tractanda. Unde vena secta est, diluentia, nitrosa, expectorantia remedia præscripta, cataplasma dolentibus adplicitum locis. Post V. S. respiratio paullo facilior fuit; petechiæ, quæ jam illi ad nos intranti minuebantur, plus disparuere, vespere vero, quamvis in parvo somno levio-rem sudorem, humidamque postea ac calidam cutem haberet, vix ultra nisi ex vestigiis relictis cognoscebantur.

Vespere cum calore 102. graduum Cephalalgia ingens, & ferme suffocans Respiratio, alteram V. S. suaserunt. Symptomatum inde remissio.

Inchoante die octavo, licet calor 100. gradum thermometri non trans- cenderet, febris tamen magna fuit, pulsu minus, quam pridie, suppres- so.

fo. Perseverantibus Ventris utcumque doloribus, continuatum cataplasma est, & injectum emolliens enema, quod copiosa stercora solvit, eduxit.

Suffocans respiratio, quæ die 7. ad meridiem, & ad seram vesperam affuerat, hoc die octavo ad 9. matutinam minus violente, ad 2. pomeridianam post levem horrorem violentissime ingruit, ita ut, ne suffocaretur penitus ægra, tertiam V. S. tentaremus: verum vix fluente sanguine, & imminente animi deliquio, sub stragulis reposita est, & aceti frigidi aspersione ac frictione sic recreata, ut facilius respiraret. Calorem notabat tunc eo, qui pridie, majorem; graduum scil. 104., percipere se affirmabat sub sterno corpus veluti durum, ac dolens, quod in paroxysmo auctum respirare prohiberet.

Ex his phænomenis fufpicati, ne præter acutum morbum, fpasmodici quid respiratorios afficeret nervos, dedimus inter remedia dicta nonnunquam lene neuroticum, fpiritum C. C. fuccinatum, miftum cum tantillo Diacodii, & admovimus Veficantia. Nihilominus ad mediam feptimam fubdelirare cepit, valde febricitavit, vehementer fitivit, & cum cute primum jam humida fudare cepit ad oétavam, fudore per totum corpus profufo, cum fomno perturbato. Urinam tunc reddidit, quæ boni coloris enæorema fufpenfum habuit. Nox valde inquieta, quietior ad Auroram fomnus parum modo læfam refpirationem ostendebat. Mane febris minor, & calor tantum 100. gr. Veficantia operabantur.

Signa bona plura hic aderant. Sudor, poft horrorem, univerfus, fym-

pto-

ptomatum emendatio, somnus tranquillior, febris sedatior, calor minor, bonus Vesicantium effectus, urina bona.

Verum contigerant hæc media octava morbi die, quæ non critica: Coctionis signa ante sudorem non adparuerant, & dies 9. continuis omni hora variantibus anxietatibus pectoris, & febribus, transacta est. Ergo nihil critici in sudore prægressio. Porro hoc 9. die observavimus dormienti, quam vigilianti, respirationem liberiores, quod acuto morbo spasmodorum adjunctorum confirmavit suspicionem. Interim hoc toto die pulcre fluxere vesicantia, bonique fuit urina coloris, calor 101. gradum tantum notavit. Nox insequens molesta, sudor frequens.

Die 10. inchoante pulsus fortis ac celer, ad meridiem moderatus; ce-

phalalgia continua toto morbo, sudor indefinens, apositia. Post meridiem permutationes perpetuæ respirationis ac febris, cum somno, ut videbatur, placidiore, aliquoties capto. Enema alvum copiosam, stercoraceam, eduxit.

Subnascebatur interim suspicio num febris hæc referenda non foret ad speciem illam, quam Libro *de Februm divisione* Capite 9. descripsi, quam postea vidit, accuratissime descripsit, feliciter curavit, egregius *Lautter*; qualis si foret, cortex peruvianus ilico præscribendus esset.

Verum species illa febrium ad intermittentes urinis, ac maxime pulsu, referendam se esse docet; nostra febris erat continua remittens utroque hoc signo. An vero etiam in continuis remittentibus, si malignitatem redolerent, non dedimus sæpius sum-

mo cum effectu Corticem ? Utique daturus fuisssem, nisi bonæ eousque & naturales urinæ circa tertiam matutinam, mox instante 11. die in vere Hypostaticas pulcre mutatæ, jussissent paulisper expectare eventum morbi.

Die igitur 11. vere critico, post hypostaticas urinas, placidus somnus, faciliior respiratio, multus, isque universus sudor, sputa pauca glutinosa. Hocque die quinquies missæ urinæ, habebant omnes sedimen album, læve, æquale, copiosum. Febris moderata sic, ut post meridiem vix ultra perciperetur.

Igitur habebamus hic plurima bona signa, quæ bonæ Criseos, criticæque evacuationis, certitudinem ad salutem indicabant; siue evacuationes sudorum & urinarum, primumque apparentium sputorum indicium, siue in-

signem morbi, ejusque symptomatum, emendationem, intuearis.

Principiis vero imbuti Hippocraticis, (vid. pag. 81. n° 1.) cavimus a certitudine prognoseos, visuri num bonorum signorum gauderemus constantia. Prudenter sane: nam ad 8. vespertinam reversio anxietatis in respirando; quæ ad 10. remissior, tandem ad 2. adeo vehemens, ut intra horam vitam una ademerit.

An malum, postremos sudores prægresso caruisse horrore? Sed alvus per totum morbum libera fuit. Vide a pag. 9. ad 12. An spasmi motam, & critice probe excernendam, natura tamen sua crassiolem, materiem morbosam, sic in angustiis pulmonum compresserint, ut tota simul substituerit Circulatio? Nunquid, simili casu denuo se offerente, cortex peruvianus non foret audacter ab initio

exhibendus, tanquam antispasmodicorum princeps? Si optime hypostaticæ urinæ formidolosæ se ostendant aliquando, ut hic, ut & ex *Hipp.* pag. 48. & seq. patuit, an non imprudenter imitemur *Galenum*, tantopere bonis fidentem urinis, ut ex iis solis prognosin credat posse formari?

CAPUT III.
DE MORBIS ACUTIS
CUM
PETECHIIS, AUT MILIARIBUS.

§. I. *Petechiæ & Miliaria rarissime, si unquam, Critica sunt; frequentissime Symptomata; symptomaticorum vero plurima factitia: quod quamvis demonstratum pluries, nec dum animis patrum evellere errorem potuit.* §. II. *Hinc natæ Tironum objectiones, & scrupuli, contra demonstrata. Objectio 1^{ma} de Aphthis est. Ostenditur hanc ipsam objectionem evincere*

tum Miliaria facilia esse, tum brevi occidua fore. 2^{da} Obiectio ponit si, quæ de calida Methodo, ut Miliaria generante, dixerim, vera essent, Miliaria & antiquiora, & universaliora esse oportere: Respondetur argumento a pari, quo obiectio refutetur. 3^{tia} Obiectio supponit, quamvis Viennæ calida Methodus vix in usu sit, tamen & in urbe, suburbiisque, & in omnibus Nosocomiis, etiamque in meo, Miliaria frequentissima esse: adeoque falsum esse, quod eadem generet calida Methodus. Respondetur, salvo honore multorum præstantissimorum Viennæ Medicorum, multos medicos, ipsamve plebem, vel utrosque, aut calida medicamenta, aut calidum regimen, aut utrumque, vehementer amare: deinde præterquam a calida methodo, etiam pluribus aliis de causis illa generari: Falso accusari meum Nosocomium, demonstrari Diariis hic communicatis; utpote quæ & rarissima in illo Miliaria, & semper Symptomata fuisse, doceant. Animadversio in imperitos, qui maculas rubras, & sudamina, cum Petechiis & Miliaribus inepte confundunt. 4^{ta} Obiectio statuens exanthema hoc, ob regularem
oriun-

oriundi, crescendi, decrescendique tempus, criticum dicendum esse, nihil probat: id textu Hippocratis, plura alia adhuc docentis, ostenditur. 5^{ta} Objectio supponit ideo critica esse Miliaria, quod eadem moderari, mutare, minuire non liceat, ut quidem id, quod vere symptomaticum: Respondetur summo ægrorum emolumento, & licere, & oportere. 6^{ta} Objectio comparat illa cum Variolis & Morbillis, ponitque male a me negari, quod ut hi illis, sic illæ his, superveniant: respondetur paucis exceptionibus regulas universales non destrui: adeoque jure me negasse. 7^{ma} Objectio Me ipsum ut idiopathica descripsisse: respondetur negando. 8^{va} Objectio condemnat mea in Miliari febre Methodum, V. S. Educationem ægrorum ex lecto, Vesicantia, &c. Respondetur demonstrando V. S. necessitatem apud Germanos, deinde Sydenhami exemplo, a Boerhaavio & Illustrissimo Præfide laudato, meam methodum commendari. Vesicantia id non facere, quod supponit objectio, demonstratur observatis; verus demum illorum usus & effectus ostenditur. 9^{na} Objectio niti-
tur testimonium Fr. Misericordiæ anni-

hilare; probatur non modo verum fuisse, sed novis constare & firmari experimentis.

10^{ma} Objection agit de omisso maximam partem in latino Lautteri textu gallice reddendo. Respondetur quod incuria fecerim, idem vitium in eodem textu gallice reddendo paulo inferius commissum esse ab iis, qui ob id me carpant. 11^{ma} Objection spectat contradictiones notatas in Libro Doctissimi Domini Hazenohrl: Responsio demonstrat, aut imaginarias has objectiones esse, aut malevolas. Objection 12^{ma} De usu candelæ ad detegenda miliaria, & responsio. Objection 13^{ma} supponit me perperam Hoffmannum, Fuchsum, Triumphum, in meas partes laudasse; respondetur laudari in meam sententiam debuisse, eo quo laudavi sensu, non vero in eo sensu, quo Adversarii velint, & qui meus non fuerit. §. III. Epilogus hujus capituli necessaria.

EX quo Medicinam, idque Viennæ potissimum, feci, per Observationes, quas in Nosocomio meo, & apud Ægros in Urbe atque Suburbiis in consilium vocatus, plurimas habui, du-

dudum didici duo hæc : 1^{mo} Clarissimum meum in Cathedra Viennensi Antecessorem, & Augustissimæ Imperatricis ELEONORÆ Archiatrum, *Paulum de Sorbait*, ante 100. fere abhinc annos, verissime de *Petechiis*, extra Pestim contingentibus, scripsisse *Univ. Med. pag. 541.* quod essent motus noxius ac symptomaticus; & pag. 545. *Expulsio symptomatica*, cujus tam parum noxia esset retardatio, ut extantibus iisdem venæ sectio tuto institueretur. 2^{do} Incomparabilem Sydenhamum 80. abhinc elapsis annis in *Schedula monitoria* justissime non modo similia de *Petechiis*, de *Maculis purpureis*, & de *Miliaribus*, testatum esse, verum etiam raro a natura, sæpius mala arte extorqueri, luxisse.

Hinc elapsis propemodum quatuor annis in Dedicatione Thesium de Div. Febr. ad Auditores meos hæc dixi :

„ Dan-

„ Dantur Exanthemata Petechialia, &
„ Miliaria *Critica*; dantur mere Sym-
„ ptomatica; dantur denique *Acciden-*
„ tia, aut *Accidentalia*, ut vocant, pra-
„ va arte producta. Pestilentiosis
„ temporibus *Critica* frequenter, fre-
„ quentius *Symptomatica*, describun-
„ tur Autoribus: tempore autem mi-
„ nime pestifero, Exanthemata hæc
„ tum *Critica*, tum *Symptomatica*,
„ rariora sunt, *Accidentia* vero, fa-
„ tali scilicet arte genita, frequen-
„ tissima.

Post editum hunc librum, magis
convictus fui, magisque, de tanta
utriusque Exanthematis, veluti critici,
raritate; ita ut vix critica dari, spon-
teque generatorum Exanthematum
pleraque, ac fere omnia symptomati-
ca esse; cæterum symptomaticorum
in *Germania* numerosissimorum plera-
que esse factitia, audacter statuam.

Hinc

Hinc in omnibus fere quæ edidi opusculis medicis, hanc veritatem proposui, statuminavi, unguibus defendi rostrisque : ut demum omnes, qui Medicinæ addiscendæ causa ad inclytam hanc Universitatem confluunt, dictis convicti factisque, ad extinguendum hoc pessimum, ac sæpe letale symptoma, animum admoveant, dum ipsi per sese praxin exercebunt.

Sed altiores egit radices patrius error, quam ut exantlatis hucusque laboribus evellatur animo. Id me docent ipsi Medicinæ Tirones, quos conversatio cum Vetustioribus Medicis, quos male relata exempla, quos horror omnis ejus quod novum dicitur, licet sit præjudicata opinione antiquius, ita præoccupavit, ut sylvam objectionum collectam mihi sæpe objiciant, ad quas toties responsa ipsis dedi, quibus videbantur convicti

re-

recedere; haud ita tamen, quin convictionis obliti, sæpius ad me redirent, crambem recoquentes antiquam.

Cum porro salus publica suprema Lex sit, & cum Nosocomii nostri Diariorum collectiones, quas opuscula *de Rat. Med.* referre solent, in usum Studioforum præcipue evulgentur; operæ pretium erit, in hoc octavo ejusdem operis Tomo, easdem tum amplius evulgare, tum elucidatius exponere, ut demum omnis de illorum animis auferatur hæsitatio. Quo autem utilius atque efficacius id exequi possim, putavi nihil ad id accommodatius fore, quam recensitionem earundem objectionum, quas mihi contra meam sententiam opposuerunt, & ad quas responsa, quæ dudum dederam, nondum rite intellexisse eosdem deprehendo. Nosocomii obser-

vata

vata simul ad objectiones easdem dirigam, & applicabo.

I. Objiciunt mihi sæpe problema, quod Ill. Med. Præses L. B. *van Zwieten*, capite *de Aphthis*, Medicis proposuit illis, quibus occasio rem propius examinandi, quam sibi, ut Archiatrorum Comiti, liceret, frequentissima adesset; *utrum scilicet Miliarem morbum inter, & Aphthas, tanta intercederet affinitas, ut quod apud Belgas Aphthæ, id Miliaria apud Germanos essent; unde concludunt non posse Miliaria dici factitia, quia factitiæ non sunt Aphthæ.*

Quidquid ex problemate concluditur, æque problematicum manet, quam problema ipsum. Verum demus non esse problema, sed demonstrationem; quid inde? Profecto Miliarium in *Germania* ruinam necessario præfatur.

Belga natus, & spatio 19. annorum luculenta ibidem praxi exercitatus, certi quidquam & novi de Aphthis proferre potui; utpote qui pluribus annis posterior magni *Boerhaavii* in Coll. Pract. Auditor fuerim, quam Ill. Præses; & qui integris novem annis post Ill^{mi} Viri abitum praxim ibidem exercuerim.

Aphtharum nomine quid intelligatur proprie, ex Definitione *Boerhaavii*, & Commentario Ill. Præsidis cuique notum est. Antiquitus videmus eo nomine potissimum intelligi puerorum morbum, & etiam exedentia Adulcorum ulcera, quæ cancri aquatici, vel ulceris Nomæ nomine, nunc describimus; minime vero aliquod symptoma, vel evacuationem criticam, quæ in acutis creberrima conspiceretur, ut quidem postea. *Forestus* in Belgio potissimum sic de Aphthis

this agit, ut dixi : addit vero Libr. 14. in Scholio ad Obs. 22. : „ Ast
 „ Aphthæ quæ in febribus & in mor-
 „ bis acutis, & in Pestilentia, & quæ
 „ frequentius in periculosis febribus
 „ apparent, ex flagrantibus exhala-
 „ tionibus etiam in peripneumonicis,
 „ ut sæpe vidimus, raro non diro
 „ augurio spectantur. „ Sennertus
 in Germania prax. Lib. 2. Part. 1.
 cap. 18. ut infantum morbum de-
 scribit; sin vero adultos occupat, ad
 malignitatem morborum acutorum
 refert.

Ex quo vero Regimen & Medica-
 menta calida *Belgis* per integrum fere
 sæculum acceptissima fuere, Aphtha-
 rum frequentia tanta ibidem fuit, ut
 gauderent Medici & ægri acutum mor-
 bum quandoque sine Aphthis curari.
 Luxerat quidem diu infamem ob illas
 Patriam suam *Boerhaavius*; verum

triennio ante sua fata vidi, audivique, venerabilem Senem gloriantem, & exsultantem, quod indies Aphtharum crebritas minueretur, spemque sui interitus daret, ex quo Hippocraticæ Methodo, multitudine suorum discipulorum sensim inductæ, inciperet, pergeretque cedere error antiquus.

Hoc adeo verum, ut ipse ego, ultimis Batavæ meæ praxeos annis, celebresque mecum in Patria Practici, testarentur, vix bis ter in anno Aphthas se in Adultorum acutis cernere morbis; læti ob id inprimis, quod inciperemus hoc modo carere ejusmodi in Acutis symptomate, quod criticæ evacuationis honesta appellatione vix esset recensendum. Equidem Boerhaave Instit. §. 938., & Aphorism. cap. de Aphthis, ad crisin eas retulerat; sed ad qualem? Ad difficilem, laboriosam, periculo plenam, ac sæpe

pe letalem; raro scilicet ortam a natura febris, sed, Aph. 991. probl. 3. *maximè si medicamenta, victus, regimen, calefacientia (aut adstringentia) initio hujus morbi data.* Agnovit eas absque calefacientibus nasci, sed simul ab iisdem nasci *maximè* asseverat. Ergo agnovit quoque aphthas *factitias*. Hinc minime in Collegiis mirabamur, quod magnus ille Vir, Sydenhamum imitatus, nobis tam serio inculcaret, ut in initio ejusmodi febris, quæ adjunctam Diarrhœam & Dysenteriam haberet, & in quarum fine alioqui essent adparituræ Aphthæ, purgans daremus, *quo ejusmodi Aphthas præcaveremus.* ibid. probl. 4. Si autem jussit nos Aphthas, ne nascerentur, præcavere, agnovit Aphthas negligentia medici *factitias*; Aphthas, inquam, quæ in fine morbi haud affuissent, si Medici in morbi principio suas partes

explevissent. Eodem prorsus modo hic *Boerhaave* egit, quo ante 100. fere annos *Sydenhamus* agebat, dum *Bubones*, *Parotides*, *Antraces*, periculosas sæpe febris pestilentialis crises, tam salutariter sudore 24. horarum, ac purgante, præcaveret, ut omnes inde feliciter emergerent; interea dum aliorum plurimi, quibus hæc Medici non precavissent, desiderarentur. Vid. de Febr. pestil. & peste ann. 1665. 1666. Eodem denique modo, *Sydenhamii* ac *Boerhaavii* sapiens exemplis, *Cl. Allionius*, *Miliaria*, in febre ad illa disposita, ne erumperent, præcaveri docuit, bina ternaque Venæ sectione, totidemque purgantibus; quam methodum ut saluberrimam toties expertus, vehementer laudat.

Itaque quo magis urgent *Adversarii* problema hocce, eo magis statuminant, & roborant, sententiam nostram.

II. Si

II. Si Regimen, & calida Medica-
 menta, miliaribus producendis apta nata
 forent, utique ad 16. sæculi initium,
 quo Sylviana Methodus florere incepit,
 necesse est tunc illa adparuisse, & ex eo
 tempore ubique, siquidem calida Metho-
 dus exinde universalis fuit.

Transeundo errorem in Epochā
 sylviana commissum, siquidem initium
 16^{ti} sæculi, imo vix illud 17^{mi} nec
 dum Sylvii videre natales, Virique
 opera prima ante 1664. lucem non
 viderunt; dicam calidam methodum
 dudum ante Epocham illam in Ger-
 mania viguisse. Sed his transmissis
 argumentum argumento opponam,
 quo ejusdem imbecillitas patefcat. Si
 congressus Venereus posset Luem ve-
 neream, ac Gonorrhœam, creare,
 hanc & illam creasset jam ante nume-
 rosa sæcula, siquidem semper obti-
 nuit ejusmodi congressus. Atqui an-

te finem sæculi 15. nullibi europæorum locorum morbus hic notus fuit. Ergo eundem producere congressus venereus non potuit. Est quidem ridiculum argumentum; sed quo objectionis ridiculitatem demonstret, necessarium. Utriusque autem facti, argumento utroque contenti, rationem rogatus, fateor responsi nihil me invenire, quam, quemadmodum finiente sæculo 15. morbi venerei, ab impuro congressu contracti, primò in Regno Neapolitano apparuere, & deinde reliquos ordine Europæos invasere, prout infectorum commercio succedente ordine utebantur; a qua tamen causa, licet antea millionesies & millionesies posita, Lues Venerea nunquam orta esset; sic post elapsi sæculi principium (eam enim Epocham figere Riveriana suadent,) nata Miliaria esse ex regimine calido, a calidis

lidis Medicamentis, ab aëre aut non, aut non sufficienter, renovato, ab eodem multorum hominum exhalationibus inquinato, ab interna corruptione humorum, illi simili, quam calida dicta generent, & forte ab aliis nonnullis causis; a quibus tamen causis nunquam antea generata essent. Mera observatio est, cujus causam neque in Purpura, neque in Lue Venerea, ingenio assequimur, naturæ utriusque corruptionis ignari.

III. *Frequentissima sunt Miliaria Viennæ, & in omnibus Nosocomiis, & in privatis ædibus, etiam quandoque reperiunda in meo Nosocomio. Atqui Viennenses Medici calida methodo tam parum utuntur, ut qui eosdem de illa accusaverit, videatur de Lana Caprina disputasse, neque ego certe calidis utor in Nosocomio. Ergo non est verum, quod ea calida Methodus pariat.*

Reservando mihi responsum ad ea, quæ de *omnibus Nosocomiis* objiciuntur, admitto Majorem, & ad Minorem, salvo semper honore plurium Vienneſium Medicorum, qui egregiam Methodum curandi adhibere ſolent, morbosque acutos, in quibus exanthema prodiſt, ſic curant, quaſi illud non aſſet, id quod mihi teſtati ſunt ſæpius; reſpondeo 1^{mo} formulas multorum Medicorum adeptum; certo me noſſe, & in *Nosocomiis*, & in Urbe, Suburbiisque, plurimos reperiſſe Medicos, qui calidis Alexipharmacis, copioſo præprimis Croco, ipſo Acutorum principio, perque univerſum eorundem decurſum, utantur, & hanc ſuam methodum publice laudare non vereantur, ut virus, quemadmodum *Hoffmannus* Medicis pravis exprobrabat, de corde pellant. Exant innumeræ formulæ Hofmannianæ
di-

dictæ mixturæ cum bona Croci dosi; formulæ Linctuum pro tussi catarrhali, quibus suspicione aut latentis, aut saltem futuræ exanthematis, Crocus est admixtus. Præfens in consultatione vidi celebrem Medicum, animadverso, ut postea patuit, culicum morfu, cardiaca calida ad exanthema, ut aiebat, foras ejiciendum, jam dedisse: methodo tamen a me, binisque aliis Collegis, in rationabilem mutata, æger absque vel minimo exanthemate brevi integreque convaleuit. Advocatus ad Consultationes, ærem nedum ægris, verum nec fanis, calore tolerabilem, sæpius deprehendo. Quin & animis adeo alte insitum calidi aëris præjudicium offendi, ut hora consultationis is, ne conquerer, moderaretur, moxque, abeunte me, incenderetur; quam fraudem, aliquando maturior inter-

pellans, detexi. Plures etiam boni Medici apud me conquesti sunt, quod, quantacumque diligentia aëris commendarent, curarentque temperaturam, tamen Vulgus æque nobile, quam ignobile, calidum perpetuo aëra, se abeuntibus, concilient ægris. An ergo falsum non est, quod, qui de hisce conqueratur, de lana cavillet caprina? An miremur, quod exanthemate infamem se Regia *Vienna* lugeat?

Resp. 2^{do} ut prava arte Miliaria, alioqui defutura produci, sæpe conquestus sum, ita luce clarius evici aliis occasionibus, haud sic calida medicamenta requiri, ac si, citra illa, Petechia aut Purpura gigneretur nunquam. Equidem etiam sine Medicamentis calidis aptum aëra esse, qui illa producat, calidiorem: adeoque a Medicis, temperatam Medelam
dan-

dantibus, Miliaria millies creari, dum aut studio imperent, aut conniventia tolerant, acute laborantes calido in aëre foveri perpetuo. Demonstravi pluries quoque Purpuram eorum sub cura produci, qui calidi remedii, calidique aëris ofores, vano interim metu ægros lecto sæpius eximere, eorundemque propriis inquinamentis in lecto fœdatam atmospheram sufficienter mutare, ac lustrare, religioni habeant. Generari forsitan eadem facilius dum in ægris, lecto vix mutatis, venæ sectiones fuerint omiffæ; five præ defectu necessariæ distinctionis veram inter imaginariamque debilitatem, five præ generaliore, quam par est, persuasionem insequuturi cujusquam nocumenti, si ægris Acutorum principio vena secetur, quando aut impetus humorum vehemens non sit, aut cutaneæ speren-

rentur, expectenturve, eruptiones. Præterea docuit experientia toties, absque calidis remediis, abs calido aëre, Miliaria & Petechias produci, quando plures ægri, eodem in loco collocati, athmosphæra mutua, aut non mutata, aut saltem haud sufficienter, ut in Bellis toties visum, vesci cogantur. Quin etiam omnibus sic a Medico directis, ut nullatenus exanthema gigni debeat, gigni nihilominus idem, dum qui jam prius istud vel in miasmate alibi concepissent, vel aliis explicitis de causis sibi comparassent, curandi susciperentur. Tandem spontaneam acutis in ægris humorum corruptionem, spontanea exanthemata, penitus tamen symptomata, & perniciofa, generare nonnunquam.

Cum ergo tot existant causæ, a quarum vel unica hæc exanthemata

ci-

citra naturæ operam produci queant, nonne iniqua prorsum argumentatione concludere velint, exanthema ideo datis de causis non gigni, si earum vel unica desit ? Eodem plane modo concluderet quis Febrim ardentem gigni posse nunquam. Optimus *Boerhaave* Aphor. 740. „Causa, inquit, (febris ardentis) labor nimius, iter longum, æstus solis, sitis diu tolerata, usus calefacientium, fermentatorum, aromaticorum, acrium, veneris nimix, de lassatio immodica, maxime æstate, &c. „ Sex igitur septemve varias, seorsimque subsistentes, febris ardentis causas enumerante *Boerhaavio*, licebitne negare hujus febris præsentiam, eoquod ad eandem præsentem sistendam ex his septem defuerit una, duæ, tres ? Ut febris ardens non gigneretur, deesse oportuif.

tuisset causas omnes : data autem earum vel unica , generari potuit.

Sic unà responsum habetur ad objectionem , petitam a viso quoque Exanthemate in nosocomio nostro. Nunquid ideo apud nos , citra bonæ naturæ operam comparere haud potis est , non porrectis licet medicamentis calidis ? Ordine adplicentur exanthematum recensitæ causæ omnes ad ægros , qui eadem apud nos acquisiverint , & capiet facile quisque , quod aut a degeneribus prorsum humoribus , aut proprio neglectu , aut suscepto antea contagio , subinde debuerint nasci.

Dedi in variis *Rat. Med.* Tomis catalogum horum , & omnium , qui unquam exanthematibus apud nos laborarunt ; ex quibus antequam demonstrationem formem , recentiora nonnulla prius enarrabo. Anno 1762.
fe-

feminam cum Miliaribus in nostro Nosocomio acquisitis ægram habui, idque hunc in modum: Per decem dies acutæ febris labore agitata femina, demum ad nos confertur. Die 15., non critico, Miliaria prodeunt notabili cum incremento morbi. Die 19. non critico, abundantior purpura. Die 21. non critico, post ingentem horrorem calor, sudor, copiosiora Miliaria; quæ & pauciora ante, & copiosiora post, Auditoribus demonstravi; eaque demum sic, ut die 24. moriente ægra, tum essent copiosissima, tum aliquantisper a morte, adhuc bene prostarent.

Anno currente, ad 8. Aug. juvenculam suscepimus, quæ cum continua febre ædibus expulsa, ad feminam pauperrimam sibi notam se contulerat, ibidemque citra ullum auxilium ad medium tertium diem jacuerat.

rat. Inde in quoddam Nosocomium, in quo Exanthematicorum legio, delata, sex horis citra auxilium, tantummodo plurimum tecta, ac probe sudans, mansit; inde ad nos sella portatili bene clausa conducta est, maculis petechialibus hinc inde jam conspicuis, pectore anxia & tussiculosa. Die 4. & 5. morbi alvus cocta biliosa, naturalis urina, sudor levis, febris pauca. Ad meridiem diei quinti febris admodum magna, valido cum sinistri lateris ventrisque dolore. Post factam sanguinis missionem obdormivit, ac sudore toto pomeridiano tempore diffluxit, maculis petechialibus inde non promotis, sed ita sensim obscurantibus sese, ut ad 9. morbi diem ulla vix relinquerentur vestigia. Quod autem notandum, post Venæ sectionem die morbi 5. factam, Crisis facta videbatur sudoribus

bus & alvo, ita quidem, ut bona indies perseverante alvo, cum urina existente passim naturali, semelque hypostatica, ad 10. diem inchoantem nullam prorsus febrem ultra deprehenderemus.

At vero 16. die mensis, Morbi die 12., non critica, notavimus alba quædam, eademque parva admodum Miliaria in pectore, at ita inconstantia, ut nunc conspicua, hora vix elapsa, evanida, pauloque post iterum visibilia essent. Idem morbi 13. die; perseverante interim, quæ ante Miliaria affuerat, sanitate. Die morbi 14. & 15. bene conspicua, sed minutissima. Die 16. 17. 18. 19. 20. mane quidem pauca, post meridiem vero plura. Die 21. mane plura, post meridiem pauciora. Die 22. vix visibilia. 23. nulla. Cum puella hæc post Crisin sana vixisset,

ita ut quovis die ambulans, & sedens extra lectum, nec ante eruptionem, nec sub, nec post illam, vel minimum ægrotasset, Templum 1. Sept. adivit, silentio supprimens levem ventris dolorem. E templo redux, vomuit, quæ comederat, fere tam integra, quam in mensa fuerant. Levem inde experta febrim, sudavit nocte multum, & sana surrexit, manfitque.

Dedi jam Cap. I. hujus Tomi historiam feminæ, quæ sub idem tempus, ad diem sui morbi 5. purpureis maculis extantibus, ad nos allata fuerat; septimoque die judicari visa, ingens posthac negotium nobis facesserat; & Cap. 2. aliûs, quæ a triduo Petechiis tincta, ad 7. diem ad nos conductæ, & ad 11. mortua est.

Ex cunctorum recensione decem homines, spatio decem fere annorum

numeramus, qui alterutrum Exanthema, aut utrumque, in nostro Nosocomio acquisiverunt. Horum porro decem, tres in Nosocomiis, exanthemate infectis, aliquantisper decubuerant; unus negligentia petechias sibi comparavit. Quinta ad peripneumoniam neglectam, extra ædes nostras, habuit Scarlatinam ac Miliaria, in Nosocomio vero variolas & petechias, a degeneratione humorum subtilissimorum summa. Sexta ex morbo maxime maligno, cum mictu cruento, fere desperato, petechias contraxit. In Reliquis, morbus acutus per 4. 6. 8. 10. dies neglectus, jam motu, calore, labore, sudore, in multos loci versus errores, malignitatem jam contraxerat.

Cum exanthematibus jam conspicuis quatuordecim ad nos allati sunt ex Nosocomiis aliis, privatisve ædibus.

Igitur spatio decem fere annorum 24. homines exanthematici in Nofo-comio nostro fuere : Octo scilicet exanthemate petechiali, quos inter cum variolis una ; undecim solo miliari : quinque utroque, eosque inter una cum pessimis variolis, affecti.

Horum quatuor diem eruptionis reliquere incertum ; novem quidem die aliquo critico habuere eruptionem, novem vero die non critico, duo in restituta post morbum sanitate : verum in horum nemine criticæ evacuationis notam sustinuerunt : aut enim in morborum acutorum incremento prodire ; aut si in statu, decrementove, cum symptomatibus pravis ; ita ut inde perierint nonnulli, copioso licet exanthemate tecti, pluresque sive Cortice Peruviano, sive Criticis evacuationibus aliis, sive utrisque, servati fuerint : aut judica-

to,

to, curatoque jam morbo, supervenere Miliaria, absque ullo præeunte, concomitante, subsequente, Symptomate.

Hisce igitur mature consideratis, capient facile Studiosi nostri cur morbus hic a natura raro, ab arte vel casu ut plurimum genitus, etiam nostro in Nosocomio compareat? compareat autem adeo rarissimus, ut utroque exanthemate simul sumpto, vix quinquies inibi biennali advertatur spatio? &, si numeremus eos modo, qui illud in Nosocomio acquisiverint, unicus modo singulo detur anno? Præterquam quod in hac enumeratione liberalem juniorum quorundam Medicorum in numerando modum de industria imitati simus, ne quid cavillemus; haud vero, ut eandem approbemus. Si enim pauculas illas maculas rubras, vel purpureas, quas

Sydenham passim, quas *Boerhaave* pluribus in locis, a petechiis distinguendo ad pessimam humorum corruptionem referunt; si præterea quasvis pustulas miliaceas, sudore genitas, quas Patres Græci ἰδρωα vocarunt, Latini *sudamina*, *papulas sudorum*, quales ut sano in æstivis sudoribus, sic sudantibus ægrotis sæpe obveniunt; si, inquam, hæc omnia ad Petechias, & Miliaria relegemus, tunc ab Orbe condito, per universas mundi plagas, petechiæ & Miliaria sunt ἐνδημιάζοντα. Hoc autem negatur ab omnibus. Quam incongrue ergo miliaciis illis sudaminibus, in sudore critico nonnunquam prodeuntibus, crisin morbi clamitent per Miliaria fieri! sed nova data occasione, de hisce latius: Dives enim differendi Seges mihi adest. Capiant quoque quantopere præter veritatem mihi objecerint, quod Miliaria soleant, etiam

etiam fatentibus nobis , & diebus prodire criticis , & morbi afferre , omniumque symptomatum , insigne levamen. Contrarium prorsus ex allatis vident exemplis.

Si præterea videant , quæ in hoc ipsum notarint Viri , eruditione aut praxi aut utroque clari , *Pourchon* , *Trumphius* , *Fuchsius* , *Kleinius* , *Hazenöbrl* , *Lautter* , erunt de iis , quæ profero , convicti. Et qui multitudine observationum cæteros antecellit *Cl. Allionius* , qui ipse ex professo de Miliaribus , tanquam naturaliter genitis , disseruerat , nonne disertis scripsit verbis hæc : „ Tertio „ aut quarto die , (ambobus criticis) „ exeunt pustulæ , septimo , & octavo , „ plerumque letales : minus funestæ , „ quas dies sexta (Criticorum infidissima) affert. Et per manipulos „ & cohortes , incerta die ac hora , „ fit hujus exanthematis expulsio.

Jurene ergo, an injuria, Discipuli mei ex pag. 70. *Thes. de febr. Divis.* colligant Criticum me pronuntiasse miliare exanthema? Conqueror pluries objectiones, quas refutandas susceperam, aut jam refutaveram, nihilominus tamen veluti meam propriam sententiam laudari; pari, ni fallor, injustitia; qua quis *Sydenhamum*, toties calidam methodum refutandam assumentem, veluti calidæ Methodi celebraret Patronum: aut qua quis assereret *Davidem* Regem in Psalmis 13. & 52. Dei negare existentiam, quando Impiorum sententiam oppugnaturus, referret quid ipsi in corde suo dicerent.

IV. *Griffin Miliaria* referunt, inquit mihi Studioforum nonnulli, regulariter procedendo, certamque efflorescentiæ, exsiccationis, ac desquamationis servando periodum.

Sat

Sat superque responsum, quod ad tertiam Objectionem dedi, hanc quartam diluit, ut insalutatam hanc præterire possim. Verum cum Discipulis meis nihil non debeo, dabo illis & aliquam hujus objectionis refutationem peculiariorem. Nescire me fateor quid in mentem venerit ipsis, quod allatis de causis Miliaria critica vocent? *Hippocrates* saltem tale quid, propter has causas, Criticum non vocasset. Grassabatur populariter *Perinthi*, Epid. 2. pag. 1020. Febris ardens, quæ ut plurimum die 14. judicabatur sudoribus, at vero in ipsa æstate sudores jam a principio comites habebat; prætereaque die 7. (critico) die 8. (non critico) die 9. (critico.) „Τρηχύσματα ἐν τῷ χρώτι
 „ κεγχρώδεα, τοῖσιν ὑπὸ κωνώπων γινόμενοις
 „ μάλιστα ἰκελὰ ἀναδήγμασιν, &
 „ πανὺ κνεσμώδεα. Aspredines in cu-

„ te miliacæ, culicum morsibus ma-
„ xime similes, oboriebantur, haud
„ multum tamen prurientes. Ταῦτα
„ διετέλει μέχρι κρίσεως, hæc ad us-
„ que crisin perseverabant. „ Ergo
erat symptoma peculiare in hac febre
ardente, quod & diebus criticis, &
non criticis efflorescens, perdurans
diu, & periodum disparendi servans,
morbum nedum judicabat, verum
ad morbi crisin, nempe sudorem, di-
sparebat. Ergo Exanthemata regu-
lariter procedentia, certamque efflo-
rescentiæ, exsiccationis, desquamatio-
nis, periodum observantia, nec *Hipp.*
nec ulli in hunc *Hipp.* locum commen-
tatores, ad criseos naturam & genium
ea de causa retulere.

Plura sane hoc in textu nos *Hip-
pocrates* docet. Ac primo quidem,
ut jam dictum, regulas crescendi eva-
nescendique servantem efflorescen-
tiam,

tiam, minime tanquam criticam, sed tanquam mere symptomaticam, consideravit. Secundo Crisim neutiquam huic tribuit, ast sudoribus diei 14. Tertio, in hac ardente febre, quæ tam benigna, ut ipse testetur illam nihil habuisse maligni; & ut, licet ab initio sudores perperam adessent, tamen pauci inde morerentur; in hac, inquam, febre, adeo benigna, agnovit excretiones dari symptomaticas; contra illorum sententiam, qui ideo negent symptomatica posse Miliaria haberi, quod sæpe in benignis acutis contingant, in quibus illi credunt tantam humorum non dari degenerationem. Et morbum benignum salutavit *Hippocrates*, & in benigno morbo Exanthemata descripsit symptomatica.

Dum igitur accusamur quod Crisim acutæ febris non Miliaribus, sed aliis,

aliis, aut simul, aut postmodum contingentibus evacuationibus adscribimus, autore id facimus *Hippocrate*. Ut enim ille agebat in descripto exanthemate, ita nos Symptomaticam Petechiam ac Purpuram habemus, eo quod utraque die erumpat & critico, & non critico; quod eruptio in die critico pejus sæpe demonstretur, quam in non critico; quod cum eruptione, postque eandem, morbus sæpe ingravescat, morbique symptomata; quodque, etiamsi morbus in melius vertatur, tamen ea in meliorem conversio minime exanthemati symptomatifico, sed aliis criticis perturbationibus & evacuationibus potius adscribunda sit, quæ morbosam eliminantes materiem, simul illud symptomaticum crudumque exanthema, quod secundum *Allionium* pag. 44. coctionem non patitur, pellant foras.

V. At-

V. Attamen instant : *Symptomati-
ca* dici hæc exanthemata nequeunt, eo
quod *Symptomata*, si modum excedant,
supprimere, *minuere* saltem, liceat, *opor-
teatque* : nunquam vero *Miliaria* ; ni
mortem velis, *pejorare* morte creare
Symptomata.

Profecto ut *Symptomaticos* in acu-
tis sudores, ut *Sydenham* Collegæ fui
Petechias, ita *Allionius*, nosque cum
ipso, ægrorum e lecto exemptione, *Ve-
næ* Sectione, *Enematibus*, *Cortice*
peruviano, *Symptomaticos* hosce mo-
tus moderamur cum bonis ægri re-
bus, totosque auferimus. Ergo sunt
Symptomata exanthemata.

VI. Comparant Medicinæ Tiro-
nes *Miliaria* ac *Petechias* cum *Variolis* &
Morbillis, naturali ortu, progressu, ef-
fectu ; id me perperam negasse arbitrati,
quando scripsi *Variolas* & *Morbillos* non
supervenire *Miliaribus* ac *Petechiis*, sic

ut penitus prodeant, crescantque, quemadmodum quidem hæc illis; contrarium nempe ex Camerario, & Albrechto, N. C. Sodalibus, demonstrari.

Cum Tironibus multæ ineptiæ condonandæ sint, & ad has respondebo. Primo ex quinque rationibus, ob quas hanc comparisonem, *Libr. de Febr. Divis.*, negaveram, quatuor suppressere, ac, veluti illas quatuor non adduxissem, unicam quintam arriperunt. Attamen arripiundæ erant omnes quinque, ut stringeret causa negati. Secundo etiam hanc, quam memorantur unicam, mutilarunt. In *Febr. Div. pag. 70.* sic scripseram :
„ Variolæ & Morbilli non superveniunt Miliaribus & Petechiis, sic
„ ut penitus prodeant, & crescant,
„ sicut quidem hæc illis, sed tantum
„ eo, quo *pag. 32.* dictum est, modo.
„ Porro *pag. illa 32.* dixeram :

ram: „ Miliaribus enim, aut Vario-
„ lis, aut Morbillis, aut Scarlatinis,
„ Petechiæ superveniunt; & vice
„ versa Variolæ, Morbilli, Miliæres,
„ ad Petechias accedunt, vix elevan-
„ tes se, mortemque denunciante
„ propinquam. „ Communem ob-
servationem sic me exposuisse credi-
derim. Rogo enim Practicos quos-
vis, num eandem utrimque consuetu-
dinem observent sic, ut eo modo Va-
riolæ Miliaribus & Petechiis superve-
niant, quemadmodum hæ ambæ il-
lis? Num, quo in loco Miliæres & Pe-
techia frequentissimæ sunt, sic in il-
lis Medici expectant Variolas & Mor-
billos, quemadmodum in Variolis ac
Morbillis, Petechias aut Miliæres? Si
igitur nudo, quo scripsi, sensu ver-
ba mea intelligantur, eam referre
sententiam censeo, quam tenent me-
cum Medici omnes. Verumtamen

exem-

exempla prostant Variolarum Pete-
chiis ac Miliaribus supervenientium.
Admitto utique illa ; utpote qui si-
mile elapso jam sexennio protulerim.
Sed num rariores exceptiones subver-
tant communes naturæ leges ? Tunc
nullas leges Medicina haberet, nullas
Phyfica tota, nullas alia quælibet Ars ;
semper enim aliquid est, quod extra
easdem divaget.

VII. *Sed ipsemet ego, pergunt,
in Febr. Div. pag. 39. Miliarem mor-
bum velut idiopathicum, & gravissimum
quidem, descripsi, cujus illa esset pro-
prietas, ut morbosam materiem ad cor-
poris deferret superficiem.*

Nunquid, qui sic fantur, mea vol-
verunt attente ? Videant ergo revol-
vendo me morbum nunquam idiopa-
thicum vocasse, sed descripsisse talem,
qualem Natura rarissime, causæ aliæ
numerosæ passim, generent. Minus-

ne factitia Lues Venerea est, quod Autores Syphilici eam describant tanquam morbum gravissimum, cujus illa proprietas sit, ut solida æque quam fluida corrumpat? An inde sequitur Luem Veneream morbum esse, in quem unusquisque ex communibus vulgarium morborum causis incidere queat?

VIII. Ajunt mihi Medicinæ Tirones se Medicos, veteris opinionis tenaces, advertere acriter invec̃tos, & quotidie invehi, in methodum, quam in Exanthematicis tractandis observem: ægre illos ferre me Venam secare, me ægros lecto eximere quotidie, & si ferant, per aliquot horas in sedili collocare erectos: me Vesicantia admovere, quæ longe acrius solida fluidaque humani corporis agitent, stimulentque, quam, de quibus conquerar, calida stimulantia: interea Medicos se frequentare, quibus

quotannis innumeri exanthematici curandi committantur, qui tamen in Febre simpliciter Miliari Venam non tundant, qui Eibmulleri consilio ægros hosce compluribus diebus lecto haud eximant, qui Vesicantia nunquam, nisi efflorescentia retrocedente, ac debilitato vehementer inde ægro, admoveant.

Medicinæ Tirones, qui his visis auditisque in data ipsis doctrina vacillant, manifeste docent se nec ad ea, quæ apud alios viderint, nec ad illa quæ in Nosocomio nostro sibi demonstrata sint, accuratè satis attendisse; nec sufficienter se utriusque methodi consequentias & effectus ponderasse.

Profecto in initiis Acutorum Venam secantem non viderunt me unquam, quando vires vera debilitate prosternebantur, neque in Schola Medica didicerunt. At vero observare potuerunt in Natione Germanica, quæ
flu-

fluxui hæmorrhoidum five naturali five factitio, quæ frequenti admodum Venæ sectioni, plus justo assue-
ta est, quæ vorax præterea, vino-
que indulgens ac cerevisiæ est, Ve-
næ sectionem in Acutorum principio,
si nihil vetat, egregie conducere:
neglectu V.S. ex benignis malignos,
eosdemque Exanthematicos morbos,
esse exortos; sic quidem ut notare
potuerint ægros, neglectu jam Exan-
thematicos, instituta ac repetita san-
guinis non dissoluti, sed vere pleuri-
tici, missione, e mortis ereptos fuisse
faucibus. Obliti penitus videntur
confirmatæ toties apud nos observa-
tionis *Sydenhamianæ*, de ea apparente
debilitate in Febribus, cujus Cardia-
cum Venæ sectio esset. Ut dubio pro-
cul inter causas frequentioris alibi Ex-
anthematis Missio sanguinis, Acutorum
principio neglecta, recensenda veniat.

Deinde causam, cur rarius apud nos Exanthema, evidentem semper habui, & indefessus docui, esse quotidianam Lecti refectiorem : intra quod tempus ægri debiliores alium in lectum transferuntur ; qui minus debiles per horæ quadrantem, horam, horasve complures, &, si ferunt, bis die, in majore ac commodiore Sedili collocantur. Hinc toties videre mecum Auditores plures ægros, quibus omnia Symptomata, futuri Exanthematis præsaga, adessent, febrim duntaxat acutam, minime Exanthematicam, sed sæpe benignam, esse perpeßos. Viderunt mecum alios, erumpente exanthemate ad nos allatos, tolerabiliter valde morbum hac methodo tulisse, nec quenquam quid detrimenti inde unquam passum esse. Ita ut longe alia & penitus contraria a nostra methodo

do

do observaverimus, quam apud alios divulgetur.

Nec insolita hæc nostra ratio, nec nova est. Summorum in Medicina Virorum est celebratissima. Docuerat nos eandem dictis factisque immortalis Sydenhamus. Tempore febris contagiosæ variolosæ adeo abhorrebat ab ægris suis lecto addicendis, *ut ejusdem additionis effectus compararet cum intempestiva Cardiacorum eodem in stadio exhibitione.* Sufficiebat ipsi, nec, ubi rerum arbiter erat, unquam aliter concessit, ut ægri cubuli ambitu se continerent, *a lectulo, æque quam a Cardiacis, abstinentes:* quarto vero die lecto adjudicabat: porro si benignæ ac discretæ essent Variolæ, & calida tempestas, *quotidie per aliquot horas lecto exemptos detineri curabat.* Quo demum effectum, ut feliciter morbi progressus ac matu-

ratio fieret, ægrique longe minore cum toedio morbum perferrent. Sin vero aut frigidior anni tempestas, aut eruptio copiosior id minus concederet, lecto quidem eosdem detinebat, verum & moderate tectos, & , foco in Camino mediocriter, bisque die duntaxat, accenso, quando hyems scilicet ingrueret, locum in lecto sæpe mutare jubebat, ne ad perniciosos hic semper sudores cogerentur.

Sed *Sydenhamo* objiciebant, quod nunc mihi; multos methodo prorsum contraria tractatos nihilominus convalescere. Respondebat vir candidus negari tamen non posse, quin quoque plurimi illa contraria methodo interirent, pluresque adhuc interituros, nisi vel a frigidioris tempestate, in quam fors inciderit Morbus, vel a Phlebotomia, servarentur: tumque notabile hoc addit: „ Ex dictis,

„ ut

„ ut obiter attingam, facile erit vul-
„ gare illud problema solvere, quî
„ fiat scilicet, ut perpauci adeo e
„ plebe hoc morbo pereant, si ad
„ eos comparentur, qui inter divites
„ eodem *trucidantur*? Quod quidem
„ vix ad aliam causam potest referri,
„ quam quod ob rem domi angu-
„ stiores, & agreste vivendi genus,
„ vix fiat illis copia sibi nocendi, Re-
„ gimine magis accurato, ac deli-
„ catiore.

Quando nunc *Sydenham* in valde
confluentibus ægros lecto addicebat,
veniam concedebat ab hac in illam
lecti partem corpus pro arbitrio suo
transferendi, eosque, febre matura-
toria adpetente, ad id serio mone-
bat, imo per alios curabat illos in
lecto versari. Si autem facies in di-
fcretis ad 8. diem flaccefferet, ac pal-
lesceret, sudorque bonus eo tempore

cessaret, & phrenitis oriretur, præter Venæ sectionem, & paregorica, asseverat sæpe se ægros ab imminente morte præservasse liberiores auras illis conciliando; quo ut rite fruerentur illos lecto aliquantisper surgere jubebat. Confirmat autem experientiam suam exemplis Phreniticorum, qui post sedulitatem irrisam custodum externo aëri frigido, eique nocturno, se exponendo, servati sint; & exemplo juvenis, quem in Variolis mortuum nunc a Phrenitide habitum, lectoque exemptum, & in mensa, ut cadavera solent, positum, aër frigidior in vitam quasi revocaret. Coma Variolosum eadem ratione tractans, *eadem sanguinis contemperatione* inquit, *& maculas purpureas vidi sublatas.* Urinæ suppressionem in Variolis, Acutisque aliis, ægrum lecto eximendo melius, quam per omnia alia

remedia, curabat. Conqueritur alio loco Vir præstantissimus, Incautioribus quibusdam necesse videri, ut ægri in variolis lecto affigantur, eo quod sudores, in quos illi proclives, cum facilius inde manarent, tum æstum moderarentur febrilem; ubi tamen sole evidentius esset, quod exsiccatum hinc corpore ad diem undecimam quamplurimi vitam cum morte transmutarent. In malignis Variolis, non ductus opinione, sed experientia firmatus, assererat, nec
„ Venæ sectionem, nec medicamen-
„ ta diluentia, & refrigerantia, per
„ se periculum auferre; plus vero
„ expectari oportere ab aere mode-
„ rato ac renovato: sic quidem ut
„ non, nisi nocte, Lecto commit-
„ tendi essent, quibus confluentes il-
„ læ anomalæ variolæ erupturæ præ-
„ viderentur. Et in genere con-

„ fluentium semper usque in tertium
„ & quartum eruptionis diem vix,
„ nisi nocte, lectum ægris concessit.
„ sexto autem morbi die, scil. ter-
„ tio aut quarto eruptionis, cum
„ ægri præ debilitate abstinere le-
„ cto de die vix poterant, eosdem,
„ & ob virium defectum, & ob suf-
„ ficientem pustularum copiam, lecto
„ addicebat; ea tamen lege, ut non
„ plus tegerentur, quam sani con-
„ fueverant, & in lecto se verterent
„ sæpius, verterenturque, ne sudo-
„ res, hic adeo noxii, prolicerentur.
„ Quare & ipsos infantes cu-
„ nis sæpe eximi curabat.

Patet igitur evidenter *Sydenhamum* haud solos eos condemnasse, qui aëre ac stragulis in lecto calefacerent, verum etiam hos, qui ægros in lecto simpliciter detinerent: Hoc porro inculcavit, ac repetivit, urfitque, sin-

ce-

cerus ille & candidus vir, toties, ut hujus articuli necessitatis ipsum oportuerit penitus convictum fuisse. Hoc ipsum tanti fecit, ut judicaverit non modo frustraneam sine eo esse reliquam antiphlogisticam curam, verum etiam ut descripturus in *Schedula monitoria* singularem epidemicam febrim, in qua *mala passim arte* gigni observabantur Petechiæ, Maculæ purpureæ, Miliaria rubra, quæ licet sponte sua, nonnunquam ingruant, sæpius tamen Lecti calore & Cardiacis extorquentur, hæc summe notanda verba adjungat: *Æger jugem in lecto decubitus, quantumvis levissimis stragulis coopertus sit, non sine magno suo periculo experitur.*

Hæc porro incomparabilis ille Veteranus multiplici annorum serie, non ex ludicra Cerebri Phantasia, sed Natura duce, didicerat, innumerabili-

li-

literque viderat confirmata. Quicumque deinceps naturam imitati in medendo, *Sydenhamiana* verissima invenerunt. Et quod luculentius testimonium *Boerhaaviano*? *Variolarum* adeo accurata *Sydenhami* descriptio, ut decies legi merenti, pauca modo addenda habeam. Aphor. 1379. Quicumque Medici in Schola *Boerhaaviana* Medicinam edocti, & cum *Boerhaavio* *Sydenhamum* secuti, nihil non exacte verum ibidem deprehenderunt. *Boerhaavii* jam senescentis discipulus, cum publico communicavi in Tomo 2. *Rat. Med.* Cap. 3. & in Tractatibus quos de *Variolarum* insitione conscripsi, propriam meam annorum multorum in *Variolis* praxin, quæ *Sydenhamianis*, & ad hæc adjectis *Boerhaavianis*, ad utraque autem additis propriis observatis innixa, felicitate curandi demonstrat, quam tuto ac pro-

proficuè hac via eatur. Pediluvia bis die per universum morbi tempus a *Boerhaavio* ad methodum *Sydenhami* addita, quum eo tempore ægri in Lecti crepidine, si debiliores; in sedili, si firmiores, erecti collocentur, adeoque atmosphæram adhuc frequentius mutant, hæc, inquam, utilitate sua magnopere se commendaverunt.

Quid quod etiam hæc praxis a multis illorum confirmetur, ac laudetur, qui oppugnent eandem? Obruta Europa fuit Dissertationibus de inoculandi Variolas præstantia, eo præter alios sine summopere commendanda, & ubique introducenda, quod sedeant, quod ambulent, quod ludant, quod cursitent suo in cubiculo inoculati, tam in febre contagiosa, quam post plenam eruptionem; sic ut ne ægro-tare quidem videantur, neve metus

retropulsionis adfit ullus. Provoco ad complures Scriptores, qui hujusmodi narratiunculis suos delectarint Lectores. Quid igitur metuatur ne benigna miliaria, quibuscum ægri, ut ajunt, vix ægrotent sæpe, retrocedant, retrocedendoque necent? quid metuant ne erupturum quod creditur exanthema, extra lectum haud satis pellatur foras? An quod, ut suo jam tempore dolebat & conquerebatur *Hoffmannus*, exanthema miliare *factitium* ex facili retrocedat & necet? hoc aliquando contingere cum *Hoffmanno* & *Sydenhamo* arbitror in Petechiis ac Miliaribus *factitiis*, nec non in Variolis atque Morbillis, quos copia ac malignitate methodus prava auxerit; cæterum quod *Sydenham* testatur, id plures mecum videre Medici, Variolas, Petechias, Miliaria, copiosissima in denatis confertissimaque extare;
sic

fic ut mors eorum retropulsioni tribuenda non esset.

Dolendum interea est, quod exultans olim de excussio hoc pulvere Medicina, *Sydenhami* potissimum ac *Boerhaavii* laboribus, nunc denuo eodem conspergi contegique sic videatur, ac si nunquam fuisset excussus. Olim honori ducebatur magnorum horum virorum inhærere vestigiis; ab illis vero discrepare in gravioribus rebus, dedecori. Summa cum voluptate horum vituperia, illorum encomia, legimus apud Ill. *Hallerum* in *Comm. super Meth. Stud. Boerb.* Nec horum solummodo, sed & illorum, qui antequam Medicina hoc inclytum Virorum par venerabunda suspiceret, vel ob communem cum iisdem sententiam humano generi profuerant, vel ob contrariam nocuerant. „ Ab „ eo Viro, (*Helmontio*) in *Sylvium*, „ alios-

„ aliosque Medicos, amor transiit an-
„ tacidorum, quibus innumeræ ma-
„ læ, in Germania inprimis, cura-
„ tiones peractæ sunt. „ Hall. pag.
888. De *J. D. Horstio* Prof. Magdenb.
„ Extant etiam practica, & non ma-
„ la aliqua, ut calidæ curationis in
„ Variolis Refutatio. „ Pag. 891.
Et „ *Franciscus de le Boe Sylvius*, *Ha-*
„ *noviensis* egregius
„ autor, tot laudes corrumpit nova ad
„ *Helmontianam* nata Theoria, qua
„ omnes fere morbos, & acutos
„ omnes inprimis, ab acido dedu-
„ xit, alcalinis vero, & quidem vo-
„ latilibus, sanare voluit; neglecta
„ interim, aut non satis laudata V.
„ S. atque refrigerante Diæta. „ Pag.
894. „ *Thomas Sydenham* meruit
„ post *Hippocratem* primo loco recen-
„ feri, non a grata sola posteritate, sed
„ dum inter vivos fuit. Eam lau-
„ dem

„ dem sibi peperit, quod *ab omni*
„ *Hypothesi purus*, omnem laborem
„ suum unice observandis morbis im-
„ penderit, eorumque curationem ab
„ ipsa per felices eventus, inprimis
„ præeunte natura edoctus, proposue-
„ rit; febres autem, rejecta inani
„ Veneni specifici, aut Acidi hostilis
„ theoria, in universum per acida
„ atque refrigerantia expugnare do-
„ cuerit. „ Pag. 895. „ G. H.
„ *Welsch* in praxi secutus
„ est vulgarem sui ævi methodum.
„ Calida & Bezoardica dedit in febri-
„ bus. „ Pag. 897. „ *J. Michaëlis*,
„ Professor Lipsiensis de Chemica se-
„ cta, magnus medicamentorum com-
„ positorum calidorum & sudorife-
„ rorum inventor, & ex eo ipso Pa-
„ triæ non utilissimus, quæ his alio-
„ quin nimis indulget. „ Pag. 897.
„ *Casp. Theophilus Bierling*, parum la-
Pars VIII. L „ ti-

„ tinus homo, & deditus formulis,
„ quarum vim non mediocrem sub
„ finem subjecit, *non tamen absque*
„ *judicio fuit, qui præter sæculi morem,*
„ *in Germania inprimis raro exemplo*
„ Venam in Variolis secuerit, cali-
„ dam curationem rejecerit. „ Pag.
901.

Et quid volupe magis, quam ea
encomia legere, quibus Sydenhamum
seguacesque ejus, insatiabiliter extu-
lit Ill. noster Præses? Videatur ad §.
715. & 716. Aph. Boerh. ubi, post-
quam in sudorum in Acutis expulsio-
nem, usumque Croci, aliorumque ca-
lidorum remediorum, acriter animad-
vertisset, hæc demum addidit: „ Le-
„ gi merentur de hac re illa, quæ
„ passim in suis Operibus habet Sy-
„ denhamus, qui generoso ausu pri-
„ mus, & solus fere, se huic tor-
„ renti opposuit, & PERNICIOSAM

„ HANC

„ HANC MEDENDI METHODUM
„ GRAVISSIMIS ARGUMENTIS
„ DEBELLAVIT, ILLIQUE CON-
„ TRARIAM FELICI, IN PERI-
„ CULOSISSIMIS ETIAM MOR-
„ BIS, EVENTU STABILIVIT. „
Et ad problema *Boerhaavii* §. 698.
Cur lecti, aëris clausi, victus, Medica-
mentorum calor, adeo hic noceat? „ Per-
„ versa hæc methodus, inquit Præ-
„ ses, imprimis invaluit, quia Medi-
„ ci quondam fuerunt in hac opinio-
„ ne, per sudores tutissime febrilem
„ materiem de corpore eliminari pos-
„ se; atque ideo tepore lecti corpo-
„ ris omnem superficiem fovendam
„ semper voluerunt. Verum uti opti-
„ me demonstravit *Sydenhamus*, in
„ fine morbi cocta & subacta morbi
„ materies sic quandoque expellitur;
„ in morborum vero initiis, impor-
„ tuna arte sic expressis sudoribus,

„ liquidissima pars sanguinis diffla-
„ tur, & MORBI SEMPER IN PE-
„ JUS RUUNT. Unde huic tor-
„ renti se generose opposuit magnus
„ ille Vir, solus tunc fere. „ Et ad
§. 610. ubi Boerhaave scribit : Si
itaque exorbitare deprehenditur Circula-
tio, moderamen fit abstinencia, victu te-
nui, potu aquæ, aëre frigidiusculo
medicamentis blandis refrigerantibus; sic
III. Commentator habet : „ Elapso
„ sæculo Medici fere omnes erant in
„ illa opinione omnes febres tutissi-
„ me & citissime sanari posse per Dia-
„ phoresin. Hinc in calidissimo aë-
„ re ægros detinebant, stragulis te-
„ gebant, imo obruebant, ut nem-
„ pe fota corporis superficies hoc ca-
„ lore, sudoribus emittendis foret
„ aptior. Verum magno ægrorum
„ damno sic ignes ignibus addeban-
„ tur, & enormiter exacerbabatur
„ fe-

„ febrium impetus. Omnium ma-
 „ xime vero huic methodo insiste-
 „ bant in illis morbis, quos cutaneæ
 „ eruptiones comitabantur, quales
 „ sunt Variolæ, Morbilli, &c. Pri-
 „ mus fere se huic torrenti animose
 „ opposuit Sydenhamus, atque passim
 „ in suis Operibus indicavit nihil per-
 „ niciosius esse.

Et quid miremur Ill^{mos} Viros B. van
Zwieten, & *Hallerum*, in *Sydenhamo*
 celebrando adeo fuisse profusos? Lau-
 des Viri antea paucis verbis omnes
 inclytus comprehenderat *Boerhaavius*,
 in *Orat. de Commend. Stud. Hipp.* dum
 primum conquestus quod inter re-
 centiores de *Medicinæ usu* scriptores,
 pauci, si ulli essent, veterum perfe-
 ctionem attigissent, cum tamen Pri-
 scos in cæteris artis nostræ partibus
 longe superassent, in hæc verba erum-
 pit: „ Unum eximium habeo, Tho-

„ *nam Sydenham*, Angliæ lumen, Ar-
„ tis Phœbum, cujus ego nomen si-
„ ne honorifica præfatione memora-
„ re erubescerem : quem quoties
„ contemplatur, occurrit animo ve-
„ ra Hippocratici viri species ; de
„ cujus erga Rempublicam Medicam
„ meritis nunquam ita magnifice di-
„ cam, quin ejus id sit superatura
„ dignitas.

At quorsum hæc, forte inquierent,
de *Sydenhami* laudibus aberratio ! Ut
miremur hodiernam praxin eo iterum
ruere præcipitem, unde *Sydenhamus*,
Virique post illum in praxi summi,
eandem tam fortunate eripuissent ;
hodiernam, inquam, praxin sic tra-
di, colique, ac si ingentes illi, quos
laudavi, Viri, ejusdem regulas, na-
tura duce inventas, nunquam poste-
ris tradidissent ; venerandaque eorum
nomina in tradenda praxi vix amplius

re-

refonare. Doleo Artis fata! Interim probe noscant genuini omnes Artis filii, dum alienam a laudatissimis his viris praxin coli cernant, ex mea saltem schola petitam non esse; ut qui primum in Mandatis habeam Boerhaavianum, id est Sydenhamianum, id est Hippocraticum puræ naturæ studium, unice tradere cum theoretice, tum practice; secundo, ut qui, etiam citra tale mandatum, nunquam aliam doctrinam traditurus essem, quam eam, de cujus usu & certitudine tantorum annorum praxis certissimum me reddiderit. Unde etiam nunquam me defuturum polliceor, quin masculam hanc medicinam tuear voce, & calamo, contra quoscumque.

Ut autem difficultatem hanc VIII. demum absolvam, debeo adhuc *Vesicantia* tueri in Acutis. Postquam *Areætæus Cappadox* forte primus iisdem Me-

dicus usus est, Medici plerique eadem magni fecerunt; cum vero, quemadmodum cum cunctis medicamentis comparatum est, haud omnibus ex æquo prodesse, *Caji, Masfariæ, H. de Saxonia, Terilli, Baglivii, Hoffmanni, Veratti*, operâ, usum abusumque illorum rite intelleximus. Observatione practica propria ad eas Cl. horum virorum adjecta, constat mihi evidenter, Vesicantia prodesse, ubi vis vitæ debilior, quam ut morbum coquat; deinde, quando intentio est certam corporis partem irritare sic, ut in eandem major calor, rubor, dolor, humorumque advocetur, & acceleretur, affluxus; quo demum quæ pars a morbo præcipue afficiebatur, ea minus humorum accipiat, multaque vis morbi ex reliquis corporis partibus in unam veluti derive-
tur: præterea quando topicus dolor,

cæteris immoriger auxiliis, irritandus eo fine est, ut, qua doleat, materies attenuetur, discutiatur, pellaturve foras: forsitan quoque quando in Nervis aut motus tumultuarius, attenuata ac dispulsa agitante eosdem materie, moderandus; aut sufflaminatus, stimulo agitandus est. An evacuationibus aliis sufficienter institutis, dissolvant quoque cruorem phlogisticum? Sapientioribus hoc determinandum relinquo, id modo testatus, quotiescumque dolorem pleuriticum, ad Phlebotomias iteratas, cæteraque auxilia immorigerum, Vesicante brevi sustulimus; quando vesicans mihi in Pleuroperipneumonia omnem brevi sedavit dolorem, febrim non modo non intensiorem, sed moderatiorem fuisse, multoque facilia sputa prodiisse. Proxime autem ad Vesicantia qui accedant, Dropaces, Phœnigmi,

Sinapifini, huc quoque referendi sunt. Vesicantia præprimis in parte quam rubefaciunt, solutis Epidermidis cum Dermate Vinculis, Vesiculas excitant, quæ, maligniores si exceperis acutos, laticem, qui ad ignem concrefcit, continent.

Ex phænomenis enarratis destruuntur ratiocinia praxeos vacua, quasi calorem in corpore præparato excitarent, eo, qui a calidis Alexipharmacis excitatur, formidabilior rem. Unde in præparatis, ut semper requiro, corporibus, ad intolerabiles capitis dolores, ad coma utrumque, ad deliria, ad pungentes dolores pleuriticos, ischiadicos, &c. falubriter adhibentur, humorum minime inde aucto motu. Et dum Sydenham in variolis consuefceret Allium pedibus adhibere, dum nos aut idem aut simile admovemus, sic calorem, do-

dolorem, & metuendam adeo in Variolis Phrenitidem, minui observamus, ut eandem ob causam febris ipsa adpareat moderatior. Quare & per totum Variolarum decursum hæc salubriter adhibentur. Itaque si quis rogasset Sydenhamum, quid sibi vellet *execrationibus* suis in Alexipharmaca, quæ tam parce dentur, ut qui in eadem invehatur de lana disputet caprina; ubi ordiri debuisset ab execratione Vesicantium? Utique solita modestia sua vir candidus respondisset, se a calida methodo experiri in febribus caloris augmentum, a Vesicantibus autem & Epispasticis, post requisitas evacuationes admotis, haud modo non auctum, sed imminutum calorem; hic cessare oportere ratiocinia; hic solam consulendam esse, quæ jugis ac sedula ad Lectos ægrorum, & minime in Musæo, comparetur, experientiam.

IX. Quædam supersunt minoris momenti in Discipulorum objectionibus, ad quæ tamen & ipsorum, & veri amore, respondendum est. Ac primo quidem referunt mihi a multis falsam haberi, quam ad corroborandam sententiam meam a R. R. Fratribus Misericordiæ mutuaveram observationem: vigere quippe apud ipsos eodem semper modo ut olim, & olim ut nunc, exanthematicos morbos.

Quæ de raritate Miliarium in Nococomio Monasterii horum fratrum in *Tract. de Febr. Divis.* cum publico communicavi, hæc ex Diariis depromseram, quæ suos in usus sibi exaraverat Rev. Frater *Bertrandus*, noster Collega expertissimus, confirmata testimonio reliquorum fratrum. Conservavi hæc mihi, ut cui lubet ostendere ea possim. Qui vero dubitet de Diariorum illorum fide, me imitetur, olim

olim subdubitantem; & ut ego tunc, & postea, & haud ita pridem, ita ipse Monasterium intret, examinetque ægros; inter 140. 150. quorum plerique acute degunt, sæpe 1. 2. 3. sæpe nullum, quem Miliaria tegant, inventurus, idemque ab expertissimo Viro, dignissimo illius Nosocomii Physico *Guarin*, cunctisque confirmari Fratribus, auditurus: qui & id addent, quos paucos exanthematicos habeant, iis dudum domi aut neglectis, aut prave tractatis, exanthema jam paratum, expulsumve fuisse, antequam ad ipsorum deferrentur Nosocomium.

Ergo resumo, quam olim feceram conclusionem: Si non a causis peculiaribus, quas toties jam memoravi, verum a causa cunctis communi, Miliaria orirentur, Fratres Misericordiæ iisdem, æque ac alia Nosocomia quædam,

dam , scaterent : atqui sæpe raros , sæpe nullos , in tanta acutorum ægrorum turba habent eisdem affectos. Ergo.

Inquisivi sæpius in Methodum ipsorum , & tractatu de *Febr. Div.* plurima dixi. Id modo & Exp. Physicus , & Fratres , addunt , quod nulla dies sit , in qua ægrorum Lecti non bis penitus reficiantur , nisi vires id omnino vetent. Quantum id ad avertendos cutaneos morbos in acutis conferre debeat , demonstravit supra Sydenhamus ; demonstrat experientia quotidiana.

X. Objiciunt Studiosi a me in *Gallica ad amicum Epistola* minus fideliter ex lingua latina in Gallicam versum esse textum Lautteri ; siquidem illo maximam partem *Miliarium factitiam* scribente , ego illud pro maxima parte in transferendo omiserim.

Fateor illud *pro maxima parte* omis-
sum esse, sed negligentia, non vero
peculiari intentione: cum enim tan-
tum hoc probandum suscepissem, quod
Miliaria *pro maxima parte* factitia es-
sent, non indigebam Lauteriana ex-
perientia, nisi quatenus idem, quod
ego, probaret. Demonstraturus quip-
pe quod idem ille, quod ego, dice-
ret, frustra plus dicentem induxissem.
Sed ridiculum est nugis ejusmodi in-
hærere. Oporteret alioquin rogare
num is, qui in eodem textu Laute-
riano Gallice vertendo, ubi in Latino
est, *ad incitas fere redactus*, redde-
ret *deja réduit à l'extrémité*, omitten-
do *presque*, an inquam, talis homo
aut alia editione operis Lauteriani usus
esset, aut malitiosius illud *fere* omi-
sisset?

XI. Laudantem me ore scriptisque
egregii Hazenohrli opus super hac ma-
te-

teria mirantur Studiosi, cum videatur ipsis hic Autor sibi minime constare. Primo quod scripserit anno 1760. pauca sibi obtigisse Miliaria, dum interim ipsi Studiosi Hispanicum Nosocomium frequentantes, copiosam inibi miliarem reppererint. 2^{do} Miliaria in Nosocomio eodem Studiosi viderunt & benigna, & morbi cum emendatione, ut capere proinde nequeant cur Medicus ille eadem critica esse neget. 3^{tio} Eundem qui scripserat anno 1760. pauca exanthemata se vidisse, mox asserere quod multoties, quod sæpius, emicuisse viderit. 4^{to} Illa saltem exanthemata factitia appellari neutiquam posse, quæ nec ipsi Autori ibidem Physico, nec ejus Chirurgus, pepercerint.

Ut paucis multa comprehendam, an me mecum dissentientem sincerus homo suspicabitur, dum in Cathedra v. g. dico pauca Miliaria mihi in No-
fo-

nosocomio obtingere, & dum paulo post Auditoribus assero me in urbe, ac suburbiis, eadem sæpe, multoties, pluries, emicantia observare? Ita nullam in Libro Egregii hujus Medici contradictionem infert, quod pauca miliaria viderit in suo Nosocomio, quod plura viderit alibi, five in altera sui Nosocomii parte, cui non præerat ipse, five in sua privata praxi. Quin quod eadem in *multis* non critica, *multoties* cum morbi gravamine contingentia asserat, an id eodem ipso anno, & non potius multorum serie didicerit annorum? Quod vero *sæpius* Studiosi Miliaria apud ipsum viderint, quod viderint etiam *benigna*, nemo inficias ibit, qui noverit quoties turmatim Milites ad ipsum deferrentur, quibus exanthema jam erupisset, aut in procinctu staret; haud vero multa ipsi apud eum videre tunc, quando pauca

haberet. Quod Chirurgus ejus gravi exanthemate anno 1760. decubuerit, quid mirentur? Debuerat is etiam alteri Nosocomii Hispanici parti prospicere, ubi Exanthema erat *epidemicum*, ut publica scripta testantur. Qui igitur inter exanthematicos diu noctuque versabatur, nunquid eundem demum exanthematicum mirari oportet? sed an conclusio legitima est; quia ille Chirurgus in parte ea Nosocomii hispanici, ubi exanthema epidemicum, etiam exanthema contraxit; ideo etiam exanthema plurimum fuit in qua parte Nosocomii *Dominus Hazenöbrl* Medicinam faciebat? An quod eruditissimus ille Nosocomii Physicus anno 1757. diu noctuque inter exanthemata versatus, demum contagione iisdem quoque gravissime corriperetur, concludere possint Exanthema etiam frequens apud ipsum triennio post
ani-

animadverti oportuisse? Aut quod illi bini ex contagio in Exanthematicos morbos inciderint, ideo non esse verum quod factitia Exanthemata dentur? Nescio demum, quid sibi velint.

Quod autem clarus idem Vir Miliaria, una cum aliis evacuationibus coctis erumpentia, neget critica esse, nec his, sed evacuationibus illis aliis, criseos concedat prærogativam; id ideo fecit, quia aliter facere Medicus rationabilis non potest. Sat superque probatum est Miliaria & Petechias nunquam Critica, semper vero esse Symptomata: demonstrationes pluries attuli. Quid ergo de iisdem, una cum aliis bonis evacuationibus conspicuis cogitandum, nisi quid prævum, quid indomabile, bonitate naturæ simul expelli de corpore, dum cocta expelluntur. *Hippocratis* alum-

ni, dum ad sudores criticos, urina tenuis nigra; dum ad Hæmorrhagias criticas, gangrænosa alvus; dum ad alvum criticam, sputa ichorosa simul compareant; criticam evacuationem salutamus, non pessimam quamque crudam, sed vere coctam; unà gaudentes naturæ robur tale, ut cum optima evacuatione simul corrupta & nocitura eliminentur.

Sed offendit illos hæc explicatio, eo quod apud Exp. Virum hunc viderint Miliaria admodum benigna; adeoque non ea, quæ cum urinis nigris, cum gangrænosa alvo, cum sputis comparentur ichorosis.

Profecto videre benigna talia, sed etiam viderunt, benignis copiosiora, maligna. Quid ergo ex illis paucis benignis concludant oportet, nisi, quemadmodum apud me pluries alvum criticam, cum pravo sputo, in

pectoris inflammationibus sic viderint, ut aliquando valde mitis morbus appareret, facileque alvo judicatus & urinis; ita Miliaria, quantumvis mala & symptomata, citra ulla malignitatis indicia adesse posse, & morbum aliis criticis evacuationibus benigne solvi, ac judicari?

Rogant me an saltem illa Miliaria, quæ, crisi jam facta, & Doctis. *Hazenöhr*, & ego, vidisse nos testamur, non sint vere critica, aut metacritica; qualia plura *Hippocrates* descripserit, quando a priore crisi morbi materies haud fuisset eliminata sufficienter?

Quod toties demonstratum est criticum dici minime posse, non potest iterum assumi, ut criticum: adeoque inanis tota hæc quæstio est. Sed undenam ergo illa Miliaria judicato penitus morbo? Forte a contagio. Si

homo levi venereo contagio, nec dum se manifestante, affectus, in morbum acutum inciderit, morboque absolute judicato, prodeuntem Gonorrhœam aut Bubonem percipiat, utique non vocabimus Gonorrhœam aut Bubonem morbi acuti, jam judicati, crisin, sed effectum contagionis ante morbum contractæ.

Contagium porro miliarium in urbe, quæ iisdem adeo scatet, contrahere facile est; quandiu vero in corpore latere possit, antequam effectum edat, incertum. Sufficiat contagia alia nosse, quæ diu lateant. Rabidicanis, insitarum variolarum, veneris impuræ, contagia sæpe brevi, aliquando multo latuisse tempore, antequam in nervum erumperent, practica observata demonstrant.

An miliaria tamen talia prodire, post crisin acuti morbi absolutam,
sic

sic possent, ut nulla ægritudo observaretur, nullave febris?

Profecto possent, cum describantur apud Autores miliaria dicta chronica, quæ vel in sanitate illibata, vel perfecta morbi crisi, homines sic adorian- tur, ut sæpe non ægrotent. Provoco ad testimonia publica. Inducor fere ut credam chronica Miliaria, quæ in aliis cum nonnullis incommodis, sine febre; in aliis sine febre, aut ulla molestia, ut v. g. scabies, sæpe efflorescunt, plurimum deberi ejusmodi contagio, quod diutius breviusque latens, demum chronice efflorescat, ut *Hazenobrlus*, ut ego, post absolutam acutorum Crisin aliquoties observavimus.

Sed nondum finis objectionum. Vehementer Medicinæ Tironibus displicent hæc ejusdem Autoris verba : „ Sed vidi *multoties* illos, qui confer-

„ to exanthemate scâtebant , gravius
„ longe ægrotasse iis , qui pauco ma-
„ cularentur : „ Rogant me an ejus-
modi ratiocinium non sit practicis
contrarium observationibus ? Multo-
ties , inquiunt mihi , vidimus , qui co-
piofa sputa redderent in morbis pul-
monicis , gravius longe ægrotare iis ,
qui pauca expuerent : Vidimus , ajunt ,
multoties homines febre ardente deten-
tos , qui die critico egregie sudantes ,
gravius longe ægrotarent iis , qui pa-
rum tantum. Nunquid inde juste
quis concludat nec sputa , nec sudo-
res , critice morbos judicare ?

Benigne ferant Medicinæ Tirones ,
me respondentem , si ad Acutorum
Crises in Nosocomio meo attentiores
animum adplicuissent , si Hippocrati-
cæ doctrinæ vel levissimam conserva-
sent memoriam ; se talem objectio-
nem mihi facturos non fuisse. Et-
enim

enim dum die critico bonæ contingunt, copiosæque evacuationes, v. g. Sputorum in inflammatione pectoris, sudoris in febre ardente, solent omnes, quotquot talia fiunt, se melius habere iis, qui parum aut expuant, aut sudent. Ab una enim parte evacuatio critica magnitudini morbi respondeat oportet; unde Priscorum axioma: *Nil paucum criticum*: ab altera parte emendatio morbi, ejusque symptomatum, in signis bonæ criseos haud infimum locum tenet. Ita ut Studioforum obiectio duplex supponat falsum. Sin vero rariore casu, (nequaquam autem *multoties*, id enim falsum,) post ejusmodi sputa, sudoresve copiosos, ægri gravius longe ægrotarent iis, qui modo paucos haberent, referendæ hæ evacuationes forent ad *κρίσιμα μὴ κρίνοντα*, & infidæ cum Hippocrate, perniciosæque, declarandæ.

Sed superfluum, & inane est, ad similia argumenta attendere; cum enim fat superque demonstratum sit Petechias & Miliaria ne vel umbram criseos habere, refutat se ipsum omne argumentum quod critica eadem falsa supponit.

XII. *Cum videant Studiosorum simpliciores quomodo Medici alii apud ægros suos accensâ utantur candela, examinaturi num pectus, collumque exanthema ferat; dubitant an fors ideo Nosocomium nostrum pauciora non exhibeat exanthemata, quod candela baud semper lustremur.*

Crudum dubium, cruda solutione dignum. An quod cænaturus luce candelarum indigeam, quo ferculis patinisque distinguendis sim, etiam candelam pransurus petam? cura nostra est acutos maxime ægros iis in lectis collocare, qui, cortinis apertis, plenum lucis jubar admittant, adeoque

que exanthemata vel minima actutum revelent. Imo ægros lecto exemptos plena die mecum studiosi solent, num efflorescant, examinare. Sin vero loci angustia, & major ægrorum numerus, nec non si insignis debilitas ægri in lucem vetat eum adducere, aut dies in hyeme tenebricosior sit, candela utimur accensa. Quapropter dum dies plena plus candelula illuminet, & e contrario ægri alibi passim sic locentur, ut Medicus eos lustraturus candela egeat, arbitramur nos in exanthematum detegenda præsentia esse cæteris certiores. Minutulorum Artifices crassiora opera ad candelæ lucem, ad plenam diem subtiliora, reservant. Addiderim Exp. Dominum *Guarin*, & omnes Misericordiæ Fratres, ob plerorumque ægroantium situm candela uti, nec tamen ideo invenire exanthemata.

XIII. Tandem proposuerunt mihi Studiosi dubium circa Cl. Hoffmanni, Fuchsi, ac Trumphii allatam Libr. de Febr. Div. auctoritatem; & quidem sic, ut Cl. Hoffmannus, statuens exanthematicos hosce morbos cum sponte genitos, tum vere criticos esse; ut Fuchsius, miram de cura uterini sphaceli per remedia externa theoriam proponendo suspectus, deinde exanthema violente extortum cum euphoria procedere, quod impossibile, docens; ac præterea exanthemata puerperis uteri inflammatione laborantibus, ante nonum puerperii diem salutaria esse contra me statuens; tandem Trumphius, qui haudquaquam de sudoribus, ut Miliarium genitoribus, verum ut Miliarium comitibus, differuerit, ac datis dedita opera calidissimis Bezoardicis, & Miliaria expectaverit, & eadem inde nata salutaria esse pronuntiaverit; ut hi, inquam, tres admodum in-
do-

donec a me ad confirmandam meam sententiam adhiberi ipsis videantur.

Si tres hosce Autores ideo laudasssem, quod mecum censerent raro sponte naturæ miliaria & petechias gigni; utique male laudasssem: si hosce viros ideo celebraßsem, quod calida in exanthematicis morbis non commendarent; falso eosdem celebraßsem: cum vero eam ob causam illos laudaverim, quod amare de iis Medicis conquesti sint, qui vel exanthemata producerent, ubi cæteroqui futura non fuissent, vel qui regimine calido uterentur in morbis, quibus exanthemata supervenire possent; tunc justo titulo hos omnes in meam sententiam citare potui & debui. Relegant ergo Discipuli mei & quid probare voluerim, & quid allati dixerint Autores; pudeatque ipsos se, omnia tumultuariò commiscendo, mihi intention-

tio-

tiones varias imputasse, quas nec cogitaverim unquam, nec cogitare quidem potuerim.

§. III. Triste sane ac tœdiosum est, temporumque notat iniquitatem, toties dicta repetere oportere, cogique ad respondendum objectionibus, quas, si non malevolus animus, saltem defectus attentionis in audiendo, legendo, reminiscendoque, pepere-rit. Ast vero Publici ego servus, publicæ amator promotorque salutis, elucidare hanc Disputationem debui; quademum a Tironum mentibus quævis hæsitætionis nebulæ dispellerentur? Interest *Austriæ*, totius interest *Germaniæ*, tam clara in luce Sydenhamianam collocari Boerhavianamque doctrinam, ut cujus miserandæ pestis, siue indies sævius grassaturæ, siue maximam partem propulsandæ, arbitri sint, serio jubeant exulem de finibus
age-

agere suis. Est mihi cordi hoc negotium, nec plane ingratos meos cineres *Germanis* fore hariolor, quando ab hac funesta plaga pene immunes, me adjuvante & urgente, se red-ditos esse recordabuntur. Feliciora vivimus tempora, diesque gratiores, quam ut publicam salutem Nationis erroribus immolaremus.

Interim animos juniorum Medicorum ad sanam doctrinam amplectendam ea eriget experientia, quam complures, qui mecum sentiant, frequentem habuerunt. Egregius *Klein*, cuius opus honorifica præfatione exornandum esse *Ill. Haller* censuit, se deprehendisse declarat „Exanthemata „ simplex accidens esse, & symptoma; nec critici quid, nec salutis „ spem facere. „ *Cl. Allionius* Taurinensis Professor eadem in Acutis, summo cum ægrorum emolumento, præve-

venienda esse, speciali tractatu evicit. Celeberrimus *Valcarengbi*, in Regia *Ticinensi* Universitate Prof. primarius, in *Spec. Pract. Cremonæ* 1761. edito in Quarto, aperte evicit nec ea Miliaria, quæ in Febribus suppuratoriis, nec ea, quæ in veris acutis adpareant, critica esse; hinc cum laudato *Allionio* omnem curam eo dirigi oportere, ut in hisce dictis morbis non prodeant: meamque denique, de Miliaribus & Petechiis factitiis sententiam, sua confirmat experientia. Egregius *Glas*, Comm. 7. de Febr. multus est in demonstranda Miliarium artificiosa generatione, & nocumento. Eximiorum Virorum *Hazenobrl* & *Lauter* tractatus, eadem propria experientia confirmantes, jam laudati sunt toties. Plures Medicorum, qui in ultimo truculento bello militibus curandis operam navarunt, serio mihi testati sunt,

Mi-

Miliaria & Petechias invenisse sese copiosas aliquoties, quo loco alii, five calido regimine, five aëre haud satis renovato usi, præcessissent; pauca vero, ac sæpe nulla in Nosocomiis, quibus præfuissent ab initio. Laudabilissimus Studii naturalis, Botanices, ac Medicinæ cultor *Cramer*, dignissimus *Pontis ad Leytham* Physicus, pluries mihi narravit, dum plura millia *Borussorum* captivorum anno 1757. & 1758. suæ curæ demandati essent, inter 300. eodem tempore, acute ut plurimum, laborantes, vix quatuor aut quinque Exanthemata passos esse; illos vero quatuor vel quinque, aut nimium tectos, aut arcte conclusos se reperisse, antequam sibi demandarentur: Leucâ autem a se distante Pago, ubi ab initio morbi calida methodus in usu erat, vix ægrotasse quosquam, qui exanthemate non macula-

rentur; a Militibus in incolas contagium transiisse; pluresque, una cum Medico suo, Exanthematum genitore, mortem occubuisse.

Quando igitur Medicinæ Studiosi, & Medici juniores, qui in Nosocomio meo demonstratam veritatem viderunt, serio hæc dicta revolvunt animo, an non gravis molestia, quæ ægros sub calido regimine premat; an non periclitans adstantium sanorum salus; an non formidabile discrimen, quod in calido regimine a minimo, eoque fere inevitabili, frigore exsurgat; an non tot ægrorum perditio, qui vix priori morbo sustinendo pares, altero, eoque sæpe calamitosiore, torqueantur; an non acutorum, inflammatoriorumque morborum dubia, propter imaginariam Exanthematum curam, alea; an non præsens ipsorum Medicorum periculum

lum contagionis & mortis; an non demum omni velamento denudatus patrius error; adhortari, incitare, animare, cogereque ipsos debeant, ut in Acutis morbis curandis inclytum *Sydenhamum*, admirentur, sequantur?

Præter insignia hæc emolumenta, quæ, Exanthemata haud ultra faciendo, universo generi humano conciliabunt ilico, etiam eidem supremum hoc beneficium præstabunt, ut contagio sensim imminuto, dira tandem plaga cesset, nec ultra, nisi in summa humorum corruptione, appareat.



CAPUT IV.

PROBLEMATATA

DE

SCORBUTO.

§. I. *Cur nobis Scorbutus, quam Antiquis, notior? Quosnam potissimum affligit? Scorbutus alcalinus, muriaticus, acidus, differt ab acrimonia spontanea alcalina, muriatica, acida.* §. II. *Daturne talis triplex Scorbutus? an autem unicum modo esse nonnulli Recentiorum vere demonstrarunt? Cum plura ad id observata requirantur, quam illi attulere, ut lis divinatur, testimonia plura examinantur, & varia Diaria marina consuluntur; ac 1^{mo} quidem Jacobi Quartier. 2^{do} J. van Linschoten. 3^{tio} Duodecim Nautarum, qui soli de naufragio, & hybernatione in Nova Zembla superstites, post varios errores in patriam redierunt. 4^{to} Guill. Corn. Schouten. 5^{to} Classis Nassovicæ. 6^{to} Laurentii F. Haan. 7^{mo} Friderici Maartens.*

8^{vo} Trium navium missarum ad novas terras australes detegendas. 9^{no} Navis dictæ Barneveld. 10^{mo} Guillelmi Dampier. 11^{mo} J. Egede. §. III. Putridus Scorbutus esse Marinus evincitur, idemque cum terrestri; quæritur porro, cum terricolis mitior redditus sit, an eædem causæ etiam mitificare eundem maricolis possint? Hinc cognoscenda marini scorbuti causæ forent. Causæ sufficientes non sunt aut marinus ær respirationi adversus, non ær humidus, non sal, nec vegetabilium succulentorum defectus. Cur vulgus marinum frequentissime, variis navium procures, afficiuntur? Machina Suttoni ventilatoria æris humiditatem noxiam sæpe non tollit. Concluditur ex combinatis pluribus causis scorbuto Classarios affici, quæ causæ navis procures tangere nequeunt. §. IV. Scorbutus marinus & alcalinus esse unice adparet, & tamen remedio æque calido, quam frigido; sed semper ex Vegetabilibus succulentis; persanatur. Quæritur unde hoc? Pringleana experimenta an id explicent? Quid in nautarum salutem suadendum Supremæ Potestati? Curaretne morbum ær purus? §. V. Parcimonia nostra in dandis medicamen-

tis ; Nautarumque in iisdem devorandis aviditas ; efficere videntur , ut longe citius efficaciusque nobis illi curantur.

§. I. **S**Corbutus, morbus pro parte Antiquis notus, ast vero, quia rarior, minus accurate, quam quidem posterioribus ævis, descriptus. Cum enim in longis, tædio-
fisque navigationibus potissimum contrahatur, utique rarior fuerit morbus necesse est, quando naves littora duntaxat lambendo, novis ubique alimentis, nova ubique refocillarentur aqua; frequentior vero, ex quo lævum mutandis mercibus æquor arando, diuturno sæpe tempore per im-
mensa maria fluctuantes, commercium agunt. Ergo & in Navibus jam multo numerosioribus, plebeque oner-
atioribus, dicta de causa scorbutici longe plures quam olim; & in continente quoque copiosiores, quod in-
nu-

numeri ex navibus in terram deportentur; quo tam Scorbutorum in Regione numerum augeant, & morbum veteribus curatius cognoscendi occasionem exhibeant Medico.

Observatur Scorbutus quoque frequentior populis Septentrionalibus, maris quippe plurimum accolis, 1^{mo} quod ibidem Athmosphæra sit, ob fluxum refluxumque maris, heterogenea, ac putrescentia, in littore relinquentis, impurior. 2^{do} Quod frigidiora incolent humidioraque loca. 3^{tio} Quod Borealiū gentium complures magnam vitæ partem in nave tranfigant, scorbutoque affecti suos repetant lares. 4^{to} Quod protractiore ibidem hyeme, Vegetabilibus diutius careant. Quippe generaliter loquendo (exceptiones enim res habet, ut patebit,) in Scorbutum cæteris proniores sunt, qui Vegetabili-

N 4 bus

bus diutius carent, ut *Bachstrom*, ut *Anglorum* plures, demonstrarunt: ita ut v. g. in urbe diu, arctèque obfessa, cives, copiæque præsidariæ, Scorbuto patiantur; interea dum, qui obsident, Scorbuto immunes vivant Vegetabilium abundantia, quam liber ad exercitum aditus, ipsique horti suburbani, suppeditant.

Dum Vegetabilia dico, intelligo succulenta: habentibus enim urbibus obsessis, & navibus, abundantiam Cerealium, Pisorum, Fabarum, nihilominus scorbutus in illis sæpe sævit. *Viennensis* Inclyta Facultas Medica Doctissimo *Cramero*, ipsam de scorbuto hungarico pessimo consulenti, Antiscorbuticas herbas ficcatas, hyems enim erat, & Antiscorbutica destillata miserat; dolens autem respondet *Cramerus* nullum morbi levamen ab iis se consecutum esse. Patebit postea

stea spiritus quosvis antiscorbuticos
semper inutiles fuisse Nautis.

Causa proxima ponitur esse sanguis rubra quidem parte crassus, ferrosæ vero partis una portio, mucosa; altera, acris; acris autem specificè: muriatica scilicet, acida, alcalina.

An porro similis acrimonia acida, muriatica, alcalina, in scorbuto, quam in humorum acrimonia spontanea, in qua etiam hæc triplex notatur acrimonia? Schola medica multam utriusque notat disparitatem. In spontanea acrimonia cujuscumque speciei sit, haud notatur putredo, atque exulceratio, gingivarum: non illa dentium vacillatio; non dolor ille, immobilitasque in genu, sæpe cum tendinum cruris flexorum contractione; imo ne illa quidem matutina lassitudo: In sola spontanea acrimonia

alcalina apud *Boerb. Inst.* §. 912. notatur quidem putredo ; in muriatica §. 914. rigiditas totius corporis : at tamen conferenti has §.§. cum capite de scorbuto *Boerb.* ingens apparet inter utrumque differentia. Describitur in spontanea acrimonia alcalina, sanguis dissolutus ; in scorbutica, sanguis parte rubra crassus ; in spontaneæ alcalinæ fero, nulla mucositatis mentio ; in scorbuticæ acrimoniæ alcalinæ fero pars mucosa una est, acris altera. Sed in singula spontaneæ acrimoniæ specie sanguis omnibus in partibus, pro specifica acrimonia, peculiari modo peccat ; ut hinc acrimoniam ab acrimonia characteristicè distinguas : in scorbutica vero singulæ speciëi sanguis idem crassus, serum partim crassum partim acre : acre autem illud speciem a specie unice discriminat. Febris adest, abest, sic
ut

ut in scorbuti definitione non contineatur, quamvis quædam detur scorbuticorum nonnullorum peculiaris febris. Quam Doctiss. *Murray* in suæ navis Scorbuticis numerosioribus epidemicam petechialem, eandemque funestissimam descripsit, hæc contagio maligni morbi, non scorbuti, tribuenda erat.

§. II. Estne igitur diversa Scorbuti species? Estne singula specificis suis curanda remediis? Gravissimi Auctores post *Eugalenum*, & *Sennertum*, sic docuerunt; egregii autem Medici non defuere, qui acrimoniam quidem specificam agnoverint, curam vero indiscriminatim tentarint calidioribus dictis antiscorbuticis, & acidis; sæpe etiam inter sese commistis. Videntur igitur hi sua curandi methodo indicasse, quod specificam hanc in scorbuto Acrimoniam minus admitterent.

rent. Quin etiam dum Historias navales accuratius examinemus, & consulamus, fere in paradoxam opinionem incidimus, ac si unicam scorbuti speciem duntaxat esse stupendæ arguissent curationes.

Sed priusquam concludamus, expediet consuluisse eos, qui omnium optimam morbum noscendi & curandi occasionem nacti, nobis sua reliquerint observata.

Occasionem de Scholarum doctrina circa Scorbutum dubitandi, supeditavit nobis opus tam utilitate, quam amœnitate, commendabile, Doctissimi Medici, *Richardi Walter*, quod iter præclari Architalassi *Anson* per Orbis ambitum, testis oculatus complexus est. In hoc erudito opere invenimus innumeris exemplis, quorum quodque centenos homines una capit, quæ proinde simul plures millenas

nas sanationes referunt, hanc sententiam, veluti Axioma positum, quod Scorbutus navalis sit alcalinus, sit putridus, sit qui vocetur calidus; de quo innumeræ historiæ nullum dubium reliquum fecerunt: quodque hic ipse scorbutus putridus tutissime, ac citissime curetur, tam copiosis antiscorbuticis calidis, quam frigidis; ita ut nautarum saluti æque conducere copiosus Cochleariæ Ceparum &c. usus, quam immensa Aurantiorum ac Limoniorum pomorum copia. Mox nos in limine offendit tale paradoxon axioma, cum scholæ subvertat doctrinam; unde memores Præceptoris monitûs *μηδὲν εἰκὴ, μηδὲν ὑπεροχῶν*, consulamus prius alios Scriptores marinos, examinaturi num idem, vel contrarium, illi experti sint, antequam Walterianum axioma, aut amplectemur, aut repudiemus.

Quod

Quod mihi primum occurrit, est Diarium *Jacobi Quartier*, qui jussu Regis Christianissimi *Francisci I.*; anno 1535. Americam Septentrionalem lustrans, hybernare cogebatur ad ripam fluvii *Canadae*, prope locum nunc dictum *S. Crucem*; Nautarum ingentem stragem hic *Scorbutus* fecit, universalem brevi facturum, nisi incolæ ipsis indicassent arborem *Anedda*, cujus & cortice & foliis plurimi reconvaluere. Doctus scriptor *A. Montanus*, qui nobis hujus Diarii copiam fecit, in sua *Americæ Borealis Historia* nihil attulit lucis, ut cognoscamus arborem: nec licuit apud *R. P. Hennepin*, apud *Denis*, apud *Martiniere*, aliosque, qui Regionem illam peragrarunt, aliquam ejus descriptionem invenire. Nec in Doctissimi, ac Nobilissimi Consilarii, & Professoris, *Nicolai Jacquin*, *Historia Stirp. Amer.* aliquid habetur, cum

cum ad eam in America latitudinem non pervenerit. Hinc ad alios, qui nobis nota magis antiscorbutica suppeditarint, nos conferamus.

In pluribus Diariis variarum Classium Navalium, quas sub finem sæculi 16. sive Respublica Batava; sive Urbium Batavarum nonnullæ, sive denique Cives ditissimi, miserunt ad viam tentandam, juxta *Muscovicam* ac *Tartaricam* oram, in *Chinam* ac *Japoniam*, strages nobis occurrunt, quas edidit scorbutus miserandas; eo quod expeditione qualibet infortunato admodum succedente, vel complures Naves inter perpetuas atque insuperabiles glacies, montesque glaciales, naufragarentur; vel Nautæ itineris tædio, longitudine, periculo, confecti, proprios demum lares repeterent; vel in *Novâ Zemblâ*, aut alibi, hybernare coacti, una vicē ad unum usque per-

perirent omnes, alia vice ex *Nova Zembla* in binis apertis scaphis, ex nave majore, glacie contracta, compositis, iter 400. milliarium in pelago errantes conficerent, donec demum ad extremam *Russiae* oram appellentes, inde in Patriam, ex toto numero duodeni, redirent. Non immorabor aliis Diariis, quam his, quæ ad scopum faciant.

J. van Linschoten in Itinerario anni 1594. refert se appulisse in locum, quem *Waygat* appellant, alii *Nassovicum Fretum*, mensis Junii 27. ibidemque detexisse inter gramina, aliasque herbas, *Cochleariam* copiosissimam, *Scorbuticorum* illuc appellentium tutissimam refectionem.

Diarium duodecim illorum, quos retuli, post hybernationem in *Nova Zembla*, in Patriam rediisse, refert il-

illos anno 1597. in insulam ignotam conscendentes, præ gaudio exclamasse ad visam primo Cochleariam, eo quod fere cunctos Scorbutus reddidisset pene immobiles; inde non comedendo, sed continuo vorando, se percepisse, non modo veras esse, quæ Cochleariæ in Patria laudes darentur, verum etiam omni illam laude superiorem; quandoquidem celerem adeo mutationem perciperent, ut, paucis post diebus, panem biscoctum denuo masticare, quod dolentes gingivæ, dentesque vacillantes, ante nequivissent, commode inciperent.

Data hæc exempla monstrant Scorbutum curatum Cochlearia: unde forsitan quis suspicabitur Scorbutum frigidum, sive acidum fuisse, hincque herba alcalescente & calida sublatum; talem vero, si acida & aciescentia antiscorbutica Regio dedisset, non mo-

do non curatum, sed in pejus ver-
sum, imo letalem fuisse redditum.

Respondebunt nautæ iidem. Scor-
butus redierat dum promontorium
Wardbus petituri, multum in flucti-
bus aberassent. Appulere demum ad
extrema borealia *Lapponiæ* in portum
Cola vocatum, intimiusque se pene-
trantes, Baccas *Rubi* copiosissimas de-
prehendere, quibus affatim comestis
a Scorbuto convaluere omnes.

Fructus acido - dulces copiosissime
comedentes, curantur a Scorbuto ii-
dem ipsissimi homines, quos antea
eodem in itinere, eodem in climate,
eodem cum victu, *Cochlearia* cura-
verat. Quid ergo de natura Scorbu-
ti statuendum? Acida & Alcalina cu-
rarunt saltem eandem Scorbuti spe-
ciem.

Rubi copia ingens, ingens &
Cochleariæ per boreales omnes regio-
nes :

nes : in omnibus itinerariis utrumque describitur, & ad Scorbutum ex æquo laudatur. *Denis*, quo tempore in *Canada* habitabat, Rubum ubique invenit tam copiosum, ac fertilem, ut qui suis de pratis eradicare vellent, non possent.

Anno 1615. 1616. 1617. *Guillelmus Cornelii Schouten*, Hoornanus, quo novas, transvecto frecto *Magellanico*, terras detegeret, australem orbi partem circum navigans, refert cum tædiosi itineris longitudine, tum diversigenis commeatûs, aquæ bonæ potissimum, penûria, potiolem Nautarum partem Scorbuto affectam esse; tentasse se dudum hinc inde insulam ut detegeret, & in continentem descensionem faceret ægrotantium; sed frustra. Scapha demum littûs aliquod attingente, nautas Herbam detexisse *Nasturtio Hortensi* similem, eamque

dein adhuc copiosiore in Insula dicta *aquosa* ad 12. gr. lat. aust. Coctis inde pultibus abundanter comestis, Scorbaticum nautam adeo levatum se percepisse, ut Herbæ vires haud potuerint fatis mirari.

In Diario Classis navalis dictæ *Nassovicæ*, quæ undecim Navibus constans, Architalassio *Jacobo Eremita*, ab anno 1623. usque ad 1626. vecta circum orbem est, nullas in principio detegimus Scorbuti querelas; causa videtur Limoniorum abundantia fuisse, quæ tanta nonnunquam, ut abuterentur, & ut Classis primo anno numeraret 42. suorum Dyfentericos inde periisse. Postmodum vero, ut in longis solet tædiosisque itineribus, Scorbuto aliam post aliam navem petente, deviando continentem quærere decretum fuit in Procerum consilio, Limoniorum quærendorum, aliasve

ve remedii antiscorbutici gratia: at vero nulla insula detecta, de servanda classe ob Scorbuti immanitatem desperatum est. Detegunt tandem Insulam *Annabon* ad gr. III. lat. austr. Nautæ & in insula Aurantiorum pomorum copia incredibili repleverunt sese, & bis centum millia eorundem secum in Naves induxere. Ex eo tempore nulla Scorbuti in Diario mentio fit.

Scorbutus igitur natus in plaga mundi australi, curatur antiscorbutico calido, Nasturtio Hortensi; curatur antiscorbutico frigido, pomis Aurantiorum & Limoniorum; eodem prorsum modo quo antea vidimus Scorbutum borealem integre curari calidis Cochleariis, & frigidis Rubis.

L. F. Haan, in *Historia Freti Davidis* plagam Occidentalem in *America Boreali* notat, ut in qua crescat spe-

cies Rubi, humi repentis, fragorum sapore grati, copiosissimi. Deinde totam Regionem describens, arbores ferre eam nullas ait, sed aliquas Frutices, & baccas ceruleas, similes Juniperi in *Norvegia* Baccis: tum & copiosissimam *Lactucam*, quam ibidem *Groenlandicum acetarium*, vocant, & *Acetosam*. Hæc *Lactuca* & *Acetosa* pro incomparabili Antiscorbutico habentur, ut refert; ita ut iisdem plurimum vescentes, incredibile quam cito, & integre, convalescant.

F. *Maartens*, Chirurgus navis *Hamburgensis*, in Diario sui itineris in *Spitzbergen*, & *Groenlandiam* suscepti, inter cæteras plantas meminit *Cochleariæ* quam ibidem pro scorbutico, copiosissimam, & sapore gratiorem, & in *Acetariis* vehementer amatam, notat.

Joannes Egede, Danicus per 16. annos Missionarius in veteri *Groenlandia*,

dia, refert cap. 3. „ præstantissimam
„ viribus *Cochleariam*, incomparabile
„ adversus scorbutum remedium, co-
„ piofam ubique ad oras maritimas
„ reperiri, sapore autem haud acrem
„ ita, amaramque, quam in regio-
„ nibus temperatioribus. Stupen-
„ das cæterum per eandem se curas
„ vidisse.

Anno 1721. a Societate Indiæ Oc-
cidentalis Batavæ missæ tres Naves, ut
novas Regiones ad gradum Lat. Austr.
56. quærerent, eruditum habent hu-
jus expeditionis diarium, cujus in ca-
pite 7. hæc de Scorbuto leguntur.
„ Aprilis 27. altitudinem attigera-
„ mus graduum 23. min. 2. Lat.
„ Austr. Hic demum incommoda, diu
„ observari cepta, quæ illos, qui
„ longa itinera mari conficiunt, in-
„ sequi solent, nos gravius preme-
„ bant. Quantus enim cumque Com-

„ meatus nobis datus esset , minue-
„ batur tamen , ita ut quotidianæ
„ portiones , ne tandem deficerent
„ penitus , indies parcius dispensa-
„ rentur. Quin & Panem , cum com-
„ munem , tum biscoctum , sitis cor-
„ ruperat , quemadmodum & reli-
„ quum , qui insuper vermibus sca-
„ tebat , commeatum. Percepta quo-
„ que & aquæ sensim crescens penu-
„ ria ; quare & parcius illa Nautis
„ cepta dari. Tandem & ipsa fæ-
„ tida ac verminosa , non ultra fuit
„ ad sitim idonea , nec ad humectan-
„ da corpora , quæ enormis calor
„ exsiccaverat , apta , nec utilis ad
„ deperditas illorum vires restauran-
„ das.

Præter cæteros morbos , Scorbu-
rum inde deduxit , nasci scilicet illum
oportere ratus , eo quod sicca esset
ac suffocans in mari Atmosphæra , quod
fa-

salita alimenta corrumperentur, quod
potabilis lymp̃ha deficeret, noctes-
que præprimis gelarent. „ Signa,
„ scribitur in Diario, morbi prima
„ manifestantur ad Gingivas, haud
„ tumidas duntaxat, sed & nigras
„ ac putridas; hinc foetens anima,
„ hinc corrupti dentes vacillantesque
„ adeo, ut nedum navalem, verum
„ etiam nec alium quemcumque
„ cibum, manducare queant. Inde
„ porro per universum corpus mor-
„ bus vagatur. Ad crura, ad bra-
„ chia, ad alias partes, maxime ve-
„ ro ad genu, patellam, Maculae vi-
„ suntur, pulicorum morsibus simi-
„ les, rubrae, purpureae, lividae, ni-
„ grae, una cum articulorum dolori-
„ bus. Posthac brachia, coxae, fe-
„ mora, hinc inde tument; livida
„ sic aut nigra, quemadmodum alias
„ a contusione fit. Palata videre est,

„ quibus frustra veluti crassæ corru-
„ ptæque carnis adhæreant , die a
„ chirurgica ablatione altero rena-
„ scentia. Multorum cernas horri-
„ de tumidos vultus. Accedunt de-
„ mum tremor , palpitatio cordis ,
„ tensio ventris , miseranda artuum
„ contractura , vehemens sæpe dolor,
„ & morbo penitus irradiato , mors:
„ non ita quidem ut omnia hæc sym-
„ ptomata eundem hominem impe-
„ tant ; nam ad interimendum suf-
„ ficiunt pauciora.

Remedia deinde prosequutus, Coch-
leariam quidem præstantem esse cen-
set, sed recentem tantummodo, haud
vero in spiritum evectam ; cum is,
inquit , calidior existens , tenuiora
dissipet , figat crassiora. Cæterum
in longis itineribus nihil reperiri præ-
stantius , quam in continentem descen-
de-

dere , quo ægri serenior aura aliquantisper vefcantur.

„ Vix fari datur , inquit , quantum marinum hunc morbum aer
„ mutet , emendetque , campestris ;
„ ac quantopere simplices *herbæ præ-*
„ *tenses* , ipsumque vile adeo habitum *gramen* , vires exerceant curandi valentiores illis omnibus , quæ
„ ut decantata remedia laudentur.
„ Miror fane Medicos illos , qui naves , quæ sua consilia obfervent ,
„ a scorbuto immunes fore obfirmata fronte asseverent. Etenim quæ
„ eorum remedia ad efficaciter præservandum alia , quam illa , quæ
„ *ipsissima in longis deficiant itineribus ?*

Inter medias has miseras Insulam detegunt ad gr. 15. Lat. Austr. cujus nigri incolæ insulæ afferunt producta : Nuces scilicet *Kokos* , & quandam herbam abundantissimam , amare-

re-

rescentem, similem per omnia *Nasturtio hortensi*. Incredibile, ait, quantopere inde reficerentur omnes; ita quidem ut, licet lapidibus fere obruti ab Insularibus fuissent, ni fugam capeffissent, insulam tamen *Refectiois* appellarent; quo nomine eandem posthac in Geographicis Mappis decoratam deprehendimus. Est in eadem fere altitudine cum insula supra dicta, ob inventas a nautis aquas *Aquosa vocata*, in qua eadem herba & copiosissima deprehensa est, & mirifice antiscorbutica.

Anno 1719. Navis *Barneveld*, post infortunatos per immensum pelagus errores, appellens tandem ad amplissimam insulam *Madagascar*, ad oram *Africæ* occidentalem, Nautarum 120. scorbuticos in Littus duxit, sub tentoriis locavit, & post 14. dies ple-rosque iterum sanos in Carinam re-
ce-

cepit, nullo adhibito remedio præter speciem *Nymphææ*, quam in aqua copiosissimam invenientes, tum juribus incoxere, tum more Acetariorum comederunt.

In itinere circum Orbem univrsũ *Guiljelmi Dampier* legimus, quæ ipse vehebatur, navem deposuisse ad Promontorium *Bonæ spei* suos Scorbuticos, eo quod ibidem quocumque fructuum olerumque genere plerique brevi soleant convalescere. Non addidit Autor numerum scorbuticorum, qui in hoc promontorium depositi fuerant; sed convaluisse refert omnes, quatuor duntaxat, qui omnium pessime in Nave habuerant, exceptis.

Famosissima Scorbuti curâ est Insula *Sanctæ Helenæ*, inter 15. & 16. Lat. Austr. gradum. „ Raro fit, in-
 „ quit *Dampier*, quin scorbutici hic
 „ amissam dudum recuperent sanita-
 „ tem.

tem. Fert Insula hæc herbas opti-
mas, unde balneis per Insulanos
adornatis rigiditas, immobilitasve
cruris percuretur: a suo autem
scorbuto fructibus, oleribus, re-
centioribus alimentis, cito liberan-
tur; ita quidem, ut qui pensili
lecto ex Navi in Continentem du-
cti fuerant, elapso octiduo pedibus
incedant, imo saltent: juvat vero
aura serena.

In tædioſo itinere ex *Nova Hollan-*
dia ad idem Promontorium, homines
ſcorbuticos primum 20. perdiderunt;
deinde vero morbo aucto, auctis iti-
neris tædioſi laboribus, putridaque
exiſtente ad bibendum aqua, miſere
omnino cum nautis agi ceptum. In-
terim Navis præfectus, magnam in
navi poſſidens *Tamarindorum* copiam,
juſſit definitam cuique ad prandium
por-

portionem cum Oryza dare ; id quod omnes multum reficiebat.

„ Porro ita commune omnibus ,
„ ait, malum erat, ut vix existeret,
„ quem immunem diceremus ; ma-
„ lum subdolè sic obrepens , ut ipsi
„ nos vix perciperemus ægrotantes ,
„ vixque dolentes ; sed debiles qui-
„ dem & inappetentes : subdolè, in-
„ quam, sic, ut plurimis eorum, qui
„ morti adpropinquarent, vix suade-
„ ri posset suo manerent in pensili
„ Læcto, donec demum immobiles
„ redderentur : quando vero se læcto
„ immobilitate affixos cernebant, con-
„ debant testamentum, haud ultra
„ biduum, triduumve, calamitates
„ protracturos se certi.

§. III. Ubique quæ de ipsa Morbi descriptione & symptomatibus Diaria habebant, in mea relatione collegi, ut constaret marinum illum scorbutum,

tum, in nonnullis symptomatibus, alia atque alia in nave, differentem, tamen præcipuis in rebus sic convenientem esse, ut scorbutum putridum vere referat; conveniatque omnino cum eo scorbuto, quem terricolæ habent: ita ut idem prorsum morbus esse appareat terra marique.

Subdolum hunc morbum lævius gentem borealem afficere observamus, ex quo tellus multis in locis sit redita ficcior; aggeribus sic adornatis, ut externæ aquæ secludantur, liber internis concedatur effluxus: ex quo ædes sic suas construxerint, ut minus humescant intus, ac liberiore perflectentur aëre: ex quo durioribus alimentis plura ceperint molliora interponere, sic ut dies nulla transeat, in qua variis lactucis, oleribus, fructibus, non vescantur; crudis, coctis, elixis, tostis: ex quo Asiatici aliàs

noxii, potus; sic saltem *Boerhavii* sententia erat; corpora ab acrioribus, diluendo, magis liberarint: ex quo tandem se contra cæli inclementiam firmioribus vestibus muniverint. Quin & cæteris paribus, vita laboriosa admodum, in eadem regione boreali, sub eodem victu & aëre, immunes omnino a scorbutis, aut levius saltem affectos, præstat Aratores, Fabros ferrarios, lignarios, &c. interea dum Textores, Sartores, Sutores, Pictores, Phrighiones, Viri Litterati, gravissime afficiuntur.

Examinandum est undenam scorbutus in navibus? ut pateat num vel hæc, quæ terricolis mitiorem reddiderint, vel adhuc alia, Maricolarum quoque mitigare tollereve scorbutum queant?

An igitur 1^{mo} ab aëre marino, ita ut ex mari quidquam exhalaret, quod

aëri commistum, ipsum sæpe redderet Respirationi ineptum, & ad scorbutum generandum aptum, ut quorundam opinio fert?

An 2^{do} ab humidiores semper atmosphæra?

An 3^{tio} a salitis?

An 4^{to} a penuria vegetabilium?

Ut primo generalem responsionem ad hæc omnia, deinde ad singula propriam, adornem, dico has quatuor causas ita universales esse, ut ex æquo omnes in nave afficiant, Gubernatores majores, minores, & Classarios vulgares. Constitit vero universali observatione classis *Ansonianæ*, aliorumque, nautas potissimum scorbuticos esse, minus esse præpositos minoris ordinis, adhuc minus præpositos majoris ordinis, omnino nihil fere Præfectos supremos. Cum igitur quatuor hæ causæ omnes ex æquo

æquo afficientes , non omnibus ex æquo scorbutum crēent , haud videntur ejus causæ appellari posse.

Doctissimus *Lind* , qui de Scorbuto Tractatum Historico - dogmaticum erudite & practice scripsit , dum examinat an salita scorbutum crēent ? egregie respondet non videri , quum sal a putredine ea præservet , quæ cæteroqui in putredinem proclivia sint : cum 2^{do} diuturniore tempore aqua marina , dira necessitate cogente , pota , scorbuticis haud nocuerit : quod tertio salita visa sint homines ab eodem præservasse.

Observatum quippe fuisse , dum naves *Anglicanæ* cum *Batavis* conjunctæ , stationem diu peragerent , ne portu solveret *Gallica Classis* , *Anglos* scorbutum corripuisse , non corripuisse *Batavos* : causa quæsitâ , constitisse id , quod *Classiariis Batavis* his in septi-

mana ex Brassica fale condita pararetur prandium, *Anglis* vero minime: cæterum in omnibus idem utrisque regimen contingere.

Pergit Doct. *Lind* docere non esse, qui scorbutum faciat, falem marinum. Scorbutum affici ceptis, inquit, mox omnia salita auferuntur; attamen morbus pergit, & furit. Præterea scorbutum natum ostendit, non nisi recentibus carnibus vefcente nauta. Sic *Ansonii* classi, *Mexico* recedenti, inter medias recentes carnes morbum natum: *Cæsarias* Legiones, Cl. *Cramero* notante, cum Carnium recentium abundantia; *Russicum* exercitum, referente *Nitschio*, salitis carentem, in turpes incidisse scorbutos.

In quæstione porro de Vegetabilibus, merito occinit Doctissimo *Bachstrom*, in eo, quod & ad prævenendum, & ad curandum, sint egregia:

id

id urbes obfessas, id *Hollandorum* Brafsicam confirmare lubens fatetur : at-
tamen cenfet etiam hanc *Bachstromii*
effe limitandam fententiam.

Quod enim 1^{mo} de urbibus obfefs-
fis conftitit, id in multis aliis obfidio-
nibus, ubi fimiles caufæ exifterent,
non ita conftitiffe. 2^{do} In media Ve-
getabilium abundantia fcorbuticos ef-
fectos effe Claffiarios.

Exemplum terribile affert, quod
egregius *Huxham* confirmat. Dum
Claffis navalis Architalaffi *Martin* in
Freto Gallicano diu obfervabat Claf-
fem Gallorum, in fuma abundantia
Vegetabilium omnium & optimarum
aquarum, tanto afficitur Scorbuto, ut
inter 4000. Claffiarios 400. numera-
rentur miferime affecti : fic ut Do-
ctifs. *Huxham* cernens redeuntem in
Pleymuti portum Claffem, graphice
ac lamentabiliter conditionem descri-

pferit ægrorum. Unde Cl. *Lind* defectum Vegetabilium, scorbuti feracem, non nisi causæ occasionalis vice fungi putat.

Sed ut certius, quid de Scorbuto proferatur, quid causæ est, quod plebs navalis infima hoc morbo maxime laboret? minus, aut vix Proceres? 1. Proceres navis & præpositi nautarum habent mutatorias vestes, ut madefactas exuere, ficas induere queant. 2. Lectos suos pellibus animalium munitiores adversus frigora, quam plebei, habent. 3. Omnes suas vestes habent Præpositi, quam Classarii, crassiores, arcendo frigori aptiores. 4. Habent Navium Gubernatores, & supremi Ministri, Tamarindos, Aurantiorum ac Limoniorum poma, horumque defectu varia Limoniorum genera muria condita, succum Limoniorum qui in doliis,
&

& melius adhuc in lagenis diu fervari possit, conditas sale Brassicas, Rapas, Phaseolos, Endiviam &c. Vina, Cerevicias lupulatas, &c. hæc omnia simul sumta & non Vegetabilia sola, concurrere videntur, quo minus Navium Proceres hoc morbo affligantur.

Vita laboriosa nautarum an non deberet illos eximere potius a Scorbuto, ita ut minus eo, quam Proceres, laborarent?

Si solus labor exercitus Scorbutum præcaveret, labor neglectus conciliaret, utique nautæ essent ab eo Proceribus navis exemptiores; sed ut, non obstante sua vita laboriosa, magis tamen Scorbutum contrahant, plures inevitabiles ipsis causæ, evitabiles Proceribus, efficiunt; ut jam vidimus.

An Machina Suttoniana apta non est, ad Scorbutum præcavendum in Navibus?

Juvat ad aëra puriorem reddendum, ac renovandum; in eoque sane egregia nautis est: si autem humiditate diuturna peccet aër, nil Machina juvat; cum pluviosa tempestate expulsum aëra humidum, humidus subsequatur. Unde gravissimus *Ansonio* Scorbutus, *Mexico* redeunti, & omni genere abundanti Vegetabilium. Pluviis saturo aëre explente naves, nulla dies ferena illuxit, qui navem permetteret ficcari. Venti interim & procellæ spumantes undas in naves invehebant, nautas reddebant madidos & frigidos. Cum nunc inter causas occasionales nulla sit aëre humido ac frigido peior, cum is diuturniore tunc obtineret tempore, Scorbutum pessimum nasci oportuit.

Ex cunctis liquet victum corruptum, aëra humidum ac frigidum, vestes tenues & humidas, humidos

te-

tenuesque lectos, Vegetabilium succulentorum defectum, animi mœores ac tædia longi itineris, unâ concurrere ad Scorbutum generandum; aëra humidum ac frigidum, cum vestibus & lectis nautarum frigidioribus, Scorbutum creare posse in media Vegetabilium opulentia; Vegetabilium defectum solum sine humiditate & frigore & mœoribus, vix creare Scorbutum, ut optimus *Lind* in *Scotiæ* Montanis incolis, & in *Finnis* evicit.

§. IV. Ex mirandarum curarum collectione constat illas peractas esse herbis calidis, & frigidis; calefcentibus, & acidis: *Cochlearia*, *Nasturtio*, *Brassica*, *Cæpis*, *Nymphæa*, *Lactuca*, *Acetosa*, *Rubi baccis*, fructibus *Tamarindorum* aliisque, maxime pomis *Aurantiis*, *Citreis*, ac *Limoniis*: quovis graminum genere: nec non qui-

busvis succulentis *Vegetabilibus* : *Vino*,
cerevisia, *aceto*.

Quamvis remedia, quæ morbum curaverint, oppositæ sint Naturæ, Scorbutus tamen navalis, Symptomatibus descriptus suis, unius modo speciei fuisse apparet; maxime id concludere licet ex curatione eorundem hominum primo per Cochleariam, deinde per Rubi baccas; ut supra constitit.

An vero Cl. Viri *Pringle* experimenta, acescentis Cochleariæ, dum chemicis quibusdam operationibus eandem exponebat, præcipuam difficultatem haud tollant, docendo unicuique Scorbuti genus unico medicamento genere curatum esse?

Si hæc experimenta aliis clarioribus elucidentur, lubens Viri Doctissimi sententiam amplectar: verum ne huc usque amplexus sim, me alia ex-

pe-

perimenta remorantur. De acore in ipsius experimentis ex Cochlearia percepto, ideo non concludo acidum in Cochlearia adeste, quia didici propriis experimentis, dum alcalina vegetabilia, dum ipsa jura carniū, certum quendam corruptionis gradum consequuta, quid acidi redoleant, id fugax acidum, licet syrupo Violarum detectum, ideo non docere naturam rei acidam, cum brevi post totum abeat in alcalinum. Ergo vix video, cur, ob fugax tale acidum, credamus & alcalescentia vegetabilia, & jura carniū, in corpore humano ut acida agere? Equidem in experimentis clarissimi Viri alcali volatile Cochleariæ avolavit multum, indeque natura herbæ alcalina vehementer mutata est; sed an mutata tota? An mirandæ curationes putridi scorbuti, ægris, Armentorum instar, crudam
de

de pratis herbarum vorantibus factæ, præsens non habuere alcali, idque copiosum? Deinde in Pringleanis sufficiens distinctio inter fermentationem & putrefactionem desiderari mihi videtur. Desiderari etiam arbitror debitam distinctionem putrida inter & alcalina. Putrida multa cum acidis non effervescent, donec certum adipiscantur putredinis gradum, quo fiant alcalina. Necdum etiam mea experimenta me convincere de vera putredine, etiam nondum alcalina, in vivente corpore animali. In tot morbis putridis, etiam conclamatis, dum sanguis vena tusa eductus, aut aliunde effluens, examinatus est, nunquam, ne in pessimis quidem vario-
lis, putredinis signa vel minima mihi dedit. *Mortono* putridus sanguis de vena exiliens descriptus, ob raritatem hic vix memorandus est. Et
de-

demum non datur in tota Chemia machina, quæ utcumque Machinæ humanæ similis sit: Comparentur alimenta & potulenta cum excretis secretisque omnis generis, an huic similem possideat Chemia machinam? Unde donec Clari, quem veneror, semperque venerabor, Autoris, experimenta elucidentur, cochleariam, nasturtium, allium, &c. vocabo calida alcalescentia, imo alcalina Antiscorbutica.

Nunquid ergo in Vegetabilibus, præter prædominans acre, aliquid aliud est, quo sic operentur, ut acre illud nihil obfit, & illud aliud, quidcumque demum sit, curam scorbuti peragat totam? Foretne vis eorum saponacea? an aliquid aliud?

An non his, qui salutis publicæ vimuneris coguntur invigilare, incumbit ut supremæ potestati ea indicent, qui-

quibus horrendus hic morbus præveniatur? Et an inter hæc Consilia etiam hoc salutare non suadendum, ut loco tantorum vegetabilium siccorum, parentur in doliis succulenta vegetabilia omnis fere generis sale condita, ut nunc pauca modo parari solent? Si Viri Clarissimi *Poissonnier* aquas marinas levi negotio potabiles reddendi succedat conatus, laudes merebitur æternas.

An ad stupendas & celeres scorbuti curas plurimum non contulit aura serena, in quam ex navi deducti scorbutici inducerentur, & qua compluribus fruerentur diebus?

Purus, siccus, tepens aer, partem medicinæ in his expleverit necesse est, dum humidus frigidusque aër symbolam adeo magnam morbo generando contulisset: sed absoluta talis puri ficci tepentisque aëris necessitas non

non demonstratur ex eo, 1^{mo} quod ægri sæpe jacuerint in Littore sub tentoriis, ubi certo & humidus aer, & frigidus sæpe est. 2^{do} quod plures tales celerēs curæ peractæ sint, ægris in continentem non expositis, verum navē detentis. Curam vero fortunatiorem ac celeriore bono cum aëre expectare oportet.

§. V. Quid demum causæ, quod marini scorbuti, ejusque pessimi, sæpe tam celeris, atque perfectæ cura fuerit; quodque terricolarum scorbutus curam nostram toties diuturnam, laboriosam, ac sæpe impossibilem arguat? An dosis esset Medicamentorum, quam ad guttulas, ad cochlearia, ad vascula aliquot Nutthemeri spatia evacuanda, præscribimus; interea dum Historia marina homines curatos ostendit illos, qui vegetabilia cruda integris manipulis, qui po-
ma

ma aurantia & limonia denario numero, qui præterea herbas & fructus, coctos, elixos, assos, juraque eorum, ad victum sic adhibebant, ut nulla re alia vescerentur?

CAPUT V.

DE MACHINA

AD

CURANDUM ILEUM

DESPERATUM.

§. I. *Communiceantur duæ Epistolæ agentes de Machina, nuper in Italia excogitata, quæ tres homines, Ileo desperato laborantes, integræ sanitati brevi restituti sunt; referentes quoque facta in canibus cum eadem experimenta.* §. II. *Traduntur novem mea experimenta cum hac Machina capta; qua occasione etiam phænomena, quæ circa Vermium in corpore animali domicilium, & circa Vitales actiones, ob-*
ser-

servabantur, noto. §. III. Quatuordecim Corollaria tam Theoretica, quam Practica, ex dictis deducta.

§. I. **E**Ruditissimus ac solertissimus Medicus *Joannes de Videmar*, celeberrimus *Mediolanensis* Practicus, ad promovendam Medicinam natus, jam pluries de ejusmodi Machina ad me scripsit, quæ excogitata in *Italia*, ad desperatum Ileum morbum, præfente jam vomitu stercoreo, solvendum pluries admota, nonnullos homines mortis faucibus eripuisset, eosdemque spatio incredibiliter parvo reddidisset sanitati.

Primæ ejusdem Literæ ad me datæ XII. Kal. Jan. 1762, sic se habent:
 „ Machinam, de qua alias sermo fuit,
 „ a Domino Physico *Molinari* huic nostro Fabro *Laurentio Mazzoni* demandatam, istuc brevi deferendam intelligo; ita binas alias historias,
 Pars VIII. Q ' „ rias,

„ rias , ad eam spectantes , quæ bis
„ fortunatum obtinere eventum , ti-
„ bi communicatas volo ; eaque si-
„ mul in Denatis per me capta ex-
„ perimenta coram Archiatro *Van-*
„ *delli* , ejusque nepote D. *Dominico*
„ *Vandelli* , ut de ejus usu certiores
„ apud Litteratum orbem rationem
„ reddere queamus. Et primo :

„ Rustica mulier torosa , quartum
„ agens lustrum , post magnam fal-
„ samenti , fructuumque horæorum,
„ ingurgitationem , quatuor milia-
„ rium iter suscepit. Domum re-
„ dux doloribus *ad ileum dextrum* ve-
„ xatur , cum abdominis intumescen-
„ tia , vomitu , anxietatibus : nihil
„ profuere Enemata sæpius applici-
„ ta , nihil iteratæ V. S. nihilque fo-
„ tus emollientes , & oleum Lini ma-
„ gna fatis copia epotum ; ita *ut ad*
„ *octavam diem* increbescentes , jam-
„ jam-

„ jamque morituram proclamantes,
„ ut transferretur machina, conscii
„ suadeant nonnulli: qua applicata
„ magna tepentis aquæ copia quatuor
„ dierum spatio, sed per intervalla,
„ injecta, mirum! dextram abdo-
„ minis intumescentiam se movere
„ visum est, doloresque demulceri
„ ceperunt, multisque brevi post de-
„ jectionibus liberata fuit.

„ *Frater Josephus Fidelis a Medio-*
„ *lano*, Capucinus, moribundis in
„ Xenodochio adstans, quadragena-
„ rius, post diuturnam toleratam fe-
„ brem vix reconvalefcens, in vo-
„ mitum fere continuum incidit, ma-
„ teriei primo aquosæ, viridescentis,
„ magnæ copię, singultibus identi-
„ dem comitantibus, nullisque trium
„ dierum spatio sedibus. Omnibus
„ incassum adhibitis, foetentes jam
„ incipiebat vomere fœces. Re in

„ angusto sic posita , adstans Chirur-
„ gus & Lithotomus magni nominis
„ *Dominicus Ocelli*, machinam expe-
„ riri solitus , ad eam confugiendam
„ esse autumavit , motum peristalti-
„ cum inversum revocandi ergo. Ma-
„ nu operi admota , paulatim , sed
„ repetito , injicitur tepida : paucæ,
„ sed crebræ redduntur sedes , (qui
„ effectus machinæ hujus singularis
„ & proprius alvum crebro irritan-
„ di,) brevi cessat emesis , perma-
„ nente adhuc singultu ; verum ana-
„ lepticis recreatus , integre conva-
„ luit , prout mihi retulit idem ægro-
„ tus.

„ Ad ea , quæ in denatis ipse ani-
„ madverti coram Testibus , nunc
„ devenio. Nudatis igitur Intesti-
„ nis , aqua per machinam injecta
„ paulatim præterfluere omnes Inte-
„ stinorum convolutiones , usque dum

„ con-

„ continuato per os exiret rivo, con-
„ spexi; ne guttula quidem in cavo
„ abdominis ejecta, intactis, etiam-
„ si fatis extensis, Intestinis; neque
„ tam impleta ac distenta inveni, ut
„ rupturæ periculum minarentur, quin
„ majori extensioni locus foret. Ite-
„ rato periculo in Cadavere, cui Ileum
„ pone Valvulam apertum fuit, aquam
„ vix ad libram injectam per aper-
„ turæ locum exire vidimus, nihil
„ prorsum resistente valvula, haud se-
„ cus, ac si nulla adesset: ex quo
„ vera scripsisse *Matthæum de Gradi-*
„ *bus*, *Guainerium*, aliosque, intel-
„ leximus, qui suppositoria in anum
„ intrusa, abrupto vi filo, per os
„ ejecisse ægrotantes nobis tradide-
„ runt; quin imo digito immisso in
„ Colum, deforsum versus absque ul-
„ la resistantia in ileum transivisse ani-
„ madvertimus.

„ Nec per constructam Machinam
„ istuc quantocyus translaturam ex-
„ perti fuimus aliis duobus in cada-
„ veribus ; hinc pari modo injecta
„ aqua ultra valvulam præterlapsa
„ non fuit ; ita ut non semper æque
„ constructam , neque in omnibus
„ æque validam esse fateamur oporteat ; quemadmodum & *Hales* in
„ canibus , aliique in hominum ca-
„ daveribus Anatomici annotavere.
„ Horum duorum cadaverum Intesti-
„ na ad spithamæ longitudinem , su-
„ pra & infra valvulam , de industria
„ dissecai , atque e corpore extraxi ,
„ in diem sequentem periclitaturus ,
„ quid inde esset. Injecta igitur in
„ Colon aqua , in Ileum pertransiit ;
„ minime miratus sum , eo quod par-
„ tes in situ quandam habeant actio-
„ nem , quam non retinent divulsæ ,
„ quemadmodum partium usus in de-
„ natis valde laceffitur. „ In

„ In vivo cane de industria para-
„ to iterum periculum fecimus , in
„ eoque facillime tepidam omnes In-
„ testinorum anfractus , ad Pylorum
„ usque , pervasisse vidimus. Ex
„ quibus patet Instrumentum hoc nul-
„ lum neque in vivis conatum infer-
„ re posse ; eo magis , quia dum fa-
„ tis est , injectio de cessatione admo-
„ neat , atque extracto tubulo imme-
„ diate post rejiciat aquam. Hæc
„ de Machina satis.

„ In secunda Epistola data *Mediolani*
sept. Kal. Jun. 1762. sic scripsit :
„ Habes hic annexam delineationem,
„ atque descriptionem Machinæ, cly-
„ steris vice adhibitæ. En casus !
„ Mulier fere quinquagenaria , coli-
„ cis doloribus quatuordecim dierum
„ spatio vexata , nihil prorsum per in-
„ feriora emittens, omnia evomebat ;
„ incassum adhibitis Clysteribus emol-

„ lientibus , acribus , ipsoque Tabaci
„ fumo , atque oleo amygdalino cum
„ Hydrargyro deglutito , nec repe-
„ titis V. S. ac balneis , levare potuit.
„ Ipso momento , quo Machinæ ope
„ injecta fuit saccharata aqua , tot
„ dejecit prædura scybala , ut vix
„ credi possit ; quibus exacte inspe-
„ ctis , præmulti uvarum acini , jam
„ multis mensibus retro comesti , re-
„ perti sunt.

„ Verum quidem est , quod mulier
„ hæc multos sustinuit labores in aquæ
„ violenta injectione , quemadmodum
„ optime notat Exp. *Hales* in *Hæmast.*
„ Exp. 25 . ac parum affuit ne in ani-
„ mi deliquium laberetur in fœcum
„ dejectione ; ast analeptics robora-
„ ta , in diem sequentem injectione
„ iterata , iterumque interpositis ali-
„ quot diebus repetita , optima nunc
„ frui-

„ fruitur valetudine , quæ iliaco mor-
„ bo mori proxime videbatur.

„ Haud abfimilis ei hæc machina
„ est , quæ ad extinguenda incendia
„ apud *Martin* describitur , in *Gram-*
„ *matica scientiarum*.

„ Jam in cadavere Machinam hanc
„ experti fumus , vidimusque aquam
„ ad Pylorum usque adscendisse ; ast
„ ignoro usque dum , an in omnibus
„ cadaveribus hoc eventurum sit ? Re-
„ petitis experimentis te commone-
„ faciam. Dubium tamen est an ,
„ posito quod æque eveniant in om-
„ nibus demortuis , in vivis pari mo-
„ do eventura sint , (quemadmodum
„ & tu notas super *Halesiana* experi-
„ menta ,) majorem propter *Tulpia-*
„ *næ* valvulæ vim in his , quam in
„ illis.

„ Clarissimus *Hales* loco citato , &
„ tu quoque in capite *de Tympanitide*

„ & *Ileo morbo*, Medicos admones
„ ut hujusmodi casibus enemata ex-
„ cogitent tantarum virium, quæ In-
„ testinorum obices tollere possint.
„ Hæc tibi communicata historia fa-
„ tis evincit, quantæ sit efficacix si-
„ milis aquæ injectio.

His ita a dignissimo Viro perceptis
curavi mihi juxta delineatam calamo
effigiem *Machinam* ejusmodi parari:
quam *Tabulam* lubenter communica-
turus essem, si in aëtis *Bononiæ*, alius-
ve *Italicæ Eruditorum Societatis*, non
prostaret brevi; & nisi, ut ante mo-
nitum est, fere similis haberetur in
Martini Gram. Scient.

Die Martis 28. hujus anni, pri-
mum experimentum in *Nosocomio* fe-
cimus in *Cane viva*, mediocris ma-
gnitudinis. Injecimus in tribus ite-
ratis vicibus in intestinum Rectum Li-
bras

bras Medicas unciarum XII. prope-
modum sex aquæ tepidæ.

Post singulas injectiones canis in-
credibili impetu aquam cum stercore-
bus ad 4. 5. pedum distantiam expu-
lit ano. Has tres injectiones spatio
horæ quadrantis absolvimus.

Liberata Canis per 3. 4. minuta
spatiosum cubiculum circuivit, cor-
pus posticum totum madidum ubique
affricans. Postea cucurrit alacriter,
bene dormivit, saltavit, manducavit
eo, & seq. die.

Violenta hæc vis, qua injecta aqua
ad tertiam usque vicem resili-
ret, nos-
que injectionem ter repetere cogeret,
suspicionem dabat an valvula *Bauhi-*
niana transitum non denegasset.

Unde die 29. & 30. & 31. Martii
eodem modo experimentum repetivi-
mus, eundem an effectum editurum
esset curiosi. Et phænomena inje-
ctio-

Etionis eadem erant, & æque bona canis post injectionem valetudo.

Unde 1. Aprilis experimentum sic mutavimus, ut ano bene circum sphunculum clausô, & cane melius intra manus firmata, Sex ad minimum libras continuata opera injecerimus. Porro dum Libræ pene quatuor injectæ erant, canis vomere cepit, primo aquam, dein cibos, vermes tandem teretes vivos. Iniectione interim pergente, Vomitus rivi lati instar profiliit ad distantiam 3. aut 4. pedum.

Vis ergo machinæ continuationis resistantiam valvulæ superavit.

Animus erat ilico interna examinare. Strangulavimus canem, & aperuimus. Crassa Intestina modicè, tenuia minus, Ventriculus immenso distentus erat.

Aper-

Apertis colo & ileo, oblongum in valvula hiatumprehendimus.

15. Aprilis fano ac vegeto canis unica continuata vice, nisi quod semel quidquam alvus resliret, injecimus ultra octo Libras aquæ tepidæ. Post injectas 5. Libras vomere cepit, pluriesque vomitum exinde repetivit. Paucis post minutis a fordibus canis mundatus, ac linteo ficcatus, hilaris ac sanus fuit per plures dies; postea dimissus adiit ilico suum in vicinia herum, reditque adhuc sæpe nos blande salutaturus.

18. Aprilis in cadavere humano vires exploravimus Machinæ. Sexagenario major cum calculo in Vesica in Nosocomio obierat. Vesicam cum calculo primum eduxeramus, ne utilissima demonstratio, quam posthac communicabo, turbaretur. Injecimus tunc ope Machinæ tepidam per
anum,

anum, quæ ut facilius progredere-
tur, intestina plurium manibus molli-
ter compressimus; sic tamen ut aquæ
progressum levatis sæpe manibus be-
ne contemplaremur. Vidimus Inte-
stina crassa cito impleri; nonnullam
quidem nasci ad Valvulam remoram,
sed brevi sublatam; injectam aquam
momento citius Intestina tenuia per-
meare; non extendi ea notabiliter;
ventriculum autem valde turgidum
fieri, oreque mox elabi aquam. Val-
vula hiabat; antequam vero perfcin-
deremus, ex colo aquam in ileum
promovere satagebamus, haud æque
feliciter in quovis Intestini situ: cer-
tus ac determinatus situs requireba-
tur, ut ex Cæci sacco aqua in Ileum
transiret.

3. Maji canem masculum 16. men-
sium, fortem, nacti, experimentum
iteravimus. Valida corporis contor-
sio.

sione & ejulatu tres primæ tepidæ libræ vi expellebantur ano. Quo dein accuratius circum cannulam firmato, tres alias libras commode, & non interturbate, injecimus : aqua interim vomitu quidem valido, sed eo, qui in primo cane observatus, debiliore, ejectabatur, cum paucis cibis, & teretibus Lumbricis, ad tertiam usque vicem.

Decreveramus etiam hunc exemplo aperire; sed cum inde minus recte, quam priores canes, se videretur habere, pepercimus ejus vitæ, visuri an quid ab operatione infortunii observari daretur. Ast hora elapsa canis per omnia se sanum esse demonstrabat. Cum haud illepidus cuiquam placeret, qui pro suo magno ac vetustiore cane libenter eum mutaret, dedimus illi nostrum, postquam per novem dierum spatium certiores nos

de ipsius perfectissima sanitate reddidissimus.

Canem ergo majorem illum 12. Maji ad experimentum ducentes, spatio binis minutis breviori injecimus aquæ tepidæ 8. vel 9. Libras, quæ incipere tunc violento saltu, minus tamen violento, quam in primo experimento, ore exfilire. Vomitus iterum ut in prioribus ter repetierat,isque singula vice copiosissimus. Materies ejecta partim aqua erat, partim copiosa caro, partim lumbrici teretes, digitum, sesquidigitum, longi, valde graciles, partim copiosissima Tenia, & gluten multum.

Apertis per longitudinem intestinis deteximus innumerabilium Teniarum copiam, sic ut catena cohærentium sibi cucurbitinorum vermium, five Ascaridum planorum, hinc inde, forte per vim aquæ, fracta, plus vige-

gesies iret, rediretque per totam tenuium intestinorum longitudinem, glutine involuta copiosissimo. Lumbrici teretes Teniam concomitabantur ubique.

Peculiare in hoc cane fuit, quod Colon in medio ventre sub umbilico originem haberet, rectaque descendens, mox Rectum formaret; longitudinem igitur una cum toto Recto 8. vel 9. pollices emensum duntaxat: quale quid & in homine *Dionis* se testatur observasse. Ceterum breve hoc Colon ab injecta aqua probe elutum erat, compactas modo fœces & in ortu suo, & in magno suo processu vermiculari, gerens.

Utrique cani, quem strangulaveramus, effectum machinæ contemplaturi, laxato post apertum abdomen & thoracem fune, vita pulcerrime redibat. Quo animadverso, mox

ad actiones vitales contemplandas, reliquo examine ad tempus dilato, nos accinximus. In priore cane, aperto pericardio, cor pulsabat uno tempore æquabiliter, alio inæqualiter: vita labascente, per vices quievit & palpitavit. Levis digiti attactus momentaneam vitam reddebat. Attenti ad ultimum cordis motum, vidimus utrumque ejusdem ventriculum æquabilissime agere, & æque fortiter; idque etiam ubi post aliquantillam quietem, sive sponte, sive flatu, tactuve, suos redintegraret motus. Quo autem certiores hujus essemus, cor parum invertēbamus, ut cum sinu & auricula sua Ventriculus sinister sub liberio rem conspectum caderet; unde finistrum cor pulcerrime agere cernebamus, ut ante videramus pro parte.

Quod autem diu, distincteque, ac de industria, notabamus, vix cuspis
di-

dici poterat ad basin in systole multum accedere, idque etiam a principio, dum cordis validior motus existeret, notavimus. Dicendum potius est in systole cuspidem, & latera Ventriculorum, se simul leviter contrahere.

Arteria intercostalis percissa pulcre ostendebat velociorem illum saltum, quem arteriosus sanguis ad singulam cordis contractionem edit.

Uterque Cordis ventriculus apertus multum, sinister autem plus, sanguinis continebat.

In altero cane pericardium ægre a corde secedebat. Attenti ad omnia, vidimus clare in systole cordis basin, æque ac mucronem, & parietes, ad se invicem accedere, & cor facere se ipso minus: motus vero vitalis ad finem usque pergebat æqualiter in utroque thalamo, inverso corde, quemadmodum in cane priore,

ut cordis sinistri motus apte conspici posset. Tandem, quod non in Canine priore, cessante motu vitali ventriculorum, auricula dextra quater vibrabat, quo tempore sinistra semel. Cor sinistrum cum sua auricula æque plenum sanguine, quam sua cum auricula dextrum. In sinu dextro polypus magnus.

In utroque Canum experimento dextrum Cor non vixit sinistro diutius. An quod, corde in situ manente, cor sinistrum minus conspicuum sub ultimis vitæ scintillis mortem testari maturiorem videatur? Igiturne aliqua cordis inversione opus, ut certi quid affirmemus, detegamusque errores?

In humanorum Cadaverum examine Cor sinistrum sæpe minus quam dextrum repletum inveni, sæpe æque repletum, aliquando repletius. A Methodo secandi multum pender: qui

cor dextrum prius aperiunt , hi motu , pressione , evacuant cor sinistrum plus , quam aliter ; qui sinistrum prius , eandem ob causam possunt dextrum inanire.

Finem Capiti huic , & simul operi , imponam quibusdam Corollariis & Problematibus.

1^{mo} Patet in Canibus facta Machinae operatione sic , ut aqua injecta bis , ter , cum facibus alvo expelleretur , vomitum non adfuisse.

2^{do} Canes post hanc operationem minime ægrotasse.

3^{tio} Quod Vomitus non successerit , violenteque ex ano fuerit expulsa aqua , id minus videri Valvulae resistentiae tribuendum , quam quidem canis motui , contorsioni , clamori , elabendi conatibus.

4^{to} Id evidenter patuisse , quando , cane prudentius firmato , injecta con-

tinuatim aqua Vomitu repetito expulsa fuerit.

5^{to} Experimento eo usque producto, ut violentus, repetitusque sequeretur Vomitus, unàque cum aqua cibus, gluten, multusque tum teres vermis, tum latus; igitur eo usque, ut vis valvulæ coli penitus superaretur, ut motus peristalticus naturalis sufflaminatus, & ut motus antiperistalticus esset præternaturaliter auctus; experimento, inquam, sic aucto, Canes tamen nullam inde habuisse, imo ne a sæpius quidem repetita eadem actione, sanitatis jacturam aut læsionem.

6^{to} Canibus stantibus, ac quatuor pedibus suis supra mensam detentis, cum injectionem fecerimus, quæritur utrum injecta aqua faciliorem hinc habuerit, an difficiliorem motum ad os usque? Et an saltem in homine
ilia-

iliaco , dextrum in latus pro more
verso , injectione minus succedente ,
fitus non foret , qualem in canibus
observavimus , conciliandus ?

7. Et in canibus , & in hominum
Cadaveribus , quæ *Cl. Widemar* , quæ
nos , aperuerimus , aperte contem-
plati fuerimus , omnia Intestina mo-
dice tantum turgida inventa esse : vi-
deri hinc eam vim Machinæ esse , ut
omnes in via resistentias multo leviores
negotio superet , quam ut per resi-
stentes potentias suam viam amplifi-
care cogatur. In vivis quidem inte-
stinorum vis contractilis juvare dici
potest ; in cadaveribus autem haud
ita.

8. Cur in iisdem experimentis
(nº 7.) Ventriculus maxime expan-
sus ? Replendus is erat donec vel fin-
deretur , vel per orificia evacuetur se
sua : per orificium inferius sive dex-

trum non poterat, impellente fortius machina; ergo per superius tantum, ubi primum sic repletus, ut capere ultra non potuerit.

9. Haud in canibus duntaxat, verum nec in hominibus, hucusque inventam esse per se letalem eam, superna versus, *Tulpianæ* valvulæ aperturam, ut aqua, ut stercore, ut enemata, ut etiam suppositoria, ex Recto & Colo adscendant, & ore evomantur. Casus *Matthæi de Gradibus, Guainerii, Pueri*, de quo *Rat. Med. Tom. 3. pag. 104. 105.* tandem & trium illorum, quibus, referente *Cl. Widemario*, hæc Machina vitam servavit, aperte hoc evincunt.

10. Casus dari ex observationibus, quos Machina hæc minime curet: quales enim binos expertus sit *Cl. Widemar* insuperabilitatis Valvulæ, tales plures reperiundos fore. Jure pro-

proinde *Italos* Medicos & Chirurgos laudandos, qui in vivis hominibus, ne una vice nimium urgendo obessent, lente adeo & prudenter progressi sint.

11. Meditationi Pathologicæ multam materiem a Vermibus in Canibus repertis suppeditari. Ac primo quidem ope Machinæ in binis Canibus vermes teretes plures vomitu ejectos; in tertio magnam copiam teretium & latorum. 2. In Anatome canis posterioris Teniam copiosam, multosque illos teretes vermes, intestina fere tota explevisse. 3. Eosdem copiosissimo ac tenaci inhæsisse glutini. 4. Cur tota hæc moles, aut cur saltem primo in ortu, motu peristaltico, & transeunte chylo, depulsa non fuerit, mirum videri; cum quo affigat sese, quove retineatur, nullibi appareat quidquam. 5. Retinere-

turne hæc Vermium ac glutinis moles a motu antiperistaltico naturali? Sed cur tunc Chylus, cur incipientes non retineantur fæces? 6. Nunquid copiosi adeo Vermes suo motu & reptatu non plus, quam alia ibidem contenta, canalem intestinalem stimulent? & cur haud expellantur tamen? 7. Possiderentne vim sustinendi se, motui peristaltico resistendi, affigendi se, dum pelluntur, tuendique domicilium? 8. Ideone inefficax toties Antihelminthici vis, quod tenaci glutini involuti vermes, tutique hæreant? 9. Visne Antihelminthici ea præcipua sit, quæ gluten incidere, pellereque, sit potis? 10. An Alium, Asa fœtida, Fuligo cruda Caminorum, &c. sæpius sumpta, Vermes in medio suo glutine sic afficerent, ut sede mutari cogerentur, & vel sponte sursum deorsumve exitum quæ-

quærerent , aut catharctico fortiore tunc facile expellerentur ? An vero hæc tantum in gluten destruendum potenter agendo infecta fugent ?

12. An inde forte capiatur cur alvo nonnunquam prodeant corpora ulna longiora , intestinum cavum longitudine , amplitudine , cavitare , referentia ; quale quid stupenda eruditione clarus *Justus Lipsius* , teste Medico suo *Heurnio* , patre , excrevit ? & quale præstantissimum Collegam , variis portionibus , quas inter unam quatuor spithamarum , excrevisse vidi ? Utique Glutinis immensi , intestina oplentis , copia , sive genita cum Vermibus , sive aliunde , possetne aliquando inspissari , condensari , conglutinari cum cavo intestino , & post Leienteriam , post Atrophiam a tot obstructis Lacteorum osculis , naturæ demum

num bonitate sub hac exposita forma excerni?

13. Si tandem, plurium Iliacorum curatorum exemplis, Cunctis meridiano sole clarius constiterit *Tulpianam* Valvulam a Machina innocue aperiri, totumque intestinale tubum se tuto per os evacuare; an tunc in difficillima cura Vermium, cum maxime latorum, Machina applicanda non foret vicibus repetitis, ut *Itali* fecerunt; quandoquidem viderimus ab unica applicatione, sed fortiore, & lumbricos multos, & copiosam, cum muco abundantissimo, expulsam Teniam? Animus est, si denuo canem teniosum nactus fuero, singulo tertio quartove die experimentum toties repetere, donec ultra nihil de verme prodeat; incidere demum Canem, visurus num penitus a Vermibus immunis sit, nec ne?

14. De

14. De experimentis, circa actiones vitales in vivo animali utroque hic captis, notandum id censeo, quod in omnibus canibus ac felibus, quos ad cōtemplandam hanc actionem unquam vivos cōtemplatus sum, rem non semper, ut hic, invenerim; verum perpetuo cum mira in aliis atque aliis varietate: unde concludo 1^{mo} illegitimam quamcumque regulam physiologicam fore, quam ex ejusmodi phænomenis, adeo inconstantibus, obtrudere quis vellet. 2^{do} magis illegitimum esse actionem sani vegetique animalis sic exponere, & per ea explicare velle, quæ in eodem vulnerato, convulso, agitato, cum morte luctante, cum absentia resistantium potentiarum, quæ olim partes in debito situ detinebant, fulciebantque, observentur. 3^{tio} Maxime illegitimum vitalitatem humanam,

nam, sanam, explicare, & comparare cum phænomenis, quæ animal vulneratum, & cum morte luctans, insigni varietate & inconstantia offert contemplantibus.

Atque hic tandem finem operi impono, solito jam protractiori, quam ut notabiliores casus Chirurgicos & Anatomicos, quorum tamen scire interest, adjungam eidem: unde hos ad proxime subsequentem tomum reservabo.



ANTONII DE HAEN
S. C. R. A. MAJESTATIS CONSILIARII
ET ARCHIATRI,

NEC NON MEDICINÆ IN HAC ALMA
ET ANTIQUISSIMA UNIVERSITATE, PROFES-
SORIS PRIMARII, SOCIETATIS SCIEN-
TIARUM HARLEMENSIS, ET PHYSI-
CO-BOTANICÆ FLORENTINÆ
SOCII,

PARS NONA

RATIONIS MEDENDI

IN NOSOCOMIO PRACTICO;

QUOD IN GRATIAM ET EMOLUMENTUM
MEDICINÆ STUDIOSORUM

CONDIDIT

MARIA THERESIA,

AUGUSTISSIMA ROMANORUM

IMPERATRIX,

HUNG. BOHEM. &c. REGINA &c. &c.



VIENNÆ AUSTRIÆ,

SUMPTIBUS HERMANNI JOSEPHI KRÜCHTEN.

M. DCC. LXIV.



ELENCHUS CAPITUM.

CAPUT I.

Sistens Anatomicas aliquot sectiones,
una cum brevi prægressi morbi
historia. Pag. I.

CAPUT II.

Sistens Pathologicam prioris Capitis
Discussionem. Pag. 50.

CA-

CAPUT III.

De Miliaribus. Pag. 93.

CAPUT IV.

De Systemate Halleriano. Pag. 103.

CAPUT V.

De Morbo Ileo, & prosecutio experimentorum cum Machina adaptata ad eundem, etiam desperatum, solvendum. Pag. 203.

CAPUT VI.

Varia. Pag. 234.

CAPUT VII.

De Inoculatione Variolarum, Pag. 259.



CA-



CAPUT I.

SISTENS ANATOMICAS

ALIQUOT

SECTIONES, UNA CUM BREVI

PRÆGRESSI MORBI HISTORIA.

§. I. *Pleuroperipneumonia, in qua dolor die 5. evanuit, pulsus autem semper, & cum dolore, & sine eo, aut fortis, aut durus, aut subdurus, percipiebatur; in qua sanguis quo crebrius missus; eo magis phlogisticus fuit; & in qua multa signa bona multis perpetuo malis commista erant. Mors die septima. Anatome eum in fi-*
Pars IX. A nem

nem descripta ut haud ea modo, quæ ad hunc morbum pertinent, sed & multa alia innotescant, quæ in decursu hujusce operis usui venient: quod idem de reliquis anatomicis sectionibus monitum esto. §. II. Pleuroperipneumonia ad 11. diem letalis, cum pulsu fere semper duro, & intercurrente Asphuxia, dolore pridie mortis evanido. Anatome. §. III. Pleuroperipneumonia ad diem 7. letalis sine pulsu duro, nec molli tamen. Anatome. §. IV. Gastritis sine vomitu, letifera, in cachectica femina, cum maxime fallentibus sanguinis missi phænomenis; in qua etiam id singulare, quod consuetudo suo per omnem vitam modo, animo linqueretur, in prima & altera, quam ipsi instituimus, Missione sanguinis; in tertia vero, ac quarta, minime. Anatome. §. V. Renalis morbus chronicus, cui deinde Pleuritis, ac Paraphrenitis, acutissimæ junctæ, cum miranda Cadaveris sectione. §. VI. Labes vi externa contracta, quæ demum post sexennium Hydropem pectoris mentita, mortem intulit miris symptomatibus. Anatome. §. VII.

§. VII. *Mors a Phthisi pulmonari, cum suspitione Aneurysmatis in ventre latentis. Anatome.* §. VIII. *Ignotus morbus sectione Cadaveris cognitus.* §. IX. *Mors ab ulceribus cruris, spurium demum Aneurysma generantibus.*

§. I.

De Nosologia, & Diagnosti, nonnulla prolaturus, præmittam plura, quæ post datos primum morbos, a morte deteximus.

Iuvencula 17. annorum, a triennio primum menses irregulares, quin & semel anni cessantes spatium, a sesqui anno vero iterum sat, ut ait, copiosos, & nuper adhuc mox ante hunc ultimum morbum suum, habens; febre acuta cum miliaribus anni abhinc elapso spatium laboraverat, exinde vero sana vixerat; excepta, qua non laboriosa

quidem, nec valde ficca, frequenti tamen admodum vexabatur, tussi. Lortrix erat.

Martii 10. Pleuroperipneumonia eam invasit, cui in principio dolor pectoris universi, dein lateris sinistri inferioris, & die quarto ejusdem lateris superioris, perpetuus eo usque comes, quinto demum die ita evanuit, ut nullus postmodum, nisi a validiore nonnunquam tussi, perciperetur. Pulsus ipsi passim celer, fortis, nonnunquam sive durus, sive subdurus, nunquam vero cum celeritate mollis, nisi prope mortem fuit. Sexies ipsi Vena secta est, sic ut libræ medicæ quinque ipsi detractæ sint; sanguinis crassamenti, crustæque densitate eo quidem auctiore, quo crebrius educeretur. Urinas vel crudas minxit, vel coctas, nonnullas etiam hypostaticas. Emisit nunc crudam alvum, nunc, idque sæpius,

coctam, ac flavam; sub finem autem fuscam, valdeque foetentem. Reddidit pauca, vix cocta unquam, sputa. Bonas partim, partim malas transegit noctes. Transpiratio inconstans; quemadmodum ne unicum quidem signum bonum, seu vitales actiones, seu naturales, animalesve spectares, toto morbi decursu apparuit, quod malis admodum signis non interturbaretur. Periiit die 7. morbi finiente.

Hora a morte 27^{ma} elapsa, Cadaver aperuimus. Quod externo in corporis habitu notaremus, nihil fuit. Torosæ Mammæ. Gracile potius & depressius, quam tumidum erat Abdomen, nec vel ad Epigastrium ullo modo tumefactum.

Bonum Omentum ac pingue, obvelans cuncta viscera ad amussim, ad imam usque pelvim, & ad integra latera.

Hepar lobo majori suo explebat totum dextrum latus sic, ut superiore sui parte altitudinem quartæ, numero a superioribus ducto, costæ æquaret; inferiore autem trium latitudine pollicum infra Costarum infimarum Cartilagines descenderet; in medio vero Epigastrio in latus sinistrum nonnihil protenderetur. Lobus minor, ingensque ille, superiorem ventriculi partem transcendens, attingit areum sinistrarum Costarum, indeque retroflexus ventriculum a latere, ac non nihil a dorso, amplectebatur.

Lobus major, qua parte ad minorem vergit, pugni magnitudinis Hydatidem gessit; quæ, eo quod in excavato ad id hepate hæreret, sua ipsius mole sive in vita, sive in Cadavere, neutiquam eminuit.

Vesicula felle bilem paucam habuit, eamque haud spissam valde, aut valde aurantiam.

Splen

Splen pedem hominis adulti longitudine ac latitudine referens, ad sesquipollicem latum infra imam costarum marginem eminuit.

Ventriculus parte superiore delitescens sub Hepatis minore lobo, demum conspicuus infra ejusdem oras apparuit; ampliusque deinde tam in dextra, quam sinistra, demum leviter obliquus, pylorum formabat ad umbilicum, dextrorsum.

Intestinum Colon naturali modo habuit, nisi quod grandior splen flexum in eo extraordinarium faceret. Intestinum Ileum in pelvi hinc inde aut rubrum valde, aut purpureum. Ceterum Intestina omnia naturaliter distenta erant. Boni Renes, Ureteres. Vesica fere vacua. Uterus instar parvæ, ejusdemque complanatæ, Castaneæ.

In Thorace Cor haud parvum, iusto carnosius; maxime lævum. In

utroque Cavo polyposi quid, quod in vasa majora usque pergebat: auricula dextra inde omnium maxime distenta. Erat autem materies hæc crassitudine, albedine, scissilitate, ei similis, quam in misso sanguine crustam inflammatoriam appellamus. Nec ab ea differebat, qui in magno venarum pulmonalium confluxu aderat, venosus polypus; nec ille, qui in Aorta. Aorta vero descendens hic rubrum sanguinem, illic pallidiorem habuit; fluidum hic, illic grumosum. Bonæ valvulæ, & cætera omnia.

Pulmones accreti nullibi: sinistri autem superior lobus exhibuit suum totum parenchyma durum ita, ut hepatis referret substantiam; sic grave, ut in aquam injectum, mox ejusdem peteret fundum. Ceterum, lobus inferior, ac dexter pulmo totus, nec rubebant, nec tumeabant.

Mox

Mox post Trachææ dichotomiam, in principio sinistri pulmonis, Calculus friabilis, granorum quinque, apparuit; nec procul inde veluti Corpus glandosum, quod perscissum similem calculum, sed quintuplo minorem, gerebat.

§. II. Vidua sexagenaria, quæ 30 abhinc annis ex gravi, diuturnoque morbo, five arthritico, five rheumatico, caruerat Catameniiis; quæ anno abhinc elapso syncope correpta, in platea jacuerat aliquantisper; quæ mens elapso spatio de gradibus in faciem prona cadens, magnam passa hæmorrhagiam fuerat, obtusiusque inde capite dolebat & tussiebat; quæ tandem nunquam doloribus aut Colicis aut Iliacis obnoxiam se fuisse testabatur; cujus cur meminerim causam anatome dabit: hæc, inquam, femina Martii 11. proxime elapso, cepit pleuroperipneu-

monia affligi, ac citra auxiliatricem cujusquam manum, in summa omnium rerum penuria, frigido in loco, in nonum usque diem jacuit.

Nono autem die, ex suburbio *Josephino* in *Nosocomium Hispanicum* minus ivit, quam reptavit, integro indigens, quo illuc demum perveniret, bihorio. Inde mox fella portatili nostrum est inducta *Nosocomium*, inique vix undecimo morbi inchoante die expiravit.

Notabile in ea nihil per hunc sesquialterum diem, nisi 1^{mo} quod post venæ sectionem, ac semiveficans emplastrum, dolor quidem lateris penitus remitteret, cetera vero *Peripneumoniæ* symptomata crescerent, 2^{do} quod pulsus durus & cum dolore lateris, & post eundem cessantem, perseveraret; nec nisi paucis ante obitum horis in parvum, debilem,

celerrimum, & inæqualem mutaretur :
3^{tio} quod Asphuxiam ter, deficiente
scilicet omnino pulsu, passa sit.

Horis post mortem duabus & tri-
ginta prægressis, inspeximus Cadaver.
Venter compressior potius, quam ela-
tus; colore hinc inde virescens.

Hepar magnum, latitudine integræ
palmæ manus infra costas propendens;
in thorace autem ad altitudinem quar-
tæ quintæve a superioribus numeran-
do, costæ assurgens, lobo sinistro ob-
velabat ventriculum, lienemque attin-
gebat.

Lienis nullus conspectus; non emi-
nebat enim infra costas, latitabat sub
ventriculo, sub quo assurgens Hepa-
tis finistrum lobum tangebatur. Sanus
erat.

Ventriculus a suo prope Diaphrag-
ma principio, ad Pylorum usque,
nihil habuit ventriculi figuræ simile,
sed

fed canalis mire tortuofus, intestini inftar, formati, tantummodo, fecundum inania illa spatia, quæ ipsi concefferant splenis jecinorisque crepidines.

Pylorus crassus, durus, una in plaga Cartilaginis inftar elasticus.

Omentum complicatum, & convolutum circa originem suam, haud ultra duos digitos latos longum; non ita tamen in suis concretum convolutionibus, quin explicari adhuc posset.

Intestinum Colon assurgens ex Ileo dextro, consueto more sub Hepate flexum, in medio Epigastrio descendebat, ac miro illi Ventriculo, hic descendentem, locum cedens, intra Jejunii volvulos occultabat sese, assurgensque inde, & juxta ventriculum decurrens, petebat splenem: inde vero descendens, in medio suo itinere, splenem inter Ileumque, flexit se pedis longitudine versus lineam albam;

mox

moxque recurrens ad illum, unde recesserat locum, descendit more consueto Cristam Ilii versus, ab inde vero in pelvim; ubi Rectum formaturum, se prius digiti longitudine sinistrorsum flexit, reflexumque iterum in mediam pelvim, & iterum inde digiti longitudine in læva, tandem ad mediam pelvim se contulit, Rectum producturum. Sic, ut omnibus hisce insolitis volvulis una tertia parte solitam alias longitudinem superaret. Desiderabantur porro Coli in his aberrationibus cum ligamenta, tum cellulæ; ejusque tenuitas tanta erat, ut pelluceret.

In Intestini ilei latere interno, in libero abdomine, erant certo quodam in loco duæ sibi proxime appendiculæ, quavis contrectatione minime dispa-
rentes, flatibus turgidæ; quales in illa Herniæ specie cernimus, in qua,
via

via intra ventrem per intestinum patula manente, ejusdem Intestini appendix intra Peritonæi saccum in Hernia est.

Elevando Colon vidimus vesicam felleam bile plenam, colore aurantiam; sic, ut lato in ambitu Jecur, Duodenum, &, quod Duodeno Intestino pro Mesenterio est, Omentum, colore profunde flavo tingerentur.

In Thorace Pulmonis dextri lobus superior cum Pleura leviter, sinistri autem superior lobus totus, & undique, membranea productione connatus fuit. Ambo vero pulmones hinc livido, illinc purpureo colore maculati toti, minime autem compacti, aut indurati.

Cor dextrum tenue, sinistrum valde crassum. Tricuspidales Valvulæ naturales, ut & tres Semilunares ad Cor dextrum; Mitrales pariter; sed

Se-

Semilunares Aortæ omnes magnas habuere, latasque, cartilagineas portiones. Aortæ tunicæ crassissimi instar Corii: Arteriæ autem pulmonaris tunicæ venam potius, quam arteriam, tenuitate referebant.

Polypus magnitudine Castanæ majoris in Aure dextra, qui totus, una cum longo venæ cavæ polypo albebat, ut materies solet, quæ crustam phlogisticam format.

Costarum Cartilagines duræ, jam offescentes, potissimum inferiores.

§. III. Rusticus 48. ann. a 20. annis sanissimus, jam autem ægitudine suæ uxoris, quinque forte mensium tempore, multum defatigatus, ejusque demum obitu inconsolabilis, cogebatur die 18. Martii trium horarum iter, gravi sarcina oneratus, idque pedes, absolvere; novoque pondere onustus redire. Ad noctem redux febre, tussi,

tussi, ac pungente præcordiorum dolore affligi cepit. Die tamen sequenti, minus male se habens, exivit; vespere vero valde ægrotavit. Martii 20. epago suo *Viennam*, horæ itinere, pedes appulit, Medelam in Nosocomio *Hispanico* petiturus. Inde ad nos, ægris indigentes, mittebatur.

Inveni hominem haud modice febricitantem, dedolatum, tussientem, laboriose respirantem. Jussi lectum mox petetet: at vero ille ejus mentis non esse sese; sed cum biduo indigeret rebus suis cum uxoris consanguinitate componendis, auxilium aliquod se velle; rebus compositis post biduum rediturum se, mansurumque. Hominem periculi convincere frustra conatus, id demum illi Consilii dedi, ut domum redux, mox sibi venam tundi curaret, & magna mistura attenuante, refrigerante, atque expecto-
rante

rante, copiose uteretur, pectorale autem decoctum continuo biberet.

Consilium hoc secutus mitius ægravavit: Die autem Martii 23. totus dedolatus venit pedestri iterum itinere ad me, per Nives ac Pluvias continuas & densas, sic ut præ lassitudine, & aëris inclementia, quinque horarum tempore indiguisset, ut horulæ absolveret iter; vini rubri fere libra in diverforio donatus, & recreatus. Video hominem intrantem Nosocomium summa cum animi commiseratione, ita defatigatum, ut fere concideret humi, frigidum, ad indusium usque madentem, aspere tussientem, anxie-respirantem, in eo duntaxat mutatum a biduo, quod nec nunc, nec quoad vixerit; præcordiorum perceperit, aut conquereretur, dolorem. Dies erat morbi quintus, magnam partem jam transactus.

Omnis sanguis vena ter eductus, summopere inflammatus fuit, & cum omnibus signis cruditatis in singulis Functionibus, quarum semel iterumque leves prodierant, sed inconstantes, & breves, coctiones, ad finem septimi sui morbi diei expiravit. Nunquam ipsi pulsum aut mollem, aut durum,prehendimus, sed fortem ac celerem; paucis vero ante obitum horis debiliorem & omni modo varian-tem.

Cadaver inspeximus 37. a morte hora. Colon & Ventriculus universum explebant Epigastrium. Parvum Jecur, & vix plus, quam dextrum latus occupans, ita intra costas reconditum, ut, contrario priorum Exemplo, nihil de eo potuisset in vita tangi. Nec putet quis vacuitate Thoracis aperti jecur altiora petivisse: nam & in hoc, & in præcedenti Cadavere utroque,

Tho-

Thorax non fuit, nisi post ventrem, apertus.

Ut de Jecore dictum, ita & intra Costas totus reconditus erat splen, ut ejus nihil potuerit in vita tactu apprehendi; is autem colore fusco ruber, una cum membrana sua sub digitis deliquescebat, rubræ pultis in modum.

Crassa, profundeque flava bilis, viciniam totam aurigine inficiebat.

Colon tympaniticum totum, tres flexus supernumerarios habuit; ingentem primum, mox a consueto sub hepate flexu descendente oblique versus umbilicum, indeque debitum in locum revolutum, inde ad Lienem; ad quem ubi solito more se flexerat, mox versus Renem lævum pergebat, redibat ad sinistra, & incurvans se descendebat ad Cristam Ilei, parvoque ibidem formato flexu, consueta tandem via in Rectum abibat. Erant au-

tem hic omnes illæ plicæ membraneis productionibus invicem nexæ, ut evolvi non possent.

Amplus Ventriculus, sinistrum latus explebat sic, ut supra lienem, cui incumbibat, arcum attingeret costarum; magnam quoque partem occupabat lateris in Epigastrio dextri, antequam abiret in Pylorum.

A Colo & Ventriculo propendens omentum, idque crassum valde ac pingue, sic obvelabat Intestina, ut quidem in dextro Ileo palmæ longitudine deficeret, in medio autem ventre in imam pubem descenderet; & non modo in sinistris omnia Intestina perfecte tegeret, verum etiam versus annulum abdominis crasso, eoque duos pollices lato processu, Peritonæum inter & Intestina, pergeret ad Rectum usque.

Cor utroque in thalamo habuit nigrum, grumosumque sanguinem. In
dex-

dextra auricula albus erat, firmusque, ac coriaceus, polypus. Qui ex vena jugulari eductus, secum ducebat spithamæ longitudinis polypum teretem, media parte album, durum instar lardi, altera parte ex nigro atque coagulato cruore formatum; qualem & ex orificio Arteriæ pulmonaris extraxi. Itidem ejusmodi polypus duplex ex venarum pulmonalium ad Cor origine extrahebatur, referens exacte figuram venarum pulmonarium, in complures ramos divisarum. Demum & similis ex Aorta extractus est, qui ad ejus in Iliacas divisiones pertingebat. Sic autem se habebat singulus hic duplex polypus, ut uno in loco alteri a latere adjaceret cohæreretque alter, alio in loco albus polypus rubro inclusus esset.

Pulmones utroque in latere Thoracis cum Pleura, cum Pericardio, cum Diaphragmate, indissolubiliter

fere coaluerant. Erant nigro purpurei toti. Ex lobo superiore sinistro ichor effluxit sectione quavis copiosus, non ex quadam veluti hydatide, sed ex illius parenchymate. Lobus superior dexter, duritate, crassitudine, ac colore fusco-rubro, Hepatis portionem referebat: dura hæc pars aquæ in fundum ilico descendit.

In latere dextro ad 3. 4. 5. 6. costarum arcum, numero a superioribus ducto, florenum crassa, ac cartilaginea, Pleura fuit; in plaga autem quadam digiti longi ac lati magnitudine jam ossæ, ossæque spinas dimittens.

§. IV. Juvencula 22. annorum, nunquam recte valens, menses irregulares olim, jam vero nullos a biennio habens, morbum acutum pectoris, decurso abhinc biennii spatio, itidemque ante annum passa, ceterum pertinaci Tussi, & validæ cephalææ sæpe ob-

obnoxia, tandem 30. Martii febre valida incipit corripì, cum acri tussi, pectore compresso, respiratione difficili, artuum dedolatione, ac Epigastrii dolore. Vomuit septies, totiesque alvum excrevit. Tertio die viribus confracta, in via, ex suburbio *Leopoldino*, ad Nosocomium *Hispanicum* conficiunda, trihorium impendere debuit. Sella portatili inde ilico ad nos ducta est.

Pulsus ipsi durus ac celer. Oculi inordinate movebantur, & pupilla integra sub palpebra superiore sæpe abscondebatur. Quater ipsi vena secta est. In singula V. S. duæ sanguinis uncix probe fluxerunt, reliquæ 6. 7. 8. uncix guttatim. In prima V. S. facies, oculique convellebantur, tendines subfiliebant, & jacuit media ferme hora inscia sui, pulsu interea perpetuo cum constanti, tum forti. In

altera V. S. ægram, subtractis pulvinaribus, horizontaliter reclinavimus, symptoma hoc, ut sperabamus, præventuri, sed frustra; quin & tunc ad se rediens, consuetum hoc sibi quotiescunque vena secaretur, sive jaceret, sive federet, fuisse asseverabat. Attamen in tertia ac quarta Venæ sectione, tale quid passa non est.

Sanguis in prima V. S. nihil omnino inflammatorius, in altera admodum: in tertia, quæ ob compressum, ac plenitudine fere suffocatum pulsum, auctaque morbi symptomata, facta est, sanguis, elapso bihorio, habuit in primo, ac tertio vase, crustam sub tenui pellicula tremulam, gelati instar; crassamentum autem subnigrum, & maxime dissolutum: in vasculo vero secundo crustam densam ac fere lardaceam; crassamentum rubicundius compactiusque. Sanguis quartæ V. S. quæ propter acutum
in

in Epigastrio dolorem, & ob durum, fortem, simulque inæqualem pulsum, instituebatur, in vase priore mox sua superficie albebat, mansit tamen diu liquidus, licet colorem crustæ habebat: post horas autem 24. solidam valde ac densam crustam habuit; altero in vase vix crusta fuit. Pulsus inde mollior.

Supra notavimus feminam primo morbi die septies cum vomuisse, tum deposuisse alvo: ex quo vero, inchoante die suo tertio, apud nos fuit, non modo non vomuit unquam, sed ne nauseavit quidem; ita ut semper avide suum jus sumpserit, egregieque biberit aquam hordei cum melle & nitro. Alvus ipsi ex judicatoriis non judicantibus. Obiit medio fere exacto morbi die quinto.

Cadaver 24. hora a morte apertum est. Hepar explens lobo utroque la-

us dextrum, & ad tres latos digitos sinistrum. Longitudine sua ad duos digitos latos eminuit infra marginem costarum ad medium ventrem, & ensiformem Cartilaginem; dextrorsum vero totum intra Costas recondebatur. Molis mediocris ergo, sed substantiæ bonæ. Bilis copia mediocris, colore aurantia.

Lien sub ventriculo reconditus, infra costas non eminuit, molis mediocris, sed substantiæ adeo mollis, ut vel levi digiti attactu, una cum sua membrana, abiret in ruffum liquamen.

Ventriculus adeo ingens, ut Epigastrium exacte repleret ab arcu costarum sinistrarum, ad eum dextrarum; altitudine seu amplitudine sua suæ respondens latitudini, imo vix dimittens de sua amplitudine versus Pylorum, quem, subito arctatus, in descensu suo a margine Costarum dextrarum
for-

formabat. Plaga obscure rubra in sinistra ejus parte prope costarum marginem. Eratque ibidem tenuis valde substantiæ. Penetrabat autem color ille obscure ruber per cunctas ventriculi tunicas, sic ut inde in ejus cavo gangræna inciperet, sive color purpureus, qui ventriculum internum ultra pedis magnitudinem defoedabat.

Quo magis a sinistris ad dexterās pergebat ventriculus, eo fiebat crassior, vix ibidem rugosus, sed cartilagineis eminentiis instructus.

Unicus in Coli sinistra parte supernumerarius flexus. Omentum magnum & pingue. Renes boni.

Pulmo dexter versus superiora leviter accretus; sinister ubique, ac fortiter. Utriusque color purpureus; internus, externusque.

Molles ceterum ac flaccidi, tres in superficie induratas pustulas habentes.

Cor

Cor pingue. In Thalamo sinistro pauculum sanguinis nigri ferme coagulati. Polypus albus ex coalitu Venarum pulmonarium extractus, sex magnos, eosque crassos, ramos polypofos habuit. Polyposa materies ad digiti longitudinem erat alba, dein rubro ac coagulato cruore in reliqua longitudine complebatur. Similem polypum, sed crassiores, longioresque, ex sinu dextro extraxi, in quo etiam fibræ, primum albæ, rubris continuabantur.

§. V. Die 23. Jan. hujus, quem vivimus, anni, convenit me homo 39. annum ætatis agens, juventutis Instructor, cui, octenni puero, juvenis fortis pilam lusoriam, fune compingente induratum, in lumbos inject adeo violente, ut humi is prosterneretur. Domum inde delatus, lumbis doluit, ac sequenti mane sanguinem

nem minxit. Miſtus autem hic, & dolor, citra ullum artis auxilium brevi, integreque, ceſſaverunt. Attamen exinde uſque ad 27. ætatis annum teſtabatur ſe debiliorem dextra lumborum parte fuiſſe, ab eoque loco dolores ſe percepiffe crebros, per ventrem vagantes, pro colicis & habitos, & citra levamen notabile tractatos. Materiem in urinis purulentam ſe ad 20. vitæ annum percipere cepiſſe; neſcire vero num prius affuiſſet: nunquam enim ſe ſuas examinaſſe urinas, & tunc caſu tantum primum animadvertiſſe.

Anno ætatis 27. ad rem annonariam in exercitu Gallico admotus, demum poſt iter plurium Leucarum curru abſolutum, minxit ſanguinem rivatim. Quiete reſtitutus, urinas ſine ſanguine reddidit, niſi ad maiores motus perpauce. Talem autem ut plurimum minxit, quæ craſſum haberet, tenaxque valde ſedimentum. At-

Atque sic se res habebat ad Autumnum 1763. usque. Tunc vero ejusmodi materiæ in urina mictu cessante, inhorruit, quatrIduo sudavit, lumbumque dolere ac tumere observavit, aucto ad pronationes dolore.

Variorum sententiam expiscatus, multa, post venæ sectionem, externa admovit. Hic status rerum, dum me primum conveniebat, asseverabatque a superiore tumoris regione depluere materiem secundum spinæ lumborum latus, inque inferiore ejusdem sede, magis, quam alibi, dolente, colligi.

Die 2. Febr. pus sponte effluxit aliquot unciarum. Febr. 3. sponte clausa apertura, minxit purulenta non fœtida. Tumor jam & ad os Ilii erat.

Febr. 4. in Consilium vocavi Magnificum Virum D^m *Hazenobrl* Reg. Cels. Archiducis *Leopoldi* Archiatrum, D^m *Schreibers*, eximium Nosocomii Civici
Phyfi.

Physicum, Viros dexterrimos S.S.M.M. chirurgos, D^m ab *Hombourg* M. D. D^m *du Creux*, &c. Quo in Consilio quærebatur cujusnam naturæ tumor esset? Aperiundusne, an sibi linquendus? Et, si aperiundus, quo & modo, & loco,

Conclusum ex Anamnesi, & conspectu, tactuque, a suppurante Rene videri tumorem natum esse. Aperendum esse, ne ad os Ilii collectum pus, id in cariem verteret, vicina destrueret omnia, resorptumve mortem post hecticam afferret. Aperiundum autem esse inferiore sede sua, idque apertura exigua, ne a latiore apertura abundantior suppuratio excitata, marcorem totius corporis, mortemque, generaret; neve aëris accessu liberiore citius corrumperentur partes, corruptionem forte inchoantes: sic tamen ut si facta apertura, digitus prudenter immissus ali-

am

am indicationem patefaceret, totum opus secundum hanc dirigeretur.

Interea, dum per unum alterumve diem differetur operatio, per aperturam parvam, quæ die 2. Febr. sponte nata erat, multum puris, ichoris, rubrive glutinis, nonnunquam effluxit, levi cum febricula, multoque cum sudore.

Hac febre intra diem sedata, Vir dextræ. ab *Hombourg* aperturam fecit, effluente tantummodo sanguine: altero autem die premendo ab osse Ilei sursum, multum puris effluxit, idque ita per octiduum. Digito, stiloque inductis, patebat varios sinus, fistulasque, deorsum, dextrorsum, & etiam supra vertebrae sinistrorsum, formatas esse.

Fluente sic quotidie pure, urina parum; post octiduum vero paucò pure effluente, urina plurimum puris, vel sibi prævium, vel subsequum, habuit.

Ligaturis, ut vocant, expulsivis, sinus, fistulæque, prorsus evanuerunt.

Notandum autem est materiæ, quæ primis diebus de facta apertura effluerit, vehementem fuisse fœtorem: hunc vero, data quotidie media uncia Peruviani Corticis, quam ad finem fere vitæ quotidie assumeret, prorsus, brevi-que tempore, sublatum fuisse. Hoc remedio, Emulsisque, nocte paregoricis, die demulcentibus, ita profecit, ut dimitti ad munus suum poscentem, ea conditione die 31. Martis dimiserimus, ut & quotidie pergeret in Corticis usu, & quotidie rediret deligandus.

Rediit ille diligenter, ulcere parumper fluente, cum frequenti pruritu, cumque pure in urinis jugiter comparente; viribus interim valens, ut in munere suo perficiundo, ambulando, bene comedendo, dormiendoque, indies torosior, meliusque coloratus, ad

pareret; suam mediam Corticis unci-
am quotidie religiose repetens, ad us-
que diem Maji octavam.

Ea vero die, cum vespere præ-
gresso mediocrem in vino suo mutato
commisisset errorem, friguit, horruit,
incaluit; altero die Vomitum passus
ac Diarrhœam est: unde eo die in No-
focomium venire deligandus non po-
tuit, venit autem 10. Maji, mansit-
que moriturus. Nocte enim Pleuritis
accessit, quæ 30. & aliquot horarum
spatio sustulit hominem. Sanguis in
hac pleuritide sexies missus, summo-
pere inflammatus fuit, non minus is,
qui ex pedum alterutro, quam qui ex
brachiis, effluxit. Pulsus durus ac
magnus erat, usque ad 12. ante mor-
tem horam.

Cadaver incidimus horis 31. a mor-
te elapsis. Ren sinister magnus. Dex-
ter omnino major, integram hominis
non

non magni manum æquans, non placentæ instar planus, sed rotundus valde. Cohærebat porro ad Peritonæum, quo loco osseus apex costæ infimæ dextræ erat; ibique perforato Peritonæo via patebat, qua materies a Rene ad tumorem externum, ejusque fistulas, pervenerat. Ab illo enim costæ apice descendebat materies perforato peritonæo, quocum Ren concreverat, ad femi digiti longitudinem, postea cavum formabat, sive tumorem inter musculos & cutem, ex quo quondam orti fuerant sinus ac Fistulæ, quaquaversum divergentes, jam vero artificiosa ligatura sic deletæ, ut ne vestigia quidem earum cernere esset.

Membrana externa hujus dextri Renis inæqualiter expansa, & hinc inde ad lineæ, & sesquilineæ, incrassata densitatem, dum auferebatur, en! miro conspectu, quoad situm figu-

ramve haud facile describundo, Calculi apparuerunt, duo Majores, tres Minores, & undecim Parvi, quorum unus ex variis calculis concretus, tuberosam quandam referret radicem; alius ex calculis pluribus itidem compositus, qui omnes ad unum seu pedunculum in ambitu cohærebant. Pondus maximi erat unc. ij. dr. ij. gr. xv. Pondus alterius unc. ij. dr. j. gr. v. Terti, dr. vj. minus octo granis. Quarti, dr. ij. scr. ij. gr. xiiij. Quinti, dr. ij. gr. xxxij. Undecim parvi pendebant una dr. j. gr. xxxiv. Fuit ergo pondus omnium unc. vj. scr. ij. gr. ix. præter minutias ubique in Rene inventas, ramenta forte aliorum.

Calculis exemptis, pelvis & ureter sponte patebant, & de corticali Renis substantia supererat parum admodum. Ureter naturali triplo amplior, versus vesicam paullo angustior, tota sua substantia crassior, Ren

Rén sinister non durus, sed dum incidebatur, ruberrimus. Papillæ naturales, ureter crassior ampliorque, minus tamen dextro. Prostata fuit cum Vesicæ collo digitum crassa.

In Thorace sub loco olim dolen-
tissimo, quem, ne quis dubitaret, ve-
stigia indigitabant Emplastri, Pleuræ
plaga admodum lata, haud inflammata
tantum, verum inflammatissima fuit, &
cum, permanente ibidem dolore, do-
lor diffudisset sese versus arcum costa-
rum, Dorsumque, ita in Cadavere
Pleura inflammatissima apparuit inde,
ad alterum spinæ latus.

Pulmones nullibi ad Pleuram accre-
ti, nisi adhæfione digito non latiore in
loco inflammato; molles ceterum &
dum incidebantur, in superiore parte
profunde grisei, etiam intus, erant;
in inferiore intensissime rubri.

Cor finistrum sanguine polyposo æque plenum, quam dextrum. Ambæ auriculæ admodum parvæ. Singulare autem fuit invenire Appendicem sinistræ Auriculæ, quæ vermicularem cæci processum haud inconcinne referebat. Attentius examinando & per Auriculam inflando, vidimus appendicem hanc genitam esse ex carnea auriculæ substantia, totam esse carnosam, & hinc inde ea vestitam pinguedine, quæ ad cor multa, juxta auriculam ad Appendicem protendebatur: apex vero illius, instar fundi sacci rotundus, pingui caruit. Phenomenon sane, quod aliis notatum non memini; Physiologis materiam præbens speculandi.

Diaphragma summopere inflammatum, qua tendineum, qua musculosum; minus tamen qua Peritonæo, quam qua Pleura rectum.

§. VI. Homini annos 34. nato in pectus irruit currûs agitati Timon; non lædens tamen ita, quin ille integro exinde sexennio famuli præstare officium, leviori incommodo, potuerit. Anno ætatis 39. febre intermittente laborans, integre curatus est, sic, ut nullum inde in corpore vitium relictum fuisse recordetur.

Jam vero quadragenarius cepit a tribus elapsis mensibus difficile respirare, pectore angi, inani vexari tussicula, maxime ad motum majorem. Diarrhæam validam habere cepit, continuamque. A qua quidem, ut & per artem excitata Diuresi, levius per 2. 3. septimanas habuit. Exin vero cepit parvum habere, intermittentemque pulsum; intermittentem vero sic, ut Viri Expertissimi *Molinari* & *Mac-cheog*, qui ejusdem in se curam susceperant, tempore toto ultimi vitæ trimestris

spatii intermissionem sæpissime animadverterent 5. imo 6. pulsationum. Huic frigus junxit se, & perpetuum, & plane marmoreum; nunquam in sex postremis vitæ septimanis recalescens. Initio trimestris hujus morbi Hypochondria dura, ac tumida fuere, ipfus vero venter tumuit nunquam. Sex ultimis vitæ septimanis decumbere lecto, præ angustiiis pectus suffocantibus, non potuit; erectus semper sedens, quod sustinere quidem præ lassitudine ac debilitate vix potuit, præ angustiiis tamen debuit. Crura tandem, dein & femora, ædematosa reddebantur, ut fere creparent. Frigus intensum, & ultimo vitæ quatruiduo Asphuxia. Excipulo insidens expirat.

Horis a morte 29. elapsis, Cadaver cum laudatis supra Medicis præclaris, cum dexterr. *Hombourg*, & cum chirurgo nostri Nosocomii *Scherer*, aperui.

Ven-

Ventriculus ingens, obliquus ita, ut situm haberet fere perpendicularem.

Sua crepidine jecur pertingebat ad Umbilicum, cetera bonum; Lobo minore magnam explebat sinistri Epigastrii partem.

Latus valde ac longus Lien, bonus erat. Pancreas induratum.

Intestina contracta, ut crassiora vix digiti diametrum, tenuia vero multis in locis vix duas digiti tertias in diametro haberent: haud tamen pro tenuitate incrassata.

In percindendis dextrarum Costarum Cartilaginibus aqua erupit, & multa, & fordida. Hydropis pectoris augebatur suspicio; pectore autem aperto, patuit non pectoris esse, sed Pericardii, Hydropem.

Plenum hoc Pericardium tantæ molis erat, ut utramque Thoracis cameram, ad jugulum fere usque, ex-

pleret; pulmonibus in tanti sacci ambitu compressis, nec tamen duris, nec, quod mirabile, ne vel minimum quidem, cum Pleura, ac Diaphragmate, connexis. Nullus Pectoris Hydrops.

Eduximus primum ex Pericardio aquæ turbidæ subviridis mensuram, id est unc. 48. dein mediam mensuram aquæ rubellæ: nec hæc, nec illa foetuit. Evacuato Pericardio, Cor examinaturi mirabamur Pericardium de integro repleri. Quare Cor cum vasis majoribus educentes, in tabula examinavimus, num forte in hoc, illisve, ea pateret, qua pericardium sanguine continuo repleretur, scaturigo?

Primo adspectu Cor nobis undique lacerum, atque exesum apparuit: propius vero examinantes, prehendi-
mus id omne lacerum ac filamentosum uni deberi sanguini, qui polyposam naturam adeptus, ipsi undique anne-
cteba-

Et debatur, colore hic flavo, alibi nigro,
 illic iterum variegato; digitis demum
 inde separandus. Cor ipsum proceri
 quamvis hominis, valde tamen parvum.
 Quocunque autem in loco viam quæ-
 reremus penetrantis Pericardium san-
 guinis, invenire eandem non potui-
 mus. An forte vulnus venæ, arteriæve
 majoris, paulo ante mortem factum,
 ad oram Pericardii, ubi vasa majora per-
 scideramus, hæsit? ut proinde sic
 ejusdem nos penitus latuerit adspe-
 ctus?

Cor substantiæ fusco pallentis, ac
 veluti semicoctæ. Cæterum nec val-
 vulæ, nec vasa majora, nec pericar-
 dium, aut aneurysmatica, aut indu-
 rata, aut incrassata, cartilaginea, os-
 seave, apparuerunt.

§. VII. Matrona annor. 59. me in
 Consilium vocat ineunte Aprili 1763.
 cum suis Medicis, expertissimis viris,

Hirsch,

Hirsch, & Prosky. Hæc pluribus annis in *Hungaria* Metallurgorum vaporibus exposita, pectore angi, ac tussire, vehementerque debilitari, ceperat. *Vienne* nunc incola, a Mense Januario haud ultra potuerat carpento vehi, imo ne vix quidem extra lectum sedere. Ex eodemque tempore, præter pectoris affectuum augmentum, natum sibi tumorem agebat in infima, eaque sinistra Epigastrii regione, haud procul ab umbilico, qui cum doleret violente, tum moleste pulsaret. Pulsus in Carpo debilissimus. Utique internum quoddam Aneurysma esse videbatur, cujus in viva vix esset determinanda sedes. Post querelas molestæ hujus pulsationis, trium mensium spatio continuantis, mortua est.

Cadaver 1. Maji aperuimus. Pulmones quovis in loco tuberculis suppurantibus pleni, hinc inde duri, pluri-

rimumque cum Pleura connati. Toto vero in corpore, ut ut anxie quærebamus, in Musculis Abdominis, in Omento, in Mesenterio, in Mesocolo, in Lumbis, ad Spinam, ad Aortam, Venamve cavam; nulla vitiaprehendimus, præterquam in loco dolente olim, ac pulsante. Nihil minus tamen quam Aneurysma erat. Scilicet Colon in indicata Epigastrii parte, longitudine latorum digitorum quatuor, diametrum habebat sesqui pollicis, cui amplificatæ portioni tanta utrinque aderat constringens angustia, ut aer, non nisi vi, per eandem impelli expellique posset.

Exangue ita hoc corpus, ut quamvis Aorta, Vena Cava, Arteriæ Iliacæ, aperirentur, nulla sponsia ad imbibendum illum, & ad partes quasvis nude contemplandas, opus fuerit: ut profecto fatear me hujus vitæ rationem

nem æque parum intellexisse, quam in duobus illis, quorum Anatomendedi *Rat. Med. Tom. VI. Cap. IV. Probl. 1. & 2.*

§. VIII. Maji 28. hujus anni ad me misit, pro publica demonstratione, Expertiss. D. Päsmeyr, laudatissimus apud sanctimoniales sanctæ Elisabethæ Medicus, tumorem, quem ventre exemerat feminæ, in illarum Monacharum Nosocomio mortuæ, una cum historia morbi. Femina hæc 32. ann. sesqui mensis spatio in illo Nosocomio jacuerat, incusans forte præposteram, qua olim in *Hungaria* laboraverat, intermittentis febris ablationem, ut præsentis originem morbi. Tumor ventris ipsi durus erat, & æquabilis; tumida crura; urinæ pauca; superiorum emaciatio. Appetitus autem semper viguit. Urinam redditura, ventris potissimum vexabatur doloribus.

Al.

Alvus alterno die spontanea. Tandem macie confecta, ac summopere debilitata, moritur.

Tumidum hoc corpus ponderis inveni Librarum medicarum tringinta, exceptis $8\frac{1}{2}$ unciis. Sedes ejus in Mesenterio erat, ac longitudine sesquipedis medium inferiore sua parte canalem, seu Cavum fulcum, habebat, in quo Intestinum Ileum sua media diametro collocabatur, connatumque erat; mox inde egressum Intestinum, & ab hac immensa mole liberum, in colum abibat, quod cum sua valvula simul ex corpore, cum tota mole, exemptum fuerat. Moles ipsa rotunda erat, inæqualis tamen multis prominentibus tuberibus, substantia constans hic steatomatosa, illic cartilaginea, pluribusque in locis gerens hydatidas.

§. IX. Magnificus *D. Hazenöbhl* sub finem anni proxime elapsi ad me misit viscera quædam hominis, qui in Nofocomio Hispanico obierat. Venerat ille, homo vino, vini spiritui, cerevisiæque perditè deditus, quadragenario major, ad se, curandus a crure, plusquam 50. in plagis ulceroso; haud vero a suo tumido ventre; quem, quia incommodo multo sibi non erat, nisi levio- re, eaque brevi post pastum, anxietate, flocci fecit. Appetitus viguit, & modicam vini portionem suis sibi pecuniis in Nofocomio quotidie comparavit. Remediis solventibus eò per- venit, ut unico duntaxat in loco crus maneret ulcerosum, venterque una modice detumesceret. Animo hilaris homo, viribusque pollens, suo tamen crure, quod fere curatum videbatur, uti potuit nunquam: id quod haud le- vem ulcerum cruris internorum suspi- cio-

cionem iniecit Medentibus. Nec frustra fane. Crus enim gangræna sensim affectum, sic sua vasa erosa exhibuit, ut, quamvis instrumento tortili admo-
to munitus homo, a letali hæmorrhagia servari non potuerit.

Hepar ejus granulosum, friabile totum. Lien quinque librarum, dem-
tis unciis duabus, non morbosus, sed ingenti adeo egens spatio, ut Intesti-
na ex toto illo loco aliorum detrusa jacerent. Pulmones sanissimi, quam-
quam exulcerati existimari in vita po-
tuissent, unciis puris duabus quotidie
tussi ejectis.

Plures anatomici Casus sunt enar-
randi; at vero cum suis quique locis
convenientius aptari queant, eosdem
ad illa referam.



CAPUT II.

SISTENS

PATHOLOGICAM

PRIORIS CAPITIS DISCUS-

SIONEM.

§. I. *Ex iis quæ superiore capite enarrata sunt, evincitur incertum sæpe id esse, ac non raro erroneum, quod ex determinato situ locatarum in toto ventre partium, ad Nosologiam, & Pathologiam formandam concludi solet.* §. II. *Eodemque pacto se habere id omne, quod ex duritie, ac tumore earundem partium colligitur: eo quod tum viscera ipsa, morbo affecta, situm forte alienum sua natura habeant, tum alia ab aliis loco turbentur, tum denique eorum tumores tantæ sæpe molis sint, ut longe a sua origine percipiantur.* §. III. *Hydropem pectoris, quamvis aliquoties satis probabilem, hæud infrequenter tamen esse ambiguum, penitusque fallentem sic, ut vel minime adsit dum adesse credatur; vel dum*

dum putetur abesse, adfit. Idemque de Hydrocardia affirmari oportere. §. IV. Signa Phibiseos pulmonalis in vita adesse, cum Pulmone in Cadavere minime purulento. §. V. Aneurysmatis Diagnosim fallere posse, origine pulsationis ac doloris ad longe aliam causam referenda. §. VI. Gastritis & sine vomitu, cum dolore; & sine utroque. §. VII. Paraphrenitis consuetis, imo pathognomicis signis, destituta. §. VIII. Nihil fallacius signis, quæ ex sanguine humano petuntur, & erroneum crebro iudicium est, quod inde de natura humorum capitur. §. IX. De pulsu varia, maxime de eo Peripneumonicorum, utrum mollis, an durus sit? §. X. Seria in hæc omnia animadversio, & ad prudentiam exhortatio. De polypo quædam.

§. I.

Ex quo ad docendam Medicinam in hac alma Universitate admotus fui, Auditores meos serio hortatus, perpetuoque, sum, situm in Cadave-

ribus viscerum notarent accuratè, quo in Nosologia, ac Pathologia rarius errarent. Quippe inter cetera morbos in Epigastrio discriminandi adminicula, etiam fitas in illo partes tactu exploramus, idque merito; siquidem ad affecti cognitionem visceris, partisve, multum conferat: non ita tamen, quin haud infrequenter, ni cauti simus, imponat nobis. Ut enim de meis præteritorum annorum demonstrationibus hic taceam; quid, quæso, differentiarum in partium situ nupera non exhibuere Cadavera! In *Capitis I. §. I.* & *II.* hepar explebat totum ferme Epigastrium; in *§. III.* parva adeo jecinoris moles, ut in vivo tactu non potuerit percipi, & ut Colum cum Omento ac Ventriculo, Liene post hunc occultato, universum Epigastrium expleat: Deinde Splen in his tota facie in anteriora hæret, in illis autem post

ven-

ventriculum versus dorsum; nonnullis infra costas unum, duos, ternosve lateros, pluresque, eminet digitos, dum aliis penitus intra easdem recondatur. Tertio, ventriculum hi habent in sinistra tantummodo Epigastrii parte, diaphragmati immediate succumbentem; illi ab interposita ingenti Hepatis mole multum a diaphragmate remotum, qui forte hinc minus in vomitum proni, aptive. His quippe oesophagus est multo longior: quam observationem nostram vides a *Morgagni* confirmatam Epist 45. §. 16. „ Jecur, ait, „ maximum, ut sinistrum quoque occupans hypochondrium, Ventriculum deprimeret; itaque gulæ, in hunc desinentis, portio ad transversos digitos duos, infra diaphragma apparebat. In quibusdam Mensuras 4. 5. 6. & plures capit; vix libram in aliis. Marsupii figuram sæpe refert;

nonnunquam contracti, & contorti intestini formam æmulatur. Nonnullis est versus Cordis scrobem, aliis versus umbilicum directus. Quid quod sæpe plus minusve ad dextrum hypochondrium; imo, ut pluries ante vidi, maxime anno 1752. in cadavere Excell. Comit^{is} *Dhen*, *Danici* apud *Batavos* legati, nuncque iterum in *§. IV. Cap. I.* demonstravi, usque ad costarum dextrarum arcum continuata amplitudine protendatur? Jam Intestinum colon quotiesne notabiles volvulos versus renes, umbilicum, imo versus ima pelvis, format, ut olim hic demonstravi, & antea pluries videram?

Quæ omnia cum haud omnino raro ita se habere deprehendantur, quam circumspēctene oporteat agere in sede morborum, ex solo attactu partium, determinanda! Quis in ventris torminibus in Colo potius, quam in Ileo,
ac

ac vice versa, ex loco affecto dolorum determinet sedem? Quis splenis, quis jecinoris, quis ventriculi morbos, dum reliqua signa sæpe obscura sint, eo ex loco definiat, quem aut tumidum, aut dolentem esse, tactus deprehendit? Hepatis plura mala dantur, quæ nec Icterus, nec depravatus Corporis Color concomitetur. Cum facie pulchre florida hominem pereuntem vidi, cui præter pectoris Hydropem, Lien tota sua externa membrana in densam esset mutatus Cartilaginem. Et Ventriculus si dextram Epigastrii Regionem multum occupet, si umbilicalem; quotiesne Intestini sive crassi, sive Ilei, sive Hepatis affectionem mentiatur; si cætera signa dubia sint, quæ Intestinatorum morbos juvent interstinguere? Nonne etiam citra ulla affecti Lienis criteria, tamen hoc viscus in inflammatoriis pectoris morbis, capite su-

periore recensitis, bis repertum est una cum membrana sua in pulvem conversum? *Cap. I. §. III. & IV.*

§. II. Sed ad alia nos vertamus. Quis ille, qui nobis rite determinet in vita tumores ventris, consimiles illi, quem prioris Capitis paragraphus descripsit octava? In Mesenterio inveniebatur ille intestino Ileo accretus: verum ejusmodi & Ren exhibuit monstrosus, ventrem in tuber prominens extendendo; degenerascens Omentum; monstrosum Ovarium, Tuba, Uterus; Hydatides de aliis enatae tumoribus: ut quorum omnium frequens nostra demonstratio fuit in Tomis præcedentibus hujus operis. Quid quod ventre in medio monstrosa vesica urinaria imposuerit clarissim. *Morgagno*, instar uteri summe gravidæ expansa, digitumque passim in substantia crassa, & Peritonæo sub umbilico accreta? Ideam

certe

certe longe aliam suæ naturæ, suæque originis, in vita dederat, quam reapse esset. Vide *Epist. Anat. Med.* 39. §. 33.

§. III. Jamque Hydropem pectoris quod signa non arguerent in eo præsentem, qui *Cap. I. §. VI.* pericardii hydrope laborare inventus est?

Namque cum respiratione difficili & anxia, cum tussicula inani, & hypochondria tumuere, non tumente unquam ventre reliquo; & a Diarrhœa, ac Diuresi, mitius egit; & nocturnas passus anxietates in lecto est; & crura demum ipsi intumuerunt. Utique hic in mentem venit candor non minus, quam error exercitatissimi in Praxi Medici Jo. Jac. Vicarii, qui refertur a Cl. Morgagni *Epist. XVI. §. II.* jurare voluisse hominem Hydrope pectoris infallibiliter laborare „cujus mortui aper-
 „ to thorace, cum in dextro sinistro-
 „ que hujus cavo nec dragmam unam

„ aquæ aut feri inveniret, nunquam
„ fatis laudanda ingenuitate mirabun-
„ dus exclamavit: Quam fallacia sunt
subinde Diagnostica! Confirmavit
eadem Epistola Vir magnus hanc fal-
laciâ pluribus exemplis anatomicis;
licet præter signa plura consueta, duo
illa probabilia admodum signa adef-
sent; anxietatum nocturnarum, & tu-
mentium, post anxietates diu toleratas,
crurum, manuumve.

Unde nec ipse Pericardii Hydrops,
quem in hoc Cadavere §. VI. Cap. I.
ingentem fuisse vides, suis ita stabili-
tus, atque confirmatus signis est, ut
non fallat multoties. Eadem Morgag-
niana Epistola constat signa Hydropis
pectoris solius, signa solius Hydrocar-
diæ, signa utriusque hujus morbi si-
mul obtinentis, adeo confusa interfese
in vita fuisse, adeo turpiter Medicos
fefellisse, ut Cadavera aliud omnino
ab

ab eo, quod creditum fuerat, exhiberent. Quæ enim ut Pathognomica nonnullis audiunt, verbi gratia, cordis veluti æquæ innatantis perceptio, ejusdemque palpitatio, hæc defuere non paucis eorum, quibus Hydrocardiam in vita adfuisse demonstravit Anatome; vel si adfuerit Palpitatio, alia longe vitia ad Cor, vasave majora, adfuisse deprehensa sunt. Verbo, hæc, & omnia signa, simul collecta, suspicionem formant, non efficiunt certitudinem: unde propriis meis convictus erroribus, facile ad quosvis con-
similes morbos refero, quæ *Vieussenius* de Hydrothorace: „ Non tam facile
„ esse, inquit, Thoracis hydropem
„ cognoscere, quam aliqui credunt
„ Medici, nimium sibi tribuentes,
„ anatomen ignorantes, & qui nun-
„ quam putaverint Cadavera esse in-
„ cidenda, aut, cum ab aliis incideren-
tur,

„ tur, inspicienda. „ Imo neque hoc sufficit: videas enim, qui etiam cada- vera incidendo didicerant multa, vel ob id in diagnosi errare, quod ea, quæ semel iterumque in Cadaveribus observaverant, hæc iis omnibus adesse contendant, quibus symptomata, priorum consimilia, observant adesse; ignari scilicet hujus veritatis, quod si longe plura cadavera incidissent, longe numerosiores eorundem symptomatum causas didicissent: ut cogar ad *Vieussenii* sententiam hæc præclara *Morgagni* verba adjungere: „ Nam qui „ plura inciderunt, aut inspexerunt, „ Cadavera, *bi* saltem, cum *illi* minime dubitant, ipsi dubitare didicerunt „.

§. IV. Pluribus hujusce meæ opellæ Tomis per multiplicem Anatomem demonstravi, & *Benneti Theatro vestibuloque Tabidorum* confirmavi, sputa
pu-

purulenta, eademque cum copiosa, tum diuturna, sæpe quidem vomicas, abscessus, tubercula designare pulmonum, haud raro tamen minime. §. IX. *Cap. I.* integerrimus deprehensus Pulmo, post quotidianam unciarum duarum puris excretionem, hanc utique observationem & experientiam confirmat. Ita ut tot exempla prudentiæ nos in Diagnosi admoneant, ne mortui veriora proferentes, ignominiam forte cum nostræ inurant, tum Artis, famæ.

§. V. Et quid de Aneurysmatis similitudine in pertinaci illa, eademque dolorifica, pulsatione memorem, quam pulsationem *Cap. I.* casus septimus Intestini coli, intercepta inter binas invincibiles contractiones amplitudine, genitam, credere nos cogit? Ut ut enim opponat quis Intestinum loco moveri, idemque impleri, ac depleri,
ob

ob idque illam ejus expansionem, quod & loco mutabilis, & amplitudine varia esset, pulsationem cum perpetuam, tum loco immutatam, producere non potuisse; minime tamen negari potest, si ab una parte consideremus coli intestini sedem firmiorem esse ea reliquorum convolutorum Intestinorum; & ab altera parte eam coli inter constringentes binos, aëraque ægre transmittentes, annulos, tympaniticam plane redditam esse partem; negari, inquam, non potest, quin inde quæpiam ex Mesocolicis, aliisve vicinis, arteria, imo arteria in ipsa coli tympanitici tunica vasculosa, moleste pulsare potuerit. Videtur eo magis hinc pulsus dolorifici deducenda origo, quo minus alia causa in tota vicinia invenienda fuerit. Profecto dantur Aneurysmatis æmulæ pulsationes, minime tamen ad illud referendæ. Historiam
haud

haud multo^{us} abfimilem olim retuli *Tom. IV. Cap. II. §. VI.* Dederat similem *Ballonius conf. 107. Libr. I.* Notabiliorem autem nondum novi eâ, quam memorat egregius *Morgagni Ep. 24. §. 34. 35.* Violenta quippe assiduaque pulsatio ad Præcordia, & ad Umbilicum, â quatuor retro mensibus percipiebatur; qua pulsatione majorem sensisse aut vidisse vix ille meminerit: cujus causam, cum reperire nullam aliam posset, præter quasdam conjecturas, Nervorum agitationi sive irritationi merito adscripsit.

§, VI. In *Gastritidis* Definitione, & validus ventriculi dolor, & repetens ad ingesta quæcunque vomitus, continentur sic, ut inter signa ejusdem Pathognomica recenseantur. At vero in *Cap. I. §. IV.* in maximi ventriculi amplissima inflammatione, postquam ægra ad morbi primordia sepius & vomuisset,

set,

set, & alvum egeffisset, non modo per integros fere quinque dies, quos totus morbus numerat, non vomuit, sed nec nauseavit; imo, quod plus est, omnia oblata abliguriens, ac ventriculum sæpe replens, suum bonum appetitum cum sæpius nobis testata ipsa est, tum experimento quotidiano nobis confirmavit. Unde non modo hic id pathognomicum signum abfuit, verum & adfuit contrarium, ac plane oppositum.

Sed potest utrumque pathognomicum deesse. *Rat. Med. Tom. VI. Cap. VI. de innustione cranii*, retuli exemplum Juvenis, qui ad mortem propemodum usque, nec signa Febris, Gangrænæve in pulsu, nec signa vel minimi doloris in ventriculo, nec signa læsæ cujusquam ventriculi functionis, mentis perpetuo compos, unquam habuerit; dum nihilominus ventriculus ore
fu-

superiore suo, initioque œsophagi, solito multo amplior, sanguine ita cunctis in vasis turgebat, ut nonnullis in locis hæc duarum, in aliis trium linearum diametrum haberent; quod forte ab antiqua ad vomendum dispositione quis explicabit: sed quod sequitur, inde non deducet; purpureus enim totus ventriculus fundo erat suo, binisque in plagis tam interne, quam externe, gangrænosus. An non evidenter hinc patet obstructionem notabilem, sævam inflammationem, vehementem adeo Gangrænam, ut totam ventriculi penetraret substantiam, citra dolorem, citraque febrim, formari? Bono cum appetitu adesse? Cum visceris integra functione superstite perfici?

Simile quid ex *Valsalva* Illustris *Morgagni* habet *Epist.* 49. §. 14. Febris acuta maligna hominem perimit 14 die

„ nullo alio stipato symptomate, nisi
„ quod æger de assidua animi inquietudine, & de vigiliis perpetuo con-
„ querebatur. In Cadavere ventriculi
„ fundus atro erat colore infectus. Hic igitur iterum ventriculi adfuit inflammatio jam in Gangrænam tendens, citra dolorem, citraque vomitum.

§. VII. *Paraphrenitis* historia, præter signa pathognomica inflammationis, habet quoque nauseas, vomitus, delirium perpetuum, risum sardonicum, convulsiones, furores, gangrænam. Vide Boerb. *Aph.* 909. cum *Ill. Præf. Comm.* Nihilofecius Casus V. Capitis I. refert nobis hominem, qui die Febris acutæ quinto, Pleuritidis sævæ altero, mortuus, Diaphragma habuit tam vehementer inflammatum, ut injectoria arte reddi non possit rubicundius, idque tum in musculosa sua par-

te multa, tum in tendinea universa; paulo lævius quidem qua ventrem, gravissime vero qua spectaret thoracem; quamquam 70. unciae sanguinis in sex venæ sectionibus, spatio 24. horarum, detractæ essent. Porro hic homo nec nauseavit in morbo unquam, nec vomuit, nec nisi sub mortem, non in morbo, deliravit, nec risum sardonium habuit, ni velis levem oris contractionem ipsi morienti, ut morientibus multis minime paraphreniticis, contingentem, ad risum hunc contorquendo referre: uti etiam nec convulsiones passus, nec furores est. Observatum est Diaphragma inflammatum ab omnia eo, quod ventriculum utcunque distendit, vehementer irritari ac dolere; noster tamen homo multam copiam Oxym: squillitici cum Stibio non abluto & Aqua Hyssopi bibit; copiosam valde aquam hordei cum

melle & nitro; præterea omni bihorio vasculum unc. iij. infuso-decocti pectoralis; sumsit quovis quadrihorio unc. vj. vij. juris carniū cum cremore tartari: deglutiit denique vario haustu unc. xx. olei amygdalini recentissime pressi: nec testatus unquam est a deglutitis sibi pejus esse. Quis demum mortalium in hac Pleuritide fuisset unquam universi pene Diaphragmatis inflammationem suspicatus?

§. VIII. De fallacia signorum petendorum a sanguine humano quid multa commemorem! Patuit ex §. IV. *Cap. I.* si quod habitum de ejus natura consilium fuisset, die ab ejus extractione prima, cum integro bihorio, in vasis tribus, in loco temperato, quievisset; id sequenti die, contrariis omnino apparentibus ejusdem phænomenis, revocandum, prorsumque contrarium concludendum fuisse. Cujus
equi-

equidem fallaciæ abunde memineram in *Rat. Med. Tom. I. Cap. 6. Tom. 3. Cap. 3.* & alibi passim, edendo multiplicia mea experimenta, quæ primum cum sanguine centum & quinquaginta venæ sectionum, ac dein cum alio numerosarum sanguinis missionum feci. Facit equidem mutationem in crusta alba tenaci, in crassamenti consistencia, in feri copia, ac colore, limpiditateve, sanguinis sive jactus validus, sive stillicidium; Lumen venæ magnum, parvumve; vasis, in quod excipitur, planities, vel altitudo; fluidum per quod ex vena in vas transit, aëreum, aut aquosum; ejusdem fluidi alterutrius calor, aut frigus; loci, in quo asservetur, a moderata aëris temperatura hinc, illincque, recessus; calidi cruoris post missionem agitatio vel quies; morbi annive, tempus, sexus, & ætas; hæc, inquam, omnia,

horumque confimilia, miram ac stupendam phænomenôn sanguinis mutationem generare, ut alii affirmant, ita ego millies vidi: verum nullam in praxi regulam, aut legem, qualiacunque demum hæc experimenta mihi formare potuerunt. Quotiesne nobis visus est sanguis guttatim defluens crustam densiorem, firmissusque genuisse crassamentum, quam is, qui valido jactu profilierat? Visus est, multoties repetito experimento, sanguis eodem jactu, eodem lumine vasis, in eadem aëris temperatura, in vasa exceptus sibi simillima, in uno ægro crustam densissimam tenacissimamque exhibuisse in primo & altero vase, in tertio, quartoque nullam: in alio ægro, in priore vasculo nullam, in binis tribusve, sequentibus magnam: in tertio homine in vasculo primo densissimam crustam, in altero nullam, ma-

ximam in tertio, in quarto pauculam : & alibi iterum in primo alterove vase nullam, validam in tertio, in quarto nullam. Atque hæc ita in variis ægris : Verum jam nulla memoratarum varietatum datur, quæ non in eodem ægro, in eadem venæ sectione, eodem jactu (nam si ratione jactus, aut luminis, aut alius rei ante observatæ, mutatio contingeret, ad hanc, ut ad rem non facientem, non attendimus;) nulla, inquam, varietas datur, quam non observaverimus in ægris iisdem, sive in varia, sive, quod plus stringit, in eadem sanguinis missione. Inversa itidem, mutata, confusa, omnia hæc phænomena sæpius vidimus, dum quater, quinquies, & ultra, iisdem hominibus tundi debuerit vena. Et aliquoties quæ crusta flava gelatinosa cum dissolutissimo crassamento nobis apparuerat, moto sanguine, iterumque

reposito in quiete, densissima facta est, ejusque tenax crassamentum. Aliquando in eadem V. S. vas unum vix-scissilem crustam, vas aliud gelatinosam habuit. Ut profecto si Judicium de statu sanguinis seu crassi inflammati, & non inflammati, seu e contrario soluti, judicandum foret ex missi cruoris conspectu, sententia altera alteram refutaret. Adde hisce omnibus eam sanguinis in varia missione inconstantiam, ut sine ullo ordine in prima missione inflammatus, in altera minime, in tertia crustam mucosam habeat, in quarta tenacem, &, ut minus latine vocant, lardaceam; ordineque iterum aut mutato, aut plane inverso in aliis ægris: sic ut sæpe nihil horum vel ad sanitatem, vel ad mortem, vel ad humorum naturam determinandam, in Diagnosi ac Prognosi faciat.

Hinc

Hinc ad rem illustris *Morgagni*, ubi intempestive lætari dixerat Medicos „ qui cætera non attendentes, id unum „ spectant, tenuiorem aut nullam in „ sanguine esse crustam, quæ antea „ fuerat crassa “ demum subjungit: „ Cave tamen ne vicissim iis in uni- „ versum assentiaris, quos ego ali- „ quando pronuntiantes audivi, si in „ hujusmodi morbis (Peripneumonia „ ac Pleuritide, de his enim agebat) „ sanguis secundo missus crusta careat, „ id adeo malum esse, ut si tertio mit- „ tatur, intereant ægròtantes.

Equidem non sunt hic erroris taxandi *Baglivius*, *Sydenhamus*, aliique, qui quibusdam Epidemicis in morbis simile quid observarunt; sed ii duntaxat, qui ex observatis Epidemiæ cuiquam propriis, Canones diagnosticos, prognosticos, ac curatorios condidere, in Sporadicis, imo aliis in Epidemiis, penitus fallaces.

Quæ si ita se habent, quis inflammationem absentem præsentemve; quis humorum aut coagulum aut dissolutionem, ex solo sanguine determinare auset? utique si in eodem homine alia V. S. ab alia toto cælo differat; si in eadem V. S. adeo oppositissima sint phenomena; quis inde de natura humorum aut possit, aut auset, iudicium ferre?

Neque est quoque ex solo conspecto sanguine vel ejusdem dissolutio in vere putridis, vel condensatio in inflammatoriis morbis, statuenda. In putredine summa, ac malignitate deletæria, sanguinem paucis ante mortem horis missum, mecum viderunt Auditores, primum quidem tenacem in parte rubra, & crusta tectum inflammata; in altera missione omnino bonum. In Petechiis ac Miliaribus, symptomatiscis scilicet eruptionibus illis, quas rarissimas nostrum Nosocomium habet,

Au-

Auditoribus meis ter, quater, plurimum annorum decursu; demonstravi sanguinem cum crassissimum, tum crusta rectum inflammata. Et *Valsalva*, & *Morgagni*, ut dissolutum, ita sæpe tenacem, imo tenacissimum, & crassa crusta rectum,prehenderunt, ut ex *Epist.* 49. liquet: narratque posterior in Febre quasi pestilenti, quæ anno 1731. agri Patavini partem infestabat, sanguinem, primo febris hujus grassantis tempore, ut plurimum dissolutum; progressu vero temporis, perseverante eadem constitutione, nimis concretum apparuisse: nihilominus & in principio hujus constitutionis, cum sanguine dissoluto; & in decursu ejusdem, cum cruore concreto; homines peticulis laborasse: imo si, quo constitutionis tempore sanguis solebat esse concretus, quibusdam de vena prodiret solutus, his tamen, haud secus quam

ce-

ceteris, contigisse Petechias. Unde concludere, „ conjungi cum maligna „ vi *solutivam*, aut *coagulativam* sanguinis; in neutraque harum malignitatem consistere; præsertim cum alterutram in tot aliis, qui maligni non sunt, morbis videamus. Adjungam ego id eo evidentius adparere, quia multis non modo in eodem morbo, verum etiam in eadem V. S. sanguinem partim compactum, partim solutum apparere, evictum sit.

Fateor nodum solutu difficillimum mihi hoc ultimum phænomenon videri, & magis nos magisque convinci de intricata, atque non sufficienter hucusque intellecta, sanguinis humani historia. Intricatiorem forte adhuc reddet observatio, quam habui, ægri, cui elabens de tunsa vena sanguis brachium frigore intenso afficeret. Cum præsens non essem sanguinem explo-
ra-

rare, dum flueret, non potui: minus tamen ejusdem verum frigus miratus fuisset, edoctus a clarissimo, quem toties jam laudavi, Viro, historiam feminæ, quæ olim sanguinem suum menstruum experta calidissimum, nunc *Mediaviæ*, „ Medico suo, testaretur bis in „ mense omnino frigidum fluxisse; „ fidemque suo testimonio inveniret, „ cum ipsa, & chirurgus spectatæ fidei, „ dei, æque ac experientiæ vir, sanguinem, vena stillando exeuntem, „ eademque die iterum pede missum, „ & ipsa sensu, & ille tactu, gelidum „ prehenderint: id quod parumper „ mutabatur, dum sequenti die sanguis ex brachio ac pede, uno eodemque momento educebatur; cuius an causa suppressioni ac suffocationi pulsuum, quæ aderat, adscribenda sit, relinquo discutiendum. Hæc mulier deinde febribus variis, do-

lo-

loribus vagis, convulsionibus, pectoris anxietate, larga V. S. sæpe oppugnantis, multum conflictata, triennio sat bene vixit: deinde redeuntibus symptomatibus largiore sanguinis missione sæpius liberata est: manente tamen affiduo in ventre glaciei sensu, qui cum inde ad pectus adscendit, eam affert respirandi difficultatem, ut continuo sanguis, nec modica copia, mittendus sit.

§. IX. Et qui demum veri pulsuum sint in Peripneumonia Characteres, paucis examinandum est. Hunc pulsum *Hippocrate*, quia de pulsibus non adeo multa habet, non describente, *Galenum* de eo consulamus necesse est. *Libr. IV. de causis puls. Cap. XII.* „ Peripneumonicorum, inquit, magnus „ est pulsus, & languidus, mollisque „ similiter, μαλακός, atque Lethargicorum pulsus: nisi quatenus præpollet

„ let inæqualitate, & in uno pulsu, &
 „ collectiva, quam vocant. In uno
 „ ictu, cum veluti interpellatur, &
 „ undosus est, & dicrotus interdum
 „ fit; in collectiva, cum alias diffe-
 „ rentias habet, tum modo quidem
 „ intermittit, modo autem intercur-
 „ rit. Mollitiem deinde explicat Ga-
 lenus ex eo, quod cum laxum ac mol-
 le & undique vacuum viscus sit Pul-
 mo, non nisi a pituitosiore & crassio-
 re sanguine inflammari queat. Cum
 autem pulsus Dicroti antea meminif-
 set, jam ait rarum Peripneumonicis
 eum esse, quod Dicrotus fere semper
 quandam requirat vasis duritiem, quæ
 ex pituitosa fluxione contrahi non so-
 let. „ Est autem, inquit, biliosioris
 „ sanguinis opus cogere, ficcare, ten-
 „ dere & exficcare: qui biliosior san-
 „ guis quandoquidem minus sæpe
 „ pulmonem infestat, manifestum eti-

„ am est raram fore pulsus duritiem ;
„ quod si sic, rarus quoque ipsis bis
„ feriens pulsus.

Quo fundamento *Galenus* hic suum
ratiocinium superstruxerit, ignorare
me fateor : nihilominus *Galenum* tantæ
in Medicina autoritatis fuisse, ut in-
ter centum, quos forte consulueris,
Autores, vix paucos reperias, qui il-
lum, plus minus, non sequantur, est
quod vehementer mirer. Plerique eti-
am graves in arte viri, in definitione
& aitiologia Peripneumoniæ traden-
dis, hi *Galen*i textum recensentes, illi,
ne nominato quidem *Galeno*, veluti
propriam sententiam referentes, sen-
tentiam *Galen*i proferunt, ac statuunt
ex amussim. Hinc indereperias, quem
explicatio *Galen*i de pulmone, non nisi
a pituitosiore cruore inflammato, of-
fendat quidem, qui tamen a *Galen*i de-
finitione de pulsu molli ne latum qui-
dem

dem unguem recedere aufit: Cujusmodi v.g. *Ludovicus Mercatus* fuit. Invenire alios est, eosque haud plane paucos, qui de Peripneumonia agentes, de pulsu, num veriti scholas? ne meminerint quidem; ut v. g. *Langius*.

Sunt præterea, qui quidem in Peripneumoniæ definitione pulsum non meminerint, sed dum alia occasione pulsus mollis explicandus venit, eum sic Peripneumonicorum esse dicant, quemadmodum Pleuriticorum est, dum suffocata fere respiratione Cor finistrum paucum modo cruorem accipiat; vel ut Phreniticorum est, quando, vi inflammationis Meningum, origines nervorum comprimuntur sic, ut nervi vitales languescant. Sic celeberrimus *Russiæ Archiater J. de Gorter in Comp. Med. Tract. 47. §. III.* Tandem nonnullos deprehendas, quos propria

experientia compulerit durum in Peripneumonia describere pulsum: quos inter candidior nemo *Felice Platero*, quem in hæc verba ut erumperet veritstimulavit amor: „ Uterque affectus, „ Pleuritis, ac Peripneumonia, cum „ horrore vel rigore incipit, subse- „ quente febrili calore, quo corpus „ ipforum nonnihil accenditur: re- „ spiratio concitatur, uti & pulsus, „ arteriâ durâ, & Serræ instar, aspe- „ râ ad tactum (quem tamen pulsum „ mollem, seu undosum, in Perip- „ neumonia privatim esse putant) „ se offerente. *Tom. I. Cap. 10.*

Profecto, ut *Platerus*, rem ego inveni plerumque, nec quanto tempore Medicinæ docendæ admotus fui, alio modo in scholis docui. Et quid ni? ubi ingens Discipulorum, lectis ægrorum mecum circumstans, corona, pulsum in hoc morbo durum, &

rarissime tantum non mollem, mecum deprehendat? Quid, quod hoc anno omnes Peripneumonici confirmarint? sic ut inter tantos sive juniores medicos, sive adultiores studiosos, ne unus quidem extiterit, qui non vere durum eum esse affirmaret? Ejusdem experientiæ socium appello *Cl. Morgagni*, qui ubi *Epist. 20.* similem *Valsalvæ* observationem retulerat, deinde proprias suas *Epist. 21.* enarrat, quibus constat pulsum in morbo durum illis fuisse, quos vera Peripneumonia periiſſe eorundem Cadavera demonstrabant.

Forſitan arbitrari quis poterit ple-
rasque meas, non ſimpliciter Perip-
neumonias, ſed Pleuroperipneumo-
nias fuiſſe, quæ ratione doloris Pleu-
ritici durum pulſum tangentibus obtu-
lerunt. Sed reſpero illi principem
morbum, in deſcriptis Capite priorē

ægris, fuisse Peripneumoniam, adeoque morbi principis Characterem gere-
re pulsum debuisse. Et dum in non-
nullis notatum sit durante Peripneu-
monia pulsum durum fuisse silente do-
lore, an saltem sic non pateat Perip-
neumoniacis pulsum durum adesse?

Nunquamne igitur mollis in Pe-
ripneumonia pulsus? Est sane, sed
malo ægri omine. Videte *Boerhavius*:
adjungite *Jll. L. B. van Zwieten* Com-
mentarios. Mollem pulsum inibi non
inventuri estis in Peripneumoniæ de-
finitione, quemadmodum pulsum du-
rum invenitis notatum in Definitione
Pleuritidis; sed in morbi, in prava
ac desperata ruentis, descriptione dun-
taxat: eo nimirum in morbi stadio,
in quo Pulmo magnam partem impe-
netrabilis, paucum cruorem, cum cru-
do ægrorum alimento, potuve, im-
perfecte mistum, per nonnulla vasa
ad-

adhuc aperta, cordi sinistro, ad continuandum qualemunque humorum circuitum, transfundit. Hicque modus quoque *Morgagno* est explicandi, quomodo ineunte Peripneumonia pulsus durus esse debeat, & quo pacto dein, obstructo, magis præ inflammatione Pulmone, mollis fiat. *Ep. 20. §. 38.*

An non credibile *Galenum* incidisse, dum ejusmodi definitionem animo medicaretur, in eam Peripneumoniam, quam *Notham* nunc appellitamus, & quæ eodem cum *Vero* olim nomine comprehenderetur? An saltem in provectam jam Peripneumoniam veram? Nescio qui rem alias explicem. Saltem cum quotidiana experientia pulsus peripneumonicorum & mihi, & aliis, durum exhibeat, terminabo hanc paragraphum nonam sententia *Jll. Morgagni* Epistola mox laudata: “ Hoc

„ tantum dico, inquit, pro varia fan-
„ guinis, & corporum, Pulmonum-
„ que in primis dispositione, vario-
„ que modo, quo in his illius conge-
„ stio accedit, verisimile esse variari
„ signa; ut modo præcipua omnia,
„ aut pleraque inflammationis indicia
„ occurrant, *idque ut plurimum*; mo-
„ do nulla ferme illorum, aut etiam
„ contraria, ut cum pulsus rarus est;
„ denique nulla interdum, sed pulsu
„ tamen plus minusve frequenti.

§. X. Quo porro omnis hujus se-
cundi capitis fermo tendat, facile ca-
piet quisque. Si enim 1^{mo} ita variet
multorum in ventre viscerum inter-
fese cum magnitudo, tum situs, etiam
in statu sano, ut exploratione sæpe,
quodnam illorum patiatur, determi-
nare aut arduum sit, aut impossibile;
imo ut aliud eorum alius occupet se-
dem: si 2^{do} præter affecta, quæ nos-
cun-

cuntur viscera, inveniantur alia, quorum affectionum nulla in vita signa constiterant, pejus affecta, quam quorum constiterant; ut v. g. in inflammato pulmone Lienis corruptio, bis hoc anno reperta talis, ut una cum sua membrana in pulvem ruffam deliquesceret, intraque digitos diffunderet totus: Si 3^{to} ipsa viscera morbofa ita mole sua, mutatoque præ aucta mole situ, imponant, ut Mesenterii tumor, ut Ren exorbitans, ut Vesica urinaria, Uterus, Tuba, Ovarium, eundem sæpe locum occupantia, veris signis pathognomicis, quibus quid demum sit innotescat, plane destituantur: Si 4^{to} Pectoris Hydropis, omnia a Practicis celeberrimis requisita signa ferentis; Si Hydropis Pericardii; si topicorum ad vitalia vitiorum Diagnoses, vel exercitatissimos fefellerint: Si 5^{to} frequenter admodum suppurati pulmonis Diagnosim

pulmo a morte integerrimus erroneam ostenderit; Si 6^{to} interna Aneurysmata, quæ vivis adesse putaveramus, in cadaveribus desiderentur, longeque aliud præ illis referant indagantibus: Si 7^{mo} Gastritis, ac Paraphrenitis, absque vomitu, imo potius cum perseverante appetitu, & cum magna, minimeque coacta liquidorum ingurgitatione homines perimant; imo Gastritis sine vel vomitu, vel dolore verti queat in Gangrænam: Si 8^{vo} Historia humani sanguinis ita obvelata nobis est, ut experimenta in uno eodemque morbo, imo in eadem cruoris detractione, prorsum contrarias videantur formare indicationes: Si denique 9^{no} in Peripneumonia, frequenti adeo ægritudine, Viginti & ultra Sæcula necdum veram pulsus definitionem, quæ ab omnibus admittatur, exhibere potuerint; profecto Diagnoses morborum,

rum, ut ut sæpe veræ, & adæquatæ, nihilominus non raro toto cælo fallunt; & Nosologia adeo imperfecta hucusque habetur, ut exceptiones cum multis, tum notabiles, patiatur; proindeque eam ordine Botanico in Classes, Ordines, Genera, ac Species reducere, frustra quis tentet; præterquam quod specierum in infinitum fere excrescat numerus: qua enim methodo undecim enumerantur Epilepsiæ v. c. species, eadem ipsa 250. imo plures numerare species possum.

Audire quidem mihi videor qui amare conquerantur, eo modo, quo pluries in præcedentibus hujus operis tomis, quo denuo in hoc nono, pergo, Medicinam a me incertiolem reddi; a me, scilicet, cujus foret, proprii vi muneris, eandem Tyronibus reddere quotidie certiolem. Hos autem rogatos velim, quo demum pa-

Et o Artis exoptent certitudinem? An suffocando Naturæ vocem, quæ ut aliis, sic & mihi, eam falsam esse clamet, quam hucusque credideramus, certitudinem? Agnoscant saltem Medicam Artem natam esse sedula, atque attenta observatione eorum, quæ in morbis apparuerant, quæ in Cadaveribus detecta. Quæ sæpe visa regulam quandam formare contendebant; ast ea, quæ non raro fallebant, arctos adeo limites nostræ circumscribere Arti, ut non infrequenter formata antea lex cessaverit talis esse. Certiorne igitur Ars erit, si quod toties Cadaverum illustrationes nos moneant, supprimeamus; ne semel, dudumque receptas opiniones, ac scholarum systemata, quæ ad multa explicanda multum, ad plura parum, aut nihil faciant, labefactentur?

Vimne eam inferre veritati poterimus, ut ea haud amplius vera sint, quæ contra receptas opiniones nobis palam Cadavera clament? Profecto hi, qui nihil prius veritate habent, ægre non ferent me medicinam non aliam tradidisse, quam eam, quæ minime a systemate, opinioneve, verum ab ipsa Natura depicta, descriptaque fuerit.

Termino hoc caput, de Polyposis concretionibus, quas *Capite* primo plures enarravi, nihil omnino memorans; siquidem *Tom. 2.* & alibi satis clare, opinor, demonstravi eos esse paucos, qui inter morborum causas referantur, Polypos; cujusmodi ibidem unicum descripsi: plerosque vero sanguinis diathesi phlogistica in morbis gigni, aut a conquassante, ac palpitante Corde, in sanguine fere quiescente fabricari. Si enim quis omnes Denatorum polypos, veluti totidem morborum causas,

con-

considerare velit, utique cunctas mortalium ægritudines iisdem adscribat oportet. Non attenderet idem milles polypofas Concretiones eorum in Cadavèribus reperiri, qui usque ad paucos ante mortem dies sanissimi, nullam unquam earundem dederant suspensionem: neque consideraret quotiescunque polypos invenire datur, toties alias, cum varias, tum manifestiores morbi, mortisque causas, deprehendi. Hæc quemadmodum ante tot annos & scripsi, & publice semper docui, gaudeo ab egregio *Morgagni* & suis, & *Valsalvæ* observationibus, ubique, abundeque, confirmari.



CAPUT III.

DE MILIARIBUS.

§. I. *Miliaria hoc anno in Nosocomio nulla. An quod extincta Viennæ? Minime, sed quod eadem non fabricemus.* §. II. *Repetitio antiquæ conclusionis, quod Morbus miliaris non sit Austriæ endemius, sed passim factitius. Multorum clarorum in Arte virorum sententia id confirmatur.*

§. I.

In tomo hujus operis octavo Anacephalæosin dedi cunctarum observationum, quas super hac materia eousque feceram, quasque in Tomorum plurimorum variis, in *Thesibus de Febris*, & in *Epistola ad Amicum*, communicaveram. Lætus deprehendi discipulorum animos nunc minus esse agitados, minus circa famosam hanc quæstionem
in-

inquietos; ita quidem ut ineptas quorundam calumnias potius, quam objectiones, tanquam ultimos agonizantis erroris gemitus considerarent; ad quas qui responderet, nimio profecto & immerito easdem honore decoraret.

Animus fuisset novas forte Observationes edere, cum per integros septem & ultra menses in Nosocomio præter morbos, acutos fere nihil, aut parum saltem, demonstrarim. Verum in tanto Acutorum numero ne unus quidem fuit, quem sive Petechialia, sive Miliaria Exanthemata, infecerint. Quin nec toto hoc anno contigit, ut ad consultationes in urbe, suburbiisque, advocatus; advocor autem crebro; in ægrum vel unicum inciderim, quem alterutrum horumce macularet Exanthematum, nisi semel forte Miliarium principium, quod ilico suffocabatur.

Igiturne, rogabit quis, extinctus demum *Viennæ* est infamis hic Morbus? Minime: nam & illum crebrum viderunt Medici Exanthematum fautores, genitoresque: perierunt cum illis complures, hos inter autem senex, quem non alterutrum, verum utrumque hoc exanthematum genus corripuerat; peritura forsan & illustris virgo fuisset, nisi, clarus superveniens Medicus Miliaria in eadem regimine calido, calidioribusque Bezoardicis, jam genita, eodem artificio, eademque fortuna pepulisset, quibus *Sydenhamus*, consentientibus Medicis aliquot aliis, Collegam suum *Morice* a Petechiis liberabat. Quod vero neutrum horum in meo Nosocomio habuerim, id pro parte saltem ei tribuendum cautelæ censeo, qua nullos hoc anno ægros ex aliis Nosocomiis mihi conquissiverim; ægris autem pro demonstratione variorum

rum Acutorum morborum egens, curaverim ad me illos adferri, qui acute laborantes ad certam semper horam ad Nosocomium Hispanicum aut afferruntur, aut ipsi adhuc accedunt, antequam cæteris cum ægris commisceantur. Non quod ejusmodi cautela omne Exanthematum periculum excludat; domi enim eadem sibi pravo Regimine consciscere possunt, priusquam ad Nosocomia deferantur; ut vel hinc Miliaria nonnunquam ad Nos detulerint: tamen juvit, quo minus periculi incurreremus, pauciores ad id habere occasiones.

Cur vero apud ægros, ad quos consultationis ergo vocor, necdum exanthemata viderim, hanc ejus causam reor, quod hæ Consultationes magnam partem apud ejusmodi ægros haberentur, quorum Medici vel ejusdem mecum sententiæ de Exanthematum origine

gine essent, vel eo saltem devenissent, ut sua Methodo eadem non generarent,

§. II. Repeto igitur antiquam meam Conclusionem eo confidentius, quo magis video nullo solido ratiocinio, nullo rite capto experimento, ab iis, qui contra clamitent, refutari aut infirmari posse, & quo experimentis meis propriis eandem reddo firmiorem: scilicet, si Petechiæ & Miliæ eruptiones sint morbi hic loci endemici, oportet eos apud ægros, quos vel in Nosocomio tracto, vel in urbe video, quoque familiares esse; sicut quidam Medici eos apud suos ægrotantes familiares reperiunt. Atqui olim valde raros, toto hoc anno nullos ulibi habui. Ergo hæc Exanthemata non sunt endemia, sed a causis alibi positis oriuntur, quas nos non ponimus.

Quod ego experior, idem clari mecum viri dudum experti sunt, ut publicis testimoniis constat. Dantur præterea quorum necdum nota testimonia sunt. *Exp. Cramer*, dignissimus ad *Leythæ Pontem* Physicus, studii naturalis universi, ac præprimis Ornithologiæ, ac Botanices cultura eximia clarus, dissertationem meditatatur, ex sua numerosa praxi petitam, qua ea, quæ statuo ego, abunde sit confirmaturus.

Nec defunt clari aliarum Regionum Viri, qui quo attentius rem contemplantur, eo magis se mecum assentire asleverent: imo dantur, qui in annosa sua praxi nunquam aliter, quam ego, de miliaribus censuerint. Testem produco celeberrimum Virum, *Meinungensis* Civitatis Physicum senio-rem, Doctissimum S. G. *Kölderer*, qui Epistola 10. Oct. anni 1763. ad me da-

ta referens quasdam fane egregias cortice peruviano patratas a se curas, tandem subjungit: „ Jam aliquot ab-
„ hinc annis in *Ebrhardtiana æconomia*
„ *Plantarum Historia*, Tomo X. pag. 135.
„ & seq. ad cujus operis a quinto to-
„ mo continuationem me, post lau-
„ dati Autoris obitum, Typogra-
„ phus compulit, occasionem arripui
„ demonstrandi, quam certo, quamque
„ facili negotio Febres malignæ, quæ
„ anno 1759. hic grassabantur, quæ-
„ que maximam partem aut Parotides,
„ aut Bubones, aliisve in locis Tumo-
„ res, passim vero Petechias & Milia-
„ res, sibi adjunctas habentes, curari
„ vix poterant; demum unice, sive
„ Cortice peruviano, sive saltem ejus-
„ modi Medicamentis, quibus Exan-
„ thematis, altero tertiove morbi die
„ confertim prorumpentis, eruptio
„ impediretur potius, quam pro-

„ moveretur, curarentur. Nun-
„ quam enim Exanthemata similia
„ existimavi critica esse, at vero
„ perpetuo symptomata, disso-
„ lutionisque putredinosæ humorum
„ certissima signa: ubi tamen, pro
„ dolor! consueta Methodus (die
„ Mode-arzeny, scribit) nihil aliud
„ quam Exanthematum clamet ex-
„ pulsionem; quo ex fonte quot
„ non prodierint Calamitates!

Ut celeberrimus hic Autor, ita cla-
rissimus *Klein*, eruditissimus *Allioni*, ex-
perientia & eruditione clarus *Valcaren-
chi*, eximius *Glass*, magnificus *Hazen-
öhr*, egregius *Lautter*, censuerunt;
brevique censebunt publico testimonio
plures. Ut hæc doctrina, cujus in sa-
lutem publicam, suscepta defensio tot
inimicitias in me, tot calamos viru-
len-

lentos, totque atroces calumnias ideo excitavit, quod contradicendi libido, quæ justæ essent, non inveniret, nunc demum facta tecta esse videatur; illoque me gaudio expleat, quod unicum verumque sit patrocinii veritatis præmium.

Quo igitur animo expertissimus hujus urbis Practicus, Medicus aulicus, excussa hoc anno apud *Krächten* Disquisitione *De Miliarium Exanthematum indole & tractatione*, antiquum errorem statuminare tentaverit, non satis capio. Dicta fuerant, & ad nauseam usque repetita a variis, tum & sæpius a me refutata, pleraque eorum, quæ, veluti nova, profert; & si qua recentiora exempla propria de praxi retulerit, facile quisque per se vidit ea ita ambidextra esse, ut negantem æque juvent, quam affirmantem. Ea enim hoc sæculo Experimentorum usus est,

ut non id dicas, quod experimenta loquuntur, sed id eloqui experimenta jubeas, quod ipse intendis: de his autem latius sequenti capite in alia materia. Ne ederet opusculum suum, pluries serio monueram; quippe me, ut nullis aliis, ita nec illi, pro excusso ferre patrio errore militanti, minime parciturum. Igiturne refellam opus? Honore dignus Autor est, laudandus Practicus, meus Amicus. Sui quoque Conaminis, ubi mea, quæ non legit, attentius perlegerit; ubi annosior mea confirmata viderit; ipsum vehementer pœnitebit. Sat igitur refutatum relinquo.



CAPUT IV.

DE SYSTEMATE

HALLERIANO.

§. I. *Partes sensibiles quæcunque, haud raro insensibiles apparent. Modificatio Jll. Morgagni admittitur quidem, sed conditionaliter, & non, nisi secundum ejusdem viri illustris explicationem. Quod si Modificatio eadem simpliciter, admitteretur, nihil omnino novo Systemati faveret. Fabricius ab Aquapendente, & Valsalva, maxime autem olim Aretæus, tendines, ligamenta, ac periostea, partes sensibiles esse experti sunt; hanc vero earundem sensibilitatem in Aritbriticorum cadaveribus Morgagni demonstrat.* §. II. *Contra consuetas observationes, dantur notabiles puris confectiones citra febrim, vel citra dolorem, vel etiam citra utrumque, in omni hominum temperie, ætate, & sexu.* §. III. *Inflammationes divissimæ Ventriculi, In-*

testinorum, &c. eademque mortiferæ, aut sine dolore, aut sine febre, aut etiam sine utroque. §. IV. Resumitur quæstio de Pleuræ sensibilitate, occasione Cadaveris Pleuritici, in Nosocomio demonstrati. Pulmo inflammatus hepaticæ duritiei plerumque invenitur, varius mollis ac rubicundus. Quia Pulmo in morbis pectoris inflammatoriis affectus esse deprehenditur, consequitur quidem id, ut nec Pleuræ, nec Intercostalium musculorum, Inflammatio hominem illæso pulmone occidat; haud vero id, ut solus Pulmo & sedes doloris sit, & mortis causa. Viros illustres, Valsalvam, ac Morgagnum, perperam ab Exp. Tyssoto suas in partes trahi, 72. exemplis demonstratur; quæ inter 14. sunt cum inflammata pleura, & 17. cum indolente pulmone. Musculorum intercostalium examen cum in omnibus hisce anatomicis exemplis desit, non imperfectam modo, sed & nullam, redderet omnem Tyssoti conclusionem; etiamsi nec Morgagni nec Valsalva, nec ego, quidquam haberemus ejus argumentis opponendum: habemus autem plu-

rimum. §. V. Inconstantia incomprehensibilis, & stupenda Contradictio Systematis Halleriani, dum Tyssotus 1^{mo} mendacia statuit esse cuncta Ill. Halleri de insensibilitate Pulmonis experimenta; ob idque, quid de reliquis illius experimentis iudicandum, unicuique integrum facit: 2^{do} dum systema hoc in Canones format, inter sese mirifice repugnantes. §. VI. Irritabilitas Cordis talis, qualem statuit Hallerus, & ipso eo Autore, & Morgagniani Operis 170. experimentis, funditus subvertitur. Explofit præterea Morgagni experimentorum in Brutis captorum adplicationem ad Corpus humanum. §. VII. Conclusio hujus Capituli.

§. I.

In opusculo *Difficultatum* super hoc systemate, in eo *Vindiciarum* contra Illustris Halleri Apologiam, in Gallica ad amicam Epistola, sparsimque hinc inde, conatus fui hujusce patefacere infirmitatem. Roborarunt sententiam de eo-

dem meam cum illius Autor ipse, qui quo ulterius in eo defendendo pergit, eo sese mutabiliorem, incertio-remque, etiam in præcipuis suis fundamentis, ostendit; tum ejus Defensores, qui, quo illud systema tueantur, in multis ab Autore recedere, plura ejusdem experimenta infirmare, quædam ridicula rejicere, absurdioraque rejectis coguntur substituere.

Sufficienter proinde meas in hac refutatione egisse partes mihi videor: attamen cum dies diem doceat, & quotidie nova observemus Hallerianis adversa, quædam abs re non erit prioribus addidisse.

Homo, cujus morbi, & sectionis, Historiam dedi *Cap. I. §. VI.* gessit in suo Rene dextro monstroso ultra mediam libram Calculorum omnis figuræ, nec doluit tamen inde, tum quo tempore primum apud nos erat, tum

eo 40. dierum spatio, quo urbem ac suburbia transcurrento doceret, voluntariasque adderet exspatiationes.

Ren, inquit, Cl. *Hallerus*, insensile Viscus est. Sed quis hoc præter illum? Juxta ejus systema a *Tyssoto* elucidatum, quo duriores in corpore partes, eo insensiliores sunt; eo sensiliores, quo molliores. Ren porro durus non est, saltem non utero, qui sensibilissimus, durior. Ergo Ren sentit. Et quem Experientia in vivis haud secus, quam incisiones mortuorum erudierunt, perillustri *Morgagnus*, quotiesne Renes sensiles declaravit? Quam non sensilitatem horum quotidianæ lamentationes Renum Calculo laborantium declarant!

Ast Experimenta Renum testantur insensibilitatem, ais. Bona verba! Experimenta bene capta exhibere nudam deberent veritatem. Id vero moris

ris non est. Vidimus *Cap. II.* Peripneumonicorum durum pulsum debuiffe mollem dici, quo Galeni servaretur Autoritas. Vidimus *Cap. IV.* experimenta Miliarium eruptionum criticam eorundem indolem testari debere, dum id ita Patroni illorum jussierint. Nunquam vero magis id, quam in Irritabilitatis systemate elucescit, ut, quod præoccupatus systemate animus jusserit, id eloquantur experimenta.

Demus vero paulisper esse indolentes Renes; num tamen homo noster dolere non debuit a finitimarum Renibus partium compressione? Mesenterii scilicet, Intestinorum, Nervorum ex vertebra oriundorum, Musculorum Psoæ, Quadrati lumborum, Iliaci interni, partium utique omnium ore sensibilibum? Verum ut ex historia patuit, nihil toto, quo dixi, tempore doluit, ne a motu quidem validiore,

re, nullumve impedimentum in motu cruris dextri expertus est.

Equidem *Cl. Morgagni*, qui taciter ac reverenter, in suis *Epistolis Anatomico-Medicis*, Modernorum systema explofit, hinc inde ejusdem absurditates obvelare, ac emollire satagens, sic ad hanc difficultatem respondit, ut subito nati tumores dolorem quidem viciniae suae sensibili creent, minus vero qui sensum, lenteque; eo quod hæc compressioni pedetentim assuescat, ac sensum quandoque occalescat.

Modificationem hanc ea lege admitto, ut saltem 1^{mo} in principio tumoris sæpe dolere vicinæ debeant partes in locis, qui pleni, haud inculpate aliena insolitaque admittunt: ut 2^{do} in Cadaveribus hæ partes vicinæ enerves, aut callosæ reperiantur: ut 3^{tio} in vita quoque partium, lente crescenti tumori vicinarum, licet indolentium fere,

fere, tamen in usu læfarum, phænomena appareant.

Sed, inquit forsitan, id necessario ex hac Modificatione non sequi: siquidem cum utero imprægnato, sensim se eam in molem extendenti, quam pauci tumores coæquent, femina complures vix doleant toto tempore graviditatis; æque casu denatæ callositatem degenerationemque partium compressarum nullam Anatomicis exhibeant: in aliis vero ipsum V. C. molis prægrandis jecur, idque induratum, non exhibeat a morte callosum peritonæum, ventriculum, intestina.

Demus & hoc quoque: an vero hoc dato id verum esse sequitur, quod Novum systema inde concludit? Minime. Si enim *1^{mo}* Clarissimo Morgagno id lubens concessero, quod exempli gratia, Duræ ac piæ Matres, dum sensim tenduntur, parum doleant; quod

quod Renes pedetentim tumefacti vix percipiant dolorem; quod in graviditate, in hydrope, Musculi abdominales, Peritonæum, Mesenterium, Intestina, Cutisque expansa, in pluribus non doleant, saltem non multum; nunquid legitima conclusio hæc erit, Cutim; quæ omnibus fatentibus sensibilis est, Mesenterium, Intestinaque, ipsos demum Nervos abdominales, sensibilitate carere? Utique tandem nihil ultra universo in corpore sensibile foret.

2^{do} Vidi ego, videre *Valsalva* ac *Morgagni*, ordine inverso, tumores subito natos dolorum expertes; lente vero cretos maxime dolorificos: idque iis etiam in partibus, quæ omnium Consensu sensibiles sunt, ut postmodum patebit.

Tandem 3^{tio} ad leniendas quasdam novi systematis absurditates Eximius *Morgagni*, ut supra monui, hæc excog-

gi-

gitavit; minime vero approbavit ad
ufum pathologicum. Qui enim aliter
ipfum intelligamus, Cephalæarum Cau-
fam ex paulatim nata compreffione
Cerebri membranarum in *Epiftola I.*
explicantem? Et capitis dolores a na-
ta paulatim Duræ Meningis cum
Cranio cohæfione deducentem? Qua
alia ratione ejus mentem capiemus,
dum *Epift. 58.* obfervationem primo
Valsalvæ referens, qui diuturni atque
omnibus adhibitis auxiliis rebellis, ad
Diaphyfin Tibiæ, ejusque Malleolum,
doloris caufam invenerat ad Tendines,
inque Periofteo: deinde obfervatio-
nem *Fabricii ab Aquapendente*, qui in
carpo pituitam acrem, internos ten-
dines afficientem, ut diuturni doloris
caufam, deprehenderat; quique am-
bo magni in arte viri, fcalpello educta
materie, & ille, offis quadam fepara-
tione facta, ægros fuos reddiderant

ab omni dolore immunes: dum illis, inquam, hæc subjungit: “ Cæterum
 „ num duo Anatomici, iidemque
 „ Chirurgi præstantissimi, *Fabricius &*
 „ *Valsalva*, ipsi quoque tum forte de-
 „ cepti sint, tendines uterque, hic
 „ etiam Periosteum, illis cruciata do-
 „ loribus fuisse non dubitantes, ma-
 „ lim per te existimes, quam ipse di-
 „ cere. Profecto ut ambo hi vitiis
 tendinis, ac periostei, minutatim na-
 tis, dolores sive repetentes, sive per-
 severantes, tribuerant; ita Hic dolo-
 res capitis vitiis membranarum cerebri
 gradatim ortis.

Sed, quod crebro dixi, quodque
 ab *Jll. Hallero*, ejusque Discipulis, con-
 sideratius attendi optassem, quemad-
 modum cunctæ hæ partes explicatis
 de causis doluisse inventæ sunt; ita
 non raro non doluisse visæ sunt: id
 quod ut in enarratis casibus, ita & in

aliis, imo in universi Corporis partibus contingere, evictum est. Nonne dudum Aretæus ligamenta considerans
 „ *νεῦρα, τὰ δεσµατὰ τῶν ἀρθρώων*, non dolere sæpe, scribit, dum quis ea ab-
 „ scindit, conteritve; & interea alio
 „ tempore hominem sic ab illis dolere, ut a nulla re magis; imo ut non
 „ ferramenta adstringentia, non vincula, non vulnerans gladius, non
 „ exurens ignis, plus crearent doloris; id quod rem stupendam vocat,
 „ cuius solis Diis nota causa sit. Morb. diuturnor. Lib. 2. Cap. 12.

Profecto procul abfuit ille humanæ naturæ Ruspator, ut ideo ligamentorum sensilitatem negaret, quod quandoque non viderentur illa sentire. Et non negat non doluisse, & doluisse affirmat. Cur *Aretæum* non sequamur?

Sed

Sed experimenta, ajunt, docuere non sentire omnino, nec unquam, ligamenta ac tendines. Attamen eorum, qui in Brutis rem explorarunt, hi has partes non sentire, illi sentire easdem, experti sunt. Ita ut, quod *Aretæus* mox de humanis, idem de Brutorum tendinibus, ac ligamentis, nunc sentientibus, nunc insensibilibus, posteriores notaverint.

At missa faciamus experimenta in Brutis capta, ea quæ in homine, de quo unice agitur, contemplaturi. Ab omni ævo Ligamentorum ac Tendinum sensus a doloribus Arthriticis demonstrari creditus fuit, ut pluries adversus *Hallerum* evici. Vir autem illustris ille podagræ sedem negavit in tendine ligamentove esse, & propria sua podagra, ut putat, edoctus, ad cutem locavit.

Cum ea, quæ adeo convincentia
claro Viro reposui, ipsum convicisse
non videantur, adeundus ipsi *Morgagnus*
erit, adeundusque *Valsalva*. Narra-
bit ipsi hic se podagricam materiem
invenisse in membrana digitorum ten-
dines obvelante: ille post sævos ischiadi-
cos dolores in vita toleratos, non *supra*,
sed totum, idque ingens, atque mul-
tiplex vitium, *intra* articulum coxæ
se reperiisse: imo quod *Cælius Aurelia-
nus* notaverit lapides podagricos primo
articulum solvere, cutim deinde di-
stendere, atque erumpendo promine-
re; hæc omnia se vidisse in digitorum
manuum articulis *Patricii Veneti*: re-
mittitque lectores ad similia observata
Harderi, *Schneyderi*, *Dobrenskii*, in
Sepulcreto. Tandem inducit nonnul-
los, quibus scribere libuit, non posse
humorem arthriticum intra articulo-
rum caveas perferri, quandoquidem
liga-

ligamenta capsularia occludant easdem, neque ulla ad has via pateat, nec vena aliqua hæc loca subeat; quibus egregie respondet Vias huc easdem esse, quæ Mucilagini, articulorum cava lubricanti, dicatæ. Adde ad hæc, quæ paulo supra, ex *Valsalvæ & Aquapendentis* demonstrationibus didicimus.

Nonne interim dolenda Artis nostræ fors est, qua id, quod plurimi Mortalium, quod ipsi Medici in semillies experti sunt, quod tot clari Anatomici suis oculis viderunt, Re- nes nempe, intimosque Articulos, Capsulas, ac Tendines, doloris materia obsideri, adeoque sentire; id verum ultra non esse, quia condito semel imprudenter Systemati convenit has omnes partes insensiles esse?

§. II. Puris confectiones febrim habere doloremque comites, ab *Hippocrate*, in nostra usque tempora, ob-

servatum est. Ipse tamen *Hippocrates*, postque ipsum alii, observarunt eas nonnunquam fieri ingentes, quæ æque doloris sint, quam febris, expertes. *Epid. IV.* apud *Chart. textu 40.* ubi primum dederat *Hippocrates* signa consue- ta, quæ Medicis patefaciant num- qui in morbis abscessus appareant, judicatorii sint; duos subjungit casus, qui a signis hisce, ab eo datis, ablu- derent: ac primum quidem *Leambii*, qui ad humerum, & ad sinistrum ani- latus, citra vel minimam febrim exul- cerabatur; alterum alius ægri, qui cum inflammata sede, unde posthac purulentum prodiit, febris omnino fuerit, dolorisque expertus. Ne quis autem Medicus, similia nondum ex- pertus, fidem forte dictis negaret, rem probe se nosse, & asseveranter se loqui *Hippocrates* declarat. *ἰκανῶς τὰ τὸ λέγω*, inquit.

Egre-

Egregius *Morgagni* in Senatore fene
& ædematoso id in crure observavit.
Et qui in varia ætate, ac sexu, viderat,
laudat Collegam suum *Cl. Pujatum*, ut
qui in Anu, in Adolescentula, in Vi-
ro robusto, idem observasset. Num
inde concludam legitime cutaneos ner-
vos, & cutem ipsam, insensiles esse?
Non: sed has sensiles per se partes, ali-
quando insensiles esse, ut de ligamen-
tis supra *Aretæus*.

§. III. Inflammationes adeo sævas,
ut eas Gangræna, Sphacelusque exci-
piant, febres, magnique solent comi-
tari dolores. Non est tamen lex per-
petua. Juvenis meus Cap. I. §. VI.
Homo *Valsalva* apud *Morgagni* Ep. 24.
inflammatum ventriculum, ac gan-
grænosum uterque citra dolorem, meus
etiam citra febrim, habuerunt. *Mor-
gagni* post quam cum ipse quatuor aut
quinque exemplis idem expertus esset,

tum ex *Fernelio*, *Hoffmanno*, *Ortlobio*,
Riverio, aliisque confirmasset; demum
Epist. 25. §. 21. præclare subjungit:
„ Quæ omnia cum ita sint; quando
„ cum aliis inflammatorum Intestino-
„ rum signis vehementem dolorem,
„ & acutam febrim in ægrotantibus
„ deprehendes; jure quidem merito-
„ que credes Rei medicæ Autoribus,
„ hæc duo inter præcipuas notas ma-
„ gnæ Intestinorum inflammationis
„ ponentibus. Nec tamen, si quan-
„ do alterum, vel utrumque horum,
„ aut abesse, aut vix esse, invenies,
„ continuo putabis aut nullam esse in-
„ flammationem, aut levem; neque
„ Gangrænam & Sphacelum in eorum
„ esse Intestinis non posse, in quibus
„ duo illa præcessisse non videris. Op-
„ tandum sane fuisset ut Medici, cum
„ signa hujus Inflammationis, & con-
„ sequentis ipsam Gangrænæ, pro-
po-

„ posuerunt, hoc monitum non omit-
 „ terent in morbo, qui per fallaciam
 „ ejusmodi, nec raro, præceps, ac
 „ repentinum affert exitium. Nec
 „ raro, inquam; nam memini, cum
 „ adolescentuli supra descripti casum
 „ mirabundus narrarem *Valsalvæ* &
 „ *Albertino*, continuo utrumque con-
 „ firmasse non absimilia occurrisse si-
 „ bi, nec semel. Quid, quod idem
 Vir perillustris semel, ego pluries,
 herniam incarceratam indolentem vi-
 derimus, ut morbus tumore inguinis,
 ac vomitu desperato cognosceretur
 duntaxat; & inflammata valde intesti-
 ni pars, inque gangrænam pro parte
 versa, in Cadavere adpareret?

Ex quibus manifestum fit partes
 sensilissimas, dolorum atrocitate infames,
 non raro a causis dolorificis af-
 fici, sine sensu doloris. An tunc cau-

sa doloris vehemens intercipiat id, quod ea in parte cum communi sensorio communicet? Namque pauculum in Nervo requiritur, ut subjecta pars insensilis, etiam scissa ullaque, nihil sensorio communi denuntiet. Sed quæcunque mirabilis phænomeni causa sit, id perpetuo constat, ideo Musculos, ideo Nervos, ideo Ventriculum, Intestina, Mesenterium, Cutim, partibus sensilibus annumeranda non esse, eo quod non raro insensilia appareant.

§. IV. Cum simile quidpiam credatur in Pleura observari, paulatim perducere me sentio ad resuscitandam tædiosam de ejus sensilitate quæstionem, quæ occasione systematis moderni agitata toties est; quæque ejus sensilitas ita a magnis viris *Valsalva*, & *Morgagnio*, explosa fuisse Clarissimo *Tyssoto* apparet, ut in suo diffamatorio contra me libello clamet io! triumphe!

Quo brevior sim, refero me ac ea quæ in *Gallica ad Amicum Epistola* in hanc rem ipsi reposui; additurus hic reliqua, quæ occasione Anatomicæ sectionis, *Cap. I. §. V.* relatæ, necessario mihi exponenda sunt.

In thorace dextro, sub loco olim dolentissimo, quem, ne de eo quis ambigeret, Emplastri figebant vestigia, Membrana Pleura, latissima admodum plaga, haud inflammata duntaxat, sed inflammatissima apparuit: sic quidem, ut cum illi, qui Pleuram vasculosam esse præfractæ negarunt, tum hi, qui felicissima injectione paucis tantummodo vasis ornatam videri statuerunt, hic eam vidissent quovis in puncto vasculosissimam. Clari hi viri laudandi sunt, quod vel nulla, vel vix ulla vasa, suis Pleuræ injectionibus se invenisse, adeoque *Ruischio* adhuc infeliciores fuisse, fateantur; sed condemn-

nan-

nandi sunt, quod ideo Pleuram vasculosam esse negaverint; quod ideo inflammationi ineptam esse decreverint; quodque ideo aut deceptos, aut mendaces, magnos in arte viros declaraverint, qui in Cadaveribus eandem valde inflammata, & viderant, & descripserant posteritati: *Erasistratos* ajo, *Cælios*, *Martianos*, *Diemerbroeckios*, *Riolanos*, *Boerhavios*, *Valsalvas*, *Morgagnos*.

Hæc porro Pleura, ut vehementer, quo indicavi loco, inflammata, sic etiam, cum in vita dolor, non deferendo hanc plagam, usque ad dorsum proserpisset, inflammata Pleura inventa est usque ad alterum spinæ dorsalis latus. Tum & ipsa Diaphragma convestiens, & qua tendineum, & qua musculosum, inflammata admodum adparuit: inflammatum quoque Diaphragma erat, qua parte Peritonæo
suc-

succingitur; levius tamen, quam qua Pleura.

Pulmones nullibi ad Pleuram accreti, nisi in inflammata quadam plaga, adhæsione digito non latiore: molles ceterum, & dum profundius incidebantur, superius grisei, inferius intensissime rubri.

Plurimos inter testes, huic sectioni circumstantes, erat Vir Clarissimus, *Göttingensis* in Anatome Professor *Vrisberg*, qui per duos, tresve menses, hanc nostram universitatem sua præsentia cohonestavit.

Febris acuta primum, dein sæva Pleuritis, sustulerunt hominem; haud sine Peripneumonia tamen. Licet enim Pulmones inflammatione duros non deprehenderemus, quemadmodum in antecedente trium Cadaverum sectione, erat inflammatus tamen, infimis uterque lobis, ea nimirum rariore

riore inflammationis specie, quam Cl. *Morgagni* describit, ut rariorem, Ep. 20. §. 21. „ Plerique credere videntur, ait, pulmonis inflammatio-
„ nem in rubore ferme consistere:
„ (hic noster casus erat) quod ali-
„ quando fieri posse non est negan-
„ dum, ut si quando de genere est le-
„ gitimi Erysipelatis: Verum in ple-
„ risque inflammationibus densus durusque fit Pulmo.

Neceffe fuit hanc memorare Cl. *Morgagni* adnotationem convenientem cum ea *Hippocratis*, pulmones Peripneumonicorum nunc Erysipelatosos, nunc infarctos, duosque, scribentis; convenientemque præterea cum ea *Lanzonii*, qui in Pleuritide, Pleura illæsa, Pulmonem invenit Erysipelate affectum, ex flavo maculosum, non vero durum: necesse, inquam, fuit
hanc

hanc adferre adnotationem; ut simul confirmarem id, quod in *Epistola ad Amicum*, contra *Tyssotum* urfi: nempe in Schola *Boerbaviana* Pleuritidem, si sedem in Pleura, vel in Musculis intercostalibus habet, haud ita considerari, ac si inde homo illæso moreretur Pulmone; at vero sic, ut respiratione Pleuriticorum vehementer læsa, pulmonem serius ocysus affici, suæque affectionis indicia in Cadavere præbere oporteat. Imo *Boerhaave* non in Pleuritide tantum, verum etiam in plerisque morbis letalibus, peripneumonicum hominem demum mori docebat.

An igitur adversariorum inde deducta consequentia legitima est? Quando *Boerhaave* scripsit Aph. 874. „ Cur „ ex iisdem pariter liquet hunc morbum, (Peripneumoniam) fere fieri „ ex omni alio prægresso, antequam „ ex eo moriatur æger? adeoque proximam

„ ximam mortis causam, & ultimum
„ omnium fere letalium morborum ef-
„ fectum esse Peripneumoniam: quan-
do, inquam, sic scripsit, nunquid
ideo statuit mortalium neminem nun-
quam a Pleuritide mori, quia Perip-
neumonia scenam claudit? neminem
unquam a Paraphrenitide? neminem
ab Hepatitide, Enteritide, Hysteriti-
de, Nephritide, Arthritide? An quo-
que dixit *Boerhaave*, hæc scribens non
differre morbum principem ab epige-
nomena Peripneumonia? Nihil pro-
fecto minus. Sed quidem hoc docuit,
quemadmodum inflammatio Menin-
gum Cerebri, ea intestinorum, uteri;
quemadmodum ceteri enumerati mor-
bi principes, seu primarii; sive san-
guinem corrumpendo, sive solida om-
nia obstruendo, constringendove, si-
ve Nervorum labefactando originem,
sive alio quocunque demum modo id
effi-

efficiant, ut pulmo plus accipiat cruoris, quam sinistrum in Cor refundere possit, letalem adeoque Peripneumoniam gignant; sic quidem ut non directe per se, sed per epigenomenam peripneumoniam necet hominem; ita pariter & quidem a fortiore, Pleuritis, id est Inflammatio Musculorum intercostalium aut Pleuræ, non modo ea facit, quæ enumeratorum plerique, verum magis immediate eorum organorum, quibus ad respirandum eget Pulmo, lædit functiones, eoque certius hac superveniente Peripneumonia occidit: absque eo tamen, ut nata sic peripneumonia non magis princeps sit morbus, non magis existentiam inflammationis laterum, ut sui causam, neget; quam superveniens inflammationi v. g. Intestinorum, negaret hanc ipsam Intestinorum inflammationem & separatam a sese morbum

esse, & se ex eadem suam sumsisse originem.

Neque alia ratione, intentione ve, suas tradidere *Valsalva* ac *Morgagni* observationes. Ut profecto nesciam quo pacto potuerit *Tyssotus* tam in *Halleri*, quam in sui proprii systematis confirmationem, magnorum illorum Virorum observationibus ita abuti, ut inde probaret nunquam Pleuritidem in Musculis aut Membrana laterum thoracis, sedem habere; & hunc morbum unum eundemque cum Peripneumonia esse. Cum illegitima hæc innovatio simul totam hac in parte Pathologiam perturbet, necesse est paucis ut has observationes recenseam, singulariumque singularem analysin faciam.

Epist. anat. med. 20. §. I. recenset Cl. *Morgagni* casus per universum opus dispersos, antequam ex professo rem aggrediatur: itaque eodem modo eum sequar.

Imo

Imo in Epist. 6. Nro 10. *Valsalva* in homine post dolorem sinistri lateris invenit Pulmonem sinistrum induratum. Pleuræ mentionem eo non faciente, illæsam fuisse lubens supponam. Numquid Musculorum intercostalium mentione non facta, illæsos quoque credam eosdem? Neutiquam: etenim ex universa sequentium historiarum serie patebit, vix, nisi semel iterumque, examinatos in Cadaveribus hos musculos fuisse; adeoque insignem adesse in omnibus *Tyssoti* conclusionibus defectum. Cum enim *Boerhaavius* Pleuritidis sedem in Pleura, vel in musculis intercostalibus fixit, & in his ultimis solis *Hallerus*; ipse vero *Tyssotus* in unico Pulmone; non potuit fere ullo testimonio *Valsalvæ*, & *Morgagni*, ille uti, nisi in quo rigorosum simul factum fuerit eorundem musculorum examen; in quo sane examine totus

rei cardo vertitur. Adeoque, ut monui, cum vix tale examen unquam ab illustri hoc Duumviratu institutum sit, fuit vana ac inanis omnis ejus conclusio.

Igitur æger *Valsalvæ* doluit sinistro latere, vel ob id unice, quod induratus pulmo sensibilem pleuram continuo terendo, premendo, fricando irritaverit; vel ob hanc causam, & simul ob intercostalium musculorum inflammationem.

Nunquid vero tunc Pleura non fuisset inventa inflammata? Potuisset, sed non debuisset. Non omnis sensibilibus partium irritatio gignit phlogosin. Si gignat Pulmo induratus hanc fricando, terendove, gignit & epigenomenam pleuritidem; sine minus, Pleura doluit non inflammatoriè.

2^{do} Epist. eadem §. 12. Senex Sterni dolore in morbo suo ultimo

unica

unica modo die laborat, saltem postea non conquestus de eo est. Illi abeunti stertor successit. Erat autem homo & ante dolorem pectoris, & post eundem, hebes, ac semisopitus. *Valsalva* in Thorace invenit pulmonem dextrum hic durum, ibi nigrum, alibi corruptum. Quid hæc historia ad quæstionem nostram? Homo hic unico die doluit duntaxat, vel quod inflammatus cruor sternum relinquendo affecerit pulmonem, vel quia æger præmentis hebetudine, & soporositate, dolorem ultra non perceperit. Die 5. vel 6. a cessante dolore mortuus est.

Arbitrabitur forte adversæ opinionis Scriptor hominem hunc non minus stupidum fuisse, quo die dolores pectoris conquerebatur, quam & antea & postmodum, nihilominus de dolore non nisi eo unico die conquestum esse; cum igitur hebetudine sua

non impediretur dolorem unico die percipere, oportere eum toto morbi tempore doluisse, cum pulmo ejus ita pro parte induratus, debuerit, secundum prioris morbi explicationem, continuo dolore pleuram irritando, fricandoque afficere.

Vicissim autem hunc ego rogabo, ut explicet mihi cur homo hic perpetuo non doluerit, si causa doloris pleuritici vera sit pulmonis inflammatio? Cum enim Pulmo in Cadavere pessime inflammatus reperiretur, debuit doluisse continuo. Nec causam indolentis pulmonis in ejusdem gangrænam referat: nam pars adhuc dura præ inflammatione erat. Cum hoc mihi nunquam explicabit, vel ad dicta antea me refero, vel in partium sensibilibus temporariam insensibilitatem, quæ longe lateque superius demonstrata est, causam refundam.

3^{to} Ibid. §. 14. Peripneumonia ac sopore detentus intra quatrimum moritur. Thoracem non examinavit *Morgagni*. Ergo Adversarius ex tota hac historia nihil concludere potest.

4^{to} Epist. 7. No. 4. *Valsalva* hæc habet. “ Vir annorum circiter 35. „ dolore corripitur in Thorace cum „ febre. Dolore abeunte, accedit ad „ febrim delirium: quod, febre magis augefcente, ad mortem usque „ perdurat, quæ circa diem 11. accidit. Thorace recluso pulmonum „ posteriora dura aliquantum, & rubra inveniuntur. Si hic homo pleuriticus fuit, dolor abivit, quia pro pleuræ inflammatione ea meningum nata est: pulmo autem inflammatus fuit || quod Phrenitis, ut omnes morbi acuti fere, quemadmodum superius probatum est, vitam Peripneumonia finiverit. Notandum adversus pul-

monum sensibilitatem, quod si ideo homo thorace doluisse statuatur, quod pulmones inflammati essent, pulmones inflammati plurimo morbi tempore insensiles fuerint. Si dicas præ delirio hominem dolorem non sensisse, dicam idem de Pleura, vel de Musculis intercostalibus.

5^{to} Epist. 22. §. 10. *Valsalva* in Thorace hominis veneri, qui sinistri cum lateris dolore acute decubuerat, sinistrum pulmonem superiore parte durum, inferiore saniosum, invenit. Iterum ab affricu & irritatione rigidi pulmonis ad pleuram dolor explicatur: vel ab inflammatis musculis intercostalibus.

6^{to} ibidem §. 11. Meretrix in sinistra thoracis parte sic dolet, ut vix decumbere in eandem possit. Cum pulmones ambo dura tubercula & ulcera gesserint, cur, si sedes doloris
la-

lateris in pulmone est, non doluit illa utroque latere? Ergo Pulmones non sunt dolorum laterum sedes. Unde ergo finistri lateris tantumodo dolor? Intercostales muscoli, si examinati fuissent, doloris forsan patefecissent causam.

7^{mo} ibid. §. 16. Virgo Pleuroperipneumonica sinistro latere potissimum ac valide doluerat. Invenitur & Pleura inflammata, & pulmo. Historia hæc explicatione non eget. Nimix præcipitationis convincit Modernos.

8^{vo} ibid. §. 22. Pleuroperipneumonia cum pungenti finistri lateris thoracis dolore. Pulmo sinister prave affectus, minus dexter: ambo cum pleura ubique connexi, magis adhuc dexter. Prævus pulmo sinister minus accretus, ad loca accretionis distraxit pleuram, ut doluerit, dolore tamen

non inflammatorio. Dexter Pulmo universalius accretus, & parum vitiosus, non potuit distrahere pleuram. Quid si etiam sinistri intercostales musculi inflammati fuerint?

9. Epist. 36. §. 23. Lanio acuta prehenditur febre, signis stipata internæ thoracis inflammationis. Pulmo dexter annexus Pleuræ & durus. Historia non narrat, an dolor affuerit, nec quam thoracis in parte: Signa modo ait adfuisse inflammationis internæ. Si doluit igitur latere dextro, causa ex præcedentibus intelligitur, pressio scilicet & irritatio pleuræ a duro pulmone. Sin minus, obscurior narratio est, quam ut quisquam illam in sui favorem laudet.

10. Epist. 37. §. 29. Thoracis inflammationem conquesta mulier est. Vaga enarratio nihil determinans, adhuc minus Anatome, quæ non est facta Thoracis.

II. Epist. 45. §. 16. Mulier in acuto morbo pectoris non quærebatur de peculiari ad dorsum molestia, ut neque de pungente dolore. In Cadavere tamen, præter vitiatos pulmones, pleura utroque in latere roseo rubore ad non parva spatia rubebat. Subrubrum & Pericardium.

Sed ipsa hæc mulier nunquam erat conquesta de tremore cordis, nunquam de animi defectionibus. Nihilominus ipsi erat Pericardium hoc amplum, fero quasi purulento distentum, in substantia incrassatum, eductaque contenta materie luridum, quemadmodum quoque universa cordis, vavorumque majorum, & Auricularum superficies erat, a crassa polyposa compacta, iisdemque accreta materie.

Cum proinde hæc mulier cordis palpitationibus, animique caruerit defectibus, quos pati debuisset, non miramur

ramur nec laterum conquestam esse dolorem. Peculiare illud hic obtinuit, supra memoratum, explicatu difficile, quo licuit causas adesse symptomatum, ipsa tamen deesse aliquando symptomata. Nihil ergo hoc argumentum urget.

12. Epist. 48. §. 32. Thoracis inflammatione Meretrix periit; cujus non est examinatum pectus. Adeoque hæc observatio ad quæstionem non facit quidquam.

13. Recensui hucusque eos casus, quorum per anacephalæosin *Morgagni* meminit. §. 1. Epist. 20. quæ nobis commentanda est: priusquam vero id aggredior, necesse est eos recensere per universum opus dispersos, quorum Autor in hac §. 1. Epistola 20. ipse non meminerit; ut toto in opere nihil, quod ad rem facere possit, maneat intactum.

Epist.

Epist. 7. §. 111. Figulo vehemens est dolor sinistri lateris, die septimo moritur. Sinister Pulmo præ inflammatione jam suppurari inchoat. Pleuræ adhæret multis membranaceis vinculis. Pleura superius crassa, inferius crassiuscula, & rubicundior. Pericardii facies exterior, sinistra tantum, a vasculis minimis, sanguine turgidulis, rubebat. Hic omnia adfunt, quæ in schola Boerhaviana ad Pleuroperipneumoniam requiruntur.

14. Epist. 52. §. 15. Pleuritis ad imam sinistram Thoracis partem gravissima fuit. In Cadavere solum cranium examinarunt. Ergo ut supra ad Nro 12.

15. Ibid. §. 13. Dolor pungens ad lævam mamillam. Sinister Pulmo inferiore lobo inflammatus; sinistraque pleura. Demonstratio ut Nri 13. superioris.

16. Epist. 9. §. 12. Nulla doloris laterum mentione facta, febricitans coquus moritur ad 12 diem epilepticus. In Cadavere inflammata Pleura.

Ad historiam hanc non est quod multum hæreamus. Cl. Autor nec morbum ipsum se multum vidisse, nec dissectioni, quæ modo a Medicinæ studio facta est, interfuisse se fatetur. Ast cum Pleura inflammata esset, legitime supponam hominem latere doluisse.

17. Epist. 22. §. 16. Virgo utroque quidem latere doluerat, sed sinistro potissimum. Pleura sinistra inflammata, sinisterque Pulmo. Pulmo dexter superius durus pleuram irritaverat nondum inflammatorie.

18. Epist. 45. §. 23. Pulmo inflammatus ac pessime affectus, sine ullis ejus in morbo acuto signis aut dolore. Qui ita urgent ideo non esse
sen-

fenibilem pleuram, quod sine prægresso dolore inventa sit inflammata; coguntur hic suam assumptam Pulmonis sensibilitatem dimittere. Quid clarius demonstrat Peripneumoniam exquisitam doloris expertem esse; ideoque in ejus definitione doloris non fieri debere mentionem?

Nunc ad Epist. 20. & 21. examinandas, quibus *Tyssotus* Pleuræ insensibilitatem, ac sensibilitatem Pulmonis, probare annifus est, nos accingamus.

Epist. 20. meras *Valsalvæ* continet observationes: quarum *prima* hæc est §. 2. Moritur Peripneumonicus, sine dolore. In thorace dexter pulmo inflammatus, cum Pleura illæsa. Hic quæretur a me cur Pleura non doluerit, quæ juxta explicationes priores meas a duriore Pulmone laceßita dolere debuisset? Quæro vicissim ego, cur Pulmo, adeo sensilis hoc tempore ha-

habitus, non doluerit? dolere enim debuisset. Si casus utrique litigantium partium inexplicabilis, neutri favorem, aut præjudicium facit. Ego qui sensibiles partes non raro non sentire demonstravi, facile hic pleuræ explico indolentiam.

2. §. 3. Dolor in latere dextro.
„ Dexterī pulmonis superior lobus,
„ & proximi lobi pars superior, qua
„ uterque dorsum spectabant, tumo-
„ re turgebant inflammato, & præ-
„ duro, arctēque per membraneos ne-
„ xus pleuræ adhærebant: hæc ta-
„ men nullam inflammationis notam
„ habebat. Quæro hic ab iis, qui
omnem pleuriticum dolorem Pulmo-
nibus inflammatis tribuunt, cur pul-
mone ad dorsum inflammato homo
non ad dorsum, ubi inflammatio, sed
ad latus, ubi sanus pulmo, doluerit?
Ergo inflammatus pulmo non dolet.

Cur

Cur igitur homo doluerit in latere ubi nec pulmo durus, nec pleura læsa? Responsio forte in propatulo esset, si musculos intercostales examinasset *Valsalva*.

3. §. 5. Dolor gravans sinistri Thoracis. Tumidus, ac durus Pulmo, sinistram hanc partem totam explebat. Pulmo valde tumidus compressit pleuram, quæ inde non *punctorie* non *inflammatorie*, sed *gravative* doluit: unde nec inflammata apparuit. Si quis tamen velit acutum ac pungentem dolorem adfuisse, in musculis intercostalibus sedem quærat.

4. §. 7. Dolor in Thoracis sinistra parte. In sinistro cavo serum albidum, tum pulmo a posteriore parte inflammatus. Pleuram *Valsalva* non descripsit. An quod neglexerit? An quod bona esset? Supponamus fuisse bonam, & ex toto casu concludamus

1^{mo} pulmonem insensilem esse, quæ enim parte inflammabatur, non dolebat. 2^{do} Serum acre effusum non quidem inflammando, sed irritando, creasse pleuræ dolorem.

5. §. 9. Dolor primo gravans in latere dextro, quarto die pungens, quinto mors. Pulmo dexter immanem inflammationem ac duritiem, & sub his inchoatum jam abscessum, ostendit. Insinuat *Cl. Morgagni* in hac anatome describenda *Valsalvæ* negligentiam. Nihil enim, quod requirebatur, de tota Pleura. Si inflammata fuit, utique causa intellecta doloris est: sin minus; expectemus musculorum intercostalium examen.

6. §. 11. Post dolorem præsertim circa sternum, in febre continua, mors die nono. Pulmo sinister inseparabiliter cum tota pleura connatus. Dexter concretus cum toto mediastino,
item-

itemque cum pleura superiores costas vestiente; pus saniosum e pulmone effluxit, dum vi a superioribus costis avelleretur. Antiquior forte cohæsiō, quæ demum, pulmone præ inflammatione, & suppuratione tumido, ac duro, causa doloris fuit. Sed quid sententia *Morgagni* præstantius?

„ Hic illud juvat attendere, inquit,
„ cum dolor esset præsertim circa
„ sternum, vitiatum pulmonem toti
„ mediastino arcte adhæsisse, quod
„ videlicet ad sternum alligatur. At
„ alligatur, inquis, etiam ad Thoracis
„ vertebrae, circa quas non memora-
„ tur dolor. Verum hoc est: sed ve-
„ rum id quoque, in violenta respi-
„ ratione, qua uti ea virgo cogeba-
„ tur, sternum moveri, non verte-
„ bras; itaque illas magis affici Me-
„ diastini partes, quæ ad sternum sunt
„ alligatæ.

Peto humaniter ab iis, qui hæc *Morgagni* præclaras Epistolas in suas partes trahunt, num manifesto iis oppositus non sit, Mediastinum, Pleuræ productionem, sensibilem declarando? si dubitent adhuc, sequantur eum hoc loco, tres *Sepulcreti* observationes sic explicantem, ut Mediastino, ac Pericardio sensibilitatem non neget.

7. §. 13. Dolor in dextro Thoracis parte, atque etiam in medio sterni. Supinus cubat. Erecta cervice spirare cogitur. Die 7. mors. „ Pulmo dexter in superiore parte tota induruerat; & nonnihil Sterno, arctius autem Mediastino, adhærebat. Sinister a tergo infectus erat colore „ atro.

Si dolor a Pulmone inflammato, in sinistro Thorace debuit violentior fuisse, cum sæva inflammatio jam in sphacelum tenderet. Atqui non doluit

luit latus sinistrum. Ergo pulmo non est sensibilis.

Cur homo doluit latere dextro, & ad sternum medium? quia pulmo sua duritie pleuram fricabat, & adhæsione ad sternum ac mediastinum, has distrahebat partes.

8. §. 15. Infantis quatuordecim dierum vera peripneumonia nihil ad negotium nostrum facit: De pleuride enim, aut dolore, hic nulla quæstio.

9. §. 16. Virgini dolor in sinistra primum, hinc in dextra Thoracis parte. „ Pulmo dexter nonnihil inflammatus, a tergo præsertim. Sinister „ autem, qui undique pleuræ, costas, & diaphragma convestienti, „ adhærebat arctius, ut eximi sine laceratione non posset, multum rubebat. Principio pulmo inflammatus dexter solus, pressit ac fricuit

pleuram dextram; inflammatus dein sinister, non modo pleuram comprefsit, sed suas cum ea cohæsiones distraxit.

Iterum in illos, qui egregium *Morgagnum* suis a partibus stare toties gloriantur, noto hunc Autorem, dum in hanc *Valsalvæ* historiam commentatur, manifesto agnoscere, pleuræ sensibilitatem, affirmando, & istam virginem, & virum priorem, in dextrum latus incumbere non potuisse, eo quod pulmo sinister ad pleuram alligatus, ac ponderosus, inclinato in dextrum latus corpore, pleuram distraheret, molestiamque crearet. Sic & §. 38. exponens cur pleura, licet inflammata inventa non fuerit, doluerit tamen, rem sic exponit. „ Nonne ita „ rem poterò declarare, ut pleuram, „ quamvis haud inflammata, distrahi „ intelligas, quoties distensus iam, „
sed

„ sed non omnino, ab inflammatione
 „ pulmo, inspirato aëre magis disten-
 „ ditur, & hoc ipso omnia suæ super-
 „ ficiei puncta aliud ab alio dimovere,
 „ & quod consequitur, annexam
 „ pleuram quasi divellere conatur?

10. §. 17. Adest Juveni dolor obtusus in lævo Thorace. Die 17. mors. „ Thorace aperto, illæsa pleura inventa est, pulmonesque ab hac „ omnino soluti. Sed erat sinister „ ubique inflammatus si partem superiorem excipias. Obtusus fuit, non pleuriticus dolor, excitatus a frictu in inspiratione turgentis pulmonis: ideoque necdum inflammata apparuit pleura.

11. §. 20 Sacerdoti principio dolor est dextræ Thoracis partis, deinde sinistræ. Non notavit *Valsalva*, utrum dolor dextræ partis abiverit, superveniente illo sinistræ, an vero cum eo-

dem extiterit? Quicquid fuerit rogo eos, qui omnem pleuriticum dolorem pulmoni tribuunt, cur non notetur hunc Reverendum virum in dorso tantummodo doluisse, in quo solo ambo inflammati pulmones? Dico iterum inde manifestum fieri, non dolere pulmones. Cur ergo doluit æger utraque in parte? causa non invenitur, nisi vel a turgidis pulmonibus latera fricantibus, vel ab inflammatione Musculorum intercostalium.

12. §. 22. „ Senex dolore depre-
„ henditur in dextra Thoracis parte,
„ febricitat, tussit, expuit: facilius
„ decumbit in dorsum. Sputi copia
„ major fit. Sed *ob sectam die 10. ve-*
„ *nam suppressitur.* Itaque undecimo mo-
„ ritur. Pulmo sinister sanus, quam-
„ vis undique pleuræ adhærens.
„ Dexter contra, quamvis a pleura
„ solutus, dorsum versus sum-
mo-

„ moperere inflammatus deprehendi-
 „ tur.

De Pleura nulla iterum mentio. Sanamne benigne interpretabimur? Sic! Si dolor Thoracis fuit versus dorsum, non in dorso, ut pulmo non in dorso, sed versus dorsum inflammatus erat, frictu hic pleuram læsit, molestavit, dolore affecit; si non ibi latus doluit, ubi inflammatio pulmonis, ab inflammatione Musculorum intercostalium intelligendus est dolor, insensibilisque pulmo inflammatus statuendus.

13. §. 24. „ Vir - - - cum Tho-
 „ racis dolore, & difficili respiratione
 „ correptus esset, initio quidem faci-
 „ lius in latus cubabat dextrum, de-
 „ inde in sinistrum; in dorsum nullo
 „ modo poterat. - - Pulmones ambo
 „ & adhærebant pleuræ, sic tamen ut
 „ sine laceratione separari possent, &

„ dorfum verſus inflammati erant, &
„ multum duri.

Deeſt quoque determinatæ, quæ in Thorace doluerit, plagæ mentio, deeſt & ea ſtatus pleuræ. Ergo ſupponendum eſt in Thorace doluiſſe, quâ parte ambo pulmones præ inflammatione duri, pleuram terebant, & comprimebant. Sin minus, muſculi intercoſtales inflammati fuerunt.

14. §. 26. Vehemens Peripneumonia in cachectico, nulla mentione facta doloris, exquisitam pulmonis inflammationem notat; definitio, ut a ſcholis datur, Peripneumonix, egregie iterum contra novum ſyſtema roboratur.

15. §. 28. A caſu, & allifione dorſi in humum, ac dein valida inſipientis adverſarii compreffione in pectus facta, Thoracis dolor natus, nihil hic explicat. De ſimili enim morbo quæſtio

stio non est. Si pleura læsa non fuit, certo muscoli Thoracis læsi fuerunt: pulmo inflammatus erat, ut in fine acutorum solet; vel a Thorace contuso, ad bene respirandum inepto, & dolor nasci, & epigenomena, vel morientibus solita, peripneumonia, potest.

16. §. 30. Clericus post multos chronicos morbos acuto corripitur, & die 7. moritur; dolores non Thoracis, sed hypochondriorum semper testatus. Utrumlibet in latus decubuerat. Pulmones a Pleura soluti, dexter tamen inflammatione durus. Copiosa aqua in utraque Thoracis camera & in Pericardio. Lien quadruplo major. Hepatis inflammationem mentitus fuerat morbus. „ Cadaveris sectio, scribit „ ingenuus *Valsalva*, detexit errorem.

Historia neque hæc ad quæstionem pertinet. Hydrops Thoracis, & Pe-

ricardii deprimendo diaphragma, & viscera hypochondriorum, dolorem excitavit, a scopo quæstionis alienum. Pulmo ἐπιγενομενῶς inflammatus.

17. §. 32. Ut prior, a scopo aliena. Ardor & irritatio in sinistra Thoracis parte, a longo antea tempore, priusquam vita peripneumonice, solito letalium morborum more, finiretur. Mors proprie ab Hydrope Thoracis utriusque.

18. §. 33. Seni gravans est dextri lateris dolor. In dextrum jacere tantummodo potest. Die 3. moritur. Pectus dextrum repletum fero, & pulmo inflammatione durus. Versus scapulas pleuræ per membranulas cohærens. Dolor hic gravans fuit, non pleuriticus, sed a pulmone pleuram, cui neceebatur, distrahente, & feri seu pressione, seu acrimonia, oriundus. In sinistrum senex incumbens
anxie-

anxietatem majorem, doloremque patiebatur: hunc, quod pleuram fortius distraheret; illam, quod & copiosum serum, & gravis pulmo, qui non nisi ad scapulas cum pleura necrebatur, in Mediastinum, in Pericardium, inque sanum incumberet Pulmonem. Huc non facit.

19. §. 35. Pungens dolor læva Thoracis parte. Die 16. mors. Pulmo sinister undique vicinis nexus partibus, inflammatus, ac superius jam suppuratus. Hydrops incrassati Pericardii.

Si Pleura illæsa inventa est, quod non scribitur, dolor natus est vel a distracta pleura, vel ab inflammatione muscutorum intercostalium.

20. §. 36. „ Juvenis dolore cor-
 „ ripitur Thoracis - - - ad diem 16.
 „ obiit. In sinistra cavea limpida stagnabat aqua, in qua sanus, & solutus

„ tus undique erat pulmo. Induratus
„ vero, proximisque partibus, & præ-
„ fertim versus scapulam, valide an-
„ nexus, qui in dextra; ubi erat vac-
„ cini feri similis - - - In pericardio
„ omnino similis humor - - - ut ingens
„ idem occuparet Thoracis spatium.

Nulla mentio pleuræ; nulla dolen-
tis loci determinatio. An quod Tho-
race doluerit universo? utique sat ad
id causarum habuit. Iterum nihil ad
rem nostram.

21. §. 39. Cum pungente sinistri
lateris dolore vir periit die 7. „ In
„ Thoracis sinistro cavo aqua erat si-
„ milis feri vaccini; pulmo autem
„ prædurus ad Mediastinum & Pleu-
„ ram costas accingentem valide ad-
„ hærebat. Eodemque pacto pulmo
„ dexter Mediastino, & Pleuræ, qua
„ Diaphragma, & præfertim qua an-
„ terius summas costas convestit, al-
liga-

„ ligabatur. Ad hunc ultimum locum
„ latebat in pulmone ulcus cancro-
„ sum, sedes fortasse morbi invetera-
„ ti. “ Diu enim senex hic catarrha-
lem materiem expuisse legitur.

Materies hæc catarrhalis non ex
cancroso ulcere; pejor enim tunc pro-
diisset; sed ex pulmone, ulcere hoc
molestato, & in actione sua impedito,
orta esse videtur. Doluit homo in hoc
acuto ac letali morbo in sinistro latere,
eo quod sinister pulmo inflammatione
turgens, ac ponderosus, & prædurus,
vitiato suo motu pleuram, cui nece-
batur, distraheret. A quibus adhæ-
sionibus pleura altero in latere non
doluit, quod pulmo ejus inflammatus
non esset.

Ast inquires, etiam ab ulcere can-
croso dolere debuit latere hoc, quum
ab ichore cancroso pulmonis pleura
sensibilis fœdaretur.

Minime: nam textus dicit ulcus cancrosum in pulmone *latuisse*. Orclufum ergo pulmonis ulcus pleuram lædere non potuit: Cum vero nec ipse pulmo, in quo latebat, doluerit inde, novo argumento est indolentem esse pulmonem.

Dudum autem sensi opponi mihi posse, quod Pulmo exactissime Thoracem explens, & pleuræ undique contiguus, distrahere, quâcum concrevit, pleuram; laceffireque eandem, cui immediate accumbit, nullo modo possit.

Resp. 1^{mo} Data ac concessa hac Thoracis perfecta a Pulmone plenitudine, negari tamen non potest, quin Pulmo inflammatus, ac turgidus, & durus, concutiente validæ tussis motu, violente agitetur, convellatur, sicque vel annexam pleuram distrahat, vel non annexam fricet, terat, prematque.

Resp.

Resp. 2^{do}. Opinio hæc omnimodæ repletionis per pulmonem Thoracis, nondum extra omnem controversiam est. Equidem ipsemet *Tom. 2. Rat. Med. pag. 130.* hanc, ut vulgatiorem, amplexus, scripsi; & egregius *Haller in Elem. Physiol. Tom. 3.* multis eam firmavit argumentis; haud vero ita convincentibus, ut argumentorum oppositorum vis enervetur omnis. Profecto non pauca me reddunt subinde utramque sententiam inter fluctuantem. Clarissimi *Hambergeri* de Pulmone per mediastinum prospecto experimentum, necdum sat solide refutatum est: & in Clarissimi Viri *Liber-Kühn* dicto *Crucis* experimento, cur demum, si bullas aëreas, per aquam manifestas, ab aëre, pilis animalis adhærente, natas dixeris; Cur, inquam, hæ bullulæ non apparent, quamdiu pleura animalis necdum aper-

ta est? Sed tunc tandem, ubi debita cum cautela, ne pulmonem lædas, pleuram penetraveris?

Etiam quod ex integra pulmonum cum cunctis suis parietibus cohæsione, respiratione interim illæsa, petitur argumentum, quadantenus stringit; haud ita fortiter tamen, ut præsentem litem dirimere posset. Quantumcunque enim idem ego, post alios in cadavere deprehendi; ita mecum alii multi, nocumenta respirandi in vita illorum hominum animadvertunt. Ut tandem evincatur inde id, quod si in nonnullis inculpate gesta videatur hæc cohæsiō, eo tamen haud minus cum vitiosa, tum morbosa dici debeat, quam vitiosus, ac morbosus hydrops dicatur sive Pectoris, sive Pericardii, quamvis pluries deprehendatur illorum in cadaveribus, qui nullam ejus dedissent in vita suspicionem.

nem. Ignoramus adminicula quibus utatur Natura, ad supplenda aliunde, quæ deficere in corpore videntur.

Nunquid & ipse *Morgagni*, in hac de pleno semper Thorace quæstione, dubius non fluitat? Ad id credendum inducimur, legentes illum Epist. 16. §. 5. sic scribentem: „Casum habes, „ inquit, in Sepulcreto descriptum, „ Adolescentis, qui se *Willisio* ac *Lo-* „ *wero* curandum tradidit. Is post „ immodicas equitationes, aliasque „ corporis diuturnas exercitationes, „ cum aliquamdiu in sinistra thoracis „ parte eum sensum habuisset, qui „ esse sine interna compressione non „ poterat, ibi tandem sensit disrumpi „ sibi vas quoddam; indeque per se „ mihoræ spatium in regione ista hu- „ moris, veluti ab alto in pecto- „ ris fundum cadentis, stillicidium „ non tantum ab eo percipi, sed

„ etiam ab adstantibus audiri potuit;
„ Res non ita facilis explicatu iis,
„ qui inter pulmonis, & Thoracis
„ parietes negant spatii quidquam
„ intercedere, vera tamen, ut
„ postmodum comprobavit humoris,
„ in eo latere congesti, cum fluctua-
„ tio in agitatione corporis ab ipso,
„ ab aliisque *evidentiſſime* percepta,
„ tum eductio per immiſſam a Chirur-
„ go fiſtulam primum, ſemper autem
„ poſtea, per foramen a natura re-
„ ſeratum, & ab arte ſervatum.

22. §. 41. Mulierem 60. ann.
prehendit pungens dolor, in dextra
Thoracis parte, ut in hanc cubare non
poſſit. Remittit poſtea dolor, ut in
dextrum decumbat facile. „ Uterque
„ pulmo adhærens Pleuræ invenitur,
„ ſed dexter arctius. Hic totus, & ſu-
„ periore præſertim parte, induruerat;

in

„ in qua abscessus erat, quo inciso,
„ multum feri effluxit fusci coloris.
„ Hoc ipso colore proxima quoque
„ Pulmonis substantia infecta erat, &
„ sphacelo quodammodo correpta. Si-
„ nister pulmo non ut dexter ex uno,
„ sed pluribus ex lobis constans, qua
„ dorsum spectabat, leviter inflam-
„ matus, totaque extima superficie re-
„ liqua nigris hic illic maculis erat di-
„ stinctus. In pericardio multa aqua.

De pleura mentio non est facta, num inter adhæsiones inflammata esset. Credo non fuisse. Ex Historia enim liquet inflammationem pleuriticam metastatice in peripneumonicam transivisse. In horum pleuriticorum cadaveribus, non est quod pleuram expectemus inflammata. Rogabis an juxta explicationes supra datas pleura non debuisset dupliciter dolere; tum ob adhæsiones cum pulmone, tum

quia etiam citra adhæsiones dexter pulmo graviter, sinister ad dorsum leviter inflammatus, subdurus, saltem tumidus, fricare illam, ac molestare debuisset?

Est profecto nonnulla hoc explicandi difficultas; verum qui pulmonem unice sensibilem in Pleuritide, ac Peripneumonia statuunt, simili difficultate laborabunt explicaturi, cur Mulier hæc ad dorsum dextri lateris non doluerit, saltem leviter, a leviter inflammato pulmone?

23. §. 43. Dolor pungens dextri lateris. Non nisi in latus affectum cubare potest Virgo, ad finem vero in sinistrum. Nona die mors convulsiva. Pulmo dexter pleuræ arcte adhærens inventus est, totaque ejus substantia inflammatione magna affecta, & ulcere insuper, qua pleuram spectabat certo in loco, inter quod ulcus & pleuram serosa erat materies. Ca-

Casum exponam verbis ipsius Cl. Morgagni, ut quam sensibilem pleuram crediderit ipse intelligas: „ Huic „ Virgini, inquit, pungens dolor „ mitior videtur fuisse, quam mulie- „ ri, cujus novissime §. 41. exposui „ historiam. Virgo enim, quod Mu- „ lier non poterat, in affectum cuba- „ bat latus; quamquam & in alterum „ tandem jacuit, *postquam serosa ulce- „ ris materia laxavit pleuræ fibras, ut dis- „ tractionem ferret ab appenso pulmone.*

24. §. 45. Viro dolor ad mamillam sinistram, nothasque costas fuit; in neutrum latus decumbere potest. Die 5. moritur. In sinistro pectore pulmo valde induruerat, ad subviridem colorem vergens, nigrisque distinctus maculis: cum secaretur, serosa, ac putrida colluvies, cum misto sanguine, erumpebat. A duro pulmone ac turgido, pleuram premente, & in tussi

fricante, dolor natus. *Cl. Morgagni* expositurus cur hic neutrum potuerit in latus cubare, suspicatur a *Valsalva* in Historia omissam esse pulmonum ad pleuram adhæSIONem, qua posita semper alteruter pulmo in aduersum latus decubitu pleuram distraxit. De maculis nigris pulmonum non loquor; Sæpius occurrunt. Videntur sub mortem nasci. Sic docui semper publice. Idem confirmantem in sequenti Epistola *Morgagnum* video.

25. §. 47- „ Juvenis - - - pun-
„ gente dolore corripitur in dextra
„ Thoracis parte, cum febre, &
„ tussi. Parum expuit. Circa 8.
„ diem accedit delirium, noctu præ-
„ fertim. Dolor abit, sed respiratio-
„ nis difficultas semper gravior fit.
„ Facilis est decubitus in utrumlibet
„ latus. Die tandem 10. obiit. Pul-
„ mones induruerant toti, Ambo
erant

„ erant dorsum versus ad pleuram al-
„ ligati; sinister etiam a latere. Præ-
„ terea cum substantia quædam alba,
„ quasi membranacea, universæ pleu-
„ ræ, & pulmonibus imposita esset,
„ quasi reticularis instar corporis laxi
„ & mollis; per hanc tamen nonnul-
„ lis in locis Pleura, & Pulmones in-
„ ter se erant firmiter colligata. In
„ utroque Thoracis cavo, sed magis
„ in dextro, multus erat humor colo-
„ re similis feri vaccini. - - - Pericar-
„ dium sero, turgebat.

Cl. Morgagni exponit pungentem
dextræ Thoracis partis dolorem a
Pleuræ sensibilitate, distractæ forte
fortioribus pulmonis alligationibus
ante delirium, quam erant in latere
sinistro; & a feri copia majore. Se-
rum certe dolorem augere potuit cum
acredine sua, tum mole, qua rigidum
jam pulmonem adhuc magis in suo

motu turbavit; turbatus ita in motu ille, & atterere, & distrahere Pleuram debuit.

Sed urgebis necessitatem doloris & in altera cavea, cum ibidem eadem existerent causæ, quæ in dextra dolorem, *Morgagno* explicante, creaverint; ac proinde explicationis vanitatem, cum sinistra pleura ab iisdemet ipsis non doluerit causis.

Verum an is, qui ita me urget, non attendat quanto magis urgeat seipsum? Si non Pleura, sed Pulmo sensibilis est; si dextrum latus ab inflammato Pulmone dolet; cur itidem a Pulmone sinistro inflammato non doluerit juvenis latere sinistro? Videntur difficultatem eandem? Nonne eodem jure, quo ille Pleuram, si inflammata, aut laceffita non dolet, insensilem credit, ego insensilem statuam pulmonem? Expediam tamen me, non ille, agno-

agnoscendo, per experimenta antea enarrata, pleuram, omnesque partes sensibiles, quandam insensibilitatem adversus causas dolorificas aliquando præ se ferre.

26. §. 49. „ Mulier 60. annorum
„ febreprehenditur vehementi, sicca
„ tussi, & pungente sinistri lateris dolore;
„ sic tamen, ut si in hoc cubet, non multum doleat.
„ A sanguinis missione adeo remittitur dolor, ut
„ jam possit in quamcunque partem decumbere.
„ Febris duntaxat & sitis urgent. Crassa aliquando expuit.
„ Gravior fit respiratio. Tandem 13. die moritur.

„ Pulmo sinister (dexter, ut bene conjecturat *Morgagni*) omnino solutus a Pleura, quæ prorsus illæsa erat: subalbidus; nigris distinctus punctis, carne durior, nonnulla ostendit tubercula sanie scatentia.

Pul-

„ Pulmo *sinister* superius quidem Pleu-
„ ræ per se adhærebat; sed longe mi-
„ nus erat vitiatum, quippe nigris tan-
„ tummodo conspersus maculis, &
„ jugulum versus durior parvum ab-
„ scissum continebat.

Iterum cum celeberrimo *Morgagno* dolorem pungentem finistri pectoris tribuimus Pleuræ, alligatæ illi Pulmonis parti, quæ in eo dura ac turgida, erat.

Sed cur a causa doloris pleuræ longe graviore non doluit pleura, in latere dextro? ob eandem causam, qua Pulmo, aliis ita sensibilis, etiam hic non doluit. Utrunque enigma, nisi solutionem in fine proxime præcedentis 25. casus invenias. Sic & intelliges, cur perseverante causa doloris, auctoque morbo funesto, siluerit dolor.

27. §. 51. Hic & pleura inflammata cum pulmone. Ergo nulla quæstio.

28. §. 53. Uti etiam hæc historia.

29. §. 55. Hæc adhuc notabiliorum inflammationem pleuræ habuit.

30. §. 56. Notabilis inflammatio Pleuræ denuo cum ea pulmonis.

31. §. 59. Mulieri 64. ann. dextri lateris fit dolor, ut difficulter in illud incumbat, nec id tangat sine dolore. Frequens respiratio, inanis tussis, celerrimus, frequens, parvus, debilis pulsus. Die 7. circa caput fudat. Deficiens viribus circa nonum periit.

„ Pulmo in cavo dextro valde tur-
„ gidus, ut hoc totum impleret, læ-
„ viter adhærens ad Pleuram ope cu-
„ jusdam quasi membranæ, inter il-
„ lam & Pleuram interjectæ.

Pseudomembranam hanc non morror, ut quæ prope mortem a sanguine phlogistico transfudante nascitur, ut pluries innui. Non videtur vera Pleuritis fuisse hic morbus, nec vera Pleuroperipneumonia. Haud enim solet verus dolor pleuriticus externo tactu exacerbari, sed spurius integumentorum, a Rheumatica v. g. materia; quare etiam *Hippocrates* dolores laterum, a dolore pleuritico, solícite distinxit: dantur exceptiones tamen; hinc addo aliud: quod nempe nec Pleuriticorum, nec Peripneumonicorum, omnibus fatentibus, sit, qui hic describitur, pulsus. Ita ut videatur a morbo antiquo mors demum pulmone obruto contigisse.

32. §. 61. Post dolorem dextri potissimum lateris, die 18. mors.
„ Cum dexter Pulmo a pleura, cui
„ adhærebat, separaretur, multum purulen-

„ rulentæ materiæ erupit, scilicet ex
 „ abfcessu in pulmonari substantia,
 „ circa quam magna erat inflammatio,
 „ pleura tamen illæsa. Sinister pul-
 „ mo erat sanus. A distractione pleu-
 ræ dolor non inflammatorius natus,
 ut pluries supra.

33. §. 63. Dolor duorum men-
 sium interni thoracis ad Pleuritidem
 non pertinet.

Finitis Valsalvianis observatis, cum
 Ep. 21. incipiunt Morgagnianæ. Igitur
 Epist. 21. eodem modo prosequamur.

1. §. 2.	} Historiæ hæ tres pul- monis inflammationes habent sine dolore. Si
2. §. 6.	
3. §. 9.	

quis roget cur hic fricta, tritaque pleura,
 non doluerit, illi similem proponam,
 ut supra, quæstionem, de suo sensi-
 bili pulmone. Et addam quæ ad finem

25. Historiæ Valsalvianæ. Præterire
 tamen nequeo quod in casu hoc tertio,
 pleu-

pleura admodum laxa inventa, addidit *Morgagni* §. 10. „ Pleuram inquit, „ quæ adhærentes pulmones facillime sequeretur, si laxam fuisse agnoscas; possis inde, ut opinor, assequi, „ cur pondus inflammati lobi non „ sentiret.

4. §. 11. Senex levi adeo catarrho se affici sibi videbatur, ut ne Medicum quidem consulere, imo ut exire vellet. Clam eo vocatus *Valsalva* vicinam adstantibus, ob desperatam Peripneumoniam, mortem prædicit, quæ & intra 12. horas contigit. Ille autem, & *Morgagni*, invenerunt lobum superiorem pulmonis dextri tumidum, durum, sanguine infarctum. Quo etiam insidioso morbo clarum egregiis laboribus suis *Vallisnerium*, septuagenarium, pereuntem vidit *Morgagni*; cujus vero lectum Cadaver non fuit.

An

An hæc illa Peripneumonia Notha? qua in describenda, ideo inter sese Sydenhamus & Boerhaavius in nonnullis discrepant, quod ex peculiari epidemia eam descripserint singuli? Cum tamen lobus superior dextri pulmonis præ inflammatione durus, infarctus, ac tumidus esset, vide iterum exemplum indolentiæ Pleuræ, aut si mavis, Pulmonis.

5. §. 15. Mors plane fenilis, ad Pleuritidem, & Peripneumoniam non pertinens. Dexter inferior lobus, præ inflammatione durus sub mortem factus est, ut in multis admodum morbis fieri supra demonstratum est; sin minus, denuo & Pleuræ & Pulmonis indolentiæ exemplum præbet.

6. §. 17. Senem simul febris, & pungens dolor corripuerat, ad anteriorem partem lateris dextri, Cuba-

bat in dorsum. Post dies aliquot curationis eo devenerat, ut jam plenius cibaretur, & purgans ad morbi reliquias expellendas sumfisset. Cum dein multum comedisset, “ Nocte qua-
,, dam proxima febris, & dolor illius
,, ejusdem partis redierunt. Pulsus
,, erant duri, frequentes, magni, vi-
,, brati, ad diem usque ultimum, at-
,, que adeo ad paucas ante obitum ho-
,, ras.

,, Pulmonis dextri superior Lo-
,, bus magnus durusque se obtulit.
,, Quem cum secarem, substantiá fa-
,, ctam vidimus Hepaticæ similem;
,, pus autem, certe puris haud absi-
,, milem materiem, simul cum spu-
,, moso humore effluere. In sinistro
,, Thoracis cavo, aqua ex flavo viri-
,, dis, mediocri copia: Pulmo qua
,, Diaphragma spectabat, itemque ad
,, superius latus, ibique arctius, pleu-
re.

„ ræ adhærebat, flava quadam tenui-
„ que intercedente quasi membranula.
„ Pleura tamen nusquam in toto hoc
„ Thorace apparuit læsa. Sed ad
„ Pulmonem finistrum ut redeam,
„ lobus ejus inferior ater, posterius
„ & durus, ex eadem ibi fuit substan-
„ tia, quæ a dextris conspecta est,
„ nec pure caruit.

Dolor dextri lateris a ponderoso pulmone, premente pleuram. Non ita res habet, inquires; nam in sinistro latere a pulmone similiter affecto etiam pleura dolere debuisset. Non doluit. Itane? Ergo pulmo tuus insensibilis est; præ inflammatione enim dolere debuisset, & non doluit tamen. Itaque in dextro pectore res se, ut sæpe solet, habuit; in sinistro pars doloris capax iterum non doluit; tibi pulmo, mihi pleura.

7. §. 19. Lanius 78. ann. qui alias sputo sanguineo laboraverat, a quadriduo infra sinistram mamillam, internum, eumque pungentem dolorem habet. Pulsus omni modo mali: Tussis crebra latratui similis: sputa crassa ac *polyposa*: difficilis respiratio: decubitus in dorsum duntaxat: post venæ sectionem in sputis sanguis. Die 8. periit.

Pulmo dexter leviter cohæsit, in eoque antiqui vestigia morbi. “ Si-
,, nistri vero pulmonis superior lobus
,, nihil habuit vitii, nimio duntaxat
,, seroso humore scatebat. At infe-
,, rior gravis, rubens, durus ut sub-
,, stantiæ hepaticæ. Hic alicubi ad-
,, hærebat Pleuræ. - - - Pleura thoracis
,, parietes, ipsumque adeo Diaphrag-
,, ma convestiens, raro spectaculo non
,, solum cartilaginea duritie erat, aut
,, ossea, sed ex magnis passim, nec

ten-

„ tenuibus laminis, revera osseis, com-
„ pingebatur - - - Quæ omnia, & si
„ in dextera magis quam læva thora-
„ cis cavea spectabantur; tamen in
„ hac quoque multis in locis pleura
„ ad descriptam constitutionem acce-
„ debat, in quibusdam vero jam erat
„ affecuta; in nullis vero erat subru-
„ bens, nedum inflammata.

Dolor infra sinistram mamillam a lobo inferiore pulmonis sinistri duro, hepatis instar, tum atterente Pleuram sua duritie, tum adhæſionibus distrahente eandem. Legitur pleura non rubuisse, nec necesse erat; constitit enim supra haud omnem dolorem inflammatorium esse. Notavimus in historia anatomica in latere hoc pleuram naturalem, non nisi *in multis locis* ad osseam constitutionem accedentem, adeoque dolere potuisse; quamquam eandem, jam tota si in osseam mutata

substantiam fuisset, ob id insensilem fuisse, haud facile concederem; cum & certo ossa doleant. Cui tamen hæc quæstionis solutio infirmior apparet, firmiorem quærat in inflammatis Musculis intercostalibus, quorum examen hic desideratur.

Pleuræ jam ossæ portionem in *Cap. I. Casu 3.* vidimus, verum olim pleuram dextram pro magna parte in os crassitie plusquam lineæ mutatam demonstravi, quam Vir præstantissimus *Mayer*, Ptochotrophii Physicus, in thorace asthmatici, aut potius orthopnoæici Militis inveniens, ilico ad me deferendam humaniter curavit.

Polyposa Lanius sputa ejecit. *Tom. 2, Rat. Med. Cap. 7. pag. 129.* exhibui demonstrationem similium sputorum hominis Nosocomii nostri, & notabilissimam aliam historiam adjeci.

8. §. 23. Quadragenarium corripuit dolor pungens lateris dextri cum febre & calore magno: supinus jacebat, mente parum constans, soporofus. Ad finem diei quarti obiit.

„ Nihil in pleura, quod præter
„ naturam esset, spectavimus, nisi quod
„ propter spinæ sinistrum latus tri-
„ bus quatuorve exacerbaretur tuber-
„ culis, quorum color albus, durities
„ instar ossis. Ab ea parte pulmo fer-
„ me sanus, fulvo cæteroquin humo-
„ re imbutus, quacunque secaremus.
„ Qui vel uberius ex pulmone prodi-
„ bat dextro. Hic vero (dexter) &
„ major, & gravior, & durior, ubi-
„ que Hepatis substantiam referebat,
„ exceptis quibusdam non exiguis tra-
„ ctibus, in quibus substantia erat albi-
„ da, & quasi ad corruptionem ver-
„ gente.

Cum Pleura bona, faltem qua in regione homo doluerat, dolor, qui adfuit, in musculis intercostalibus quærendus est, vel in indurati pulmonis affrictu ad pleuram.

Verum cur tribus illis, quatuorve tuberculis, offea duritie exstantibus in pleura, pulmo non doluerit? vel inde arguitur indolentem esse pulmonem, vel non replere exacte thoracem, vel faltem partes sensibiles sensu quandoque carere.

9. §. 24. } Responsio eadem,
10. §. 27. } quæ ad proxime
11. §. 29. } præcedentem casum data, ad hos tres convenit. Id modo addam, quod pulmonum adhæ-
siones ad Pleuram haud ita inculpate ferantur perpetuo, quam nonnulli jactitent; si enim omnes hos recensitos casus revolvamus animo, videmus plures chronicis pectoris morbis vixisse
ob

obnoxios; in aliis causam variorum pectoris morborum inde facile explicandam videri; tandem haud paucos inde futuræ, ac tandem letalis Peripneumonix, causam proegumenam secum diu tulisse.

13. §. 30. Hydrops cum pectoris utriusque, tum Pericardii Hydrope, corrupto etiam pulmone, ad chronicum morbum referendus est; non ad acutos Pectoris morbos inflammatorios, de quibus agitur.

14. §. 32.	}	Cum quinque hæ
15. §. 33.		historiæ pleuram si-
16. §. 34.		mul affectam de-
17. §. 35.		monstrent, non est
18. §. 36.		quod in doloris ex-

ponenda causa multus longusque hæream. Ultima musculos intercostales quoque inflammatos exhibet; quale examen utinam non ubique fere desideratum esset!

19. §. 45. Nec arbitror explanatione hanc egere, in qua Pulmo sinister, Pleura, ac Musculi intercostales, præ inflammatione fere in Gangrænam abierunt.

20. §. 47. Ruptum Aneurysma thoracis ad quæstionem nihil attinet.

21. §. 49. Neque Hydrops tum pectoris tum ventris sine inflammatione vitam extinguens.

En nunc observata omnia, quæ in toto hoc præclaro opere recensentur; quæque exp. *Tyssot.* in Epist. diffamatoria ad Exp. *Hirzelum*, imperfecte admodum, ac perfunctorie, examinavit. Ex quibus quid concludat ille, partim vidimus, partim videamus.

Primo numerat 35. Pleuritides, quarum 24. *Valsavam*; 11. *Morgagnum* refert tradidisse. Recensendo non invenit, nisi in sex casibus, inflammatam Pleuram; ea tamen cum restri-

ctio-

ctione, ut ex sex illis duas duntaxat admittat, in quibus Pleura inflammata dici debeat. Adducit deinde egregium *Morgagnum*, veluti, num Pleuræ illæ inflammatae sedes pleuritici doloris fuerint, dubitantem; imo demum inclinantem eo, ut Pulmoni, & non Pleuræ, pungentem dolorem tribueret.

Ast quantum hic a vero aberraverit! Eximium hoc opus continet Peripneumonicorum, Pleuriticorum, ac Pleuroperipneumonicorum Historias 72. quæ in suas divisæ classes sic se habent.

1	Peripneumoniæ veræ sine dolore,	
	sunt - - - - -	4
2	————— notæ sine dolore	1
3	Pleuroperipneumoniæ & Pleuriti-	
	des illæsa pleura - - -	19
4	Pleuroperipneumoniæ & Pleuriti-	
	des cum inflammata Pleura	14
	5 Pul.	

5	Pulmo cancrusus non dolens	I
6	Pleura inflammata sine dolore	I
7	Lateris dolor filens, pergente tamen in mortem morbo	3
8	Pulmo inflammatus citra dolorem, vel non dolens in loco inflammato	17
9	Musculi intercostales inflammati	2
10	Morbi ad quæstionem nihil facientes; ut Hydrops pectoris, Hydrops Pericardii, Aneurysma internum, Chronicus duorum mensium in latere dolor, &c. in quibus Peripneumonia non fuit Morbus primarius, sed more solito prope Mortem aliis morbis superveniens; ut expositum supra	14
11	Non examinata vel cadavera, vel saltem eorundem pectora	4
		<hr/> 80

In hac summa plures quam 72. videntur recenseri; plures vero non sunt, sed quidam casus ad binas classes

ses pertinent, ut v. g. Peripneumonia vera ad 1. & 8. Dolor Pleuriticus ad 3. & 4. & ad 9. &c. Hinc octo numero plures historiæ dari videntur, quæ tamen numero 72. continentur omnes.

Itaque si præclari viri, *Valsalva*, & *Morgagni*, invenerunt 17. inflammationes Pulmonum citra dolorem; unicam vero indolentem Pleuram: quomodo *Tyffotus* dolorem pleuriticum veluti Pulmoni potius, quam Pleuræ adscriptum, a binis his gaudeat Autoribus? Si iidem recensuerunt quidem 19. aut Pleuritides, aut Pleuro-peripneumonias illæsa pleura; sed tamen quoque cum eadem læsa numero 14.: cur ille vix duos ab utroque observatos clamitet casus? Tandem, ut reliqua præteream, quæ ex hac recensione proferre possem; quomodo suas in partes clarum virum utrumque

que trahere potuit, dum toties in ipforum textu legeret; neque dubiis sane expressionibus; dolores pleuriticos, etiam non inflammatae Pleuræ, sed eidem pressæ, distractæve, adscribi oportere?

An exinde clare non liquet incomparabile *Morgagni* opus male lectum, pejus intellectum, pessime in suam sententiam *Tyssoto* esse laudatum; dum, illo unice id negante, quod cum illo negamus & nos, non ab obruto pulmone, in hisce morbis, sed a pleura affecta, hominem mori; hic nihilominus eundem sic proferat scribentem, ac si pleuræ omnem denegaret causam sedemque doloris, unico concederet pulmmoni? Tentabit forte ex classe inflammatarum pleurarum expungere unam alteramve, ut tentavit antea, eo quod leviter modo ruberent; sed si vicissim ego expungere ipsi tentem om-

nes leviores Pulmonis inflammationes, nemo hoc tentamine plus illo amittet. Præterquam quod non attendat multis, quibus Nervi delicatuli, a leviori inflammatione graviores dolores oriri, quam aliis, qui nervos habeant hebetiores.

§. V. Et ut demum, quod res est, dicam, est imperfecta admodum illa omnis sententia, quæ in allatis historiis causam doloris in unico Pulmone collocet, quamdiu Musculorum intercostalium, illorumve saltem involucrorum membranaceorum, desideratur conditio : sunt enim partes in lite principes, a *Boerhaavio*, & *Hallero*, doloris creditæ sedes. Ut vel ob hunc defectum solum manca omnia argumenta, & mutilata sint, non illa *Morgagni*; nam sive causa doloris in Pleura, sive in Musculis intercostalibus resideat, mors tamen semper Pulmonis

in-

infarctu continget; sed illa *Tyssoti*, quibus concludit ideo in pulmone esse sedem doloris, quod non raro Pleura fuerit visa illæsa.

Interim tristem sed non immeritam, contemplemur novi systematis sortem, qua cæterorum more systematum, præ sua cum inconstantia, tum confusione, in suis incunabulis jam senescat. Et quidni? *opinionum commenta delet dies*. In *Halleriano* systemate Pulmo ac Pleura insensibilibus partibus annumerantur, idque ob numerosa vivis capta in Animalibus experimenta: ideoque doloris pleuritici sedes præcipua in Musculis intercostalibus collocatur. Exp. *Tyssot*. dum statuminare hoc idem systema, ac propugnare satagit, ridicula facit omnia, quæ mox laudavi experimenta Ill. *Halleri*; & adversus illa, ac si falsissima forent, unicum Pleuritidis statuit in
Pul.

Pulmone dolorem; imo contra *Hallerum* pro se veluti pugnantes *Valsalvam* ac *Morgagnum* profert. Quid proinde de numerosis aliis *Halleri* experimentis suspicari non oporteat, si ejusmodi eorum propugnator tantam ipsorum partem non suspicetur, sed statuatur, falsa esse? At vero ipse Autor systematis, quam non infirmet, non labefactet, non dehonestet illud, quando in Tomo primo *Elementorum Physiologiæ*, operis quod æternum durare autumabat, Animam *Stablianam* de œconomia animali penitus proscribit; & Tomo tertio sic priscae dignitati restituit, ut totius Machinæ respiratoriæ sit Domina, sit unica Moderatrix! Nihilo fecius Exp. *Tyssot* non modo systema propugnat, verum in Regulas reducit Artis, ut v. g. ne quis ultra ambiguus hæreat utrum pars sensibilis, insensibilisve sit, id modo tenendum esse cen-

set, ut quo teneriores Animalis sint partes, eo essent sensiliores; eo insensiliores, quo duriores: interea dum mollem pulmonem acutissimo sensu donet; & lapideæ duritie dentes, sensibilissimos cum ceteris debeat percipere mortalibus.

§. VI. Ad irritabilitatem Cordis, quam omnes, sed limitatiorem, admittimus, stabiliendam, egregius *Hallerus* 50. & ultra experimenta partim in frigidis, partim in Calidis animalibus a se facta recenset, quibus probare annisus est: „ Sinistram auriculam, & Cor sinistrum, ideo citius „ mori, quod Pulmonibus nihil ultra „ sanguinis transferentibus, haud amplius a sanguine irritentur. Deinde „ sensim ventriculum dextrum, „ novissimeque dextrum auriculam, „ quoque quiescere, eo quod non acciperent ultra a cavis venis, quo
irri-

„ irritarentur, sanguinem. E contra-
„ rio vero si Venas cavas, Aortamque
„ ligasset, dein vulnere lato aperuif-
„ set pulmonarem Arteriam, tunc
„ Cor finistrum, utpote irritatum san-
„ guine, qui ex auricula in ventricu-
„ lum, & ex ventriculo in auriculam
„ moveretur, diutius, imo per horas,
„ in mortuo animali vivere; interea
„ dum Cor dextrum, ejusque Auricu-
„ la desineret vivere expulso omni
„ sanguine per pulmonarem apertam
„ Arteriam, nec novo per ligatas af-
„ fluente cavas. Oportere autem Ven-
„ triculum dextrum integre esse eva-
„ cuatum, si, ne se ultra moveat, ve-
„ lis; tantam enim esse irritabilitatem
„ cordis, ut relictum in eo vel pau-
„ culum sanguinis non finat ventricu-
„ lum quiescere.

Ad hæc in *Difficultatibus meis* oppo-
fueram *Harvæi, Plempii, Riolani, Ho-*

gelandii, & *Batholini* experimenta, quæ in Cadaveribus cordis thalamos sanguine multo repletos demonstraverant, meaque propria, haud sane pauca: quibus omnibus id evincere conabar, ut si verum hoc foret, quod mortuorum animalium cordibus ideo motus non cessasset, quia cruoris pauculum in ventriculo restitasset, nemini fere mortalium cor a motu cessaret, quandoquidem in Denatorum plerisque cordi, ejusque utrique ventriculo, residuus sanguis, ac crebro copiosus, invenitur.

Attamen in sua adversum me *Apolo-*
gia vir clarissimus hanc tot Anatom-
icorum, meamque propriam, experi-
entiam, non admisit. „ Et licebit,
„ inquit, ejusmodi rationes objicere
„ experimentis, quæ docent cor per-
„ fecte expallescere in Ranis, in Pul-
„ lo, atque adeo perfecte inaniri? si
„ autem

„ autem evacuatur , potuit , puto ,
„ evacuari. Sed neque adeo rarum
„ est in homine inane reperiri, inque
„ infantibus, matrum nefariarum ma-
„ nu occisis, etiam familiare.

Respondi in *Vindiciis* ad hæc pag.
223. ad 232. ipsis *Halleri* verbis, ac
sententiis, quas alibi sparsim protule-
rat, & quæ nunc iterum in hac sua
Apologia mutabat: unde demum Viri
doctissimi sortem deplorabam, eo quod
hinc vi Veri pressus, vera agnosceret:
illinc infausti systematis amore illectus,
negaret omnia, quæ vel ipse prius
scripsisset, vel ego ex ipsiusmet attu-
lissim operibus.

Ast vero non respondi ad ultima
hæc: „ Sed neque adeo rarum est in
„ homine inane reperiri, inque infan-
„ tibus, matrum nefariarum manu
„ occisis, etiam familiare. Etsi hoc
ultimum ultro largiremur, tamen in-

fantum, vel dum nascuntur, vel mox ab ortu suo occisorum, circulatio non permittit eorum cordium conspectum ad præsentem de Adultis, aut saltem perfecte respirantibus, quæstionem adferre: unde mittimus hæc: quod vero dicat „neque adeo rarum est cor in „homine inane reperiri“ ad hoc repono ^{1^{mo}} quotquot Cadavera non animalium (in his enim sanguinem multum, utroque cordis in thalamo, post perfectam quietem Cordis, me invenisse *Rad. med. Tom. VIII. Capite ultimo* scripsi, ac demonstravi, similia paulo post prolaturus,) sed quotquot Cadavera humana post editas meas *Vindicias* aperui, in illis iterum me constanter sanguinem, eumque sæpe copiosum, in cordis utroque vidisse ventriculo; & ex quo moris mihi fuit cordis inversi ventriculum posteriorem, seu sinistrum, prius aperiundi,
me

me illud sæpe æque plenum, nec haud ita raro dextro plenius, reperire.

2^{do} in magni *Morgagni* opere magno tam ab eodem, quam a *Valsalva*, *Mediadia*, aliisque, centies nonagesies & octies narratur quo pacto Cor, in eoque sanguis, humanis in Cadaveribus, se haberet. Si demas pauca, in quibus vel utrumque vacuum reperi- tum est, ut V. C. post ingentes hæ- morrhagias, vel alterutrum, ut in *Hydrophoba*, &c. videbis saltem centies ac septuagesies cor aut modicum, aut multum, aut plurimum, utroque in Ventriculo, sanguinem gessisse; eundemque sive fluidum, sive grumofum, sive polypofum, sive denique ex pluribus, omnibusve horum, aliquid habentem.

Hæc porro si dignaretur Ill. *Haller*, suis cum observatis conferre, videret

Primo, sua non convenire cum meis, quæ hujus operis tomo 8. in canibus facta communicavi. Secundo, etsi convenirent cum meis, nihil tamen ad Cor humanum facere, si jugis humanis in cadaveribus capta experientia monstraret contrarium. Diceremus potius cum Clariss. Morgagni Ep. 12. §. 14. qui, dum objecisset sibi, „ At „ Rhedius tamen cerebro Testudinibus „ excepto, has vidit, inquis, diu, & „ nonnunquam sex ipsos menses ambulare potuisse “ scite respondet. „ Ego vero de perfectis, ut vocant, animalibus, atque adeo de „ *Homine*, hic verba facio; & tu „ mihi testudines narras, quas facere motum vel corde ablato, „ non ignoravit *Aristoteles*. Tercio autem lege constanti humani cordis utrumque thalamum sanguine, ac
pas-

passim multo, gaudere in Cadaveribus; adeoque ejus integrum de Cordis irritabilitate systema corruere.

§. VII. Terminabo hoc caput animi testando lætitiā, quod non temere hoc novum systema amplexus, aut, quod plus est, non in Pathologia exponenda cæce sequutus sim, sed prius sedulo statuerim examinandum esse. Quam subito a tergo secuta fuisset pœnitentia facti! Quid quod ipsi ejusdem conditores sua incomprehensibili inconstancia, ac manifestissima contradictione, coegissent me canere palinodiam e suggestu? Equidem laudo illos, venerorque, qui ejusmodi nova proferant, quæ quo rigidius examinantur, eo rutilantius fulgeant; qui vero non talia, eos ut desistant hortor. Nova indies prolata, quæ examen non sustineant, pestes sunt in schola medica, cum quod discere, &

dediscere temporis irrevocabilis, irreparabilis jactura fit; cum quod systema docere, idque mutare; aliud forsitan ineptius adoptare, rejicereque, docentibus turpe fit, & noxium discipulis. Utinam demum foecunda fingendi ingenia Systematum suorum inanitate defatigati, deque eorundem nocumento convicti, eo demum usque saperent, ut caducæ inventi systematis gloriolæ abnegantes, ad salutare Naturæ studium, quo unico *Hippocrates*, quo solo quoque magni Viri *Hippocratem* secuti sint, claruerunt, æternumque clarebunt, animos nobiscum intenderent, Artisque pomæria more *Hippocratico* extendere fatagerent! Interea dum id ab illorum ingenuitate expectamus, in id ego sedulus annitar, ut ad lectos ægrorum, una cum circumstantium Discipulorum Corona, simplicem Naturam contemplan-

plando magis intelligam magisque,
in omnibus plane Afystematicus.

CAPUT V.
DE MORBO ILEO,
ET
PROSECUTIO EXPERI-
MENTORUM
CUM
MACHINA ADAPTATA AD EUNDEM
ETIAM DESPERATUM,
SOLVENDUM.

§. I. *Morbus Ileus periodicus, quem olim Nix ventri circumposita, epotaque frigida, solverant; alia vice minime, sed cortex peruvianus; jam Tabaci fumo in anum injecto solvitur. Prophylaxis.* §. II. *Iliacus morbus constricta hernia oriundus, gelidæ aquæ externa applicatione subito in gangrænam letumque conversus. Emphysema*

sema terribile inde. Anatome. Collum Herniosi sacci in umbilico adeo laxum, ut si sic in vita fuisset, facili negotio hernia reponi potuisset. Aliud exemplum recentissimum Herniæ umbilicalis, curatæ fere protinus gelidissima fomentatione. §. III. quædam de Machina Italica ad solvendum Ileum. Plurima experimenta in canibus facta; quorum unum, cum formidandum, tum Doctrinæ ferax. Varia contemplatio functionum Vitalium in semivivis animalibus. Quædam de Tænia.

§. I.

Annus Academicus proxime elapsus suppeditavit mihi singularis Ilei morbi contemplationem. Homo 30. & aliquot annorum, à 20. ferè retro annis sæpius hoc morbo laboraverat, ter aliquando, quaterve in anni unius spatio. Siccissimi temperamenti erat, ob idque etiam ficcioris, quod execranda Onania turpiter se commaculare consuevisset.

Con-

Consuetis artis adminiculis sæpius ab hoc morbo restitutus, *Neapoli* demum eodem afficitur, adeo gravi, ac pertinaci, ut a consuetis, ac juvare solitis adminiculis, nullum consequeretur solatium.

Etiam ventri universo circumdata Nix, quæ quondam in graviore paroxysmo profuerat, nihil opitulabatur. Alius demum advocatus Medicus, cortice peruviano morbi tentandum esse levamen ratus, sopivit eo vomitum primum, deinde Ileum.

In frequentium adeo paroxysmorum plerisque, aqua gelidissima, eaque epota largiter, Vomitus omnium auxiliorum felicissima compescuerat. In præfenti autem paroxysmo necdum. Nec juverant enemata, purgantia, cataplasmata, fomenta, paregorica. Quin & tabaci fumus bis injectus in anum, & mistura ex mentha cum
fex

sex opii granis brevī spatio assumpta, nihil profuerant; nisi aliquot exinde elapsis horis.

In consilium quippe advocatus inchoante die tertio, inveni cum dolo-rem, tum vomitum, ab aliquod horis minus violentos. Pulsus quamvis frequens, plenus tamen erat, nec durus, nec inæqualis; blandusque ceperat profundi sudor. Autor fui iisdem uti pergerent, quibus hæc emendatio jam cepta esset, nihil mutando donec res in melius verti observabatur: sin minus, fumum repetendum esse Tabaci.

Cum morbus sexta exinde hora elapsa ingravesceret, injectus est tabaci fumus. Afferuit tunc ægrotus lævo abdominis in latere, quæ in quovis paroxysmo præcipua sedes doloris, tale quidem se manifesto, deprehendere, ac si contractum quid, & dolens,
fu-

subito evolveretur, eoque evoluto, se levius pati. Continuata deinde opiatam mistura, levamen minus celere, si præ siti calide; celerius, si frigide biberet, observabat. Itaque etiam concessa frigida est. His auxiliis sensim vomitus cessavit, prodiit alvus, conticuit dolor, & solutus brevi omnis morbus est.

In consilio tunc de prophylaxi actum. Ea ab abstinencia nefandi criminis, & ab usu lactis cum pilulis saponis veneti, gummiq; ferulaceorum, petita est. Profuere: sic, ut jam ultra medii anni spatium paroxysmus defuerit.

II. §. Quo illa cura fortunatior erat, eo hæc, quæ sequitur, fuit infortunatior. Mulier quinquagenaria à 15. retro annis herniam a partu umbilicalem habuit, quam cælabat, restituebatque semper ipsa elapsam. At

vero vespere quodam elapsi proxime
januarii eandem plurimum egressam
reponere nequeuns, dira per noctem
passa tormenta est. Summo mane re-
positione frustra tentatâ, vena ipsi tun-
debatur; plura, eaque variæ materiæ
Enemata, injiciebantur; & gelida aqua
herniæ, quæ capitis molem æquabat,
circumposita, laborioseque renovata
est. Post meridiem primum illam vi-
di, Herniam examinavi, quæ capitis,
ut dixi, magnitudine, ac duo in tu-
bera divisa erat. Repositionem vero
frustra tentavi. Enemata fumi Tabaci,
& varii generis alia immittenda sæ-
pius esse censui, &, quia a frigidis
omnia in pejus, emollientia, ac ca-
lentia cataplasmata admovenda esse,
exhibendaque Paregorica. Sed nata
intra 24. horas visibilis gangræna,
feminam sustulit trigesima morbi hora.
Horis á morte 35. elapsis cadaver ape-
rui.

rui. Enormi totius corporis emphysemate Monstrum erat. Ut si dixero quadruplo majorem, ceterum crassi corporis, fuisse molem, minus dixero. Sandapila includi certo non potuisset. Fætebat necdum apertum. Dum ad locum herniosum cutim gangrænosam incideramus, aër fætidissimus sibilu strepituque violentissime erupit, sibilandoque erumpere continuavit ex corporis perscissa cellulositate. Ne in animi deliquium caderemus omnes, necesse fuit, quotquot januas fenestrasque conclave haberet, extemplo aperire, & aera accenso pulvere mastiches, & olibani, multique aceti vapore, lustrare.

Sacco demum hernioso aperto, invenimus intestinum tumidissimum ad ulnæ dimidiæ longitudinem extra umbilicum. Umbilici dilatatio nullo modo constrieta, sed amplissima erat, ut

commode ire, ac redire, intestinum potuerit. Principio videbatur intestinum binis extuberantibus faccis adhærere; unde credebamus hinc impossibilem repositionem herniæ fuisse; verum attentius omnia revolventibus, nulla Intestini cum sacco adhæsiō patuit. Examinis prosecutionem fætor prohibuit, haud ultra ferendus.

Spasmodicæ partium constrictiones, ipsique Tetani, nonnunquam a morte solvuntur; non raro permanent; ut maxillæ tetanum, triduo à morte necdum solutum, olim viderim, ac descripserim. In hac femina solutam constrictionem fuisse post obitum suspicor; in vita vero minime; cum alias intestinum facile reponi potuisset in ventrem. Gangræna in sacco, & in integumentis erat, vix in ipso intestino; quod potius dici debebat inflammatum.

In-

Incarceratæ huic herniæ gelida aqua, *Heistero* cum maxime commendante, admota non profuit: homini autem iliaco cum epota profuit ad vomitum, tum ventri hæc, vel nix ipsa, adplicata; tamen nix non semper, aqua ut plurimum ore hausta. Et gelidæ internus, externusque usus, Matronam iliacam curavit, applicante *Nabotho*, aspiciente, & testante *Hoffmano*. Quin & feminam 73. annorum, quæ die 5. constrictæ suæ herniæ, quam operatione chirurgica reponi constanter recusaverat, morti jam propinqua videbatur, Illustris Medicus, ac Poliater Haga-Batavus, *Abrahamus Westerhoff*, Amicus meus candidissimus, & antiquissimus, hisce diebus mortis e faucibus eripuit, cataplasmati calenti substituendo gelidæ copiosæ fomentum: ex quo vetula vix ad mediam horam tota inhorrescens,

jamque moribundæ similis, mox dein levamen, postea sedationem omnium symptomatum experta est, abortaque diarrhoea putrida, integre restituta.

An frigus, constringendo intestinum, materiem obstruentem ex hernia liberiores in partem expellit? Num universo corpori incussus a Gelidæ applicatione externa, internave, horror stringendo omnia, sic arctat Ventriculum, & Intestina, ut motus antiperistalticus sopiatur? utque, eo quiescente, per residuas vitæ vires motus peristalticus animetur ad solvendum morbum? simulque eadem constrictione solvit alvum? Est ne remedium, quod, ni juvat, occidit; inducendo gangrænam? Nunquid etiam cortex peruvianus, potens in multis, Sydenhamo dudum notante, remedium purgans, perinde, atque aqua gelida, Ventriculum atque Intestina, constringendo, simulque

que hac adstriktione fœces promovendo, morbum *Neapoli* solvit?

Verum in homine hoc macilentissimo & exsiccatisissimo, magis probabile apparet, hac, sive gelidæ, sive corticis adstriktione, intestinum, jam ratione temperiei contractissimum, sic claudi oportuisse, ut morbus redderetur plane conclamatus.

Si dixeris forte corticem peruvianum minus hic egisse, ratione adstriktionis, quam virtute sua in agitados, inordinatosque nervos specificâ, qua v. c. æque in macilentissimo homine, quam in laxissimo, intermittentium, seu remittentium febrium, sopit aggressus; quomodo demum gelidæ aquæ, quæ utique hac vi specifica minime gaudet, expones actionem?

An igitur credibilius est, ut alias experimur, hominem hunc tum temperie, tum infanda consuetudine, ex-

ficcatum, nervos suos habuisse debiles ultimamque coctionem, & nutritionem, præ vasorum minimorum constrictione vitiatas; adeoque multa Viscera, Intestinaque sua, omnino flaccida, & inertia? Modus utique, quò ultimus paroxysmus solvebatur, qui fere solutæ Intro-susceptionis Intestini videtur, spasmus flaccidis intestinis accessisse forte innuit.

§. III. Cum morbus sit formidandus, nec raro cito necans, mirum non est, forti nodo quæsitos fortes cuneos esse, & in desperatis desperata tentata. Elapso anno in *Tomo VIII. cap. ultimo* Machinæ memini, quæ a Clarissimo viro, ac præstantissimo *Mediolanensium Medico Widemar*, mecum fuerat communicata; una cum experimentis, cum antea in *Italia* per *Italos*, tum a me *Viennæ* captis; quibus addidi nonnullas, & Practicas, & Theoreticas obser-

observationes. *Viennæ* necdum in homine captum experimentum est: *Mediolani* hoc anno unus; *Monzæ*, olim *Modoeciæ*, alter; ab Iliaco morbo, effectu hujus *Machinæ*, curati sunt.

Mediolani Auriga 55. annos natus, Baccho, ac Veneri litans, in Anorexi-
am incidit, alvumque tardam; & qui-
dem sic tandem ut licet præclarissimus,
versatissimusque Practicus, *I. de Wide-*
mar, quæcunque artis auxilia tentasset,
æger tamen jam esset in diem 17. aut 18.
alvo clausus. Adplicata Machina pri-
mo scybala durissima; eademque, bis
adhuc deinceps admota, copiosam al-
vum solvit: ita ut in sua jam antiqua
ægritudine, quæ eum in Nosocomio
binis postliminio mensibus sustulit,
alvum solvente remedio haud indig-
uerit ultra.

Monzæ autem Rev. Pater Kolm, Tri-
dentinus, ordinis S. Aug. Iliaco morbo

correptus, ope *Machinæ*, unica vice duntaxat admotæ, alvum ita copiosam habuit, ut altera adplicatione non egeret. Haud equidem vidit hunc ægrotantem ipse *Widemar*us, sed rem totam rescivit a dexterrimo chirurgo *Mediolanensi Ucelli*; qui cum sua *Machina Monsam* vocatus, eandem Viro Reverendo ipse admovit.

Quamvis iterum res in utroque hoc casu successerit, meretur tamen, antequam in homine tuto tentetur, serio, matureque perpendi. En quæ posthac expertus sim!

Die Maji 27. canem mediocrem *Machinæ* adplicuimus, præsentibus Clarissimo Domino *Göttingensi Professore Vrisberg*, & Clarissimo Domino Medico *Viennensi Hirsch*. Canis ab injecta aqua ter vomuit; ilico post hilaris denuo, sanus, famelicus. Effluxerat non parum ex ano aquæ: sub
inje-

injectione jacuit canis dum injiciebatur.

Eidem cani die 5. Junii experimentum repetivimus stanti, siphone ope lintheaminum sic ad anum firmato, ut parum admodum reflueret retrorsum. Perfecta intra duo minuta operatio fuit. Canis ter valide vomuit, sanus exinde, ac famelicus.

Die 12. Junii ipsi huic cani stanti, obfirmato rite siphunculo, intra minutum & aliquot secundas tota operatio perficiebatur. Denuo ad tertium vomitum injicere perexeramus. Borborigmi exaudiebantur, & venter valde sub finem injectionis intumescebat.

Laqueo porro eum extemplo strangulantes, Thoracem aperuimus, partium vitalium contemplaturi actionem. Aperto Thorace laqueus pauculum laxabatur, quo nobis bestia redderet aspectum, quem quærebamus, vivi-

diorem. Vita autem nimia nihil non turbabat, ventriculo aqua distentissimo per angustum foramen, quod prosector aperiundo Thoracem in summo Epigastrio inflixerat, se penetrante; unde constrictimus denuo laqueum.

Aperto pericardio cor bene se contrahebat, contractili motu observato tam ad basin, quam ad cuspidem. Potuimus omnia per horæ quadrantis spatium contemplari, & quo cordis sinistri, ejusque auriculæ motum accuratius intueremur, cor pro more parumper invertimus.

Sæpe lente, sæpe iterum cito, Auricula sinistra convellebatur. In ventriculo sinistro motus palpitans diutius perseverabat, quam in ejusdem auricula. In dextra Auricula motus omnium diutissimus, ut & in Thalamo dextro, cujus vita diuturnior eâ sinistri adparebat, eo quod sinistri apex
a dex-

a dextri ventriculi contractionē duntaxat moveri nobis videbatur: errabamus autem: ipsum cor finistrum erat, quod primario movebatur, ut patebit mox.

Silente corde Abdomen aperuimus. Ut in præcedentibus, ita & in hoc cane parum erant intestina expansa, Ventriculus autem vehementer. Valvula coli connivebat. Vermicularis processus coli valde expansus.

Redeuntes ad cor, vidimus ex eo sinistro Thalamo copiosum sanguinem, plane fluidum, prodeuntem; etiam ex dextro multum. At ventriculus sinister duplo ad minimum erat dextro amplior: Ut pateret finistrum fuisse, qui tam diu pulsasset, nobisque veluti dexter esset, imposuisset. Levis tamen palpitatio ventriculi dextri supererat, silente sinistro. Immo to fere corde, per anteriora asperæ arteriæ

teriæ pulmonem inflantes, pauculum
ast brevissimum cordis motum excita-
vimus.

Aug. 24. die cani haud interrup-
ta Machinæ actione aquam tepidam
injecimus sic, ut animal intra minu-
tum temporis, vomeret, & ut, inje-
ctione spatio duorum minutorum con-
tinuata, fere quinque aquæ libras vo-
mitibus ejiceret iteratis, unaque non-
nullas teniæ portiones. Extracto ex-
tra anum tubulo, haud tanta vis aquæ,
ut quidem alias, ex illo profiliit. Ca-
nis e manibus nostris dimissus, pro
more se primo momento abscondit,
verum diutius sub Arca dilituit, ac
fere tota die, contra id quod in aliis
canibus observaveramus, occuluit.
Fluxit ex latibulo suo multum aquæ,
orene, an ano, incertum. Vomitus
sub operatione ad tres modo digitos,
non ut olim in aliis canibus ad tres
pedes

pedes, profiliit. An quod hic ventre suo ad tabulam adplicaretur, & alii suis quatuor pedibus erectis tenerentur? sicque hi, præ illo, ad vomitum violentiorem aptiores?

Alteri cani injecimus aquæ circiter libram, visuri num alvus, educto siphone, vi emitteretur. Effluxit vero potius, quam erupit; contra quam in aliis observaveramus. Similisque fuit experimenti iterati effectus. Deinde continuata opera aquam duorum minutorum spatio injecimus. Hic veró canis neutiquam vomuit, sed vehementer intumescens, mortuus est. Presens erat Doctissimus *Mummssen*, Medicus *Hamburgensis*, & ni fallor, Doct. *Nitert* Medicus *Batavo-Transsylvanicus*, nec non Doctiss. Medicus *Lucensis Michaël Moni*.

Ipso momento incidimus illum. Cellulositas ad ventrem, & ad Thoracem

cem aqua plurima scatebat. Hinc quærebatamus nos inter, an animalis agitatione siphunculus ad ani margines in cellulositatem vicinam penetrasset se se; non vero in cavum recti introductus mansisset? sed turgidissimus venter internam læsionem innuebat; demonstrabatque id postea copiosissima, ventre contenta, & effluens aqua. An læsisset, perrupissetque Rectum siphunculus? sed leviter tantummodo inducta fistula in anum ænea, aërem per illum in Rectum inflavimus, qui colon intrans, idque expandens, manifesto docebat minime penetratum Rectum fuisse.

An itaque nimia valvulæ coli resistentia repulisset aquam? eaque sibi in vicinia valvulæ in abdomen viam parasset? Sed, quem inflaveramus, aër, qui eo, quo aqua, penetrasset, quoque non penetrasse, sed intestinum
expan-

expansisse, nobis clare videbatur. Quo, tamen omnis auferetur dubitatio, injecimus ope Machinæ per anum aquam, moxque vidimus vix notabile volumen aquæ ante valvulam colligi, quin superaret illam, ileumque repleret intestinum.

Ergo altius origo phænomeni quærenda fuit. Intestinum jejunum in quadam plaga inveniebatur dehiscens in sua peritoneali tunica, integri digiti longitudine; in medio verò hujus fissuræ totum intestinum divisum erat, latitudine pollicis: pauloque inde remotius altera digitum minimum longa fissura, sed exterioris duntaxat tunicæ, reperiebatur.

Quamvis jam patere videretur, id quod quærebatur; inquirere tamen volumus, num forte altiore in loco quid lateret, quod elucidare nos posset? Aqua enim per datum foramen efflue-

effluere in ventrem potuisset vel sola vi Machinæ, vel ab obstaculo, quod forte plaga hac fissâ altius hæreret. Itaque ligato jejuno supra hanc plagam, proximeque ad eam, aërem per œsophagum immisimus. Ille vero successive inflans Ventriculum, Duodenum, & eam Jejuni partem, quæ suprâ ligaturam erat; hasque partes in sua distentione constanter fervans; abunde evicit nullum hæsisse suprâ ligaturam obstaculum, quod aquæ transitum remoraretur.

Historiæ sic enarratæ explicationem periclitabor, quæ mihi admodum naturalis videtur, omnique satisfaciens phænomeni parti; opinionem suam cuique relinquendo integram.

In Hernia incarcerata est pars intestini ingrediens in saccum herniosum, parsque ejusdem regrediens in Ventrem. Pars ingrediens non raro in-

invenitur cum stercore, tum aëre, ita turgida, ut altera pars regrediens ex sacco in ventrem complanetur tota, fiatque impervia, & nihil ultra ex intestino prolapso remeare in ventrem possit.

Simile quid videor mihi dato in casu videre: intestina convoluta multis in locis supercandunt se, pars alia aliam premit, in cavo abdomine. Sic secundum naturam. Verum aqua, violentia nostræ Machinæ agitata, expleat subito ejusmodi Intestini partem, quæ aliam sibi proximam supercandit; an facile non capitur partem hanc supercandentem, si ab una parte consideretur abdomen jam plenum pluribus aquæ libris, ut evolutio compressi intestini ultra speranda non sit; si ab altera parte aqua continet vi impelli eadem; an non facile capitur, inquam, partem hanc supercandentem.

subjectam sui partem sic comprimere, ut omnis ejusmodi dematur cavitas, omnisque ad hanc demptam cavitatem impulsæ sistatur aqua? In summa Intestini hoc in loco expansione videntur mihi tunicæ interiores hiasse exterioribus priores: Aqua vero continuata vi impulsæ, eodem modo hiantis cellulosa tunicæ cellulas subiisse, quo solet in emphysemate aër. Communicante autem hac cellulosa tunica per mesenterium, cum universi cellulositate corporis, intelligi videtur, cur adeo copiosa aqua efflueret, ex cellulosa tunica, circumdante Abdomen & Thoracem. Permanente igitur vi impulsæ aquæ eadem, Intestinum jam interiorum tunicarum fissura debilius, rimam eandem completam egit, effuditque cavum in ventrem aquam. Quod porro Intestini ejusdem pars superior, non internis, sed externa tunica,

nica, hiulcaverit, inde natum reor, quod aqua cellulofam tunicam jam ingreffa, complicatam forte hanc intestini partem sic plus ceteris extenderet, ut demum externa tunica dehifceret.

Adde ad hæc omnia eum, qui machinam dirigebat, testari, se nunquam velocius, minusque interruptius, ejusdem alternantia manubria agitalle.

Multa profecto nos docet hoc experimentum. Et quidem 1^{mo} hanc Machinam offendere ejusmodi in corpore resistentias posse, ut funesta evadat. 2^{do} Eo magis Italos amicos, viros clarissimos, laudandos esse, quo in vivo homine mitiores paucioresque injectiones fecerint, posteraque potius, tertiave die, repetierint. 3^{tio} Cum constiterit jam humana cadavera non omnia sic esse disposita, ad coli valvulam, ut transmittant impulsam vi machinæ aquam, ut *Tomo VIII. pa-*

tuit, etiam hac de causa leniter ac breviter hic agi oportere; ne in Colo idem contingat, quod in Jejuno canis: aut si non hoc, ne saltem anxietates oriuntur, minime sufferendæ. 4^{to} Nec omnem extra metum esse, ut nonnunquam ad incarceratas Hernias admota machina, vis impulsæ liquidæ, aut intestinum compressum non aperiatur; aut, si aperiatur, non ita comprimat subjectam, quæ jam compressa nimis, partem, ut omnis per eandem sit impeditus in ventrem influxus; alterutroque demum modo idem infortunium in homine, quod in cane, excitet. 5^{to} Forsitan hinc illarum anxietatum originem, naturamque intelligi, quæ in intestino, quod pro parte tympaniticum sit, quæque similes in colicis flatulentis crebro contingant; tum & sic concipi, quo demum patet verus Ileus, licet flatulentus tantum-

tummodo, nasci queat; idemque, dum dura atque indigestilia alicubi in Intestino nimium retardentur, ac compingantur.

Die Aug. 28. in eodem cane, in quo una cum illo infortunato ante quatrimum, experimentum repetitum est, nec non in altero, & in tertio. Ab injectione destitimus, ubi omnes libras tres quatuorve, in tribus aut quatuor vicibus evomuerant, lente semper agitata machina. Neque omnes hi tres canes tanta vi, tantoque jactu, ac quidem olim sæpe observaveramus, aquam alvo, educito siphone, ejecerunt. Liberati e manibus nostris, ore, & ano dimiserunt aquam; hac emissâ, alacres cucurrerunt, comederunt, ac diu sani manserunt in Nolosocomio

Septembris 3. binis illorum; au-
fugerat enim tertius; repetita injectio

est sic, ut priorem tertio vomentem dimiserimus; alterum vero, ingentem profecto canem, injectione producta eo, ut quidem nondum vomeret, sed jam vomituriret, strangularem, visuri num forte quid aliud hoc experimento, nondum antea tentato, disceremus.

Intestina crassa & tenuia ne utriusquam extenta sed expansa fere naturaliter erant. Duodenum duplo amplius; ventriculus autem ita expansus, ut aquæ contineret libram fefqui alteram. Notavimus antea in canibus, quæ etiam vomuerant pluries, parum expansa Intestina fuisse, Ventriculum autem quam plurimum; unde & dimissi vivi canes multum semper postea vomuerant. Similiter rem in humani cadaveris intestinis, ac ventriculo olim deprehenderamus, etsi multum aquæ ore jam elapsus esset. Manu premente

mente, omnem fere aquam illam per æsophagum expulimus.

Cor utrumque fluidissimo sanguine plenum; sic ut incisione primum in sinistro, deinde in dextro Thalamo facta, sanguis ex utroque cavo, rivi instar, profiliret.

Erat porro hic canis terete Verme multo plenus, copiosaque Tenia. Sedes Teniæ incipiebat spithamæ longitudine a valvula coli, sursumque ascendendo trium spithamarum longitudinem in Ileo emetiebatur; ultra non, sed quidem Teretes, quemadmodum & in ventriculo; incertum, num domicilium antiquum hic habuissent; an vero, aqua subtus premente eo versus pulsi essent.

In hac nunc trium Spithamarum longitudine, morabatur fasciculus multarum teniarum, hic decem, alibi undecim, duodecim, in longitudine

positarum, quas gluten haud tenax valde involvebat. Fuere, quæ hanc longitudinem integram emetirentur, emetitæque reflecterentur; fuere, quæ mediam, quæ tertiam. Id vero num ideo, quod nonnullas fregissemus eximendo? vix credibile; attentius enim examinatæ breviores hæ, æque quam longiores illæ, componebantur primum ex latioribus mutuo articulatis, & subito tenuioribus admodum portionibus, itidem mutuo articulatis. Latarum autem & tenuium portionum eadem longitudo fuit.

Vermium seu articulationum, vacua apparebant corpora esse. Siphone dicto *Anelliano*, quo in fistula lachrymali deobstruenda utimur, lac in unam pertusam injecimus, quæ inde reple-ri quidem videbatur, at vero in alteram, nisi semel iterumve, non trans-misit. Pellicula externa frangebatur
passim,

passim, antequam in subsequenter articulationem lac posset se penetrare. Nec inflato aëre plus profecimus. Argenteo vero stylo omnium subtilissimo citra minimam læsionem penetravimus ex una in aliam; ita ut ad brevem hunc stylum sex septem varias articulationes, citra ullam læsionem, penetrando affigeremus.

Nunquid sic intelligitur demonstratus a magno *Winslowo* canalis, qui injectione facta in alteram ex altera penetrabat portione? An igitur, in cane saltem, tenia infectum unicum; non vero vermis ex numerosis cucurbitinis, ut ajunt, vermibus coagmentatus?



CAPUT VI.

V A R I A.

§. I. *Febris continuæ remittentis, Συνέχου, hoc anno in Austria grassantis, genius, & natura. Autores qui in hac febrium genere cognoscendo, curandoque, se se omnium maxime commendaverunt.* §. II. *Virtus fomentorum aquosorum, eorundemque in perpetuo madore & calore conservatorum, in multis externis morbis.* §. III. *Endemii in Austria morbi ophtalmici. Varia ad illos remedia. Laus Bilis hepaticæ Mustellæ fluviatilis.* §. IV. *Cura Viperina.* §. V. *De Rachitide nonnulla.* §. VI. *Arsenici albi, copiose assumpti, effectus mirifici; & quid, multis incassum tentatis, profuerit.* §. VII. *De Uva ursi.*

§. I.

Graffatæ sunt in Austria hoc anno Febres continuæ remittentes, veræ hemi-

hemitritææ tales, ut ex una continua, alteraque tertiana, compositæ viderentur; hæ quibusdam in locis benigniores, paucis medicamentis, quin & hic illic, adhibita haud admodum laudabili methodo, tandem cessaruunt, paucis inde morientibus. Pagos autem novi, in quibus dictam malignitatem quandam adjunctam habentes febres istæ, per remedia antiphlogistica communia primum, deinde a 5. vel 6. morbi die per corticem Peruvianum, quotidie ad sex dragmas in substantia, ut Medici ajunt, assumptum, demum ad 14. 17. diem judicabantur, haud infrequenter sudoribus: Sic ut ex sexaginta, & aliquot ægris bini modo perirent, & alii duo, non sine symptomaticis exanthematibus demum ad crisin ducerentur.

Perierunt in urbe ii maxime, quibus damnanda sua methodo Medici exanthemata excitaverant. In

In Nosocomio nostro tres mulieres hac febre decubuerunt. Communem febrium acutarum methodum sequebamur, quamdiu eidem morigeræ erant: cortice vero eas abegimus, quando immorigeræ plane erant, & pravis stipatæ symptomatibus, & eam malignitatem redolentes, qua alibi Petechiæ, & Miliæ eruptiones, febrem concomitabantur. Harum feminarum priori, die 14. corticem dare inchoavimus; alteri 12. die; tertiæ vero 6. die; perseverantes in ejus usu ita, ut per dies 14. a curata febre eandem daremus, quam in febre, dosim, tertia demum, & quarta septimana paulatim parciorem. Recidivam harum una die 14. passa est, quod maturius exire Nosocomio vellet. Rediens vero altera febris recidivæ die in Nosocomium, intra triduum curata fuit, & quatuordecim diebus eandem,

dem, qua olim, fumsit corticis quantitatem, deinde pedetentim minorem.

Poscebat autem hæc febris in sua declinatione, postque eandem, purgans ad singulos 3. 4. dies; Ventriculo alias corticem, qui toties specificum ventriculo languenti auxilium est, plane respuente, cum deletio omnino appetitu. Dedimus illis uncias iv. vel v. *Aquæ laxativæ Pharmacopææ Viennensis*, quæ nobis purgans longe tutissimum, mitissimum, citissimumque visa est: idque summo mane; ea lege, ut post alteram alvum, quæ passim intra trihorium, citiusve, habetur, corticis sui consuetum usum repeterent; sub quo purgans adhuc pluries operari solet, & reparare appetitum.

Plures tamen vidi in urbe harum febrium prioribus pertinaciores, nunc
alter-

alterno, nunc singulo, nunc quarto die ingravescentes, idque sæpe citra vel minimum frigus, cortici neutiquam auscultantes: ita ut nonnulli ægri ad 20. alii ad 40. diem, & ultra, nihil aliud; quod tamen multum erat; a cortice lucrarentur, quam ut viribus sustinerentur, ut a maiore malignitate, quæ, Regimine cooperante, Miliarium in una eruptionem jam inchoaverat, præservarentur; utque triduo aut quatrIduo ante crisin pares coctioni essent; ac demum 20. aut etiam multo posteriore die, hi sputis, alvo alii, illi per sudores, urinasque; nonnulli integre, alii partim ac repetitum, judicarentur: idque ea lege, ut si post coctionem nifus adparerent Naturæ, ad crisin promovendam per laudabilem viam quamcunque, exempli gratia, per pulmonem; loco corticis, modo vires sufficerent, ea porrigeren-

rentur, quæ ad hunc nifum promovendum efficaciffima in arte habeantur.

Occafione trium hac febre laborantium ægrarum, præter generales *Hippocratis*, id eft Naturæ, leges, centies laudavi, debuique laudare, magnorum virorum, qui in febrium hujus generis curatione cæteris perfpicaciores, felicioresque fuerunt, auro contra cariora opera: *Mortoni*, ajo, *Sydenhami*, & incomparabilis in hac materia *Francifci Torti* Archiatri *Mutinenfis*, ac Profefloris: deinde & illorum, qui priorum exemplis inſtructi, Doctrinæque imbuti, hanc rem illuſtrarunt, *Pringli*, ac *Huxhami*, apud Anglos; *Lauteri* ac Magnifici Viri *Hazenöbri* apud Auftriacos, &c. Inde intellexit, demonſtrationibusque convicta ſtudioſa juventus vidit, in febribus Ardentibus, & in omnis generis

He.

Hemorrhoidæ, communi methodo insuperabilibus, frequenter admodum sive præveniri, dum minas intentat; sive tolli, dum jam adest; dictam in Arte malignitatem: dato cum prudenter, tum audacter, antequam nimius fiat Solidorum Fluidorumque a sanitate recessus, cortice Peruviano: & quidem sic, ut si ore assumptus minus expedite opituletur, etiam in anum injiciatur.

§. II. In morbis cutaneis antiquis, ulcerosis, in malignis crurum ulceribus, in ulceribus spinæ ventosæ fædissimis, in tumoribus arthriticis, continuamus, id quod superioribus annis innui, pulcras observare aut emendationes, aut curationes eorum, quos consueta artis auxilia haud levaverant; ope sollicitæ continuæque applicationis aquæ calidæ, sive puræ, sive, ne forsan pauperes eam præ simplicitate nimia

mia negligent, repudiantve, medicatæ redditæ, a Malva, Parietaria, Chærophyllo, Althæa, sem. Lupini, &c. Vetustiores, viros in arte graves, hac in parte imitati, qui dum consuetis unguentis, & emplastris, ejusmodi mala aut difficilius, aut nullatenus, curari cernerent, fomenta aquosa, reddita ejusmodi vegetabilibus medicata, vehementer laudarunt; *Dioscorides*, inquam, *Dodonæos*, *Clusios*, *Lobelios*, *Santorios*, & novissimum præclarum Auctorem *Morgagni*, qui in Epist. 57. §. 3. calcaream podagricorum Materiem sola aqua calida fuisse resolutam, refert.

§. III. Est endemius in *Austria* omnis fere generis oculorum morbus. Inflammatio, Pannus, Pterugion, Phlyctæna, Albugo, Cataracta, Amaurosis, sæpe hi bini morbi ultimi una juncti, Staphyloma, Sarcosis. Viæ publicæ, quantumvis lapilloso solo

duræ, nec non in urbe strata platearum, conservari superstratis solent silicibus tritis, lapillulisque, continuo renovatis. Curruum innumerorum rotis hi ita commoliuntur, ut nube tenuissimi pollinis circumderis affiduo, quacunque perrexeris; eoque magis, quod sit Regio ventosior: ut vetus proverbium dicat, *Austria aut ventosa, aut venenosa.*

Unde præter oculorum morbos frequentia esse oportere Asthmata, Dyspnœas, Phthises pulmonales, facile quisque per se perspicit.

Inter ea auxilia, quæ variis oculorum affectibus opitulari experimur, & miramur, una cum venæ sectione, & iteratis purgantibus, laudare oportet flores Zinci, quorum dragma unciis quinque aquæ Rosarum vel Euphragiæ admista, incipienti, ac repententi tunicæ conjunctivæ inflammationi, efficax auxilium præstat. Ne-

Neque hic laude sua caret aqua purissima, cujus unciae, spiritus vini re-
ctificatissimi guttas 15. vel 20. additæ
fuerunt. Quæ gravior inflammatio
ac dolor hisce minus cito cedunt, po-
tentius remedium capiunt cataplasma-
te, quod ex pulpæ Pomorum acido
dulcium, ac Micæ panis albi ana unc.
ij. florum Rosar. rubr. ac Sambuci á
pugill. j. Croci ac Camphoræ ana gr. vj.
componi solet. Vix vero hæc omnia
graviores inflammationes tollunt, nisi
simul purgatio antiphlogistica sæpius
repetita, potenter revellat; quo cum-
maxime etiam facit aut in Nucha ve-
sicans, aut Emplastrum post aures,
quod ex Empl. Vesicat. & Melil. á q. f.
compositum sit. Quasdam tamen in-
flammationes ita ad omnia pertinaces
offendimus, ut visus minentur jactu-
ram; quibus una cum remediorum di-
ctorum plerisque, fetaceum Nuchæ re-
perimus utilissimum. Q 2 Ad

Ad maculas vero, ad perlas, ad pannos, ad pterugia, ad Adnatæ albugines, nihil efficacius experimur Bile animalium, ac præprimis Bile hepatica *Mustellæ fluviatilis* vel *lacustris*, etiam *Motellæ* dictæ, & *Lotæ*, (*Rutte*, *Aal-Rutte* germ.,) quam apud *Rondeletium* libro de *piscibus lacustribus* cap. 19. quæras. Antiquum remedium, *Hartmanno* aliisque laudatum, oblivioni deinde fere datum, nunc iterum ad experimenta revocavi, effectusque gavissus sum, postquam nitidos Juvenis oculos conspexissem, quos a variolis maculatos hoc oleo integre curasset Matrona Mater. Cum *Danubius* hos pisces alat numerosos, iique sapidum suum jecur sæpe magnum ita habeant, ut non modica bilis hepaticæ copia inde colligi possit, dum in vitro suspensum, solisque expositum calori, levi compressione nonnunquam juvetur; cu-
rari

ravi mihi hanc bilem perpetuo præsto esse. Bis, ter, die, guttula una, alterave, oculo sincera instillatur, supra maculam, aut albuginem. Plures profecto brevi fuerunt ab his malis curati.

An specifica ad has ærumnas *Mustellæ fluviatilis* Bilis? vix crediderim. Senioris *Tobiæ* Albugines bile majoris piscis, in *Tygride* fluvio capti, curabat Angelus *Raphaël*, juxta id, quod ipsius filio dixerat, *Tob. cap. 6. & 11. Fel ejus valet ad ungendos oculos, in quibus fuerit Albugo, & sanabuntur.* Unde suspicor, si, quibus in locis *Mustella fluviatilis* desideratur, capi experimentum lubeat jecoraria bile *Anguillæ, Lucii piscis, Aselli majoris ac minoris, &c.* forsitan quoque haud inutile fore. Dolorem levem ac brevem quidam ab admoto hoc remedio experiuntur, alii diuturniorem gravioremque: illis ni-

hil; his autem, post horæ quadrantem oculum aqua Rosarum eluere expedit.

§. IV. Ut ceteræ res sublunares, ita Medicamenta multa, mutationes temporum subire solent. Patuit id mox in bile *Mustellæ fluviatilis*. *Vipera* sæpius in cælum elata olim, in morbis cutaneis pertinacissimis, nec non in summa debilitate curandis, dein hic viluit, ibi oblivioni penitus tradita fuit, iterumque postliminio summis laudibus decorata. Cum eximii Viri *Mead*, & *Morgagni*, *Viperæ* decocta, gelataque, ob pulcras, quas ipsi cum vidissent, tum patrassent, curationes, impense laudarent; *Viennensiumque* Medicorum complures egregias suas per eadem curas celebrarent; experimenta capere hac æstate cepi. Puellæ decennî herpete ulcerosa circum os & nares, deinde tussi pertinacissima à lon-

go tempore laboranti, nec consuetis a me datis remediis curatæ, jusculum dedi, paratum ex aqua cocta cum quarta viperæ vivæ parte; sic ut quotidie idem, quod sex unciarum erat, unica vice, jejuno assumeret ventriculo. Mensis sic elapso spatio, læti vidimus eam tussi sua integre curatam, herpete pene liberam. Juvenculæ scabiosæ quæ quopiam unguento suam sibi scabiem infelicitè curaverat, atque inde in tussim fere intolerabilem, summamque maciem inciderat, dedi quotidie libram juris cum media vipera viva decocti: post mensem tussi omnino vacantem, scabie ipsi non nihil redeunte, vidi. Si quis maluerit redeunti scabiei tussis adscribere ablationem, cui adscribet ejusdem curam in Puella, in qua & cutaneus morbus, & tussis violenta, una curabantur? Præterquam quod in juvencula scabies pauc-

ca rediisset, cum integra cura tussis. Experimenta promoturus intellexi vi-
peras deficere; defecturas in æstatem.
Dante DEO, multiplicabo tunc experi-
menta sic, ut quid agat hoc Medica-
men, quousque agat, quidque de-
mum sit de ejusdem laudibus admit-
tendum, cum intelligam, tum pate-
faciam.

§. V. In Rachitide, alio demum
Austriæ endemico morbo, satis nequeo
Ostracodermata laudare: si enim bis,
ter, die, pulveris hujus scrupulus quo-
tidie detur, infantesque sole aprico,
aëre rurali, motu in infantili curru cre-
brerrimo ac quotidiano, lecto & con-
clavi ficcis, fanisque fruuntur alimen-
tis, propemodum omnes cito; qui
vero horum adminiculorum plerisque
carent, solo hoc pulvere, motuque,
tardius quidem prioribus, tuto ta-
men, & certo, curantur; quam diu
de

degeneratio universæ compagis curam necdum reddiderit quocunque noto hucusque remedio impossibilem.

§. VI. Arsenici albi terribiles recensere juvat effectus. Hortulani in proximo pago *Penfink* uxor, nunquam adhuc gravida, sanissima tamen, ac torosa mulier, mense julio anni 1763. emerat pro ægrotante quopiam puero, pulveres duos *Cremoris tartari*, & *Lapidum cancrorum*, eorumque uno puero dato, alterum in mensa reposuerat. Ipsa vero a prandio minus recte se habens, sumpsit, ut putabat, hunc alterum pulverem.

Notandum est feminam hanc, antequam pulverem fumeret, præ enormi siti immaniter gelidam bibisse; prætereaque pulverem una cum ingenti aquæ copia assumpsisse: ita ut copioso cum veneno, antitodum quoque sumpserit copiosum.

Cum valida ventris tormina pati inciperet, petiit lectum, nauseavit, elapsa autem semi hora vomuit. Interea temporis redux domum maritus, videt uxorem vehementer vomentem, & anxiam esse. Igitur percunctari ille quid gestum, quidve assumptum sit? Dum vero inaudit pulverem hunc, quem in mensa mane se reposuisse uxor ajebat, assumptum ab illa esse, mox territus hic ad mensam accurrere, & miserando ejulatu vociferari, pharmacopæi pulverem in mensa reperiri, ejus vero loco assumptum pulverem *Arsenici albi*, quem ad mures necandos emtum, eadem in mensa incogitanter reposuerat. Vocatus actutum Medicus, oleo & lacte corpus laudabiliter implevit; unde vomitus, qui per multas horas plus centies erupisset, paulatim cessavit.

Porro

Porro mirabatur femina quod, vomitu cessante, se tam belle haberet, quemadmodum etiam die altero tertioque. Quarto vero die pedes invasit, qui dicitur *crampus*, crassaque plantarum pedum epidermis tota secessit. Qua dein recrecente, incedere, præ summa ejusdem teneritudine, dudum non potuit. Jussa est *Badensia* Balnea Sulphurea adire, mensisque hisce uti spatio. Catamenia substitere in balneo. Multaque ibidem Medicamenta sumsit. A Balneo crurum ipsi sensim impeditior motus, sic ut primum ingenti cum labore, tardissimeque, passus quosdam ederet, ab ineunte vero Septembri cruribus movendis ultra non esset; manuumque, ac brachiorum fere omnem motum amitteret; humeris solis, ac femoribus nonnihil adhuc obsequiosis. Jamque universo de corpore, caput si excepe-

ceperis, Epidermis secessit. Postmodum autem motus exiguus musculis manuum rediit, ut sinistra leve quid, chartam v. c. tenere, dextrâ digitos nonnihil, sed obscure, ut vix advertisses, movere posset. Binis vero hominibus suffulta, crura ne hilum quidem movere potuit. Quodque in paralyticis nonnunquam adverteramus, ut jacentes artuum inferiorum superiorumque motum quemdam, qui sedentibus istis impossibilis, ederent; hæc ne vel minimum quidem. Attraxit utcunque crus, & brachium, levi illo motu, quem dixi humeris femoribusque superstitem fuisse, haud vero movit. Intolerabilis accessit crurum, pedumque, pruritus, qui in aliis boni sæpe augurii, in hac vero minime. Interea pulsus, appetitus, somnus, alvus, urina, bona; quique in balneo substiterant rediere menses.

fes. Multis, iisque præstantissimis remediis incassum usa, inducta demum in Nosocomium nostrum est, ineunte Novembri anni 1763.

Datis, ut monui, incassum selectissimis remediis, animum mihi subiit vires explorare, cum aliis vul, nerariis, *Brassicæ*, cui *Otto Tackenius*, vapore *Arsenici* captus, curationem suam magnam partem adscripsit, postquam lacte & oleo a præsentis periculo vindicatus primum esset; in *Hipp. Chem. Cap. 24*. Sumpsit itaque femina bimestri spatio hoc decoctum: Rp. Tarax. rec. cum toto unc. ꝑ. *Brassicæ rubræ* Lib. i. Pulv. Saffap. unc. ij. Glycyrrhi. unc. iij. coq. aq. p. per horam. Colat. Mens. i. ꝑ. D. u.

Cardialgia ex acore manifesto vexata aliquoties fuit, sed mox restituta usu misturæ, paratæ ex aqua sambuci, syr. diacod. & lap. cancr. Semel autem

tem febris, cardialgiam concomitans, remedio huic haud obedivit amplius, sed cephalalgiam adjunxit, & tantillum illud, quod supererat, motus, prostravit. Cogebamur tunc cortice peruviano eandem fugare; haud multo tamen; cum paucos intra dies febris, suis cum symptomatibus, fusa, fugataque esset.

Spatio bimestri hac methodo Paralyfin, ac Pruritum, Doloremque nihil emendavimus. Unde robur nervis cortice peruviano conciliare annitebamur, interea dum crura manusque nunc aqua vulneraria, nunc pulveris aromatici fumo, bis die fricarentur. Vis dein electrina, quotidie semel adhibita, levem quidem emendationem fecit, ut crura utcunque plus attrahere, ac digitorum manus spectabiliorum, pedisque dextri obscurum, qui nullus fuerat, motum edere posset;

at vero tandem corpore ad lecti crepidinem suffulto, crura, ac pedes immisimus in Balneum, usque supra genua, aquæ calidæ, cui flores chamomillæ, flores sambuci ac lavendulæ intabuerant: dum interea corpus repleretur decocto Tarax. Nasturt. Sarsap. Glycyrrh. Effectum hinc, ut decurso mensis horum in usu spatio, gradi inciperet, cum iisdem deinceps pergendo ambularet, digitos nendo exerceret, ac tandem mense Junio domum, quo aëre rusticano frueretur, peteret, & sæpius inde ad me pedes venerit; ob reliquias mali ejusdem remedii novam formulam petitura.

Quæri a me posset citiusne curata hæc femina fuisset, quando, vel antequam meæ curæ subjiceretur, vel saltem cum eidem subiecta esset, ultima meæ methodi parte tractata fuisset: indicante nimirum pruritu illo dolorifico

fico acredinem, aut veneni residuam, aut veneno genitam, ante ostia cutanea morantem, sui que per eadem expulsionem flagitantem? Ægre sane quæstionem hanc non fero. Jnnui Brassicæ vires, *Tachenio* autore, me explorare voluisse, viresque deinde electricas. His scopo non respondentibus indicationem, de qua quæstio agit, secutus sum; in simili postmodum offerendo mihi casu ab ultima indicatione incepturus curam, quo constare posset num & citra auxilia diluentia, saponacea, ac solventia, aut venenum aut veneno genita materies, æque feliciter expelli posset. Interim haud displicuisse lectoribus opinor, hanc integram communicando historiam, qua non curam duntaxat, sed una contueantur mirabundos *Arsenici albi* effectus. Quod ipsum copia enormi, scrupuli certe pondere graviore, assumtum, primum qui-

quidem abundantissima, quam tam
mox ante, quam una cum illo sumse-
rat, aqua; deinde vero saluberrimo
consilio medici præstantis oleo & la-
cte, sic viribus inermis redditum est,
ut neque necaverit feminam, neque
hospitatum diu in primis viis fuerit,
sed his cæterisque relictis extremorum
artuum Paralyfin, Epidermidis univer-
sæ secessum, perpetuumque cutis Pru-
ritum, dolentemque eundem, gene-
raverit.

§. VII. Calculosorum pauciores
hoc anno affuerunt, quam ut experi-
menta cum *Uva ursi* augere multum
potuerim. Interim ex quo hanc Plan-
tam ab *Illustrissimo Præsidente* utilem in
hoc terrifico morbo didiceram; mul-
tisque experimentis, ut talem, pro-
baveram: magis confirmor, magisque
in eo, quod in hoc *Opere* toties monui,
nullarum eam virium esse, ubi in sy-

sternate urinoso interno multa facta fuerit, sive a calculo, sive a pure, sive ab urina, sæpius diutiusque retenta, Degeneratio. Qui in posteriore casu experimenta irrita expertus, ideo de veritate eorundem priore in casu dubitat, poterit ab ipsis, quos Uva ursi, jam pluribus ab annis a suis ærumnis fartos, tectosque servat, rerum edoceri veritatem. Adfunt enim & in hac urbe, & alibi plures; vivumque exemplum potest conspici quotidie in *Pambolzero*, janitore aulico. Quod si quis arbitretur consimili, majorive virtute, *Vaccinium foliis Buxi* pollere; rem experimentis tentando, legitimeque probando, & Medicos cunctos, & Genus humanum universum, sibi reddet devinctissimos. Ceterum existimo me, adeo in specificis, quæ necdum probaverit usus, admittendis difficilem, adeo in propriis erroribus castigandis faci-

facilem, id fidei apud candidiores mereri, ut non, nisi probata experimenta, protulerim quondam.

CAPUT VII.

NONNULLA

DE INSITIONE

VARIOLARUM.

§. I. *Duplicis erroris, in mea ad Ill. Tralles Responsione, correctio.* §. II. *Variolarum naturalium, hominem secundo, & letaliter quidem, invadentium exemplum.* §. III. *Tria exempla secundarum variolarum, quorum in primo secundæ prioribus mitiores; in altero, ac tertio, contra.* §. IV. *Epitome novi operis Ill. Tralles, quo ad meas decem quæstiones, ipsi propositas, respondet: eaque occasione Medicæ testimonium refertur, qui hoc anno ex quatuor inoculatis unum morte amisit; ex*

duodecim qui naturalibus variolis laborarunt, neminem: quamvis inter hos posteriores essent, quos ab insitione arcendos esse statuisset.

§. I.

Grave argumentum, quod sententiam meam de Inoculatione variolarum roboret, denuo nactus, & de uno alteroque errore, quem in Responso ad Cl. Tralles nuperrime commiserim, convictus, nonnihil hanc quæstionem refricem necesse est.

Scripseram in Responsi hujus *Appendice*, Filium natu majorem Excell. Comitæ, quem naturales variolæ invasissent, periisse. Non periit, sed evasit: dolore tanto sæviore animos utriusque nobiliss. Parentis percellente, quod naturalibus variolis filium natu majorem servaverint, artificialibus amiserint minorem.

Scripseram *Florentiæ* factam inoculationem fuisse Nobilis cujusdam legati

gati filio: non filio, sed natu majori filiæ facta est: quæ ipsa biennio post cum fratre ac sorore, inoculatas variolas patientibus, intrepide conversata, variolas naturales hoc iterum contagio sibi contraxit. Scripseram, sic enim edoctus eram, puellæ natu majoris artificiosas variolas tales fuisse, ut de earundem cum numero, tum genio, qui operationi præessent Medici, contenti essent. Hæc cum paulo aliter se habere deprehendo, historiam ex ipsis Patris litteris, ac Medicorum Puellæ testimoniis, integram dabo.

Doctiss. Medicus *Collinius* qui nobili puellæ in variolis tam arte, quam natura, genitis semper adfuit; & doctiss. *Durazzinius*, qui cum priore puellam in variolis naturalibus curavit, hoc casus utriusque testimonium perhibuerunt.

„ *Isabella* ex feminis natu major,
 „ ætatis suæ anno quinto, gracili ac

R 3

„ sani

„ fani corporis habitu prædita, prima
„ fuit, quæ vere 1761. præmiſſo con-
„ ſueto purgationis regimine, artifi-
„ ciale contagium per vulnuſcula cuti
„ femorum inflicta, intrepide ſuſtu-
„ lit. Sexto ab inſitione die calor, &
„ pulſus celeritas ægram invaſit, &
„ papulæ circa vulnera eruperunt,
„ maculis mixtæ ſubrubris, parum,
„ aut nihil elatis; & decimo tertio
„ exiles puſtulæ ſparſim ſe protule-
„ runt, quæ tribus diebus maturatio-
„ nis & exareſcentiæ ſtadia percurre-
„ runt. Conſpicuam male olentis
„ puris vim ab incisionibus, uſque ad
„ earundem cicatricem, abundanter
„ ejecit, & quod admodum animad-
„ verſione dignum, urinas albo copio-
„ ſo ſedimento per totum ferme cu-
„ rationis decurſum, qui quadragin-
„ ta, & ultra diebus ſe ſe extendit,
„ onuſtas reddidit. Id genus fuere
„ mor-

„ morbosæ perturbationis signa, quam
„ corpori generosæ puellæ excitavit
„ variolosi aliquantulum puris, a Cl.
„ Paulo Medico *Lucensi*, transmissi; id
„ ipsum, quod aliquot indubiis vario-
„ lis *Lucæ* occasionem præbuit.

„ Fide doctissimorum hominum freti
„ Parentes *Isabellæ*, & fratribus, qui
„ vere, anni 1763. variolis discretis,
„ eodem artificio excitatis, lecto de-
„ cumbabant, liberum concesserunt
„ commercium. Sed XVI. Kal. Quint.
„ dum illi convalescebant, inopinato
„ febris illam adoritur, symptomati-
„ bus stipata, quæ variolas distinctas
„ regulariter comitantur: & quarto
„ ab invasione die, pustulæ per uni-
„ versum corpus, valde copiosæ, pro-
„ ruperunt, nullum dubitationi lo-
„ cum relinquentes morbi illiusmodi
„ ad veras variolas referendum esse,
„ ubi naturalis earundum decursus

„ omnino demonstravit, qui sine ul-
„ la nedum faciei deformitate felici-
„ ter cessit.

Quod in testimonio dicitur, fide
doctissimorum hominum freti parentes, non-
nulla explicatione eget. Doctiss. vir
Collinius, quem inoculationi præfuisse
memini, dubium Parentibus genero-
sis moverat, num vere haberet puella
ab insitione variolas? Quamobrem hi
virum Doctissimum, erudita, atque
utilissima opera clarum, *Targionium*
Tozzetum, qui insitioni quoque adstite-
rat, nunc denuo ad decimum & quar-
tum ab insitione diem advocarent, ut-
pote in Inoculationis negotio exper-
tissimum, celebratissimumque. Hic
omnibus bene examinatis judicavit pro
tenera, ac delicatula puellæ natura, sat
variolarum excitatum fuisse; præfer-
tim ubi pustulas duas in labio inferio-
re, inque poplite aliam, vidisset,
quæ

quæ variolarum erumpentium naturam optime referrent.

Alter horum doctissimorum virorum fuit in re oculatoria famosus scriptor *Condaminius*, ad quem generosus parens detulerat casum. Repondit ille „ Nullam parentis animum subire inquietudinem oportere: siquidem „ homines omni variolarum unquam „ acquirendarum periculo se se per „ inoculationem liberarent; materia „ variolosa funditus evacuante se incisionum factarum ulceribus. Recte quidem, secundum sua principia, clarus *Condaminius*: vel enim veræ variolæ prodierunt, vel non: si cum optimo *Targionio* statueret veras fuisse, expectare secundas ille non potuit; sin minus, evacuatione ulcerosa sex septem septimanarum, urinisque albo sedimine fætis, tam nativum, quam insitum virus variolosum, omnino expulsum fuisse credere debuit. §. II.

§. II. Atque hæc de correctione ejus, qui in utraque hac historia referenda a me commissus fuerat, erroris, sufficient; accepta vel ideo futura lectoribus, quod utramque historiam, potissimumque posteriorem, multum elucident. Verum Publico debeo secundarum variolarum authenticam historiam mecum communicatam, Juvenis Academici, quem in prioribus variolis vidit, tractavit, vir Clarissimus *Petrus Emmanuel Hartmann*, dignissimus Medicinæ in Universitate, quæ *Francofurti ad Viadram* fulget, Professor. Contigerat hic casus ipsi, dum adhuc in *Helmstadiensi* Academia esset; in qua is, de quo agitur, Juvenis tunc Musas colebat. Sic ergo ille ad amicum scripsit. „ Anno 1761. die 20. „ Maji, versus vesperam accessi ad Juris studiosum D. *Voelger*, Frisonem, „ 20. circiter annos natum, habitu „ cor-

„ corporis mollioris, sanguineque:
„ quem circa quartam a meridie ho-
„ ram a febre continua correptum de-
„ prehendi. Nox subsecuta maxime
„ inquieta; urina cruda. Altero die
„ matutinis horis paulo remissior erat
„ febris; post meridiem vero anxietates
„ præcordiorum molestissimæ ac-
„ cedebant. Versus vesperam denuo
„ febris increfcebat; nox inquietissi-
„ ma; urina adhuc cruda; cum con-
„ tinuis præcordiorum angustiiis. Ter-
„ tio die mane Hæmorrhagia narium
„ fatis copiosa supervenit. Inter hæc
„ sensim facies, præsertim circa ocu-
„ los, insigniter intumuit, & versus
„ vesperam maculæ paulo elevatae, ru-
„ bicundæ, fatis copiosæ in facie, &
„ passim, licet rarius, in universo re-
„ liquo etiam corpore, in conspectum
„ prodierunt. Per noctem omnes hæ
„ maculæ in vesiculas abierant lenti-
„ for-

„ formes, & satis elevatas, circulo-
„ que rubicundo circumdatas. Re-
„ miserunt ita angustiae praecordiales,
„ & febris; ægrotusque quarto, quin-
„ to, sextoque die, satis bene se ha-
„ buit. Sexto die, vespere, nova
„ accessit febris satis gravis, & pu-
„ stulae laudabile pus contraxerunt,
„ distinctaeque ubique, si confluxum
„ earum in dextro brachio prope axil-
„ lam, & in sinistra gena, exceperim.
„ Tum ab hoc die nihil singularis phæ-
„ nomeni accidit, sed reliquus ha-
„ rum variolarum decursus cum aliis
„ benignis variolis perfecte convenit.
„ Eo vero loco, in quo utroque con-
„ fluxus variolarum fuerat, satis ma-
„ nifestae cicatrices superfuerunt.

Studiosus hic deinde *Helmstadio*
Francofurtum ad Viadram appulit, ibi-
demque haud ita pridem variolas ite-
rato contraxit, quibus decumbentem
vidit,

vidit, & tractavit Exp. & Doctiff. vir *Eberti*, Physicus *Francofurtensis*, easque variolas ita malignas doluit, ut nulla arte Juvenem a morte præservare potuerit. Expecto propediem hujus descriptam a claro hoc Physico historiam.

§. III. Magnificus Vir, *Tergestinus* quondam Medicus, nunc Regii Archiducis *Leopoldi* Archiatrorum alter, *Carolus Krapf*, ostendens mihi pulcra sua Morborum Diaria, simul monstrabat mihi Filiaæ suæ, binorumque Filiorum, Variolarum Diarium, cujus en compendium!

Anno 1764. Filia ejus, sexennis, cepit 5. Febr. febricitare, & die febr. 8. variolas habere. Crescebant hæ sensim; & ad diem 12. mensis, qui septimus morbi erat, pure bene turgabant, basi rubra pulcre ornata. Septimo eo morbi die a pustulis magis
puel-

puella doluit. In maximis pustulis apex depressior erat, cum puncto livido, nigrove, in sui medio. Die 8. morbi a maturis jam pustulis dolor intensior.

Egregius Pater hoc die, ut & morbi decimo, majores pustulas ita evacuavit, ut nil ultra puris viderentur habere; vidit nihilominus easdem brevi post pure æque plenas.

Decidua pustula, locus asper & elevatus erat, squammulam deinde dimittens: squammulæ successit rubra macula, quæ non nisi, insequente mense Majo, evanuit.

Cum eadem hac Filia, Filii ejus bini, *Xaverius*, ac *Leopoldus*, variolis laborarunt. *Xaverio* eruptio cum continuo tremore contigerat.

Die 28. Maji, mane, cepit febrecitare filia, & tandem die 1. Junii vespere variolas habere paucas quidem, at vero sensim plures ad usque quintum

tum cum eruptionis, cum mensis diem. Ordine sibi subsequente quoque hæ maturuerunt, & aruerunt, rubra latiore basi pulcre coloratæ. Prima vice tamen numero sextuplo plures affuerant. Junii 8. die in facie, quæ habebat numero circiter triginta pustulas, siccescere ceperunt. Et ut quondam, ita & nunc, deciduis crustis locus asper & elevatus squammam, ac rubram maculam habuit. Unica modo foveam fronti impressam reliquit.

Filius *Xaverius* ad 14. Junii febricitans. triduo post Variolas accepit, iisdemque copiosioribus, & graviore cum ægritudine, quam hyeme, hinc inde cohærentibus, laboravit. Circa 22. Junii, qui octavus morbi, Suppuratio inchoat, & ordine solito dein turgescencia, flavedo, exsiccatio, lapsus.

Leopoldus autem propeidem tempus alteras variolas passus est. Priores suas similes habuerat iis sororis; has vero alteras longe copiosiores. Plures similes historias, ac præsertim unam binorum cum sua Sorore fratrum, quos omnes utroque in morbo viderat curaveratque *Diemerbroeckius*, attuli, in gallica mea *Inoculationis Refutatione*.

§. IV. Confirmant hæc omnia quæ toties in variis de hac materie dissertationibus, & recens adhuc in Epistola ad Cl. *Tralles*, Inoculationis Patronis objecit: Scilicet 1^{mo} vanam eam esse securitatem, qua sopire eorum inquietudines satagant, quibus Infans aut nullas conciliaverit, aut perpauca variolas. 2^{do} Nihil calamitosius posse accidere parentibus, quam Naturali via servatam sibi prolem videre, Artificiali occisam. 3^{tio} Et post insitas variolas, & post spontaneas, homines

nes iisdem impeti secundo contagione naturalium; ut profecto hi, qui naturales variolas passi, se se dederint inoculandos, aliosve, qui rite naturalibus perfuncti essent, inoculaverint, cum Divina Providentia, ut ita dicam, luferint; potuisset enim, quod aliis, idem, aut sibi, aut illis, contingere. 4^{to} Quotquod infitionem subierint, hos æque parum securitatis habere, quam ii, quos adortæ sint naturales variolæ, ne, ut *Florentina Puella*, utque *Juvencula Constantinopolitana*, *Coconam Timoni*, & ut demum alii, quorum memini in Resp. ad Cl. *Tralles*, ne, inquam, conversantes cum variolosis, easdem denuo sibi contagio contrahant. 5^{to} etiam id, quod nonnulli asseruerint, qui frequentia experimentorum convicti, & tamen Inoculationi dediti sunt, esse nempe alteras variolas benigniores prioribus;

a veritate alienum esse: siquidem & *Florentina* puella, puerique *Tergestini*, multo copiosiores suas posteriores variolas, quam priores, habuerint; & *Juvenis Francofurtensis*, & *Juvenacula Constantinopolitana*, aliique complures, nos convicerint, de secundarum variolarum tam malignitate, quam letalitate.

Interim dum præsentis disceptationis naturam intueor, video adeo iniquam ejusdem sortem esse, ut quidquid adversus inoculandi praxim opponitur, vix admittatur, audiaturve; ipsaque tandem forsitan spectabilissimo exemplo ubique obtineat Principatum. Fortunatam eam cunctis Mortalibus apprecor; si felix faustaque ipsis contingat, gratulaturus; sin minus, eodem quo ipsi, moerore afficiendus. Nihilominus pergam, quo cepi, pede; ad convitia tranquillus,
ad

ad nova observata communicanda, placeantne, an displiceant, semper promptus. Et quamvis non is sum, qui hominibus propositi tenacioribus mutare sententiam me posse credam, meas egisse me partes arbitrabor, si quæ vera, quæ demonstrata habeo, candidus communicem; quo saltem ii, qui animæquiore inter utramque fluctuant partem, inanem plane haud esse intelligant, quam adversus Inoculationem incusserim, formidinem. Quod enim in *Difficultatibus meis super Inoculatione* dixi, id audacter hic repeto; non posse admitti illam, nisi posito hoc principio, quod in Plurimorum salutem de vita Pauciorum disponere pro lubitu liceat: quod quidem Dei, vitæ mortisque Arbitri, non modo permissu, sed etiam jussu, in justo bello, in facinorosis puniendis, &c. licuit mortalibus; neutiquam vero in

Inoculationis negotio, in quibus ejusmodi jussum, aut permissio divina non extat, probari hoc titulo possit. Profecto si semel ad ea omnia, quæ ad Reipublicæ qualemcumque majorem utilitatem conferre putantur, hoc principium absque Dei Jussu, aut permissu expresso, adhiberetur, quod inde horrenda non consequerentur! Pestiferos demum comburerent, ne virus in cæteros propagaretur: duobus enim tribusve, qui primi affecti essent, necatis, centum millia servarentur forte. Et ad quæ non ultra! sed potius manum de tabula.

Et ut tandem quod res est dicam; quantumcumque Praxis ista prævaleat, suprema etiam autoritate suffulta, ac condecorata, non efficiet unquam id, ut variolæ sive naturales, sive artificiales fuerint, eundem hominem non bis feriant: non efficiet,

ut ab insitivis haud ultra quis trucidetur: ut præfenti mortis discrimini se se non committant inoculandi: ut multi inde male non mulctentur: ut paucus non fit eorum numerus, qui eadem de causa, aut fanitatis, aut venustatis jacturam, acerbe non lugeant. Quæ enim observata olim, eadem & observabuntur posthac; eo-que frequentius, quo magis insitio percrebrescat. Veniet, veniet dies, cum nimiam in eandem propensionem, ingens animi moeror, integrarumque familiarum luctus a tergo sequatur inconsolabilis: dies, inquam, quo præfens quæstio de integro commoveat, agitetque Mortalium mentes, iteratumque, ast priore cum maturius, tum sedatius, poscat examen. Sed his Altiori Providentiæ relictis, quæ res humanas, pro infinita sua, & adoranda sapientia, sic moderatur, ut

nihil in ejus gloriam non cedat, mihi monuisse sufficiet, donec prostabunt exempla, quæ nedum suspectam hanc Praxin reddant, sed & hos qui eam exercent, Homicidii; qui eandem in se admittunt, Suicidii; reos agant.

* *
*

*
* *

* *
*

Finis hic erat hujus Tomi, & sub prælo jam ille sudabat, cum Vir illustris, BALTHASAR TRALLES, ad me mitteret suam Responsionem ad Decem meas de Inoculatione Quæstiones. Æquum foret ut, qui Replicam dedidissem, jam Duplicam darem; sed votum obstat Cl. viri pag. 303. serio deprecantis huic controversiæ ultra immisceri. Ipsi igitur obtemperabo. Cum tamen publici intersit ea nosse, quæ præclaro hoc opere habentur, convenientissime ista huic capiti annexi poterunt.

Titulus operis est: *Vexatissimum nostra ætate de Insitione Variolarum, vel admittenda, vel repudianda, Argumentum, &c.* Est divisum duas in partes, quarum prior, eaque longe maxima, ad præsentem Quæstionem; altera ad amicam nos inter Litem pertinet. Paginas 304. in majori Octavo habet. Quia lis inter nos peculiaris ad Inoculationis negotium non spectat, unice in examinanda priora parte versabor, alteram in proximam opportunitatem reservaturus.

Honoratissimus Autor meis decem quæstionibus tres alias præmittit, quas, ut ait, a me, adeoque tredecim, expectasset. Prima hæc est: *An certo certius quivis homo variolis serius, ocysus, afficiatur?* Altera: *An Inoculatio illis affricet variolas, qui sine ea ipsas haud passi fuissent?* Tertia: *An cum pure variolarum insititiô, & cum ejus vehiculo, immitti in*

corpus queat fomes morbosus alius, contagiosus?

Primam hanc quæstionem non proposui, utpote ad quam in prioribus operibus fuse respondissem; & quæ nova adderem, in præsentiarum non haberem. Secundam ex eruditissimo *Condaminio* abunde probare potuissem, sed cum plures Inoculationis Defensores hic cum illo non sentiant, eam non proposui; sat alioquin materiæ ad causam meam tuendam natus. Tertia problematica est, probabilior utique quam demonstrabilior, adeoque litem minus utiliter extendens. Hinc claro Autori tres suas prodromas quæstiones relinquens, non nisi erga illius ad meas decem responsa versabor.

Quæstiones porro meas omnes sic expendit vir doctissimus, ut clara primum in luce collocet omnem Inoculato-

latorum doctrinam: dein meam ipsis sententiam opponit, sententiamque illorum, quos mecum sentire deprehendit. Id autem sic facit, ut, utrum illis, vel mihi, faveat, dubites; sæpe perspicue cernas; ac potissimum quidem illis. Haud sic tamen, ut quamnam a parte ipse stare malit, evidenter capias: donec demum absolutis Quæstionibus mentem suam, a pag. 208. ad 230. dilucide exponat, eamque adeo quidem in re inoculatoria retardatam, atque suspensam, ut, quam apud animum statuisset dilectæ filiæ insitionem, procrastinaturus sit; quemadmodum etiam alii, qui cara sua pignora *Trallesio* inoculanda commisissent, dilaturi hoc negotium essent. Forte ad hujus propositi prorogationem & illum, & hos, magis determinavit Epistola Clarissimi *Ludwigii*, Decani Fac. Med. Lips. ad Cl. *Tralles*, in qua

hæc verba: „ Hoc anno habui qua-
„ tuor inoculatos, & duodecim ægros
„ naturalibus variolis affectos. Ex
„ prioribus unum amisi; Ex poste-
„ rioribus nullum, licet inter eos ef-
„ sent, quos, ob humorum malam
„ constitutionem, ab operatione ar-
„ cendos statueram.

Quandoquidem ergo se ab Inoculi-
stis remotiorem, Antinoculistis pro-
ximiorum declaravit, haud erit opus
in ea, quæ in singularum quæstionum
responsione, hinc inde vero minus
consentanea videri forsitan possent,
animadvertere. Sufficere enim arbi-
tror, si ambiguus alicubi, si a mea in-
tentione alienus, eum demum ad fi-
nem operis omnem sustulisse, aut mo-
derasse difficultatem. Breve itaque
erit meum omne hujus tractatus exa-
men, versaturum unice circa ea, quæ
dubia in illo manent.

Pri-

Primum proinde advertere cogor virum clarissimum mentem meam assequutum non esse, dum Inoculistarum argumenta de præparandis ad Infectionem corporibus adeo longus, adeo fortis, adversum me urget. Potuerat in Gallica mea *Inoculationis Refutatione* Apologiam dudum vidisse meam: quam si vidisset, non alia profecto mente, quam ipse sit, me esse intellexisset. Præparationis necessitatem atque præstantiam ultro agnovi semper: tantummodo insufficientem eandem sæpe ab ipsis Inoculatoribus deprehensam esse, multis probavi experimentis.

Secundo, nec bene intellexit quid voluerim in sexta mea quæstione, quam me sic proponente: *Nulline ab Infectione moriantur?* Vir doctissimus in hanc mutandam esse censuit: *Faucioresne ab Inoculatione, quam a naturalis morbi incursum mori-*

moriantur? Profecto quæstionem, ut hic ille, sic ego proponere nec debui, nec potui; gnarus apprime quot pueri adultique a Variolis, sine Medico, ægrotent; quot eorum Anicularum concilio perdantur; quot homines continuo pereant, tardius advocato Medico; quot etiam cum Medico, cui morem gerere detrectent; quot denique innumeri, qui Medicis destituti, quam usi, feliciores fuissent. Et, si quondam mortuorum & ab insitivis, & a naturalibus, numerum, pene coæquaverim, id non, nisi præstantissimæ tempestivæque curandi Methodi consideratione feci. Ut proinde quæstio, quo putabat *Trallesius* modo, a me proponi non potuerit, cui mens unice erat id meam thesin probando evincere, quod insitio adeo insons, & inculpata non esset, quam quidem ad eandem commendandam plurimi Inoculi-

culistarum ubique jaētitent. Non dif-
fiteor tamen quæstionem evidentius
meam mentem expressuram fuisse hoc
modo: *Raræne ab Infectione Mortes?*

Tertio. Sicco pede transire ne-
queo, quæ in hac eadem Sexta Quæ-
stione examinanda, Vir egregius, a
pag. 141. ad 151. adeo sapienter ad-
versus *Condaminii* problema arithmeti-
cum urget. Obtutu scilicet politico
istud problema valere, dum Principi
parum interfit quinam pereant, modo
pereant pauciores. Principem itaque
posse, si ab inoculatione minores nu-
mero pereant, problema istud admit-
tere; haud vero privatum quemcum-
que civem, cui filius haud minus, quam
Regi suus, carus sit, & apud quem
multum interfit filiusne suus moriatur,
an alienus. Quod responsum vellem
ad 7. quæstionem quoque dedisset. Si
enim apud quemque privatum homi-
nem

nem multum differat propriusne filius sit, qui moriatur, an aliſus ſibi ignoti; etiam plurimum intereſt eidem proleſne ſua, an aliena, in extremam Extenſionem ab Inoculatione incidat, in perpetuam Claudicationem, in annosa moleſtaque Ulcera, in incurabiles fere Hæmorrhagias, in Abſceſſus horrendos, in Scrophuloſam Diatheſin, &c. eo quod hæc ad munia quæcumque obſeunda, ſæpe ad generationem, illos reddant ineptos.

Dum porro ſic loquitur clarus Autor de Principe, politicè hoc negotium conſiderante, reor eum in abſtracto a Chriſtianismo loqui velle. Novi enim id minime illius eſſe principium Chriſtiano Principi licitum eſſe populorum ſuorum incremento ſic ſtudere, ut ejus cauſa quosdam, ceterum forte ætatem victuros, aut immolaret, aut ſaltem perire ſineret.

Sed

Sed perirent forte, ais, a naturalibus variolis, multoque cum iis plures. Bene ais, *forte*: quod si contingeret, non humana opera, sed inevitabili forte, seu potius DEI jussu, perirent.

Evidentius fit eam mecum Cl. *Tralles* mentem fuisse, dum pag. 138. Patrem *Haganum*, qui inoculatione filium *Londini* amiserat, comparans cum Patriarcha *Abrahamo*, qui in *Moriam* proficisci, & *Isaacum* immolare a DEO jussus, domum cum filio rediisset, bene notat comparationis disparitatem: siquidem *hicce* Pater Credentium filium, DEI mandato, immolaturus fuisset; “ at miser ille Pater, inquit, „ nulla vocatione divina accepta, non „ sine summo tristitiæ affectu *Hagam*, „ orbus filio suo, iterum repetiit “. Si enim id ita intelligit, ut unicum DEI mandatum turbatam conscientiam pacet si affuerit, si defuerit, neu-

ti-

tiquam; statuit quoque Principibus nullum jus in vitam Subditorum competere, quam quod ipsi divinæ Leges concedant.

Quum ergo hoc sit, quem veneror, Autoris principium, ad plura id adplicare potuisset, omnemque inoculationem ex eodem condemnare.

Quarto. Ad quæstionem meam Octavam quæ sic habet: *Nunquid non propagent inoculatæ contagium?* respondet eximius vir a pag. 161. ad 164. exp. *Tyffoto*, qui ob insitarum cum paucitatem, cum benignitatem, quodvis fere negaverat contagium: quod cum minime verum esse, & e contrario insitivas sæpe & copiosas & malignas esse, credere cogeretur, censuit Gordios indenodos Inoculationi necti; quorum solutionem *Tyffoto* relinquere, quam ipse tentare, mavult. Argumentum autem Cl^{mi} *Tralles* contra lati-

tu-

tudinem propagationis variolosi contagii, ab illustri *Werlhofio* statutam, in eo quodammodo, ut mihi videtur, deficit, quod ex casibus a se visis, in quibus tot homines contagium contrahere potuisse, nec contraxisse tamen; postmodum vero ex causis, vix explicabilibus, idem contraxisse advertit; ex iis, inquam, casibus, æque confici potest, ut illo priore tempore hi homines necdum essent suscipiendo contagio apti, quam ut tale ferax contagium non detur, quale posuerat *Werlhofius*.

Quantamcumque autem operam *Cl. Tralles*, veluti patiens & sedatus inter litigantes iudex, navat ad contagionis infamiam ab inoculatione abigendam, minime abegit tamen. Quotquot enim testimonia coacervat de non aucto ab insitivis contagio; quaecumque existimat eruditi *Schultzii* assertum,

quo hic contagium ab inoculatione minui potius, quam augeri statuit, eo quod *Londini*, ejusque in confiniis, anno 1719. proximo scilicet ante acceptam apud Anglos insitionem, a Variolis mortui sint 3229. homines; & anno 1753. post tantam inoculationum crebritatem, tantummodo 774. hæc omnia, si quid video, non modo id non probant, quod omnes hi clari viri inde probari credunt, sed potius causæ inoculatoriæ desperationem.

Etenim si inoculationi tribuere debeo hanc *Schultzii* observationem, quam utinam tanti non fecisset Ill. *Tralles*! cur nondum nota Anglis hac Praxi, *Londini* anno 1710. mortui sunt a variolis 3138. homines, & anno sequenti 915. duntaxat? Cur anno 1683. variolæ 2096. homines occiderunt, & anno proxime sequenti 156. tantummodo? Utique a causa longe alia, quam ab inoculatione. Pro-

Profecto si Vir expertissimus *Schultzius*, antequam hæc scripturus esset, consulisset Londinense Necrologium, in quo patet sub frequentissimis inoculationibus eo anno, qui proxime illum suum beatum annum sequitur, 2393. homines in variolis periisse; in illo vero, qui felicem illum annum proxime præcedit, 3538. utique contagii decrementum ab inoculandi frequentia non derivasset, nec in errorem utcumque duxisset illustrem *Trallesium*.

Fervor sane tuendæ partis arripuit egregium *Schultzium* pari modo, quo anno 1752. Reverendissimum *Maddox*, Episcopum *Vigorniae*. Hic enim quod forte observasset anno 1751. a variolis tantum 998. *Londini* periisse, anno vero 1750. recenferi 1229. mortuos, pro suggestu exclamavit mortuorum a variolis numerum, præ infitionum frequentia, una quintâ fere parte decrevisse:

visse: dum interim ipse ille annus, quo ita peroraverat Episcopus, mortuos a variolis haberet 3538. plures nimirum, quam unquam spatium 67. annorum, quos Londinense Necrologium, ab Inoculatoribus nobiscum communicatum, continet, observatum fuisset.

Igitur ipso *Schultzii*, *Maddoxii*, Aliorumque, inito calculo, nos eodem jure concludimus augeri inoculando contagium, quo illi id minui. Sed ultra pergendum est. Pace tantorum Virorum dixerim jure longe potiore nos contagii augmentum concludere, quam illos decrementum.

Necrologium meum Londinense cum anno 1755. terminatur. Si retrogressus sumam ab anno 1755. annos 22. inoculandi frequentia famosos, invenio a variolis mortuos esse 43975. si sumam, deinde annos 22. illos,

illos, qui immediate primum Anglicanæ infitionis præcedunt, mortuos inde habeo 36530. duntaxat.

Ergo tempore prodigiosissimarum numero inoculationum periere a variolis 7445. homines numerosiores, quam pari annorum numero, ante inductam infitionem; homines, inquam, plures quam $\frac{1}{8}$. Nec incuset forte quis majorem eo tempore mortalitatem, qua a cæteris quoque morbis longe plures morerentur, & a quorum malignitate variolæ fierent maligniores: etenim id Necrologium non affirmat: imo anno illo 1752. in quo a variolis periere 3538. non numerantur tot mortui tam a reliquis morbis, quam a variolis, quam anno illo felicissimo, de quo Reverendissimus *Mad-dox*.

Condonabunt proinde mihi *Angli* amici nostri, & optimus *Schultzius*, &

integerrimus *Tralles*, sic argumentantur: Tot mille & mille homines inoculationem Londini subierunt per illos 22. annos, qui, secundum communem sententiam, numerum horum, qui naturali contagio contrahere variolas potuerant, incredibiliter minuere debuerunt. Atqui numeros eorum, qui variolis perierunt, non decrevit, sed increvit. Ergo, vel contagium naturalium variolarum notabiliter augetur inoculando; vel, plurimos eorum, qui inoculationem jam passi sunt, variolæ secundæ aggrediuntur, & necant: vel, inoculatorum est multa strages: vel omnia simul.

Datis tandem ad decem meas Quæstiones responsis, Vir clarissimus omnia resumit, mentemque exponit sic suam, ut metuat ne æque suis Amicis Inoculistis, quam mihi, displiceat. Quid de hoc suo metu censeam, proferam

feram ingenuè, ubi quid ille de methodo inoculandi cogitet, paucis retulero. Primo concedit ea vere se habere sic, quemadmodum ego proposueram. Deinde ex enormi discrepantia tum variorum Infitionis Corryphæorum inter sese, tum singulorum a se ipsis, conficit id, ut longe plus periculi infitivæ variolæ involvant, quam vulgo aut asseritur, aut scribitur. Tertio recenset præcepta magnorum in arte inoculatoria virorum de non inoculandis infantibus infra quinquennium, nec adolescentibus intra 14. & 17. ætatis annum, raroque post annum 25. Affert multorum leges, juxta quas oportet eximi Athleticos, Plethoricos, Temperie calidos, biliosos; maxime vino si sint aromatibusque dediti. Juxta easdem vetari inoculationem hyeme & æstate. Esse quoque eximendos pueros nervo-

fos, valdeque irritabiles; cum maxime autem verminosos, quos jubent verme liberare prius: id quam difficulter sæpe efficiamus, versatissimus ille practicus ultro agnoscit. Itidem non Rachiticos; nullos tempore Morborum epidemicorum, ut febris inflammatoriæ, putridæ, &c. Nullos præterea Asthmaticos, nullos Phthysicos, nullos Hæcticos; non Febre lenta laborantes, non ubi Ulcera interna, ubi Obstructiones glandularum, seu Scrophuli, ubi Obstructiones viscerum post febres intermittentes, ubi Scorbutus, Scabies, Furunculi, Coryza, Dolor quicumque, Mensium suppressio, Menses irregulares, Chlorosis, Cachexia, Ictérica dispositio, Graviditas, Puerperium, Mobilitas nervosa, Lues venerea, sive in Parentibus præsens, sive ab iisdem transmissa in proles; non illos qui eadem de causa

ma-

magnam vim mercurii in corpore habent; non vini, ejusque spirituum amatores; non omnino tempore Epidemiæ variolosæ; quamvis ejusmodi epidemia quandoque 15. 20. annis perseveret.

Ex his omnibus demum Spectatissimus Autor concludit ipsa præcepta clarorum in ea Methodo virorum ad infitionem dimidiam, tertiam, quartam, dixerim, potius centesimam, Mortalium non admittere partem.

Liceat mihi, hisce observationibus hanc unam addere! Si ab Inoculationis Promotoribus omnibus plurimam Mortalium partem ab hac operatione arcere jubemur, aderunt perpetuo homines plurimi variolis contrahendis obnoxii, contagium perpetuantes, spemque nobis, quam multi adeo faciles dederant, abigentes, fore, ut Variolæ demum cessent affligere genus

humanum; fore etiam ut inoculati ab alluente contagio naturali male non habeant nec pereant. Quid si præterea inoculati contagium augeant? Absensque illud præsens sistant? An igitur tantopere mirabimur publicas populorum clamores supremum ad examen commovisse Magistratum? Et an dignum non foret Principibus opus, tentamen Cl. Lugd. Professoris *Rast* ad minuendum contagium examinare? Sed ad rem.

His ita candide recensitis Cl. *Tralles*, ut supra monui, utrinque sibi metuere cepit, & in hæc ad me verba tandem erumpit: “ Confido ea pro-
,, pter te in veritate invenienda meam
,, in Bivio stantis christianam inten-
,, tionem, & animi candorem, cal-
,, culo tuo dignaturum fore porro.
,, Forte autem mihi ea nunc contingit
,, infelicitas, ut tot inoculationis
,, Ami-

„ Amici, Viri eximii, quibus non
„ minus, quam tibi, existimationem
„ & venerationem debeo, & exsolvo,
„ Te me haud idoneum controversiæ
„ arbitrum selegisse affirment, cau-
„ sam suam fortioribus armis tuituri;
„ Tu vero in omnibus valorem tua-
„ rum assertionum me non affecutum
„ esse quæraris, &c.

Quid amantissimi Antagonistæ mei
Amici inoculatores ad hæc dicturi sint,
facile mecum augurari potest. Erunt
quippe inter illos, ut fit in rebus hu-
manis, qui animo præoccupati, vix
examinaturi ejus argumenta sint, eum-
que condemnaturi; quos, opinor,
non morabitur. Erunt vero complu-
res qui clari Viri vestigia prementes,
in eodem, cum illo, bivio se colloca-
bunt, ancipites plane utrum Inocula-
tionem ultra sequantur blandientem,
an vero horrificam fugiant. Hæc de
illis.

illis. Quid vero ego, id præscire certus potuit. Quid enim nisi summis efferre laudibus Virum debui, qui quo Verum intimius atque expeditius contueretur, ad tempus totam veluti relinquit, cui adhæserat, partem; ut quidquid ornaret vituperaretque eandem, liberius contemplaretur? Exemplo profecto haud minus imitando, quam admirando, & mihi, & omnibus, qui ex officio in Litigiosis versantur, fuit, quo discat quisque, quem non damnabile studium partium, non honores caduci, sed DEI honos, Veritas, ac Reipublicæ salus, unice tenent, quî in hisce se gerat oportet. Sicubi asperiusculum forte quidquam ipsi invito elapsum sit, eodem animo, quo ille mihi, ego ipsi condono. Quod vero hinc inde me, in mea Sparta ornanda, nonnihil aut minus recte intellexisse, aut

repo.

reposuisse, blande insinuet, est sane ob quod immensas ipsi debeam grates. Errare humanum est; nolle corrigi diabolicum. Qui id mihi ostenderit *Trallesius*, vel ob id unicum, si non ob alias causas bene multas, dignissimus profecto est, quem veneratione eximia, quem amore fraterno, quem amicitia colam perenni.

Nihil ea moror, quæ a pag. 232. ad 241. Vir perillustis habet de incertitudine multarum in Medicina rerum; cum in hoc argumento pertractando alterum & quartum hujus Operis caput impenderim. Suos habet ars limites nostra; quos ultra citraque tendere nefas. Neque propterea ars nulla habenda est, sed præclara potius & saluberrima; arctioribus tamen, quam vulgus Medentium credit, circumscripta cancellis. Non aliam eam Tyronibus trado. Porro

U

quod

quod in eadem sæpe acriter circa res graves disceptetur, id eo minus *Trallesio* miror, quo humanarum rerum conditionem attentius contemplor. Cur rarius in Arte nostra, quam in illa sacratione, *δεῖ καὶ αἰρέσεις ἐν ὑμῖν εἶναι, ἵνα οἱ δόκιμοι φανεροὶ γίνωνται ἐν ὑμῖν?* Aut ignavus est, aut Epicuri de grege porcus, aut suis commodis tantummodo, non Reipublicæ natus, qui Arti, quam profitetur, tuendæ devinctus, nihilo secius studio famæ, commodi, emolumenti, vitæque tranquillæ, Naturæ suffocat ac Veri vocem.



Prænobilis ac Clarissimi Viri *Eberti*, Consilarii actualis Wurtenbergenſis, Regiique provincialis & urbani Phyſici Francofurtenſis ad Viadrum, testimonium, quod me propediem expectare pag. 296. innueram, tandem poſt diuturnas in itinere moras accepi. Teſtatur Vir Cl, ſe hunc ipſum Juvenem, juris Studioſum, nomine *Voelger*, ſive *Vulger*, annos circiter 23. natum, febricitantem 18. Aprilis 1761. reperiffe, cum maculis rubris, cum dolore extremarum partium, ac præſertim Spinæ doſi, & Lumborum: vidiffe ſe die inſequentē prorumpentis variolas, quæ copioſæ, ſine rubro circulo, depreſſæque manſerint, tandemque confluxerint: haud citra ſpem aliquam tamen, ob ſymptomatum tolerabilitatem. Die 23. Menſis ſe illum, bene ratione morbi habentem, commiſſiſſe prudentis Chirurgi curæ, cum Ruſ, ad Virum nobilem vocatus eſſet; reducem vero poſtera die in urbem percepiſſe ſe, quod æger poſt bonam noctem, bonamque auroram, a ſubito Variolarum reſeſſu convulſus periiffeſet. Hæc omnia, & in longum, germanicæ: finit autem latine Vir Cl. ſic: „ Sic teſtor, & quod omnia ſic ſe habuerint, mea ſubſcriptione, & ap- preſſo ſigillo, iterum teſtor. Francofurti ad Viadrum 11. Aug. 1764.

Ad pag. 233. Teniæ humanæ portionem longam nunc tandem naſtus, injectionem præ tene-
ritu.

ritudine vasorum frustra tentavi. Id modo didici vas album per medium cujusque articulatae partis longitudinem, Axis instar, decurrere, ex quo utrinque innumeri rami ad angulos plerumque rectos oriuntur, abeuntes in glomeres, & penicillos, non pervenientes autem ad extremam latitudinis oram, sed lineae fere distantia ab ora utraque terminati. Infuso in medium vas lacte, laterales hi rami pulcra impletione turgebant; lac vero ex una portione vermis in aliam, seu, ut alii loquuntur, ex uno verme cucurbitino in alium, non transivit, eo quod vas dissiliret.

Margines hae, seu orae extremae insecti, quas dixi a vasis non perreptari, fere pellucunt, digitoque leniter frictae ac pressae, alba corpuscula ostendunt, quae hac pressione ac frictione ex una articulatione in aliam, in tertiam, in sextam, & ultra adscendunt; ut inde pateat ad singulam articulationem non haberi singulare insectum, verum ex tot innumeris articulatis portionibus unicum insectum conflari.

Confirmatur hoc eodem experimento quod Cap. V. pag. 233. in canina tenia me fecisse narravi; nam & in hac humana tenia tenuissimum specillum, seu filum argenteum, duxi per vas longitudinale medium, sine ulla laesione, per tot articulatas portiones, per quot volebam.

Tandem si consideremus singulas portiones ab uno totius teniæ extremo esse latiores, ordineque exacte decrescente pauxillatim fieri extenuatiores; sic quidem, ut in longitudine plurimum ulnarum posteriores sint fere dimidia latitudine prioribus angustiores; an probabile fit totcentena infecta, ordine nunquam læso, sic invicem jungi, ut a principio ad finem latitudo integræ teniæ æquabilissime decresceret? Tenia humana in eo differt a canina, quod in illa latitudo pedetentim decrescat, in hac plures æque latæ invicem connectantur portiones; deinde plures æque angustæ. Forſan tamen & in cane, & in homine, vermes a ſeſe in nonnullis differre, crebriore examine deprehendere poterimus.

Ad caput de Inoculatione. Vir Doctiſſimus, & maxime egregius Medicus *Du Monchy*, Inoculationis patronus, haud ita pridem inoculavit *Roterodami* duos filios Domini *Anderson*, quorum alter ſaniſſimus, alter minus ſanus. Interim hic, minus ſanus ſcilicet, a paucis variolis convaluit, ille ab iisdem confluentibus periit. Paulo ante, eadem in urbe, puella inoculata a convulſione mortua eſt. *Amſtelodami* Matrona, quæ, quod inoculata eſſet, Marito variolas patienti intrepide inſervierat, nunc iisdem veris & legitimis decumbit, fere curata.



